



BIBLIOTHECA  
UNIV. IAGELL.  
CRACOVENSIS

35804

I

Mag. St. Dr.

P

THEOLOGIA.


N. 730.



35804

I


1690.






XXIV. B. 34







# EXPEDITA

## Salutis via

*Collegij Cracoviensis Societatis IESU*  
Per *ad S. Petrum*


## EXERCITIA SPIRITUALIA à S. PATRE IGNATIO MONSTRATA

Ex meditationibus, sensû eorundem Exercitiorû  
declarantibus.

Usui cuiusvis statûs hominum.  
pro animo, per octo dies excolendo  
Ac. etiâ fidelibus, per Concionatores instituendis  
accommodata.

à P. Adriano Miaskowski  
Societatis IESU

Hæc est via, ambulate in ea, non  
declinetis neque ad dexteram ne-  
que ad sinistram Jsaïæ 30.



SANDOMIRIÆ

Typis Collegij Societatis IESU Anno 1718



In avitum Illustrissimæ MIERZE-  
WSCIORUM Domûs Insigne.

BIBLIOTH. UNIV.



Cū vacuū præcella Domus Tibi struxit acervū,  
Hunc implere Nepos Celse valebis, ait.  
Fecerunt promissa fidem, nec patria tecta,  
Totaque Regna valent claudere mentis opes  
Hinc licet assiduò censum depromat egestas,  
Continuòque suus grex alimenta ferat.  
Quæ dantur, cumulantur opes: fortuna recondi hæc  
Cum nequeat terris, est nisi digna polo.

35.804T

JLLUSTRISSIMO  
REVERENDISSIMO  
D. DOMINO FRANCISCO  
LESZCZYC  
MIERZEWSKI  
Scholastico Gnesnensi  
Archidiacono Sremensi  
&c.

D. Mecænati Munificentissimo.

*L*iber hic quòd expeditum ad  
Coelorum adyta monstret tra-  
mitem, Tuo Illustrissime Mecænas,  
in frontem reposito nomine satis e-  
docet. Legitur abundè ex Te uno,  
quidquid integro opere, rectè vi-  
vendi præceptis instructo compre-  
henditur, & quidem compendiosior

(2)

per



per exempla ad Coelos via, est Tua  
illimis vita. Nec primum hodie  
laudatam ejusmodi decurris Appi-  
am, grandes pridem fecisti passus,  
omnigenae probitatis normâ prædu-  
ce Illustrissimo STANISLAO LIPSKI  
Gnesnensi simul ac Chocensi Præ-  
posito, in Cleri Ideam, ab eodē jam  
tunc ex honesti regula, etatem tran-  
sigendi, vivam ex Te palæstram,  
cum addisceres, effecisti Canonicus  
& Chocensis Custos. Suspexit pro  
tunc non sine gestientis animi sen-  
su, jam Prælatus, canitie, & in  
Ecclesiam meritīs venerandus, jam  
totum Inclytum Canoniorum Col-  
legium, Avitū MIERZEWSCIO-  
RUM Acervum, etiam in juven-  
te flore, adultā non nisi rectē sa-  
ctorum impleri messe, & ipsā di-  
vari maturitate. Suspexit inquam  
morum



morum gravitatem memoratus vir  
sedatissimus, & suo senio mentis  
canos in Te simillimos gestiens ama-  
vit tenerius, coluit singularius. Mo-  
visti dehinc ad majora gressum.  
Illustrissimo Posnaniensi, Gnesnen-  
si adlectus Capitulo, proprio dun-  
taxat commodò sanctius vivere non  
contentus, nisi præires cunctis &  
salutis monstrares semitam in Ar-  
chicathedrali Basilica Ecclesiastes  
Zelosissimus. Intulisti sacrationes in  
Exedras, unà famam per Regni  
totius Dioeceses, vocalissimā, Gne-  
snensem à sacris Oratorem sanctis  
horam implere dictis, factis vitam,  
utrisque ultra censuram ad plau-  
sus & motum perorare. Nec gran-  
diores curæ tantum poterant, nec  
possunt hactenus, ut zeli restringant  
ardores, & sacrationem flammam  
sopiant

*scipiant exortam in incendia. O  
diem Ignatii plùs quàm festum! ò  
ultimam lucem Iuliam, non Tuâ  
minùs sacerrimâ facundiâ, quàm  
annuâ Divi Parentis nostri pompâ  
celebrem! velut in criminum si-  
mul fatum decretorium, simul in  
virtutum, & pridem Coelô donatæ  
Sanctitatis commendationem depu-  
tatus fuisses, ascendisti Macieiovia-  
ni Templi Rostra, tam oris disertis-  
simi eminens majestate, quàm di-  
gnitatis Judiciariæ: ea sudisti ora-  
cula, quæ Sanctum fecerant Lo-  
jclam, nisi invenissent. Utcunquè ille  
suarum Auditor laudum parcissi-  
mus, promisit tamen ab astris Caput,  
& ideo amavit encomia, quòd Tu  
Orator, Tu Panegyris nobilissima  
contigisses. Ibit ergò in fastos me-  
mores: vel superos eloquiò crevisse.  
Tuò*

Tuo vel igneum Societatis Patrē, ter-  
ris amplius inclaruisse, V-Presi-  
dentis Tribunalitii sermone Illustris-  
simo. At Lublinensis exedra, quæ  
non meminit dignius aliquando se  
locuiam, diu similem suadam ex-  
spectabit, nostri verò homines ultra  
pectus & manum Tuam, oris quo-  
que pretiosi beneficia computabunt.  
Allaboras Divis immortalibus; at,  
nequē mortalium portio, Tuæ vili-  
or facundiæ, dum Ivanoviensi in  
parochia, exemplo sanè rarissimo,  
ac seculis memorando, assidua vigi-  
lantissimi Pastoris sui voce, cōmissus  
curæ grex animatur, & viriles re-  
sumit animos, ut Cælos arietet, qui  
compunctus ac victus, toties pulchrā  
de se lauream tanto concessit Ora-  
tori. Adeo non solitarius salutis in-  
cedis viam! ita concione florentis-  
sima



*sima, & numerosis virtutum copijs  
stipatus, cum pompa graderis, ut  
inter lateris probra non reponas, etiã  
comite beneficiorum egestate ambi-  
ri. Hæc illa est, quam solers pietas  
conquirat undique, porrigit manum  
auream, Tuam scilicet, ne pauper  
jaceat, calamitatem in pretium, la-  
cernas in melioris fortunæ cultum dis-  
singt, ipsas deploratæ sortis lacry-  
mas transfundit in solatia. Sequun-  
tur præterea suum Apostolum nobiles  
animæ, à Calvinii erroribus in planis-  
simum Cælorum reductæ callem.  
Latalsciorum Twardowskiorum,  
Domus quantum de Coelo Te Duce  
merentur? postquam præclara quæ-  
que de Patria meruissent. Vege-  
tantur hætenus à Te; resumpto spi-  
ritu, & quem hauserunt orthodoxæ  
fidei amorem, hæredibus inspirant.*  
*id*

id est ab Gentilitio Mierzewscio-  
rum insigni, supernis frugibus, sem-  
per divite, acceptam sementem ja-  
ciunt in uberius germen prorupturā.  
Quodsi plures viæ & vitæ gloriosis-  
simè exactæ hæcenus progressus Tuos  
memorem, constat semper, quod à  
recto neutiquam deflexeris, vincen-  
do ardua, merendo summa. Imple-  
verat horror Gnesnensem Metropo-  
lim, quæ repentinis, grassante lue,  
excitus mortibus, quæ hoste Eccle-  
sias, redivitibus, auro, & gemmis a-  
ras spoliante: ergo dilabentibus uni-  
versis, Tu unus Achilles contra, cu-  
jus infracto robori superatæ mortes  
palmam, elusi ferocientis militiæ as-  
sultus donant lauream. Erepti sa-  
tis Primatialis Templi Accolæ, su-  
um Te servatorem prædicant, si-  
mulque grassante cū pestibus fame  
satis

satis superque habiti, suum plus  
quàm Patrem. Integrum Archica-  
thedrale Capitulum, stupendæ dex-  
teritati debet plurimum, & quòd  
inter afflictissima tot injuriis tem-  
pora, subditos vidit incolumes, &  
quòd vastantem cuncta, inter belli  
licentiam, extremam bonorum ja-  
cturam haud vidit. Debet Sanctis-  
simus quoque Gnesnensis Archi-  
Præsul Adalbertus, cujus Sacerr-  
ima Lypsana, tutiori loco concredi-  
ta, quòd ipsa securitate non perie-  
rint, Tuus Prælate Dignissime in-  
geniosus labor fecit. Hæc videlicet  
Tua Curarum fuit maxima, post  
servatos & mortibus ereptos homi-  
nes, servare Cælites. Sic, ubi in rem  
Archidioceseos egisti grandia, simul  
vicinæ Dioecesis. Supremum Caput,  
non ita pridem vitâ duntaxat, sed

non



non reſeſactorum ſunctum memo-  
riâ Illuſtriſſimum Bartholomæum  
Tarlo Poſnaniensem Antiſtitem,  
Sanctâ Tui ipſius torſiſti invidia.  
Tentavit ille vir Sanctus omnia, ut  
Epiſcopales redditus ſeliciffimis con-  
crederet manibus, è quibus liberali-  
ùs perciperet, quàm ſperaret. Mi-  
ratus brevè & Colonorum augmen-  
tum & proventum; credidit, Gen-  
tilitium Domus Tuæ acervum, in  
Templorum fortunam, in egenti-  
um ſubſidia vacuari. Hinc, quæ  
illa in meritiffimo Antiſtite ad Te  
æſtimatio? amor quantus? priùs nec  
ſemel Tuum nomen impreſſit pe-  
ctori, quàm illius vultum expri-  
meres Poſnaniensis Cancellarius, ſi-  
mulque in tribuendo ejusmodi offi-  
cio præluſit, utinam ſenſu augure!  
Metropolitânas manibus his concre-  
di

di ceras, quæ posthac Regni to-  
tius aquilas sint gestaturæ. Neque  
verò Sacrorum tantum Reges, at  
Sarmatici etiam Throni Coronata  
Gloria Augustus 2dus, eum candore  
notabilem animum in Te suscepit,  
qui militaris licentiæ adnotator,  
& ultra Romanum illum longè  
melior, ut pote sine supercilio,  
Cato, afflictos, Posnaniensem  
Califfiensemque Palatinatus obires,  
civium damna horrida colligeres  
in numerum fortune, lacrymas in  
sinum Principis referres. Ivisi col-  
legisti, retulisti. Cecidit, Te publi-  
ci luctus quasi Referendario, Re-  
ge Iudice, insolens causa, nomen,  
que Tuum extulit cadendo, ut Pa-  
latine felicitatis Assertor dici me-  
rueris: audires etiam titulos istos, si  
in accepto referre, saltem glo-  
riam

muneris velles, cui institutum est  
non ad auram vivere popularem,  
studere terrarum sorti citra laure-  
am, quia orbem Lechicum in Tui  
cultum trabunt, & amorem, prope  
est tamen ut minera dixerim, si  
ad summa in facie Regni ad pri-  
ma Areopagi Poloni subsellia con-  
ferantur. Toties Te excipiunt  
quà reorum, quà actorum plau-  
sus, quoties Tribunalis Regni V-  
Præsicens, Cælorum dono, meri-  
torum adminiculo constitueris.  
Statuum acclamatio una omnium,  
supremam Lechiæ Themidem tunc  
non auro venalem, cum Illustris-  
simus FRANCISCUS MIERZE-  
WSKI, proximè supremo admove-  
tur Curiae gubernio, Judex ex toto  
Aureus. Pulsant Coelos etiam nocen-  
tium vota, cum quibus partiris  
men-

mensas, & vinculatos liberali de-  
vincis manu, ut suæ dejectæ sortes  
si triumphare non possunt, cadant  
mitius, & per exquisitam Dignis-  
simi Archi-Judicis pietatem, à cru-  
deliori, omnibus lanienis, inedia  
eximantur. Tantis pro DEO, Eccle-  
sia, Regno, Patria, benemeritis vel  
Te Uno MIERZEWSCIORUM  
Domus locuples, in Colligatas quoq;  
prosapias PIGŁOWSCIORUM  
KARSCIORUM, GNINSCIO-  
RUM, BOIANOWSCIORUM  
&c. dispensat jubar, & diu tritas  
à Majoribus Purpuras, cum publico  
plurium omine, Dignissimis lacer-  
tis Tuis promittit innovandas.  
Novis interim auctus honoribus Scho-  
lasticum Gnesnensem, Sremen-  
sem Archidiaconum ita geras, ut  
ad Tui Sanctos ponè ac politos,  
mo-



*mores Clerum instruas, & plures  
ad Infulas, & Sacratiores trabeas  
debebit tibi Patria Candidatos. Mi-  
hi unicum, illudque Religiosum Vo-  
tum superest ut ea, quam, inoffenso  
pede decurris, virtutum semita, post  
incolumem diutissimè vitam, sacris  
Coronatus vittis Beatorū, terminum  
comprehendas. Id ex corde voveo.*

**JLLUSTRISSIMÆ REVEREN-  
DISSIMÆ Dominationis,**

**Devotissimus Servus.  
ADRIANUS Miaskowski S. I.**

REINHOLDUS GERT.  
Visitator & V. Provincialis Soc.  
JESU per Poloniam.

Cum opus, quod inscribitur: Expedita salutis via &c. á Patre ADRIANO Miaskowski Societatis JESU Theologo, aliquot ejusdem Societatis Theologi recognoverint, & in lucem edi posse probaverint, potestate mihi factâ ab A. R. P. Nostro Michæele Angelo Tamburino Societatis Nostræ Præposito Generali, facultatem concedo, ut typis mandetur, si iis, ad quos pertinet, ita videbitur: Cujus rei gratiâ, has literas, manu meâ firmatas, sigilloque munitas dedi Sandomiriæ 1717. 20 Junii.

Reinholdus Gert.

APPROBATIO  
ILLUSTRISSIMI & REVERENDISSIMI LOCI ORDINARIJ  
Imprimatur in utroque idiomate

Joan. Casimirus Episcopus Premisliensis  
Cancellarius Regni

Jaroslavia 15. Martij

1718.

# Intentio Authoris



## Finis operis.



*Xpeditam Salu-  
tis Viam per sua  
Exercitia Spiri-  
tualia, Christi fi-  
delibus, qui ipsis  
uti voluerint, S.  
Ignatium Lojolā  
Societatis JESU,  
Fundatorem mō-  
strasse; & ex sum-  
morum Pontifi-*

*cum Oraculis, & ab experientia plurimorum, maxi-  
misque hinc perceptis fructibus spiritualibus, satis  
superque constat.*

*Paulus III. Supremus Christi in terris Vicarius,  
in Bulla approbationis prædictorū exercitiorum, quæ  
incipit: Pastoralis officij, quid de his exercitijs sen-  
serit, & quem sensum Christi fidelium esse volue-  
rit, ex verbis ejusdem facile intelligitur. Dicit  
ille: Nos igitur qui documenta hujusmodi, &  
exercitia examinari fecimus, & quæ testimonio,  
ac relatione nobis desuper facta; pietate & San-  
ctitate, plena & ad edificationem & spiritualem  
profectum*

profectum fidelium valde utilia esse & fore cōpe-  
rimus, debitū etiā respectū habentes, ad fructus  
uberes, quos Ignatius, & ab ipso instituta Socie-  
tas producere non cessant, & ad maximum  
adjumentum, quod ad id prædicta Exercitia  
attulerunt, exercitia prædicta ac omnia, & sin-  
gula in eis contenta approbamus, collaudamus,  
ac præsentis scripti patrocinio communimus,  
hortantes plurimum in Domino, omnes &  
singulos utriusque sexus Christi fideles, ubilibet  
constitutos, ut tam pijs documentis, & exercitijs  
uti, & illis instrui devotè velint. Alexander verò VII. Summus pariter Pontifex  
in bulla: Cum sicut nobis, non solum commen-  
dat eadem ipsa Exercitia, sed etiam concessâ  
plenariâ indulgentiâ ad ea per 8. dies peragen-  
da excitat & invitat in hæc verba: Nos qui  
probè scimus, quantopere conducant Exercitia  
spiritualia, à S. Ignatio Societatis JESU Fun-  
datore instituta, dirigendis in viam Domini,  
& confirmandis in illa, Christi fidelium men-  
tibus, devotionem eorum, qui operi adzō pio  
& saluari vacaverint, celestium Ecclesiæ the-  
saurorum elargitione, magis incitare volentes:  
omnibus, & singulis Christi fidelibus, qui in Do-  
minibus memorata Societatis, exercitia prædicta,  
juxta laudabilem ejusdem Societatis consuetu-  
dinem, per octidui spatium, quandocunque pere-  
gerint, & interea temporis, verè penitentes &  
confessi, sacrosanctum Eucharistia Sacramentum  
sumpserint, quoties id egerint, plenariam om-  
nium



nium peccatorum suorum indulgentiam, & remissionem, misericorsiter in Domino concedimus.

Quosnam verò, & quantos spirituales fructus, Christi fidelium animabus usurpata afferre soleant? spectamus in conversione tot peccatorum, qui per hac Exercitia ritè peracta, in viros prorsus alios mutati, verè penitentes, sanctam deinceps egerunt vitam. Spectamus item, in sublimi, & magna Sanctitate, tot virorum Sanctorum, ad quam hoc usi medio pervenerunt. Quales sunt S. Carolus Borromæus, S. Franciscus Salesius, S. Terefia de IESU; S. Maria Magdalena de Pazzis. Omnes etiam e Societate Sancti, & viri virtutum laude celebres, hac & non aliâ viâ, ad magnæ Sanctitatis culmen conscenderunt. Per hac in Anglia, Iaponia, & alibi pro Christi fide Martires disposuerunt se, ad tormenta, pro Christo, fortiter perferenda.

Per hanc saluam viam, ut fideles ad DEUM dirigantur, non solùm S. Ignatii cura singularis, & sollicitudo fuit: sed etiam filiorum ejus, & univèrsæ Societatis, ab ipso instituta, hic ipse labor, hoc studium est, & esse debet. Illud a Sancto Fundatore, habemus singulariter commendatum, Constit. par. 4. Cap. 8 § 1. ubi dicitur: Ad exercitia spiritualia alijs tradenda, postquam quisque ea in se expertus fuerit, assuescant, & dent operam omnes, ut in hoc armorum spiritualium genere, dexteritatem habere

habere possint. *Iisdem tradendis, ut etiam ego indignus, Sanctissimi hujus Patris filius asvescerem; & officij mei ratio, quod ex superiorum meorum voluntate obivi, & occasiones aliquot, tradendorum hujusmodi exercitiorum, diversi status personis, aliquam fecerunt opportunitatē : quæ quia non solum ad spiritua-lem fuisse profectum eorum, qui ipsis exculti fuere, visa sunt, sed sperantur insuper, etiam alios adjutura, prout plurimum, ea luci publicæ, Superioribus annuentibus danda esse censui.*

*Quia verò Directorium Exercitorum monet Cap. 1. num. 6. Opinionem hanc, eripiendā esse hominibus, quā putant, solis religiosi, aut ijs, qui religiosi fieri volunt, convenire exercitia: Quæ opinio falsa omnino est: Cum enim omnes salutis suæ, curam habere debeant; omnesque non solum religiosi, sed etiam saculares, egeant gratiâ DEI, propter pericula, in quibus assiduò vivunt, debentque & ipsi a dju-menta querere eā, quibus ad hanc gratiam, hau-riendam, quam maxime disponuntur. Tale adjumentum ut habeant, cujusvis status homi-nes, utque non solum religiosi, sed etiam qui-cunque alij, finem suæ creationis agnoscant, impedimenta, & pericula excidendi ab hoc fine, cognita habeant; adjumenta etiam, & media ad eundem finem consequendum, conducentia, bene nōrint; viamque salutis, & ipsi intelli-gant, & alios quos possunt, aut tenentur, in veritate doceant; meditationes quæ hoc oper,*  
*pro-*

proponuntur, omni hominum statui accommodatas  
esse volui.

Et imprimis, in prima operis, parte Meditationes pro cœtiduo Excitiorum tales & eo modo proponuntur, ut ab omnibus etiam à non religiosis, nec ad hunc finem aspirantibus, fructuose, & cum spirituali ipsorum profectu, & solatio, peragi possint.

In secunda parte, adduntur Meditationes quæ inter octiduanas primæ partis inferi, & substitui, possunt: expunctis quibusdam earum quæ in prima parte habentur, pro exigentia & circumstantia Personæ, quæ exercitijs huiusmodi, vacare volet. Et sic quia aliqui egerere, vel oprare possunt: ut in via purgativa, diutius excolantur, propter concipiendum, maiorem peccati mortalis horrorem: proponuntur in hunc finem, in parte 2da, Meditationes novem, de peccatis: quæ, vel aliqua ipsorum, assumi poterunt. Addantur deinde, de Purgatorio, & de Beatissima, quæ pro devotione cuiusque, utiliter ab omnibus fieri poterunt. Quia verò, ulterius possunt non nulli, sub tempus exercitiorum, de eligendò, determinato vitæ statu, deliberare ipsaque electionem; perspicere velle, proponuntur tres Meditationes, in ordine, ad faciendam electionem, quarum prima præliminaris est, respondetque præludio, ad electionem faciendam, in Exercitijs, S. Patris Ignatii proposito, & introductioni, ad eandem rerum electionem. Per 2dam, & tertiam Meditationem, proponuntur

A3

prior



prior, & posterior Electionis modus: & prae-  
cipua quavis, ad electionem spectantia. Ex  
his tribus Meditationibus, potest proponi qui-  
buscunque de eligendo statu deliberaturis, imò  
etiam, in certo vitae statu constitutis, si illi, circa  
aliarum rerum, etiam mirabilem electionem,  
deliberare voluerint. Et sic, possunt hac Me-  
ditatione exerceri, qui aliquod beneficium Ec-  
clesiasticum, sunt accepturi, vel dimissuri: qui  
deliberant de condendis testamentis, de pijs ali-  
quibus operibus, eligendis, & faciendis: circa vi-  
tam, sanctius & perfectius instituendam: sa-  
culares etiam, in saeculo mansuri, possunt exerceri,  
ut adversus pericula, in quibus versantur, sint  
magis muniti, & preparati. Meditationes,  
modum priorem, & posteriorem electionis pro-  
ponentes, non omnibus danda sunt, ex praescripto  
Directorij: sed ut cuipiam dentur, ad duo hac  
adverti debet: nimirum ut is, cui darentur, per-  
mores suos, & indolem, sit capax perfectionis,  
per electionem assequenda: cujus non videtur  
esse capax, qui adverteretur, esse naturâ levis,  
& inconstans. Deinde, ut quis electionem  
facere velit, modosque ipsos, faciendae eiusdem  
desideret, & postulet: non petenti enim nulla-  
tenus dari, multominus ingeri, & obtrudi de-  
bent non cupienti. Tandem in 2da par-  
te, proponuntur Meditationes, diversi hominum  
statibus, propriae, & accomodate, Quales  
sunt, de reformanda vita hominis, in statu sa-  
crali, vel etiam matrimoniali constituti. Me-  
ditatio

ditatio de fine, medijs ad eundem finem, & Obligatione hominis religiosi. Meditatio de Vocatione, ad statum Sacerdotale, & Meditatio, de Vocatione ad Beneficium Ecclesiasticum maxime illud, quod curam animarum, a nemine habet. Quae Meditationes preparatae sunt, conformiter ad ea, quae S. Pater Ignacius proponit, puncto 3. introductionis, ad eligendum rerum notitiam: ac etiam sub Titulo, de reformatione, circa vitam statum, cuius facienda.

Quando vero, in octiduo Exercitiorum, aliqua Meditationes 2da partis assumentur, poterunt, tunc expungi, & omitti Meditationes, imò de Creatione & modo Creationis. 2do de Incarnatione Verbi Divini. 3. de fine hominis Christiani, & medijs ad eundem finem. 4. de conformitate cum voluntate Divina. Sunt tamen aliae Meditationes, in octiduo Exercitiorum praescriptae, quae R. P. Ignacius Diertius Societatis nostrae, in sua explanatione, Exercitiorum S. Patris Ignatii, capitales appellat, & quasi animam, exercitiorum, quas nullatenus, praetermittere fas est. Tales sunt: Meditatio, quae à S. Patre, appellatur Fundamentum, de fine hominis, & medijs ad hunc finem. Meditatio de Regno Christi. De duobus vexillis. De tribus hominum classibus. De tribus humilitatis gradibus. quibus etiam adjungendas censet, Meditationem de peccatis, & Meditationem, de amore DEI excitando. Quod si quis, per 10. dies, exercitia S. Ignatii, agere voluerit, ut

cuique liberum, ac etiam laudabile est; non nullis, vel etiam nullis Meditationibus, primæ partis exclusis, poterunt pro placito assumi, 6. Meditationes ex illis, quæ in 2da parte habentur.

In Meditationibus ferè omnibus utriusque partis, hæc observatur praxis. Unicuique meditationi, vel etiã singulis earum punctis, præfiguntur aliqui, sacre scripturæ textus; aut quæpiam, SS. Patrum sententiæ, ex quibus deinde eruntur doctrinæ, quas S. P. Ignatius, in suis exercitijs proponit, vel quæ conformiter ad mentem ipsius, proponi existimantur, ac etiam reflexiones, materiæ accomodate. Quod factum est imò ex eo: Ut pateat, Exercitia S. Patris, quæ, & ipse S. Pater, & summus Pontifex Paulus III. appellant, documenta ex sacris scripturis, & viæ spiritualis experimentis, elicitæ, ut inquam pateat, ex quibus, probabiliter, scripturis sacris, & Patrum sententiis singulæ eorum, sunt eruta. 2do quia multum hac ratione, consulitur memoriæ facientis Exercitia, dum ad sacre scripturæ textum, revocantur, & applicantur doctrinæ, quæ, in una quaque Meditatione, & singulis ejus punctis, opportuna proponuntur.

3tio Quia, dum ex sacris Scripturis, & Patrum sententijs, deducuntur aliquæ veritates, ad vitam rectè instituendam serviente, Intellectus convincitur facilius, ad agnoscendum verum. Clare autè cognita veritate, citius permovetur



vetur voluntas; ad amplectendum bonum, & fugiendum malum.

4to Quia principia vitæ spiritualis, ex sacrae scripturae doctrina eruta, rudioribus etiam fidelibus, in concionibus facilius, & commodius proponi, & instillari, cum ipsorum fructu possunt. Etiam si enim hi, ad exercitia spiritalia, facienda, invitari, & admitti, sine delectu non debeant, cum plerique, nec capaces etiam sint, ut ijs excolantur; tamen cum nec ipsi debeant destitui, vitæ Christianæ principis, & ad finem suum consequendum adjumentis, multa etiam illis, ex his, quæ in Exercitijs dictis continentur, per partes, in Concionibus instillari, & proponi debent, quod vix commodius præstari potest: quàm præstetur, dum sacra Scriptura ipsis explicantur; & ex explicatis, eruuntur doctrina, & veritates, ad vitam Christianè agendam, conducentes.

Pleraque Meditationes, afferuntur prolixiores, ex his rationibus. Imo; Quia licet S. Patris Ignatii, exercitia, & documenta, sunt brevissime proposita; tamen ut loquitur Directorium Exercitiorum, Cap. 5. num. 7 multa in Exercitijs ipsdem, sunt brevissime dicta, quæ magnum pondus habent; & ignorata ac præterita, damnum afferunt. Sunt nuges, quæ frangi debent, ut nucleus habeatur; sunt granum sinapi, quod non nisi contritum, vim suam & efficaciam exerit. Quare visum est hæc proponere enucleatius, & singulas pene voces, sine scripturarum

sive Exercitiorum, quibus hæc à S. Patre Ignatio proponuntur expendere. 2do Quia etiam si his, qui in rebus spiritualibus, aliquantum versati, & exercitati sunt, qui item, cum magno spiritus fervore, & singulari animi contentione, ad faciendâ S. Ignatii exercitia accedunt, juxta annotationem 2dam ejusdem, Mediationis proponi debeant, percursis obiter punctis, & adjunctâ brevi declaratiunculâ; ut is, qui meditaturus est, accepto veritatis historica primùm fundamento, discurrat postea, & ratiocinetur per se ipsum, idque propter gustum delectationis, & fructum uberiores percipiendum, tamen his, qui in rebus spiritualibus, exercitati non sunt, non cum magno etiam fervore accedunt; sed hic primùm in ipsis, per exercitia excitandus est, nec præterea spes esse possit, ut illi, per se ipso, fructuose discurrere, valeant: sed timere potius debeat, ne propter materia ariditatem, mente vagentur, per disparia objecta. His inquam, conveniens est, proponi singula Exercitia clare, plenè, & sufficienter: Ut exijs, modum & normam discant, quomodo deinceps meditaturi, Divina & spiritualia, quæ ipsi, pro suo arbitratu, assumant; possint circa illa, fructuose discurrere. Quare, cum Mediationes præsentibus, proponantur, pro usu varij statûs, & conditionis hominum, inter quos, plures futuri sunt, parum versati, & exercitati, in rebus spiritualibus, multi etiam minus ferventes, & rebus terrenis immersi, debebant illa dilucide &

dè, & accommodatè, ad captum ipsorum  
& faciliorem convictionem intellectus, adeo-  
que fusius, & prolixius proponi.

3tio Quia cum non sit necesse, ut integræ  
Meditationes, prout proponuntur, decurrantur  
per horam, imò etiam cum non sit possibile: ali-  
quas, intra hoc tempus, decurri, & a solvi, nul-  
lusque, aut exiguus hinc fructus, proveniret: sed-  
cum unum punctum, imò quandoque pars etiam  
aliqua puncti, possit esse materia sufficiens ho-  
rariæ meditationis; unusquisque, accepto hinc  
fundamento, poterit adhuc, per se ipsum discur-  
rere, & ratiocinari, ulteriusque fructum inde  
percipere, quod annotatione 2da, intenditur.  
Siquidem satis breviter, & succinctè, plures  
particulares doctrinæ, insinuantur; circa quæ  
intellectus, diutius discurrendo, potest immorari;  
et puncta, per hoc frequenter, prolixa sunt quod  
multas doctrinas, & veritates, complentur,  
Reflexiones quoque, & affectus sapius, leviter non  
nisi attinguntur; ex quibus tamen, cum potissi-  
mus fructus esse debeat, aliquantùm ipsam in-  
dulgeri, & plus temporis, impendi debet. In-  
hoc verò casu, in quo unum punctum, vel ejus ali-  
qua pars, pro materia integræ Meditationis, as-  
sumetur reliquum meditationis, loco libri spiri-  
tualis vel tempore libero re legi poterit: &  
si attentè, ac consideratè legatur, fructus hinc  
singularis referetur. Punctum 3tium meditationis,  
juxta priorè modum electionis, non minoris ei, multo  
minus unius horæ, sed aliquot dierum labor, et negotium  
esse

esse debet, idque non intra sed extra meditationem, expediendum ita, ut omissis plerisque, alijs actionibus, huic uni operi vacetur.

4to Meditationes hæc proponuntur longiores, ex eo, non solum ut usui sint, dum exercitijs spiritualibus, per 8 vel 10. dies, vacabitur sed etiam, ut extra hoc tempus, materia, quotidianarum Meditationum, hinc desumatur. Inter alios enim fructus, qui ex peractis, vel semel, hujusmodi exercitijs referri debent, hunc etiam unum esse convenit, ut tales usum habeant, quotidie meditandi, Divina, per mediam aut etiam, si fieri potest, per integram horam, alium verò, quotidianarum Meditationum, si quæ materia, videtur consulenda; maxime materia, spiritualium, S. Ignatii Exercitiorum. Ita enim facilius, fervor Spiritus, in his exercitijs acceptus, per eadem principia conservatur: et proposita sancta, in exercitijs concepta, memoria facilius, occurrunt; ut ad eadem exequenda, magis obfirmetur animus.




# P A R S I.

*In Qua,*

Proponuntur Medita-  
tiones, Usui communi,  
cujuscunque status ho-  
minum, pro octiduo,  
Exercitiorum Spiritu-  
alium, accomodatæ.

PRI-



# PRIMÆ DIEI.

## Meditatio. I.

### Præmittenda octiduanis Collectionibus.

Præludium I. Imaginare te à DEO vocari, & duci ad solitudinem, ut in hac, DEUS ad cor tuum loquatur.

Præludium 2. Postula à DEO gratiam, ut hoc Sancto Exercitiorum Spiritualium tempore, ad cor tuum loquatur.

Loquere Domine, quia audit servus tuus.

PUNCTUM I. Audi DEVM dicentem: Oseæ 2, Ducam eam; ( id est animam, ) in solitudinem, & loquar ad cor ejus. Et considera, Exercitia Spiritualia, S. Patris Ignatij, quibus vacaturus es, esse solitudinem illam sanctam, ad quam DEUS, te ducit, per suam internam motionem, segregando te, a negotijs, & hominibus, & secedere faciendo, ut in hac solitudine, loquatur ad cor tuum.

Hæc considerans concipe pretium, & æstimationem, quam maximam, exercitiorum horum spiritualium, tuique, in hanc solitudinem secessus, Magni sane, æstimandum est, tempus illud, quo soli DEO vacamus, cum DEO conversamur, DEVM nobis

nobis loquentem, auscultamus. secessus ille Moysis, quo secesserat in montē Horeb, ut cum Deo, per 40 dies loqueretur, ab eoque præcepta Decalogi acciperet, res erat omnium iudicio sancta, & maximè æstimanda, ac in magna fuit admiratione, toti Israël.

Ad tale pretium, & æstimationem majorem, adhuc, sacri hujus secessus concipiendum, considera, quod Deus, in hac facia solitudine, loqui soleat verba legis, verba salutis, verba vitæ æternæ. Loquitur verba legis. Quia in hoc secessu, per sanctas, intellectus nostri illustrationes, ostendit nobis, quæ sit hominis obligatio, Deo serviendi, ipsū amandi, a vitijs quibuscunque abstinendi, ex illis consurgendi, in virtutibus, & perfectione Christiana, proficiendi. Loquitur etiam Deus animæ in solitudinem ductæ, verba salutis, verba vitæ æternæ; dum eam dirigit, in viam salutis, dum docet, quâ ratione, vita hæc, sanctè & Christianè, sit instituenda, dum modos & media proponit, ad salutem, & vitam æternam consequendam. Tale Dei alloquium, quis non libenter habeat? quis pro documento, specialis Divinæ benevolentiae, non accipiat, nulli certe tædium, nulli fastidium asferre debet. Apostoli à Christo avelli non poterant, ex eo, quod verba vitæ æternæ, ex ore ipsius, audirent. Quo ibimus, verba vitæ æternæ habes.

Excita in te, desiderium, audiendi verba legis, verba salutis, verba vitæ æternæ, quæ Deus, Optimus, tibi loqui dignabitur. Age Deo tuo gratias, pro tanta dignatione, & beneficio, quod tibi præparavit, quod te alloqui, suamque voluntatem, tibi manifestare velit. Indignum te reputa, divina hac gratiâ. Protestare animi tui præparationem, ad audiendam vocem Domini, appropinque omnem facilitatē, ad ea facienda & exequenda, quæ tibi hoc tempore, Deus inspirare & ad quæ te movere, & excitare dignabitur.

Punctum

PUNCTUM II. Considera quod DEUS, in hac sacra solitudine, loqui velit, non ad aures, sed ad cortuū; & ad cor, se locuturum promittit, *Imo* ex eo, quia, quæ ad te loquetur, cordi bene imprimi debent. Quæ ad aures dicuntur, facîle transvolant, cum sono vocis desinunt. Quæ verò DEUS tibi loquetur, ad cor transmitti, cordi insculpi, corde conservari debent. Talia siquidem DEUS, in hoc secessu, loqui consuevit, quæ ulteriori vitæ spirituali, subservire debent, juxta quæ, vitam te deinceps, instituire oportet. Hic tibi, discenda principia vitæ Christianæ, vitæ perfectioris, dictamina illa practica, sancta, quibus regulandæ sunt, omnes totius vitæ, actiones, ut sanctè, & laudabiliter vivas.

2do ideo DEUS, ad cor tuum loquetur, Quia non solum, instruct, Sanctisque suis illustrationibus, illuminabit intellectū tuū, sed etiam, voluntatem tuam fletere, ad bonum prosequendum inclinare, tuumque affectum, & cor sibi devincire, ad se attrahere, sibi que indissolubiliter conjungere, volet. Illos Oratores, ad cor loqui dicimus, qui non sistant in eo, quod doceant, quod res novas, inexpectatas, ingeniosas, & eruditas afferant, suisque auditoribus proponant: qui non sunt contenti, quod curiosè, pascant intellectum, eundem etiam rationibus, subinde efficacibus convincant; sed insuper progrediuntur, ad inflammandum affectū, acres admovent stimulos ad excitandam, & permovendam voluntatem, conanturque vi & efficaciam singulari, diversos animi motus, & effectus in cordibus humanis, excitare, idque miro artificio, facîle consequuntur. Talem Oratorem, hoc oſtiduo DEUS vult agere, vult ille non solum per sanctas illustrationes, mentis tenebras dispellere, tuumque Intellectum illuminare; sed etiam, per pias affectiones, ad id, quod sibi placitum fuerit, te excitare. Ita tecum aget, ut non solum cognoscas, ea, quæ sunt necessaria, ad salutem



salutem & perfectionem tuam, ut non solum discas principia altissima, rationes æternas, juxta quas vitam instituere debeas, sed inflammabit voluntatem tuam, ut velit ea facere quæ, intellectus à DEO illustratus proponet faciendæ, tanquam rectæ, & legi æternæ, rationibusque, & principijs altissimis conformia, imò acribus te stimulis gratiæ suæ urgebit ad ea non nisi volenda, quæ cum gloria ipsius sunt futura. Utinam verò talem adhibeat stimulum contra quem sit tibi durum calcitrare.

3<sup>to</sup> Ex eo adhuc DEUS ad cor tuum loquetur, quia quæ loquetur, cor tuum maximè petent, ad cor diriguntur. Ita tibi & ea loquetur DEUS, per quæ cor tuum molliat, illudque, conterat & in lacrymas solvat, per quæ cor tuum mundet & totaliter immutet, ut non ampliùs de corde tuo prodeant cogitationes malæ, & illa peccata quibus Divinam Majestatem offendere solitus fueras. Per hæc quæ loquetur volet efficere ut cor tuum sit dignum Sanctissimæ Trinitatis, Christi in Sacramento Eucharistiæ sæpius ad te venientis, & gratiæ Divinæ habitaculum, ut sit templum DEI vivum, donis cælestibus, & sanctis virtutibus exornatum.

4<sup>to</sup> Tandem loquetur DEUS ad cor tuum, quia cor à te maximè exiget, illudque a te petet, Fili præbe mihi cor tuum. Non petet autem cor divisum, cor partitum inter DEUM & creaturas, sed cor totum, cor integrum. Ideoque vult ad cor tuum loqui in solitudine, ut solus DEUS cordi tuo loquatur, & aures cordis tui, soli DEO pateant. Absit, ut hoc tempore ad cor tuum loquatur mundus, caro, diabolus. Non loquatur tibi concupiscentia carnis, concupiscentia oculorum, & superbia vitæ, unum cor cedat uni DEO. Vult DEUS cor tuum, cor totum, ut ad illud loquatur, vult enim, ut magno & liberali animo exercitia hæc peragas, totumque studium & arbitrium tuum Creatori

offerat, ut de te, rebusque tuis omnibus statuatur juxta sanctum beneplacitum suum. Vult DEUS, ut netu quidem ipse in corde tuo partem habeas, sed ab amore tui ipsius & a cujusvis proprii commodi affectione totum te abstrahas, fortiter persuasus, tantum te ex hac Divina ad cor tuum locutione profecturum in spiritu, & rebus ad animæ tuæ bonum conducentibus, quantum ab amore tui ipsius, & commodorum tuorum affectione te abstraxeris.

Præbe itaque DEO cor tuum, cor totum, perfectum, velis illi servire corde perfecto, ama illum ex toto corde tuo, amplius, & dilata cor tuum, nec pone modum, ac terminum donis ipsius, & sanctis ejus illuminationibus, & motionibus, procul sit a te cor ita arctatum, ut ad quosdam non nisi, & determinatos limites illuminari, & juvari velis, ut illa tantum a DEO loquente audire exoptes, ad quæ ipse propendes, & quæ ex rationibus humanis, statuta & prædefinita habes, non verò omnia quæ tibi DEUS optimus loqui dignabitur.

Erumpe in affectus: Loquere Domine, quia audit servus tuus. Paratum cor meum DEUS: paratum cor meum, DEUS cordis mei es, cordi meo loquere: cor meum in manu tua quocunque volueris, flecte illud, compelle ad te Domine quantumvis rebellem voluntatem meam ut tibi serviam corde perfecto ut te in vita, & æternitate toto corde amem.

PUNCTUM III. Expende illa verba ad Romanos.  
2. *Non Auditores sed factores, legis justificabuntur.*  
Et considera, non hunc unice debere esse finem præsentis recollectionis tuæ, nec hunc nonnisi fructum ex exercitijs S. P. Ignatii te referre debere, ut in hoc secessu DEVM ad cor loquentem audias, ut voluntatē, & beneplacitum Divinum circate, & tua omnia cognitum & perspectum habeas, ut per illustrationes Divinas edocearis, quomodo te  
vitam

vitam instituire oporteat, ut multa bona, & sancta proposita concipias, illa in cor tuum altè demittas, & corde percipias, ac intelligas, quæ tibi loquitur ac inspirat Dēvs. Plus à te exigitur, amplior, et uberior fructus esse debet sancti hujus secessus, non satis est, quod sis auditor legis, sed factorem legis te esse oportet, ut justificeris. Illustrationes sanctæ & lumina à Patre luminum liberaliter in te effundenda, in pœnam tibi sunt futura, nisi, ea, quæ facienda hîc cognoveris, ad effectum deduxeris; servus sciens, & non faciens voluntatem Domini sui, plagis vapulabit multis. Fructus præsentium exercitiorum non debent esse solæ consolationes, quas per locutionem suam Dēvs cordibus immittere consuevit, sed talis fructus debet esse vitæ in melius reformatio, & emendatio, ut veterem exuas, & novum induas hominem, ut ex his exercitijs novus deinceps homo, & per omnia immutatus prodeas, ut ulteriorem vitam tuam, juxta rationes æternas, & principia tuæ saluti maxime opportuna instituas, & per omnes tuas actiones, Dēi gloriam quæras, ipsique præstes obsequium.

Aggredere ex nunc hoc sanctum reformationis vitæ tuæ opus, ad quod faciendum excitat te, & excitabit gratia Divina, fac citò; & quæ corrigenda, Divino lumine illustratus, adverteris, statim corrigere stude. Serio obfirma animum tuum, contra omnes difficultates, quæ te retrahere conabuntur ab executione beneplaciti Divini, & sanctorum tuorum propositorum. Protestare illis Psalmistæ verbis: Juravi, & statui custodire judicia justitiæ tuæ. Illis item verbis Apostoli: Quis me separabit à charitate Christi? an tribulatio? an angustia? Certus, sum quia neque mors; neq; gladius &c. neque ulla alia creatura poterit me seperare.

Colloquium ad Patrem æternum, cui suppli

ca humillimè, ut ita ad cor tuum loquatur, ut illud in se planè transformet, tuamque voluntatem per resignationem perfectam ejusdem, suo Sanctissimo conformet, beneplacito, & ad quod volendum suâ gratiâ excitabit, ad illud explendum & perficiendum, uberem gratiam, misericordissimè largiatur. In fine

Suscipe Domine universam libertatem meam, accipe memoriam, intellectum, atque voluntatem omnem. Quidquid habeo, vel possideo, mihi largitus es, id tibi totum restituo, ac tuæ, prorsus voluntati trado gubernandum, Amorem Tui solum cum gratia tua mihi dones, & dives sum satis, nec aliud quidquam ultra posco.

## Meditatio II.

### De fine hominis & medijs ad hunc finem consequendum.

Meditationem hanc S. P. Ignatius vocat Principium seu fundamentum.

Præludium 1. Imaginare DEUM formantē hominē de limo terræ, eidemq, animā & vitā inspirantē.

Præludium 2. Pete gratiam, quā illuminatus. cognoscere possis finem Creationis tuæ, & media ad hunc finem consequendum tibi a DEO benignissimè concessa.

PUNCTUM 1. Audi illa verba Deuteronomij 26. *Creavit DEVS omnes gentes in laudem, & gloriam suam.* Audi item verba S. Patris Ignatij, in suo Exercitio, quod appellavit fundamentum. Creatus est homo, ut Dominum DEVM suum laudet, revereatur, eique serviens, tandem salvus fiat. Et considera, DEVM, cum prudentissimè & sapientissimè condiderit hoc universum, sicut unicuique creaturæ, ita & homini certum finem præfixisse, ut cum intenderet, & studeret consequi. Porro cum



cum, finis ( ut Scholæ loquuntur ) alius sit objectivus, qui est ipsum objectum, quod propter se, & gratiâ sui intendi & appeti debet, alia verò, propter illud. Et alius finis formalis, qui consistit in actibus potentiarum intentionalium, intellectûs, & voluntatis tendentium in ipsum finem objectivum, finis objectivus hominis est, ipse DEUS, in quem homo omnibus suis actionibus tendere & collimare debet, talisque finis intelligitur esse Deus, dum dicitur, quod propter semetipsum DEUS sit operatus omnia. Finem formalem hominis expressum habestum adductis Deuteronomij verbis, tum verbis Sancti Patris Ignatii. Qui ipse ulterius finis prout proponitur à sancto Patre Ignatio, complectitur duplicem finem formalem: Finem immediatum, cui ipse ulterius ad alium finem ordinatur, & finem formalem mediatum, ac ultimum, qui ad ulteriorem finem non refertur, sed in ipso tanquam in possessione perfecta finis obiectivi quiescit.

Finis formalis immediatus hominis, est cognitio, & notitiâ DEI, partim ex creaturis, partim per fidem habita, laus, glorificatio, & Amor DEI cogniti, reverentia ejusdem, ac etiam obsequium, & servitium DEO exhibitum.

Finis mediatum, & ultimus hominis, est salus ipsius, & vita æterna. Est ergo creatus homo propter Deum, tanquam propter finem suum objectivum. Jam verò creatus est, tanquam propter finem formalem immediatum, ut Deum in hac vita mortali ex creaturis, & per veram fidem cognoscat, amet, laudet, revereatur, ei; serviat; propter finem autem formalem mediatum, & ultimum, creatus est, ut salvus fiat.

*Expende ulterius singula.* imo. Creatus est homo propter DEUM, tanquam propter finem suum objectivum. DEUS est principium tuum,

quia est Creator tuus, ab ipso habes esse tuum. DEUS est conservator tuus, ab ipso conservacione, quovis momento dependet vita tua. ipse est in te summè beneficus, quidquid es, quidquid habes, vel habiturus es, à munifica DEI manu habes. Hic igitur DEUS, qui est principium tuum, ipse est & finis tuus, ipse enim est principium, & finis, Alpha & Omega. DEUS seipso, te summè beatum, & felicem, potest et vult reddere, tuum appetitum plenè explere, et satiare.

Ubi DEUS sit finis tuus, exigit summa illius excellentia, ac perfectio, cum enim sit summum, & perfectissimū bonum, illi soli convenit, quod plenè explere, & quietare possit appetitum rationalem. Exigit & ipsa hominis natura, & conditio. Homo enim secundum animam est immortalis, spiritalis, intellectivus, capax Beatitudinis, & æternæ felicitatis. Igitur finis objectivus ipsius, debuit esse objectum summè necessarium, & indefectibile, debuit esse objectum spirituale, inter objecta intellectu perceptibilia nobilissimum, & præstantissimum, deniq; debuit esse tale objectum, quod possessum redderet hominem summè beatum, summè: felicem, adeoq; finis objectivus debuit esse Deus, cui soli enumerata conveniunt prædicata.

Unde, clarum ulterius est, finem hominis non esse nec posse esse voluptates, opes, & divitias, honores, & vanitates, non ipsummet hominem, non ullam creaturam, non mundum totum, nec omnium creaturarum universitatē

*Expende 2do.* Creatus est homo, tanquam propter finem formalem immediatum, ut DEUM suum cognoscat, amet, laudet, revereatur, eiq; serviat. Hoc consequens est: si DEUS finis tuus objectivus est, finem formalem immediatum, debere esse ipsius cognitionem, amorem, laudem, reverentiam & obsequium: si enim DEUS finis tuus objectivus est, antequam ad ejus perfectam pervenias possessionem

& in

& in ipso plenè conqviſcas, debes in ipſum ferri & tendere, in eumq; collimare, non ſecus atque lapis fertur, & tendit ad centrum terræ. quia hoc eſt centrum lapidis, & omnium gravium, & quodammodo ſinis ejuſdem. Idq; debes tendere non motu locali, ut per præſentiam localem DEO conjungaris, hic ſiquidem propter ſuam immenſitatem, ubicunq; exiſtis, præſens tibi adest, ſed debes tendere motu proprio potentiarum tuarum intentionalium, nimirum Intellectûs, & voluntatis, ſeu debes moveri in Deum, & tendere per cognitionem ipſius, curando, ut Deum, quoad fieri poſteſt, quàm perfectiſſimè cognoscas. Debes ferri in Deum per amorem ipſius, ac etiam deſiderium perfectæ unionis, & conjunctiſſionis cum Deo. Si Deus ſinis tuus objectivus eſt, ſupremum, & maximum bonum tuum eſt: adeoq; debes in Deum tendere ut in ſummum bonum, eumq; ut ſummum bonum, & ſuper omnia, amare. Ut autem taliter Deum ames, debes illum cognoscere, ejuſque cognitionem comparare, qualis hæc, in vita mortali haberi poſteſt, nimirum ex creaturis, & per fidem, nihil ſiquidem volitum, niſi cognitum, & quo perfectiùs bonum aliquod cognoviſcimus, eò perfectiùs illud ipſum amamus. Si verò Deum amas, & amas ſuper omnia, convenit, ut illum laudes, glorifices, quæ enim ſingulariore affectu proſequimur, ea laudamus, extollimus, magnificamus, imò etiam ab alijs laudari, & extolli optamus. Amoris, quo in Deum voluntas tua fertur, indicium & argumentum eſt, & eſſe debet laus, gloria, & æſtimatio DEI. Debes etiam revereri Deum, hoc eſt, præcepta ipſius ſervare, & voluntatem exequi, debes illi ſervire, ad id enim teneris non ſolùm ratione ſubjectionis, quam Creatori, & ſupremo tuo Domino debes; ſed etiam ratione amoris, & tendentiæ quâ in Deum, ut finem tuum

ferri teneris. Si enim Deum non revere-  
ris, si illi non servis, si mandata DEI transgrederis,  
nec ejus voluntatem exequeris, in amore finis tui  
deficis, jam non tendis in Deum, ut finem, sed  
ab eo deflectis, & rationem finis in creatura con-  
stituis.

Idq; laus DEI, reverentia, &  
servitium debent esse finis formalis immediatus  
hominis: quia per hæc homo ita tendit in Deum  
tanquam finem suum objectivum, ut hæc non sint  
perfecta consecutio, & possessio DEI, sed sint  
medium, ad finem formalem, ulteriorem & per-  
fectam possessionem finis objectivi, quatenus dis-  
ponunt hominem, & faciunt, ut finem formalem  
ultimatum consequatur.

Sunt enim merita,  
in quorum præmium, homo accepturus est perfectā  
possessionem finis objectivi, adeoq; finem forma-  
lem ultimatum consecuturus.

*Expende. tertio* Hominem creatum esse  
tanquam propter finem mediatum, ultimatum, ut  
salvus fiat, hoc est, ut post vitæ hujus mortalis æ-  
rumnas, DEO æternaliter fruatur, ipsumq; possi-  
deat per claram, & intuitivam visionem ejusdem,  
& amorem beatificum DEI, ita cogniti, in qui-  
bus duobus, æterna salus hominis sita est. Finis  
formalis ultimus hominis est, summa ejusdem  
felicitas, nihil enim magis desideramus mortales,  
quàm ut semper felices simus. Summa nostra felici-  
tas futura est visio DEI, ejusque clara intuitio.  
Si plures mortalium suam felicitatem in eo con-  
stituunt, quo creata pulchritudine oculos corporis  
exsatiare possint, frequenterq; ab hujus conspectu  
abstrahi, & avelli nequeunt, quanto magis, ma-  
xima Sanctorum felicitas est futura, quia mentis  
oculum in summa, & increata pulchritudine defi-  
gent, quia conspectu DEI, conspectu pulchritudi-  
nis indeficientis, immutabilis, infinitè quasunque  
creatas pulchritudines excedentis, quâ major clari,  
& cogi



& cogitari non potest, totâ æternitate perfruentur, de ea gaudebunt, eamque puro, & perfecto amore complectentur.

O increata pulchritudo, & quando tandem velamen ex oculis meis detrahes, quando intellectui meo, taliter, ut es in Te, manifestaberis? Quando facie ad faciem Te intuebor, Te plenè, & perfectè diligam, ac in Te conquiescam.

PUNCTUM. II. In explicato fine hominis considera Imò. Sublimitatem; & excellentiam ejusdem. Finis hic (intellige objectivus) idem ipse est, qui & finis ipsius DEI. DEUS enim non alium finem respicit, nisi seipsum, in se ipso per cognitionem comprehensionem suam, sui; amorem, ultimò quiescit, ac se ipso summè felix, summè Beatus est. Cum ergo citra omne dubium finis DEI sublimissimus, & præstantissimus sit, cum DEO nihil sublimius, nihil excellentius esse possit, sequitur finem quoq; hominis talem esse.

*Considera 2do* Quòd inter creaturas corporeas, soli homini, finis hic sit proprius. Cum enim solus homo, usu rationis polleat, capax etiam sit beatitudinis, nimirum visionis intuitivæ DEI, & amoris ipsius beatifici, solus homo propter hunc finem creari potuit, ut Deum laudet, revereatur, ei; serviens, tandem salvus fiat.

*Considera 3tio.* Quòd finis hic sit plenè expletivus & satiativus cordis humani, seu appetitus rationalis. Poteest quidem pro sua liberate varios intendere fines, ab hoc, propter quem creatus est, diversos, nullus tamen satiabit appetitum ipsius, nisi hic unicus, juxta illud Augustini: creasti me Domine ad Te, inquietum est cor meum donec requiescat in Te.

*Considera. 4to* Quo hic finis ejusq; consecutio sit ultima, & totalis perfectio hominis. Sicut enim nulla res est perfecta, nisi quando con-

sequitur finem suum, ita & homo tunc nonnisi futurus est perfectus, dum finem suum consequetur.

*Considera 5to* Hominem esse obligatum, ut in hunc finem tendat. Aliæ quævis creaturæ corporeæ, à natura sua sunt necessitatæ ad tendendum in suum finem, nec à tali tendentia impediri possunt, nisi cum illata sibi violentia; homo verò siquidem ex prædicato creaturæ rationalis, & liberæ, non debuit à natura sua necessitari ad tendendum in suum finem, defectum talis necessitatis a natura sibi non inditæ, supplere debuit obligatio ejusdem ad tendendum, in prædictum finem.

*His consideratis*, reflecte te supra stultitiam hominum, qui finem suum constituunt in creaturis, qui pro fine, suaq; beatitudine constituunt fædas voluptates, divitias, honores? ô qualis hæc ipsorum est beatitudo? quæ ipsos brutis viliores, miseros, inquietos, sollicitos reddit, quæ ipsorum appetitum minimè explere, contentare potest. Reflecte te item supra te ipsum, vitamq; tuam antecedentem: Quem finem, hactenus quæseris? an adverteris, te, ad tam sublimem finem creatum esse? Alium forte, finem, tibi præfixeras? forte finis tuus hucusq; fuit tu ipse, tua sensualitas, vanitas, quam quærebas, commoda temporalia, transitoria, oblectationes, sensuales.

Confundere, quod tuis actionibus ad tam viles fines collimaveris, confundere, quod omnes creaturæ visibiles naturali inclinatione in suos ferantur fines, suntq; in continua tendentia ad finem, ita ut non possint nisi violentè impediri à consecutione ejusdem; tu verò toties à fine tuo deflexeris, tam facile à tendentia in ipsum retrahi te permiseris.

Poteras per sublimes intentiones tuis actionibus præmissas, omnibus illis in finem tuum, laudem scilicet

licet, & gloriam DEI collimare: & quid, oro, te impedivit a tali in finem tuum tendentia: non aliud certè nisi vel prava tua voluntas alium sibi præfigens finem, vel certè tua desidia, & neglecta salutis tuæ cura.

Statue si mi ter, per intentiones sanctas sæpius renovandas, per frequentes mentis ad Deum elevationes, unicè te spectaturum finem tuum, ad quem creatus es, scilicet gloriam, & obsequium DEI, dicens toto cordis affectu: Dignus es, Domine accipere gloriam, & honorem, & virtutem, quia Tu creasti omnia.

PUNCTUM III. Audi verba illa Psalmi 8. de homine dicentis: *Constituisti eum super omnia opera tua: omnia subiecisti sub pedibus ejus.* Audi item verba S. P. Ignatij, in præsentis exercitio dicentis: reliqua vero super terram sita, creata sunt hominis ipsius causâ, ut eum ad finem creationis suæ prosequendum juvent: Et Considera Imo. magnam DEI bonitatem, & benevolentiam erga hominem. Parum fuit Deo, quod se pro fine hominis statuerit, quod Dominus hominis esse voluerit, cui homo serviret, & quem revereretur, ipsum insuper hominem voluit esse Dominum, & finem aliarum visibilium creaturarum.

Considera 2dò Dignitatem & excellentiam hominis, ex tali, in creaturas visibiles dominio, & plena potestate disponendi de omnibus, & singulis earum. Magna dignitas regum, & principum terræ est, quod uni vel aliquot regnis & provincijs præfint, quanta dignitas erit hominis; quod totum orbem sub pedibus habeat, suumque Dominium ad omnes creaturas, & ultimos orbis fines extendat.

Considera 3tò. Omnimodam omnium irrationalium creaturarum subjectionem homini. quomodo cælum, & terra serviant ipsi. Serviant  
cælum

cælum, sol luna & omnia sidera, influendo in corpora sublunaria, medioc; hoc influxu, producendo herbas, frumenta olera, aliaq; necessaria ad sustentandam vitam hominis, intra terræ viscera elaborando aurum, argentum, æs, ferrum, aliaq; metalla, & mineralia: Servit sol in illuminatione diei, oriendo æquè super bonos, & malos, serviunt luna, & stellæ in illuminatione noctis, servit terra, sustentando hominem, calcari se sinendo, ad omnes hominis usus, se formando, quæcunq; germinat, non in suum commodum, sed in bonum hominis producendo. serviunt omnia elementa suarum qualitatum productione, serviunt omnia animalia; leones, elephantes, equi, boves &c. idq; serviunt ad defatigationem, serviunt non solum suis actionibus, sed etiam totâ suâ vitâ, & suo esse, dum serviunt cum jactura, & dispendio vitæ propriæ, & esse sui.

*Considera 4to.* Omnes easdem creaturas ita tibi servientes, & obsequentes, creatas esse ut juvent te ad prosequendum finem tuum. Creatæ enim sunt, ut te ducant in cognitionem existentiae Creatoris rerum omnium DEI. Toto suo esse eundem prædicant: ipse fecit nos, & non ipsæ nos. Prædicant suis perfectionibus, perfectiones Divinas, & dicunt cum Bernardo: quid miraris in sole splendorem? in flore pulchritudinem, in pane saporem, in terra fecunditatem, A. DEO hæc universa dona sunt, nec dubium, quin multò amplius, reservaverit sibi, quam dederit creaturis. Hæ ipsæ creaturæ ad amorem DEI te excitant, ad Deum laudandum, gloriam ejus quærendam, serviendum ipsi, te provocant. Quod aliquando audivit S. Augustinus, & tu, si attenta aure mentis auscultare volueris, facile audies: Omnia clamant ad me, ut amem te Domine. Enarrant cæli gloriam DEI, laudant Creatorem suum astra matutina

na, ut & tu laudes ipsum, ut enarres mirabilia ejus, ut promoveas gloriam DEI. Ezequantur promptè omnes creaturæ, voluntatem Divinam, ut & tu facias voluntatem Patris, qui in cælis est, ut serves mandata ipsius. Serviunt illæ tibi, ut & tu servias illi, à quo & propter quem factus es.

*Considera 5to* Si reliqua omnia super terram sita, creata sunt hominis causâ, sequi hinc, eatenus licitum esse usum creaturarû, quatenus juvant hominem ad consequendum finem suum. Earum item non nisi creaturatum, usum licitum esse, quæ, ad eundem finem conducunt, & juvant; quæ verò, ab assequendo fine impediunt, ab illarum usu abstinendum esse.

Deinde, cum omnia alia creata super terram, debeant esse homini, media, ad finem ipsius consequendum, non debere in creaturis aliam bonitatem æstimari, & amari, nisi quam habent per hoc, quod conducant & juvent hominem ad finem suum consequendû. Debent enim in media unicè amari, propter finem, & propter suam quam habent aptitudinem, ut per illa obtineatur finis. Infert hinc, S. Pater meus: quapropter debemus absq; differentia nos habere circa res omnes creatas ( prout libertati nostræ subiectæ sunt, & non prohibitæ ) ita ut quod in nobis est, non quæramus sanitatem magis, quàm ægritudinem, nèque divitias paupertati, honorem contemptui, vitam longam, brevi præferamus, sed consentaneum est ex omnibus, ea demum, quæ ad finem ducant, eligere ac desiderare.

His consideratis fac reflexiones, supra te ipsum, an gratus exsiteris Creatori tuo tanti beneficii? an factus dominus aliarum creaturarum, non volueris excutere jugum, & servitium Creatoris tui? an ordinem hunc à Deo constitutum, ex vicijus alia omnia subiiciuntur tibi, non perverteris? an non subjeceris te creaturis? an non fueri



fueris servus, & mancipium voluptatis, sensualitatis, passionum, & pravarum inclinationum tuarum? an quibusdam creaturis nimio, & inordinato affectu non adhæseris? ac te non resolveris ad transgredienda propter illas præcepta, & leges Divinas, salutemque animæ tuæ, æterno dispendio non exposueris.

Fac insuper reflexionem, an taliter tu servias DEO, & in DEUM ut finem tuum tendas, sicut creaturæ aliæ serviunt tibi, sicut illæ in bonum tuum ordinantur. Reflecte te, quo affectu feraris in creaturas? an hoc unice motivo, & titulo illas aines, quod te juvent ad finem tuum consequendum? si alio, affectus ille inordinatus est: Quā indifferentiā feraris in sanitatem, & ægritudinem, divitias, & paupertatem, honorem & contemptum, vitam longam, & brevem? Esne paratus ad id potius, quod est futurum cum majore gloria Divina? cum majore obsequio, & salute animæ tuæ.

Elice affectus accommodatos, gratitudinis, gratiarum actionis, desiderij serviendi DEO, quā ferventissimè, omnibus viribus, omnibus actionibus tuis, toto te, serviendi DEO ad defatigationem, ad collapsionem virium, cum dispendio, & jactura vitæ, & valetudinis tuæ. Fac desiderium sanguinem, & vitam tuam profundendi ex amore DEI, ut hac ratione promoveatur major gloria DEI.

Conclude affectu S. Augustini. Ut totus servirem Tibi, omnia quæcunque fecisti in meum servitium fecisti, & mihi in servitium tradidisti. Omnia sub pedibus hominis subjecisti, ut totus homo subijceretur tibi. Et ut totus Tuus esset, super omnia opera Tua, dominatus est homo. Omnia exteriora creasti propter animam, animam verò ut Tibi soli vacaret, Te solum amaret, possidens Te ad solatium, inferiora ad servitium. Quidni igitur amem Te, serviam Tibi. Suscipe Domine, universam libertatem meam, ut supra. Me-

## Meditatio III.

## De beneficio creationis hominis.

Prælium I. idem erit, quod Meditationis præcedentis.

Prælium 2. Pete gratiam quâ illuminatus, possis agnoscere beneficium creationis tuæ, illiusque gratus esse.

PUNCTUM I. Audi illa verba Job 10. *Manus tuæ fecerunt me, & plasmaverunt me totum in circuitu.* Et ut melius penetrare possis, magnitudinem beneficij creationis tuæ, considera in tua creatione hæc intervenisse Imo. Quod sis opus ipsius DEI. Ipse DEUS, te suis manibus de limo terræ formavit, ipse corpori inspiravit animam. Ad animæ tuæ creationem non est usus, ministerio ullius creaturæ, quâ, è mente multorum, ut instrumento saltem, uti potuit, sed ipse solus hoc opus à se perficiendum suscepit.

2dò Quod manus Creatoris te fecerint & plasmaverint, te inquam, quem DEUS præviderat tanti beneficij ingratum aliquando existiturum, quem præviderat, fore suarum legum, & præceptorum transgressorem, quem præviderat suis gratijs donis, beneficijsq; abusurum, in suo servitio negligentem, & tepidum futurum. Idq; manus hæc sanctissimæ fecerunt, & plasmaverunt te tot alijs in suo nihilo, & pura possibilitate, relictis, inter quos, multos præviderat, si crearentur, sanctiores futuros, in suo fine consequendo studiosiores, pro DEI honore, & gloria magis zelosos, Divinorumq; beneficiorum gratiores. Insuper quod, te fecerint non ex casu fortuito  
non

non ex aliqua necessitate, sed ex puro suo beneplacito, & plenè liberâ voluntate, attestante Psal-  
mista Psalm. 134: Omnia quæcunq; voluit Do-  
minus fecit in cœlo, & in terra.

3<sup>to</sup> Quod manus hæ beneficentissimæ fe-  
cerunt, & plasmaverunt te totum, hoc est non mu-  
tilum, non claudum, non monoculum, non aliquo  
sensu destitutum, non monstrosum, non destitu-  
tum usu rationis, sed omnibus membris, sensibus,  
organis, potentijs instructum, cum debita eorundē  
dispositione, symmetria & proportionē, imò majō-  
ribus talentis supra multos alios dotatum. Fe-  
cerunt te totum manus Divinæ etiam hoc sensu,  
quia nihil in te est, quod à DEI manibus non  
acceperis. Et corpus tuum, & anima tua, omnes  
potentiæ, & facultates tuæ, sensus tui, dotes, &  
talenta tua, dona DEI sunt, à DEO tibi omnia  
hæc collata sunt, tuq; ipsè totus à DEO es. Non  
ego spiritum (alloquitur Mater filios suos Macha-  
bæos) non ego spiritū, & animam dedi vobis, & sin-  
gulorum membra non ego compegi, sed Creator  
mundi qui creavit hominis nativitatem.

4<sup>to</sup>. Tandem manus hæ DEI Creatoris tui  
fecerunt te totum in circuitu, hoc est in omnibus  
circumstantijs tibi coexistentibus, cum omnibus  
tibi adjacentibus, ita ut soli DEO debeas, quod  
sis natus post Christi adventum, in Regno & fide  
Catholica, non in medio persecutionis æstu, ex  
Parentibus Catholicis, honestis, probis, quod bo-  
nam institutionem ab his acceperis. Quod na-  
tus, non statim ante baptismum sis mortuus, Di-  
vinis debes manibus, quod etiam nunc vivas, illæ  
manus sustentant te: hæ manus multa adhuc pro te  
beneficiâ parata, conferenda tibi tenent: in his,  
manibus sortes tuæ, utinam ex his manibus æter-  
nam animæ salutem aliquando accipias.

Osculare beneficentissimas has DEI Creato-  
ris

ris tui manus Referas humillimas ei gratias, pro tantis in te beneficijs. Protestare te totum quidquid es DEI esse, totumque te ipsi debere, & totum te ejus mancipare velle servitio.

PUNCTUM II. Expende illa verba Psal. 8

*Quid est homo, quod memor es ejus, & considera quid etiā moverit, & inpulerit DEUM ut memor tui esset, & te ex tuo nihilo extraheret, tot alijs hominibus possibilibus, in suo non esse & pura possibilitate relictis. Non moverunt, nec impulerunt DEUM ad te creandum tua crimina, quæ prævidebat, ut clarum est: Hæc enim potius quantum de se retrahebant DEUM, ne te crearet. Nunquid fortè moverunt DEUM ad te creandum & ex nihilo educendum virtutes & bona opera, quæ DEUS in te futura prævidit? fortè placuisti DEO ex virtutum Christianarum exercitio? mortificationum usu? ex tuo fervore in DEI obsequio ab ipso prævisis? movit fortè DEUM tua tempertania? mansuetudo? in egenos misericordia? tua humilitas? inimicorum amor? præceptorum DEI observantia? studium promovendæ gloriæ DEI? verum cum in te hæc non reperiantur, prævideri à DEO non poterant. Quod si inveniuntur, ô quantis scatent imperfectionibus quo minus DEO placere possent, & tu propter illa. Deinde si hæc movissent DEUM, ad creandum te, quare non potius moverunt eundem illi ampliores in DEI servitio fervores? illæ sublimiores virtutes, rigidiores mortificationes, accuratiores observationes præceptorum DEI? & consiliorum Christi? omnia hæc similiter prævisa in tot alijs possibilibus hominibus ut eos, potius crearet DEUS, te relicto in tuo nihilo, quibus tamen in sua pura possibilitate relictis, te indignum licet, pro objecto & termino, virtutis suæ creativæ assumpsit, te creavit.*

*Fateri debeo, nihil omnino in me fuisse, quod tibi DEO meo, creationem mei persuaderet; sed*  
C
*persvasit*

persvasit illā sola onitas, clementia, & misericordia tua. E rumpe in affectus gratiarum actionis, ardentis in DEUM, in te tam beneficium, amoris, humilitatis, & confusiois propter ingratitudinem tuam, tandem firmi propositi, quo velis tanti beneficii deinceps gratus semper existere: Quod omne id, quicquid à DEO habes, velis in DEI obsequiū impendere, & DEO ferventissimè servire. Desidera servire DEO majore fervore, quàm eidem servivissent; quicumque alij homines possibiles, tibi, in creatione posthabiti.

PUNCTUM III. Audi illa verba Genesis 1. *Creavit DEVS hominem ad imaginem & similitudinem suam*, ad imaginem DEI creavit illum, &

*Considera* Dignitatem, & excellentiam hominis ex eo, quod inter creaturas corporeas, ille solus sit insignitus imagine, & similitudine DEI Creatoris sui. Alijs creaturis DEUS non nisi aliquod sui vestigium impressit, hominem verò ad suam similitudinem condidit, eumque suā imagine donavit. Aliæ enim creaturæ aliquas non nisi divinis perfectiones Divinas participant, quædam participant esse, & existere, quædam participant vitam, aliæ fecunditatem, aliæ pulchritudinem, aliæ potentiam, aliæ alias perfectiones Divinas. Solus homo, plures collectim perfectiones DEI coadunatas tenet, & participat, nam & illas participat, quas participant creaturæ materiales, & insuper participat alias, quas illæ non participant, nimirum quod sit intellectivus, volitivus liber, immortalis, quoad animam, spiritualis, quo ad eandem, Beatitudinis, & æternæ felicitatis capax. Propter hanc igitur complexionem plurium perfectionum, solus homo ad imaginem DEI creatus est.

S. Bernardus in suis Meditationibus de anima Cap. 1. censet hominem ex eo creatum esse ad imaginem & similitudinem DEI, quia anima



nima hominis triplici suâ potentiâ, nimirum memoria, intellectu, & voluntate exprimit Trinitatem Personarum Divinarum, Patrem, Filium, & Spiritum Sanctum.

*His consideratis*, æstima dignitatem tuam : si argentum, aut æs, per hoc, quod sit insignitum effigie Principis, ad majorem valorem, pretiumque, attollitur, ad quantum tu non attolleris pretium & dignitatem ? per hoc, quo sis insignitus imagine Conditoris tui, quomodo lumen vultus illius signatum sit super te. Et ad hanc quidem dignitatem evexit te beneficium creationis tuæ. an verò eandem non amiseris fædatâ, per peccatum imagine Dei, ad quam creatus es, tecum ipse dispice. Advertas velim, imago illa Dei tibi in creatione indita, maneatne adhuc integra, & illibata ? an non potius dæmonis, aut horrendi alicujus spectri fædissima in te reluceat effigies ? in hanc certè per quodvis peccatum lethale imago Dei in te efformata degenerat. Amissa gratia sanctificante, desinis esse Filius Dei, perit in te imago Dei.

*Vide etiam* an anima tua sit imago referens Sanctissimam Trinitatem Divinarum Personarum. Memoria tua est ne imago Patris æterni ? si memoria tua generat verbum mentis, sanum irreprehensibile ? si generat intellectiones sanctas, veritatem, & sapientiam ? quæ secundum DEUM est, est Imago Patris æterni. Quod si memoria tua generat Intellectiones seu cogitationes vanas, superbas, impuras, gulosas, vindicativas &c. si generat verbum, de quo in die judicij reddenda erit ratio, si generat infanias falsas, mendacia, hypocrises, fraudes, sapientiam mundi, quæ secundum, DEUM stultitia est, talis memoria nequaquam potest esse imago Patris æterni. Intellectus etiam tuus si est incessanter repræsentativus Patris æterni, essentiæ Dei, ejusque perfectionum, si totaliter

Deo est immersus, cum eoque conjunctus per Meditationes rerum æternarum incommutabilium, si est in repræsentando verax, infallibilis, & viam veritatis ostendit, est imago Filij æterni. Quod si transitoria, sensualia, & ea quæ carnis sunt, meditatur, repræsentat, iisque immergitur; si dictamina proponit falsa, à via veritatis retrahentia imago Filij æterni, esse non potest. Voluntas denique tua, si tota est Divina si ignis est, charitate, & amore DEI æstuans, si est voluntas sancta termi, nativa spirationis, & inspirationis Divinæ, eamque retinens, si est sanctificativa aliorum, inspirativa, & tibi ipsi, & alijs, perfectionis, & omnis boni; est imago Spiritus S. Non est verò talis imago, si tua voluntas non conformis cum DEO, ejusque Sanctissima Voluntate, si non ardet igne amoris, & dilectionis DEI, si frigida, vel tepida est, si inspirationes Divinas non suscipit, si alios ad perfectionem & amorem DEI non inflamat. Facta tali discussione confunderè coram DEO, si deprehenderis non esse te imaginem DEI, vel imaginem hanc esse in te sædatam, & turpiter deformatam. Proponere efficaciter te acturum ut deinceps retineas imaginem DEI & integrā, & illibatam: eamque imaginem post hac in majori te reverentia habiturum.

*Colloquium* ad Filium æternum, qui est imago Patris & figura substantiæ ejus Supplica Ei humiliter, ut reformet in te imaginem DEI per tua peccata deprævatam. Postula, etiam gratias, ut ei quàm perfectissimè, ceu exemplari & Archetypo conformari possis. In fine oratio à S. Patre usitata.

*Anima* Christi sanctifica me, Corpus Christi salva me. Sanguis Christi inebria me. Aqua lateris Christi lava me. Passio Christi conforta me. O Bone JESU, exaudi me. Intra tua Vulnera absconde-

conde me. Ne permittas me, seperari à Te. ab hoste maligno, defende me. In hora mortis meæ voca me, & Iube me venire ad Te. ut cum Sanctis tuis laudem te, & in æternum fruam te.

## DIEI SECUNDÆ

### Meditatio I.

#### De triplici peccato.

*Praludium 1.* Imaginare prælum illud, cuius scriptura meminit; Factum est prælum magnum in cælo, in quo S. Michàél, & Sancti Angeli ejus, in gratia Divina perseverantes pugnaverunt contra Draconem, & Angelos ejus.

*Praludium 2.* Postula gratiam, ut seriò apprehendas malitiam peccati, & statum illum, in quo creaturam rationalem peccata constituunt, & ut per veram poenitentiam, consurgere possis, ex tuis peccatis.

**PUNCTUM I.** Audi illa verba Iob. 4. *Celi non sunt mundi in conspectu ejus, & in Angelis suis reperit pravitatem.* Et considera 1mo. ad quem finem creatus est homo, ad eundem etiam omnino creatum fuisse Angelum, nimirum etiam Angelus creatus est, ut Dominum DEVM suum laudet, revereatur ei que serviens tandem salvus fiat.

*Considera 2do.* Quemadmodum homini concessum est viæ, & meriti tempus, data etiam sunt ei opportuna gratiæ Divinæ auxilia, ut in hac vita mortali DEVM meritoriè laudet, reveretatur ei que serviat in æternitate verò pro suis obsequijs; DEO præstis, & servitio ac laude ipsius, tanquam præ-

mium & mercedem recipiat, vitam, salutem, & beatitudinem æternam; ita & Angelo concessum est tempus viæ, seu meriti, vel demeriti, data sunt ei dona gratiæ Divinæ, & auxilia ad merendum necessaria, ut his sufficienter instructus DEUM laudaret, eique debitam reverentiam ac servitiū exhiberet, & per hæc mereretur beatitudinem, quæ in termino viæ suæ, conferenda illi erat in præmium.

*Confidera* 3tò Angelos dum essent in via, & statu meriti non omnes, prout obligati fuerunt, laudem DEO Creatori suo, reverentiam ac obsequium exhibuisse: sed plures illorum cum antesignano suo Lucifero, miserabiliter collapsos cecidisse, contra DEUM rebelles consurrexisse illique bellum per superbiam, vel quodcunque aliud quomodocunque explicabile suum peccatum intulisse.

*Confidera* 4tò Angelos eisdem, in hoc bello per quod contra DEUM consurrexerant victos, turpiter succubuisse: & in peccatum prolapsos è cælo exturbatos, & rudentibus ad infernum usquè detractos, à fine suæ Creationis, nimirum à salute, & Beatitudine, in æternum excidisse: & in perpetuum supplicium præcipitados esse.

*His* consideratis, exhorresce judicia DEI, quæ Angelis suis, nobilissimæ illi Creaturæ non pepercit, qui ob unum nonnisi peccatum, illudque cogitatione & voluntatis internæ assensu perpetratum, Angelos in inferno demersit, & æternâ punivit damnatione. Et reflecte te, supra tua peccata eorumque comparisonem facias cum peccato Angelorum. Angelus uno tantum peccavit peccato; tu innumeris. Angelus peccavit peccato superbiæ, Tu fortè reus es septem peccatorum capitalium. Angelus peccavit per actus internos intellectus & voluntatis, tu peccasti cogitatione, verbo, & opere. Angelus, siquidem status viæ il-

lius docetur non durâsse ultra triâ instantia: tam exiguo tempore in peccato hæsit: tu à tot annis in cæno peccatorum volutaris & fordescis. Diabolus cum Angelis suis, post unum à se commissum peccatum, non habuit indultum sibi pænitiæ tēpus, in flagranti statim crimine ad infernum detrusus, tot annorum millibus ibidem ardet, ardebitque semper, tu post tot tantaque peccata & scelera tua toleraris.

*Admirare* in te sustinendo & expectandâ tuâ pænitiâ, DEI patientiam & longaminitatem. Excita teipsum ad non differendam amplius tuam ad DEVM in toto corde conversionem. Ecce. nunc tempus acceptabile, ecce nunc dies salutis. Hoc tempus Pater misericordiarum tibi indulgit, fortè non daturus aliud, ut in amaritudi ne animæ tuæ desleas peccata tua, ut iugo peccati excusso abhinc DEO tuo in sanctitate servias omnibus diebus vitæ tuæ.

PUNCTUM II. Audi verba illa Psal. 48. *Homo cum in honore esset, non intellexit.* Et recole memoriâ primum peccatum Adæ, in paradiso commissum, per esum fructûs de arbore scientiæ boni & mali, contra gravissimam DEI prohibitionem, sub comminatione mortis non solum corporis, sed etiam animæ, sub comminatione exilij ex Paradiso, amissionis justitiæ originalis, gravissimarumque & multiplicium ærumnarum, quæ omnia non solum Adam & Eva perpeffuri erant, sed etiam hæ pænæ, in eorum posteros per propagationē naturalē ab ipsis descensuros, derivandæ erant. Recole itē memoriâ, quôd primi nostri Parentes per peccatum contra hanc prohibitionem commissum, omnia hæc mala & pœnas incurrerint & ipsorum posterij, iisdem malis obnoxij nascantur. Circa hoc peccatum & per ipsum promeritas pœnas.



*Considera* imo Quæ & quanta mala, unum peccatum Adæ, unius pomi prohibiti esus, in ipsum Adam & totum humanum genus induxerit. O quantum malum est æternum cum malis angelis in inferno supplicium! Huic malo ob hoc unum peccatum & Patres nostri ( nisi illud per tot annorum pœnitentiam, & Redemptionem Salvatoris evasissent ) & omnes ipsorum posteri ( nisi remedium afferatur, & applicetur? facti sumus obnoxij, ejusdemque rei. Hocque ipsum malum plures infelices posteri Adæ perpetiuntur, & tota æternitate sunt perpeffuri. Quantum item est malum mors animæ, & amissio justitiæ Originalis & donorum supernaturalium? Propter hanc animæ mortem nascimur filij mortis & filij iræ, prius damnati antequam nati.

Quantum ulterius malum est, dura illa servitus, & subjectio potestati dæmonum, insensibiliorum generis humani hostium? Illa carnis, concupiscentiæ, appetitus sensitivi contra rectam rationem rebellio? Illa disordinatio? depravatio, & corruptio naturæ, tanta illa in malum propensio? effrænis passionum vehementia? fomes peccati aliaque similia: Quantum præterea malum mors corporis? ad quam omnes damnati sumus? illi labores, qui in hoc exilio suscipi debent, ut in sudore vultus vescamur pane? Magna mala sunt fames sitis, nuditas, frigus, æstus, dolores corporis, cruciatus excogitabiles, tot illæ æruginæ, miseriæ & afflictiones, quibus concutimur, morbi tam multiplices, tam graves, tam diuturni. Hæc & quæcunque alia cogitabilia mala, quæ evenire solent, aut possunt, idque non solum quatenus primos nostros Paentes afficiebant, sed etiam quatenus afficiunt quoscunque eorum posteros ab iisque tolerantur sunt effectus & pœna peccati Adæ & infelicitis illius esus pomi prohibiti. Si peccatū  
hoc

hoc non fuisset, nunquam tantis malis obnoxij, & subiecti fuisset.

*Considera* 2do Quantæ malitiæ debuerit esse illud peccatum Adæ? quàm odibile D<sup>eo</sup>? ut tam gravi & multiplici pœna, eaque ad totum genus humanum quanta quanta est, extensa puniri debu-erit. Et tamen tota hæc pœna non adæquat gravitatem offensæ mortalis, totâ hæc pœnâ longè & magno excessu gravior est malitiâ culpæ mortalis quâ offenditur Deus. Tanta gravitas est peccati Adæ, & cujuscunque peccati mortalis, ut nullæ ei pœnæ, quantumcunque multiplicentur cō-mensurari queant, nec per illas justitiæ Divinæ ad æqualitatem satisfieri possit. *Considera* 3tio Esum illum fructûs arboris scientiæ, boni & mali, non fuisse ex natura sua malum, sed ex eo fuisse præcisè malum quia fuit à D<sup>eo</sup> prohibitus, quamvis absolutè loquendo potuerit non prohiberi. Quodsi prohibitio Divina non intervenisset, talis esus non fuisset actio peccaminosa sed fuisset vel actio honesta, vel saltè indifferens adeoque licita. Sunt verò aliqua talia peccata, quæ sunt ex natura sua mala & quæ non poterant non prohiberi. Talia peccata sunt idololatria, perjurium, homicidium, peccata carnis, aliaque his similia. Si ergo esus pomi vetiti tantum D<sup>eo</sup> displicuit, tantumquæ ei odibilis exstitit, quid sentiendum de peccatis ex natura sua malis, quanta eorum sit gravitas, quantum D<sup>eo</sup> sint odibilia.

*His* Consideratis, fac iterum comparisonem à te patratorem cum peccato Adæ; & faciliè agnosces peccata tua, & multiplicitate, & gravitate sua incomparabiliter excedere, & superare peccatum Adæ; quod tamen tantorum, imò omnium malorum exstitit causa, & origo. Cogita & illud, si peccatum Adæ; illa ipsius gula, & sensualitas tanta mala, & tot pœnas promeruit, pecca-

tis tuis longè majoribus & gravioribus quæ & quantæ debebuntur pænæ. Unus infernus, una mors, morbi dolores, & quantacunque mala, quæ totâ vitâ tuâ perpeffurus es, quid hæc sunt? in comparatione ad tua peccata, mille & amplius infernos meruisti, mille mortes: tanta meruisti mala, ut tot produci non possint, ut per ea tolerata satisfacias Justitiæ Divinæ.

O DEUS omnipotentissime, tantum processit malitia & gravitas peccatorum meorum, ut desint Iustitiæ tuæ pænæ & mala, quibus ea ad æqualitatem vindicare, & unde me secundum mensuram peccatorum meorum punire condignè possis, non desunt tamen Misericordiæ & Bonitati tuæ infinitæ, modi, & media unde, mihi possis misereri. Ad hanc & ad thronum gratiæ tuæ maximus peccator confugio, miserere peccatrici animæ meæ, ne perdas eam cum impijs, sed veniam delictorum meorum mihi benignissimè indulge.

PUNCTUM III. Revoca in memoriam peccatum particulare seditiosorum Core, Dathan, & Abiron, de quo habetur Num. 16. Consurrexerant hi contra Moysen & Aaron, & potestatem sacerdotalem sibi usurpare volentes, ad quam elegerat DEUS Aaron cum Filijs suis, ausi sunt thus DEO adolere, quod solis sacerdotibus licitum fuerat. Hunc temerarium eorum ausum, ita punivit DEUS, ut eos thus adolentes cum tabernaculis ipsorum, & tota substantia, terra disrupta absorpserit, & devoraverit, vivosque ad infernum, transfuderit.

Exhorresce tantam peccati illius pœnam sed magis ejusdem peccati gravitatem, & cogita: de pluribus peccatis seditiosorum illorum hominum non constat, hoc unicum memorat scriptura, propter quod ad infernum detrusi sunt, pluresque in inferno damnatos inveniri scias, qui ob unum peccatum

catum vel certè ob delicta tuis longè pauciora & leviora, æternis pænis cruciantur. Et meritò, tanta enim etiam unius peccati gravitas, tanta DEI offensi excellentia, ut inferno; & gravissimis pænis etiam unum peccatum mortale puniri debeat.

*Refleète* deinde te, supra te ipsum. ô quoties, iram DEI meruisti? Quis ulticem Divinam manum continuit, ne post illud peccatum fulmine te feriret, ne terra vivum te absorberet, ne, subitanèa morte percussus in infernum & tenebras exteriores projicereris? non acceleravit Deus pænam tuam dissimulans peccata tua propter pænitentiam, quâ à te fieri desiderat. Vide ergo ut hanc seriò facias, vide ne adijcias, ut ultra pecces, Quis enim securum te fecit, post peccatum, quod fortè patraturus es, indulgendum tibi, pænitiæ tempus? & non potius, quòd post peccatum, quod commissurus es, sis immediatè, in finali impænitentia, morte percutiendus.

*Colloquium* ad Beâtissimam Virginem Matrem Misericordiæ, cujus patrocinium invoca, humiliter supplicans, ut Filio suo te reconciliet, ut per illam te ad gratiam suam recipiat, qui per ipsam datus tibi est, ut te redimeret.

*In fine Pater noster. AVE MARIA*

## Meditatio II.

### De peccato

*Praludium* 1. Imaginare, quòd peccator per peccatum contra DEUM assurgat, eique bellum inferat.

*Praludium* 2. Pete à DEO gratiam, quâ illuminatus gravitatem peccati penetrare & ipsius horrorem concipere possis.

Pun-

PUNCTUM I. Audi illa verba Iob. 15. *Tendit adversus DEUM, manum suam: Contra Omnipotentem roboratus est.* Et considera per quodvis peccatum, precipuè verò per peccatum mortale ad eam venire insaniam & dementiam, ut contra DEUM manum suam tendat, bellum DEO inferat, eum hostiliter aggrediatur, DEUM & ejus perfectiones quantum in se est tollere, destruere, & annihilare conetur.

*Inprimis* peccator per suum peccatum vult tollere DEUM, vult DEUM non esse, & ex hoc pessimo affectu, quo affectat DEUM non esse, frequenter stultè sibi persuadet, defacto DEUM non dari, juxta illud Psalmi: Dixit insipiens in corde suo non est DEUS. Idem peccator vult tollere DEUM, dum vult tollere perfectiones Divinas DEO identificatas, sine quibus DEUS nequit esse DEUS. Et hac ratione vult peccator tollere in DEO rationem finis ultimi, dum se à DEO, qui finis ultimus verus est, avertit, & convertit se ad creaturas, in iisque, & earum usu suam reponit felicitatem, vel certè se ipsum pro fine suo ultimo statuit.

*Vult 2do* Peccator tollere beatitudinem, & felicitatem DEI, qua in seipso summè felix, summè beatus est, dum DEUM suo peccato contristare & ad amaritudinem provocare nititur. Propter quam impietatem Oseas maledixit Samariæ dicens; Pereat samaria quoniam ad amaritudinem concitavit Dominum.

*3tio* Immenfitatem Divinam vult tollere peccator, vellet enim tunc dum peccat DEUM non esse sibi præsentem. In scelera tam impudenter se resolvit, eaque sine fronte patrat, atque si DEUM præsentem non haberet.

*4to* Peccator & peccatum, affective tollit supremum in creaturas DEI dominium. Contra jus, & voluntatem supremi hujus Domini, potens  
tjs



tijſ animæ ſuæ, ſenſibus, organis, & membris corporis, alijsque creaturis in offeſſam illius ipſius abutendo.

5<sup>to</sup> Peccator tollere nititur libertatem DEI, impediendo ne DEUS ſuâ libertate utatur, ne id fiat, quod DEO placet, faciendo ne DEUS operetur ſecundum determinationem propriæ voluntatis, ſed cum aliquatenus neceſſitando, ut ſequatur determinationem voluntatis creatæ, ut contra ſuâ omnem inclinationem, imò cum ſumma renitentiâ & diſplicitiâ concurrat ad peccatum, ſitque ſervus ipſius peccatoris, juxta lamentabilem illam querimoniam apud Prophetam. ſervire me feciſti in peccatis tuis, præbuiſti mihi laborem in iniquitatibus tuis.

6<sup>to</sup> Peccatum tollere conatur ſumnam ſimplicitatem & unicitatem DEI, ſiquidem, peccator plures ſibi adſciſcit DEOS eosque colit ut exiſtimat S. Hieronymus, ſcribens in illa verba Pſalmi. Non erit in te DEUS recens, cui DEUS venter eſt, DEUS ei recens eſt, quotcunque vitia habemus, quotcunque peccata, tot habemus DEOS, iratus ſum, ira mihi DEUS eſt, vidi mulierem & concupivi, libido mihi DEUS eſt. Unus quiſque enim quod cupit & veneratur hoc illi DEUS eſt.

7<sup>mo</sup> Peccator per peccatum adverſatur ſapientiæ divinæ omnia clariffimè cognofcenti, & penetranti, vel quatenus impiè exiſtimat ſua peccata à DEO non cognofci, dicens, in corde ſuo, DEUS poſuit nubem latibulum ſuum, noſtra non conſiderat, vel quatenus ponit objectum ſædiſſimum oculis divinis, maximè indignum, ſummè exoſum & abominabilè, ejusque poſitione DEUM & illius ſcientiam ex ſe determinatam ad videndum quidquid exiſtit, quodammodo neceſſitat, ad illud ipſum ſuum peccatum tota æternitate intuendum.

8<sup>vo</sup> peccatum adversatur Omnipotentiae divinae. Peccator enim sua resolutione in peccatum, videtur sibi persuadere, peccata sua DEUM vindicare non posse.

9<sup>no</sup> Tandem ( ut tot alias præteream perfectiones Divinas ) peccator adversatur Iustitiae Divinae, dum præsumendo de Divina misericordia, putat DEUM sua peccata vindicare nolle, nec vindicaturum unquam.

Has tres postremas perfectiones Divinas oppugnari per peccatum advertit optimè, mellifluus Doctor D. Bernardus, dum de voluntate peccatoris, sic discurret: Omnino vellet DEUM, peccata sua, aut vindicare non posse, aut nolle, aut nescire. Vult ergo eum non esse DEUM, quæ voluntas quantum in ipsa est, vult eum aut impotentem, aut injustum aut insipientem esse.

His consideratis exclama, O impietatem! O crudelitatem! exclama cum eodem Bernardo: Crudelis, & execranda malitia est, quæ Dei potentiam, Iustitiam, sapientiâ, cæterasque perfectiones perire desiderat.

Reflecte deinde te an non tetenderis aliquando adversus DEUM, manum tuam? an non sis roboratus adversus Omnipotentem? an perduellionis, rebellionis contra DEUM, imò affectati Deicidij non sis reus. Reflecte te supra, anteaquam vitam tuam quoties DEUM tollere & annihilare attentasti? quoties summam illam felicitatem ad amaritudinem concitasti? Reflecte te, dum peccares, credidistine vivâ fide DEUM tibi præsentem esse? Quam sæpe contra jus & supremum Dominium Dei in creaturas, his ipsis se abusus, ad nefandas turpitudines tuas? Recogita, quoties DEUM servire tibi fecisti in iniquitatibus tuis; quot & quos Deos recentes habuisti? Reflecte te supra fæditatem & gravitatem tot peccatorum tuorum, & mente  
revol-

revolve, quàm abominandum objectum, Divino intellectui & scientiæ objeceris, tota æternitate à DEO, cum summa abhorrentia, displicentia, & abominatione conspiciendum. Tandem reflecte te, an prava tua voluntate non affectaveris, DEUM tua peccata vindicare aut non posse, aut nolle, aut nescire.

Confundere coram DEO, de impietatibus tuis: concipe horrorem, quàm maximum cujusvis peccati: detestare tantam peccatoris, & tuam dementiam, atque in ipsum DEUM attentatam crudelitatem. Dele peccata tua tali affectu.

Itane DEUS meus infelix ego homo, itane, aliquando impius & crudelis, in te existi? ut te fontem omnis esse, perire & annihilare affectaverim. Tu me creasti, esse & vivere mihi dedisti, quidquid sum, tuâ gratiâ & beneficijs sum, ex nihilo meo Tu me extraxisti, & ego Te tuo esse spoliare volui. O quanta dementia, quanta impietas mea! Dereliqui Te fontem vivum, & feci mihi cisternas dissipatas. Averti me à Te ultimo fine & summo bono meo, & converti me ad bonum creatum imperfectum defectibile, quod cor meum quietare non valet. Tu me Te ipso beatum & felicem reddere desideras, & ego Te ad amaritudinem concitavi, & infelicem reddere volui. Præsentiam tuam mihi concedis, ut in Te vivam, movear & à te conserver, ego ut Te offenderem, locum quæsi ubi non existeres, optavi non esse Te ubique præsentem, non esse Te immensum. Tu constituisti me super omnia opera tua, omnia subjecisti sub pedibus meis, ut tibi soli subessem, ego Dominio tuo Te spoliare attentavi. Vocasti me in libertatem filiorum DEI, ego Te mihi servire coegi in iniquitatibus meis, Tu me tot beneficijs, tuis Tibi obstrinxisti, ut Te solum, & unicum DEUM, agnoscerem, laudarem, Tibique, uni DEO cor  
totum

totum consecrarem: Ego tot Deos mihi feci colui, tibi que prætulī. Tu mei intellectus & obtatus objectum præstantissimum, summè satiativum, per totam æternitatem esse voluisti: Ego quot objecta quàm fæda, quàm detestanda coram purissimis oculis tuis aversantibus hujusmodi turpitudines pro tota æternitate conspicienda posui? Tua sapientia me regit, Tua ònipotentia me sustentat, Tua justitia præmiare desiderat: Ego miser insipientem, injustum, impotentem, Te esse volui. Quibus igitur lacrymis, desilire potero insipientiam meam. O anima deduc quasi torrentem lacrymas, non taceat pupilla oculi mei.

PUNCTUM II. Audi illa verba Lucæ 15. *Pater peccavi in Cælum & coram te.* Item illa verba, ad Hebræ. 10. *Quanta putatis mereri supplicia qui filium DEI concukaverit, & spiritui gratia contumeliam fecerit.* Et considera quodvis peccatum, sed maximè mortale, tantæ virulentia & malitiæ esse, ut quantum de ipso est, non solum opponatur, & maximè adversetur Deo quo ad suam essentiam, omnibusq; Personis Divinis cõmunia (quæ Theologi prædicata absoluta vocant) spectato; sed etiam ut opponatur prædicatis relativis hoc est, ipsis Personis Divinis contra illas pugnet, casque tollere nitatur. Offendis Deum peccato, peccas in Patrem æternum, concultas Dei Filium, facis contumeliam Spiritui Sancto.

Sunt quidem certa aliqua peccata quæ specialius opponuntur quibusdam Personis Divinis, & contra aliquas in particulari magis pugnant. Quædam enim peccata dicuntur esse specialiter contra Patrem æternum. Quædam contra Unigenitum Patris Filium: quædam contra Spiritum Sanctum, de quibus Christus pronuntiavit, quod non remittantur neque in hoc sæculo, neque in futuro. Quale peccatum à plerisque existimatur despera-

desperatio conjuncta, impænitentiæ finali, in qua quis moritur. Nihilominus, commune est, omnibus peccatis, quod singula ipsorum, omnes & singulas personas Divinas impugnent.

Quod ipsum ulteriùs exinde cognosces: *Imò* Quia quando in peccatum quodcunq; te resolv-  
vis, lædis imprimis potentiam Divinam: tuo e-  
nim lapsu, facis infirmiolem, virtutem & poten-  
tiam DEI, te adjuvantem: te contra dæmonem,  
ejusque tentationes armantem; & tecum contra  
hostes animæ tuæ dimicantem. E contra dæ-

monem, tentationem, potestatem tenebrarum, fa-  
cis & reddis fortiolem. Quia facis eam prævale-  
re, potentiæ Divinæ, te adjuvanti. Offendis adhuc  
potentiam Divinam, non utendo viribus, & au-  
xilijs, quæ tibi Deus confert, ad superandum ho-  
stem; imò etiam potentiâ & concursu Divino, ab-  
utendo, ad patrândam offensam ipsius. Læ-

dendo verò, & offendendo potentiam Divinam,  
delinquis in Patrem æternum, cui specialiùs at-  
tribuuntur ea, quæ spectant, ad Divinam potentiam,  
& quæ hanc concernunt. Quovis etiam pec-

cato, offendis & conculcas Filium DEI: quatenus  
offendis, & lædis sapientiam Divinam, Fi-  
lio DEI, specialiter appropriatam, qui etiam, Sa-  
pientia Patris dicitur. Hanc autem, nimirum sa-  
pientiam offendis, quatenus peccando, stultè agis;  
dum sapientiam hujus mundi, quæ stultitia apud  
DEUM est, præfers sapientiæ, quæ secundùm DE-  
UM est; dum aliter de rebus judicas, quàm DE-  
US sentiat & judicet.

Offendis præ-  
terea Spiritum Sanctum, & facis contumeliam  
spiritui gratiæ, per quodvis peccatum; quatenus  
quovis peccato, pugnas contra Bonitatem DEI, quæ  
specialiter attribuitur, & appropriatur Spiritui S.  
Contra hanc autem pugnas. quia nihil magis, op-  
ponitur summæ Bonitati, quam summa malitia.



Malitiam verò, cujusvis peccati, summam malitiam, & summum malum, appellat S. Augustinus, per contra positionem, cum summo Bono; dum dicit: Unum est summum Bonum, scilicet DEUS: aliud summum malum, scilicet peccatum. Illud propter quod, appetenda sunt cætera bona; ipsum autem propter seipsum. Hoc, propter quod declinanda sunt cætera mala; ipsum verò propter seipsum.

Pugnat adhuc quodvis peccatum, contra Bonitatem Divinam, adeoque contra Spiritum S. Quia per quodvis peccatum, Divitiæ Bonitatis Divinæ contemnuntur. Quia dum peccas: Bonitati Divinæ retrahenti te à peccato, præfers bonitatem creatam, quæ te movet, & invitat ad peccandum.

2dò Quovis peccato, offenduntur omnes Personæ, Sanctissimæ Trinitatis, quatenus quodvis peccatum, pugnat contra fines Creationis, Redemptionis, & Sanctificationis. Quæ opera Creationis, Redemptionis, & Sanctificationis, tribus Personis Divinis, singula singulis, specialiter attribuuntur. Quovis peccato, offends Patrem æternum; Quia quodvis peccatum, opponitur fini Creationis, qui est laus & gloria DEI, reverentia & obsequium ipsius, quæ per quodvis peccatum, tolluntur vel imminuuntur. Offendis, & conculas Filium DEI. Quia peccatum tuum, opponitur fini Redemptionis, qui hic præcipuus fuit, ut auferretur peccatū, ut finem acciperet prævaricatio.

Offendis tandem Spiritum S. per quodcunque peccatum; quia quodvis adversatur, fini Sanctificationis. Peccatum enim mortale, privat gratiā sanctificante; expellit charitatem, quæ diffusa erat in corde tuo, per inhabitantem Spiritū S. contumeliā facit tot gratijs actualibus, quas abijcis, contemnis, & inefficaces reddis; adeoq; contumeliam

meliam Sacis, spiritui gratiæ.

*His consideratis*, iterum exhorresce peccatum; detestare malitiam ipsius, toto cordis affectu, dicendo. O Pater! ò Fili! ò Spiritus Sancte! ò Trinitas Divinissima! ò DEUS meus & omnia, quo tandem dementiæ deveni, ut Pater æterne, in Te & coram Te peccarem? ut Unigenite Fili Patris, Te sacrilego pede conculcarem? ut Sanctissime Spiritus Te contumeliâ afficerem? Viscerosissimè doleo, quod vos, ò Sanctissimæ Divinæ Personæ, offenderim. Pater æterne doleo, quod læserim potentiam, tibi specialiter appropriatam; quæ d imminuerim laudem, & gloriam tuam, propter quam creatus sum. Fili æterne doleo;

quod stultitiâ meâ, offenderim sapientiam tuam, quod commitendo peccatum, finem redemptionis tuæ, quantum ex me fuit, aliquatenus impediverim.

Sanctissime Spiritus doleo, quod contra summam tuam Bonitatem deliquerim; quod me evacuaverim, gratiâ sanctificante, æternisq; donis tuis; quod sanctas tuas inspirationes, quibus me à peccato retrahebas, inefficaces reddiderim. Firmissimè propono, non me Vos ampliùs offensurum.

PUNCTUM III. Audi illa verba Proverb: I. *Vocavi & renuistis. Despexistis omne consilium meum, & increpationes meas neglexistis.* Et Levit. 26 *Rogabant pro peccatis suis, eò quod abjecerint iudicia mea, & leges meas despexerint.* Et considera peccatum ita contrariari DEO, ut nihil sit in DEO, quod intactum relinquat; nihil quod non oppugnet; quod non lædat. Lædit Essentiam Divinâ, & prædicata ejus absoluta: ut in Imò puncto considerasti. Lædit Personas Divinas, & prædicata DEI relativa: ut considerasti puncto 2dò. Lædit insuper prædicata DEI libera, & contingentia, quæ ita sunt in DEO, ut potuerint non esse:

quatenus omne peccatum, opponitur præceptis, judicijs, legibus, & consilijs Divinis. Omne enim ut docet S. Augustinus est dictum, aut factum, aut concupitum contra legem æternam. Omne peccatum est transgressio legis, est abjectio, neglectus, despectio judiciorum, præceptorum, consiliorum DEI.

Etiam hæc consideratio concutiat cor tuum: augeat in te horrorem & abominationem peccati: augeat ruborem, & confusionem de peccatis tuis, quibus tam atrociter DEUM offendisti: accendat te deniq; ad seriam, & efficacem detestationem, & emendationem eorundem.

Colloquium fiat, per hunc, vel similem affectum. O quantum erravi DEUS meus, quod te vocantem secutus non sim, quod consilium tuum despexerim, quod increpationes tuæ, non me deterruerint à malo, quod judicia tua abjecerim, quod leges tuas sæpius transgressus sim, quod præcepta tua non servaverim. Sequar ab hinc te vocantem, audiam consulentem, corripente increpante: custodiam judicia tua, leges, & præcepta tua, cum tuæ gratiæ auxilio non transgrediar unquam, usq; in æternum.

*In fine Pater noster.*

### Meditatio III.

## De peccatis venialibus, & eorum odibilibitate.

*Preludium I.* Imaginare Parentem aliquē, indignantem filio, quem amat, ob aliquas levēs sui irreverentias, & culpas contra se commissas; & ex hac causa, ad aliquod tempus, eundem à conspectu, consuetudine suâ arcentem,

*Pra*

*Praludium 2.* Pete gratiam, ut possis cognoscere, peccati venialis malitiam; illudq; detestari, & vitare,

PUNCTUM I. Audi Psalmistam dicentem Psal. 18. *Delicta quis intelligit.* Et hæc verba, peccatis venialibus accommoda, atq; considera; quod licet multi mortalium, nulla delicta videantur intelligere; nec apprehendant ipsorum gravitatem, malitiam, differentias, pœnas, & damna ex ipsis provenientia; maximè tamen plurimi non intelligunt, nec apprehendunt delicta illa, quæ peccata venialia appellamus; imò nec intelligere volunt, ut bene agant, talesq; lapsus præcaveant; ita ut meritò quæri possit: *Delicta quis intelligit?*

Ac inprimis rarus est, qui practicè, & in ordine, ad efficacem, suæ conscientiae directionē intelligat peccata venialia, quoad suam malitiam & odibilitatem. Parvi pendimus communiter, lapsus hos veniales, dicimusq; levè est istud, possum hoc facere, possum cōmitere. De minimis non curat Prætor, parum pro nihilo reputatur. Et tamen S. Basilius miratur, quòd, aliquod peccatum, levè dici possit dum quærit: *Quis est, qui peccatum ullum, cujuscunque modi sit, levè audet appellare?* Docet quidem fides, contra Jovinianum, & alios hæreticos, non omnia peccata esse æqualia, sed quædam alijs graviora vel leviora, quædā præterea esse mortalia, quædam venialia. Cæterum illa, quæ venialia sunt, levia sunt, & dicuntur, respectivè ad mortalia: levia præterea sunt, quòd non tollant gratiam sanctificantem: quòd non mereantur pœnam æternam: quòd non sint contra præceptum, graviter obligans: Nihilominus, iisdem peccatis convenit, quòd per illa offendatur, & contemnatur summa Majestas, DEUS summè dignus, & omni æstimatione superior. Ex vi cujus sui prædicati, in apprehensione nostrâ

nullum peccatum leve esse, nullum parvi pendi debet. Certè ut ait citatus Basilus, *leve nunquã est, DEUM, etiam in exiguo contemnere.*

2dò Rarus est qui venialia intelligat, quoad suam differentiam à mortalibus. Intelligimus quidem, venialia esse illa, quæ digna sunt veniã, & facile deleri possunt: quæ non dissolvunt, amicitiam cum DEO, nec auferunt vitam animæ: mortalia autem esse illa, quæ (ut loquitur S. Augustinus) *uno ictu perimunt, & vitam animæ tollunt:* Cæterum in praxi frequenter fallimur, dum persuademus nobis, multa esse venialia, nec graviter læsiva conscientiæ, quæ tamen gravia & lethalia sunt. Quotus est; qui damnificationes, quas-cunque in bonis fortunæ, si parvæ sint, non habeat pro peccatis venialibus: cum tamen illa damnificatio, etiam in re parva, quæ conjuncta cum antecedentibus materijs, efficit quantitatem notabilem, & per quam pervenitur, ad damnum proximi grave, sit peccatum mortale. Quotus item est; qui interiores aversiones animi, à proximo: diffamationes, & denigrationes famæ alienæ; seminationes discordiarum, peccata gravia esse exstimet. multi hæc, finè discrimine pro venialibus habent; cum tamen secundum materiæ gravitatem, gravia esse possint & soleant. Quis est? qui sibi persuadeat, posse peccari mortaliter, dicendo. Fratri suo fatue; & tamen, ex veritatis æternæ oraculo, discimus, talem esse reum gehennæ, qui reatus solis convenit peccatis mortalibus.

3tîd Rarus est, qui intelligat delicta venialia, quoad differentiam à defectibus, & imperfectionibus. Universaliter, quidquid non est contra præceptum obligativum, sub peccato, sed est vel contra consilium Christi, vel contra inspirationes Divinas, excitantes ad aliquid perfectius, vel

contra



contra leges, ita præscribentes actionem aliquam, vel omissionem actionis, ut sub nullo obligent peccato quales leges reperiuntur, & reperiri possunt in aliquibus Religionibus; omne id pro imperfectione, & defectu non peccaminoso haberi solet. Cum tamen frequenter, actiones aut omissiones hujusmodi, à peccato saltem veniali, excusari non possint, vel propter obligationem aliunde supervenientem, puta ratione contractus expressi, aut taciti; ratione inobedientiæ; si legitimus Superior, impletionem consilij, seu legis, non obligantis sub peccato, præcipiat; item ratione statûs ex vi cuius teneretur quispiam, tendere ad perfectionem; vel ratione scandali & offensionis pusillorum; vel ratione annexæ tepiditatis, & remissionis in curanda salute, & in profectu in virtutibus ac perfectione; vel deniq; ratione inordinati affectûs, & nimiae inclinationis, ad aliqua vana, sensualia & similia.

4<sup>ta</sup>. Rarus est, qui intelligat delicta venialia, quoad differentiam illorum, inter se. Inter quæ tamen, magna diversitas est. Quædam enim venialia ad alia comparata, sunt graviora, intra rationem peccati venialis, quædam leviora: quædam sunt, quæ ex ignorantia: quædam quæ ex fragilitate: quædam quæ ex malitia committuntur: aliqua rarius, aliqua ex habitu & consuetudine perpetrantur: aliqua fiunt ex plena advertentia, & deliberatione: alia per inadvertentiam, vel cum advertentia semiplena: aliqua in oculos incurrunt, alia sunt occulta.

Hæc differentia in ordine ad praxim, deberent benè intelligi ut major sollicitudo & diligentia habeatur, ad quædam præcavenda, quam circa alia. Major ut caveantur deliberata, quam indeliberata: item ut magis vitentur, quæ fiunt ex malitia, ex consuetudine, quæ alios scandalizant, quam illa quæ fi-

unt ex fragilitate, vel ex ignorantia: quæ rariùs contingunt, nec sunt conjuncta cum scandalo.

5<sup>to</sup> non est, qui intelligat damna, ex venialibus oriunda: qualia sunt, quod veniale inquinet animam, eique turpem inspergat labem: quod minuat fervorem charitatis: quod vires animi debilitet: quod disponat ad mortale: quod pænis gravibus, peccatorem obnoxium reddat: quod impediatur progressum in via spirituali: quod DEO, & Angelis, alijsq; Cælitibus, ratione peccati venialis, homo displiceat.

6<sup>to</sup> non est qui intelligat, & ritè expendat, motiva retrahentia à talibus peccatis, & remedia contra eadem inquirat.

7<sup>mo</sup> tandem, non est qui intelligat, quantum deflenda sint, hujusmodi peccata: sicut enim non æstimantur; ita nec deflentur à multis. De S. Paula scribit S. Hieronymus, eam levia peccata ita planxisse; ut eam, gravissimorum criminum, crederes ream. Utinam simili ratione, defleantur ab alijs. Modus etiam illa tollendi ignoratur: cum tamen juxta doctrinam Concilij Tridentini, multis modis tolli possint.

Fac reflexiones convenientes. Proposita statue. Affectus varios elice, detestationis, doloris: quod tot, tantisq; peccatis venialibus, DEUM offenderis etc. etc.

PUNCTUM II. Audi illa verba Judicis, an Creditoris Evangelici, ad quendam debitorem, Matth. 5. *Non exibis hinc, ( id est ex carcere ) donec reddas, ad novissimum quadrantem.* Et occasione hujus sententiæ, id quod obiter considerasti, in puncto præcedenti, diligentius nunc expende. Nimirum quod DEUS, non leviter puniat, levia peccata: quod minimos hos & novissimos quadrantes, velit sibi, plenissimè solvi. Sed quomodo illi solvuntur, quomodo redduntur?

Solvuntur per hoc, quòd peccator, si ipse, pro ijs non satisfaciat; cogatur luere pœnas, quas ipsi Divina infligit Iustitia, idq; luit aliquando pœnas in altera vita, in qua flammis purgatorij expiatur, aliquando verò luit pœnas, in hac vita, varios dolores, morbos, tribulationes, ipsam etiã corporis mortem sustinendo. Omnes hæ pœnæ, graves admodũ sunt.

Graves sunt pœnæ purgatorij. Quia aliquæ pœnæ purgatorij, quibusdã infligendæ, intensione majores, futuræ esse putantur, quàm pœnæ inferni.

Sed nec illæ leves sunt pœnæ, quibus, in hac vita, punit DEUS peccata venialia: ut videre est in tot exemplis, ex sacra scriptura desumptis. Certè gravis pœna fuit, lapidatio ab omni populo, illius, qui aliquot ligna, in Sabbatho collegit. Gravis fuit pœna, exitium Achan, cum tota familâ suâ, propter aliqua spolia furtivè asservata, contra prohibitionem Divinam: gravis fuit pœna, lepra, quâ percussa est Maria, Soror Moyſis, propter aliquam suam murmurationem. Gravis pœna fuit, Moyſis, tanti amici DEI, qui ob aliquam incredulitatem, ad aquas contradictionis, ingressu, terræ promissionis est prohibitus. Graves fuerunt pœnæ, illa clades, & sublatio septuaginta millium hominum, per pestilentiam, propter aliquam vanitatẽ, à David commissam, in numeratione populi. Pœna Heli Sacerdotis, qui, ob omisſam asperiores oburgationem filiorũ, subitã, & funestã morte percussus est. Spoliatio Ezechix Regis, omnibus thesauris, propter jactantiam ipsius in præsentatione eorundem, admissam. Occisio Prophetæ à leone, quòd in loco prohibito cibum sumperit: Mors subitanea Ozæ Sacerdotis: propter parvam irreverentiã, Arcæ Domini: Tandem mors repentina, Ananiæ & Saphiræ, propter cõmissum mendaciũ & aliquã retentionẽ, propriæ pecuniæ. Hæc considerans reflecte te supra tuas scelerum

D5

rum

rum violationes, supra murmuraciones, vanitates, jactantias, irreverentias DEI præsentis, mendacia, & alia peccata venialia, à te commissa. O quoties & tu, per hæc, omnes illas pænas meruisti? Exhorresce. Admirare patientiam DEI, in tolerandis tanto tempore, tuis delictis, detestare illa, & lacrymis pænitiæ ablue. Fac proposita, de vita in posterum emendanda. Protestare, te potius velle, tuis mortificationibus, abstinentijs, elemosynis, indulgentiarum usu, alijsq; pijs operibus, satisfacere Justitiæ Divinæ; quàm, ut illa à te tam rigidas, exigat pænas. Postula ulteriorem DEI patientiam, dicens humili corde: Misericordissime DEUS, patientiam habe in me & omnia reddam tibi: & quia ex me, solvendo toti debito meo non sufficio: pretium solutionis, usurpo mihi, ex vulneribus, Domini mei JESU Christi, infinitumque thesaurum, Meritorum ejus offero, in satisfactionem pro peccatis meis.

PUNCTUM III. Audi verba illa Ecclesiastici 19. *Qui spernit modica, paulatim decidet, & iterum. cap: 3. Qui amat periculum peribit in illo.* & diligentiori consideratione expende, hoc gravissimum incommodum, ex peccatis venialibus provenire; quòd per illa procedatur, ad peccatum mortale, quòd is qui spernit modica, facilèq; committit peccata levia, sensim à pietate decadat; decadat à statu gratiæ, in statum perditionis; quòd peccatis levibus & venialibus, sit annexum periculum labendi, in peccatum mortale, & per hoc incurrendi, mortem animæ.

Peccata venialia, sunt stuppa accensa, quæ nisi extinguatur, domus tota incenditur, & in flammam abit: sunt fons exiguus, scaturigo & rivulus, ex quo profundissima flumina, suam ducunt originem: sunt illæ aquæ torrentis, per quas aliquando ductus est Ezechiel Propheta; quæ primum fuerunt

fuerunt ad talos, creverunt postea ad genua; postea ad renes; tandem factæ sunt aquæ profunditorrentis, qui transvadari non potest. Peccata venialia sunt illæ vulpeculæ, de quibus scriptura, quæ si non capiantur, demoluntur vineam: sunt morbi, qui si contemnantur, nec tempestivè currentur fiunt lerales: sunt fluctus, innavem irruentes, & aquæ stillantes, quæ si non exhauriantur, mergunt navim.

Peccata venialia præcipitare in peccata mortalia, docuit infelici suo exemplo, Saul, de quo S. Chrysostomus homil. 87. in Matthæum. *Saul dum Samueli non obtemperavit, paulatim ac paulatim labens non fletit, quousq; ad perditionis baratrum, se immisit.* Docuit item Judas proditor, de quo Hugo à S. Victore sic ait: *Judam in baratrum nequitia, præcipitavit neglecta, minimorum cautio.*

Hæc ipsa veritas, similitudinibus illustrata, & exemplis declarata, etiam rationibus firmari & solidari potest.

*1ma* Ratio propter quam venialia peccata, sunt gradus & dispositio ad mortalia est hæc. Quia venialia, cum imminuant fervorem charitatis, impediunt tot auxilia gratiæ divinæ, faciuntq; : ut in pænam illorum, DEUS deneget homini, gratias victrices & efficaces, ad superandas graves tentationes; quibus homo destitutus, succumbit tentationi, pravâq; suâ voluntate, labitur in peccatum mortale.

*2da* Ratio est: quia ex frequentibus, venialibus crescit habitus, & quædâ peccandi audacia, ut docet S. Gregorius 1. moral. cap: 14. *si curare parva negligimus, insensibiliter seducti, audenter etiam majora perpetramus.*

*3tia* Ratio est: quia per frequentationem, aliquorum peccatorum venialium, ita crescit, & radicatur affectus, ad quædam vana & sensualia; ut homo resolvat se, ad perpetranda mala, etiam



graviora ; ne cogatur deferere quod vanum est, quod ipsum, insinuat S. Augustinus, dum dicit: *Dum amantur vana, perpetrantur mala.*

Seriò hæc apprehende, & si horres peccata mortalia, tuamq; perniciem, exhorresce peccata venialia. Reflecte te deinde, an & tibi peccata venialia, non fuerint passus, & gradus ad perpetranda mortalia? Reflecte iterum te, si forte in peccatum grave, aliquando prolapsus es; an in hoc statim te resolveris, an non potiùs, resolveris te priùs, in tot peccata venialia? Detestare illa quàm maximè. Confundere de illorum vilipensione, de tua facilitate ad ea committenda. Proponere, curaturum te impensè, cum gratiæ Divinæ auxilio, ne ullo, præcipuè deliberato peccato, DEUM unquam offendas.

In colloquio postula supplex, à Christo & Matre ejus Sanctissima, ab omni culpa immuni, nè permittant te his arenis obrui. In fine Pater noster : Ave Maria

## D I E S III.

### Meditatio. I.

### De Filio prodigo.

*Preludium 1.* Imaginare, te esse Filium prodigum, qui à Deo, tanquam Patre tuo recessisti, & substantiam, tibi ab eodem datam, dissipasti.

*Preludium 2.* Postula gratiam, ut qui Evangelicum filium prodigum secutus es peccantem, sequaris pariter pœnitentem; ejusque exemplo, ad veram & seriam exciteris pœnitentiam.

*PUNCTUM I.* Audi illa verba, de Filio prodigo Lucæ 10. *Abijt in regionem longinquam & ibi dissipavit substantiam suam.* Et iterum : *Cupiebat implere*

*implere ventrem suum de siliquis, quas porci manducabant, & nemo illi dabat.* Hæc audiens, revoca in memoriam, parabolam de filio prodigo, & existima, hunc filium prodigum, esse typum, & imaginem cujusvis peccatoris Christiani.

Accipit ille *imo* substantiam, sibi à Patre cælesti exdivisam, dum accipit dona plurima sive naturæ, sive gratiæ. Dona naturæ, quæ accipit, sunt vita, valetudo bona, vires corporis, talenta & animi dotes, scientiæ & eruditio, rerum experientia, bona educatio, & institutio, indoles ad bonū flexibilis, ingenua, honestatis amans, & similia. Dona gratiæ sunt, gratia sanctificans, in Baptismo accepta, ac deinde per bona opera, & Sacramentorum usum, aucta. *et vitam* Habitus infusi virtutum, vocatio ad fidem veram; sanctè & salubriter instituendam. Item dona gratiæ sunt: Merita Christi, unicuiq; si ipsa sibi usurpare velit, facilè applicabilia: propria etiam merita, cujuscunq; Christiani, sanctæ illustrationes intellectus, motiones supernaturales voluntatis, bona desideria, resolutiones heroicæ, virtutis & perfectionis amor, fervor in Divino obsequio etc. Hæc dona, dat liberaliter Pater Cælestis: filiis suis: dat eo finetam amplam substantiam: ut eam magis ac magis augeant: dat cum illa adhortatione: *negotiamini dum venio*; ut qui quinq; talenta accipit: superlucetur alia 5. ut thesaurizemus thesauros indeficientes: ut abundemus in omne opus bonum

*Cosidera 2dò* Acceptâ tam amplâ à Patre nostro substantiâ, quid facimus degeneres filij? Ecce abimus, in regionem longinquam; elongamur, à beneficentissimo Patre; imus in regionem umbræ mortis: in regionem tenebrosam. Quisquis à DEO per peccatum recedis, abis in regionem longinquam. Averteris enim, à Bono increato incommutabili indeficiente, à bono per essentiam

essentiā, perfectissimo: puro & summo bono; & convertis te ad creaturam. Converteris ad bonum creatum bonum deficiens, bonum per participationem, imperfectum, deficiens; ad minutissimam, bonitatis participationem, ad mellis paululum, quo gustato statim moreris. O ! quanta distantia ? o ! quam longinqua hæc regio, in quam abis ? Per peccatum amittis jus hæreditatis æternæ, excluderis à Paradiso, è Cælo præcipitaris ; non es amplius filius regni, incurris verò, reatum damnationis æternæ. O ! quanta elongatio ? Infelix & degener fili, habes regionem amplissimam, uberrimam, mellem & lacte fluentem, in qua tua substantia, non solum in tuto, integra manet sed etiam augere illam, & tu locupletari potes. Habes inquam regionem talem, si Patri tuo, si DEO, adhæreas, Quid is longè ? Vitam relinquis, ut in regionem umbræ mortis pervenias ; regionem quæris, quæ suos devorat habitatores.

*Considera 3<sup>tiò</sup>* Et expende verba illa, *dissipavit substantiam suam*. Unusquisq; peccator cū a Deo recefferit et abierit in regionē longinquā; datā sibi substantiam, consuevit dissipare. Dissipat imprimis, dona gratiæ, aliqua amittendo, & se illis privando. nimirum amittit gratiā sanctificantē, & pleraq; dona habitualia, seu infusa aliqua mortificando. Mortificat enim merita propria, ingratia DEI facta ; ut post peccatum, nihil ei profint. Merita, & sanguinē Christi, facit descendere in corruptionem. bona desideria, proposita, resolutiones sanctas facit evanescere, fervorem spiritūs extinguit, locò cujus, tantum fūgus, & glacies, animā occupat; ut multo igne, & fervore opus sit, ad hæc dissolvenda. Tali ratione, per peccatum, plurima dona gratiæ, dissipat peccator. Licet verò, illustrationes sanctæ, & sanctæ voluntatis motiones, per peccatum commissum, non excludantur

dantur, ita ut omnino cessent : siquidem peccatorem etiam tunc, dum à DEO maximè elongatur, non cessat DEUS illuminare, excitare atq; vocare ; sed DEUS etiam tunc, dum peccator cordis ostium claudit, stat ad ostium & pulsatur ; nihilominus & hæc ipsa dona, eatenus dissipat peccator ; quatenus cordis ostium, DEO pulsanti non aperit, quatenus, ejus inspirationibus, non obedit, sed ad ejus vocem obsurdescit, gratiasque excitantes, inefficaces reddit. Dona insuper naturæ, peccator recedendo à DEO, per peccatum dissipat. Quia per peccatum, vita imprimis corporis minuitur, valetudo labefactatur, varij morbi contrahuntur, vires corporis notabiliter atteruntur : talenta ingenij, judicij, prudentiæ, defodiuntur in terra ; dum circa res terrenas, & sensuales occupantur, illiq; immerguntur. Eruditio etiam & scientiæ, longo studio comparatæ, superinductis tot ineptis speciebus, rerum sædarum, vanarum sensualium oblitterantur : Indoles illa, quæ ante ad omne bonum, erat flexibilis, per peccatum & peccandi consuetudinem ita depravatur, ut de peccato in peccatum ruat ; ut à malo abstrahi nequeat ; ut corruptio boni, non sit nisi pessima ; & ex vino præstanti, acetum non sit nisi acidissimū.

4to Tandem considera & expende, dictum illud, de Filio prodigo, *Cupiebat implere, ventrem, de siliquis porcorum.* Siliquæ porcorum sunt, commoda sensuality : oblectationes sensuum : divitiæ & opes : dignitates, honores, vanitates & similia : hæc quærunt filij prodigi, his inhiant & in his acquirendis toti sunt. Talibus siliquis, quas porci, de grege Epicuri manducant, & filij prodigi, ventrem implere desiderant ; hoc est cupiunt explere, appetitum brutalem, & sensualem, ac terrena nonnisi sapientem. Quia verò interim, mentem & appetitum rationalem, reficero

reficere negligunt; cui, cibus hic vilissimus non convenit, & quem solus DEUS, explere & quietare potest, cum nec gustare velint, quàm suavis est Dominus; cupiendo filiquas, fame proli dolor! miserè pereunt. Idq; nec filiquis ventrem implent.

Discunt enim experientiâ, qui hujusmodi cupedijs, oblectantur, quòd ipsis appetitus placeat, experientia displiceat, quòd hæc illos non satient, appetitum non expleant unquam; neq; tamen tales filiquas relinquunt, sed semper illis, ventrem implere cupiunt. *Et nemo illi dabat.* Inter alias, etiam hæc est infelicitas, filiorum prodigorum; ut vilissimus hic cibus ipsis negetur, ut à filiquis arceantur; sunt Tantali sitientes inter aquas, poma in aquis natantia insequuntur & non assequuntur, nollent peccata deferere, & interim ab ipsis peccatis deferuntur; consolatione interiore carent, exteriorem quærere prohibentur. Mundus fallax, filios prodigos, vanitatibus, voluptatibus, divitijs & honoribus, ad se allicit, & trahit, in spe tanquam in hamo, escam illis proponit & offert; cum verò hamum hunc, hoc est spem talis escæ devoraverint; eodem hamo illos ad se attrahit, miseros tenet, nec tamen tali escâ frui, & ventrem implere permittit; verum & escam & hamum, ex cruentato ore recipit.

*His consideratis.* In Filio prodigo, tanquam in speculo, te ipsum intueri. Cogita quòd tu, ipse sis filius prodigus. Singula quæ considerasti, tibi applica: fac salutare reflexiones, supra tua peccata; & per illa elongationem, à DEO, Patre tuo optimo: supra damna hinc subsecuta. supra tantam mihiariam, & infelicitatem. Confundere, varios actus elice, fac proposita. & de remedio, tantis malis asserendo, serio cogita.

PUNCTUM II. Audi ulteriora verba ejusdem



dem Parabolæ. *In se autem reversus dixit: Quanti mercenarij, in domo Patris mei, abundant panibus, ego autem hic fame pereō: surgam & ibo ad Patrem meum. &c.* Cum autem adhuc longè esset, vidit illum Pater ejus & Misericordiâ motus &. Et

Confidera: his verbis exprimi initia conversionis, peccatoris ad DEUM, & DEI in peccatores pietatē & Misericordiā, quā ipsis subvenit, ut convertantur

*Expende singula.* Imò. In se reversus, ( intellige filius prodigus ) dixit. Ut quis ad DEUM, convertatur, debet in se reverti. Per peccatum ita abit in regionē longinquam peccator, ut non solum à DEO, ejus gratiā, & domo Patris sui elongetur; sed etiam, ut à seipso abeat. Abit à seipso peccator, quia imaginem & similitudinem DEI, quam per Creationem accepit, fædat, amittit ac in turpissimi monstri transformat spectrum. O quàm diversus, o quàm dissimilis sibi; o quantum à se abit! Abit à seipso, per oblivionem sui ipsius, per oblivionem suæ salutis, bonorum quæ habuit, & quæ habere potuit. Abit à se ipso. quia rationis & mentis se inopem facit, pro modica vanitate, momentanea voluptate, permutando inæstimabiles thesaurōs; & æterna gaudia; dum relicto Patre; adhæret civi regionis longinquæ, nimirum mundo, carni, & diabolo; dum filius magni regis, pascendos porcos suscipit, & qui in domo Patris voluptuosè vescebatur, qui nutriebatur in croceis, dum amplexatur stercora, si quis ventrem implere cupit, & fame miserè perit. Qui ita à se ipso abiit peccator, si ad DEUM converti velit, debet in se ipsum reverti per cogitationem infelicis status sui, recogitando annos suos in amaritudine animæ suæ, debet advertere unde exciderit. Debet scire se infirmum esse, in se non esse sanitatem, se malè, imò pessimè habere; tandem; quod fame pereat. Nisi enim hac ratione in se reversus fuerit, de quærendo malis suis remedio nunquam fructuosè cogitabit.

*Expende 2dò Verba. Quanti Mercenarij in Domo Patris mei abundant panibus, & Considera Filio prodigo in seipsum reverso, id ante omnià occurrere: quòd mercenarij in Domo Patris ejus abundant panibus, ipse vero fame paret. Mercenarij sunt, qui DEO serviunt ob spem mercedis, qui laborant tanquam operarij conducti ex denario diurno. Hi in domo Patris cælestis antequam promissam recipiant mercedem, abundant panibus, abundant cælestibus consolationibus, fruuntur pace & tranquillitate conscientiæ. Non patitur illos DEUS fame premi, famemquè experiri. supra hanc Patris sui in mercenarios liberalitatem dum se reflectit filius prodigus, in spem erigitur, cogitat fieri posse, ut fame non pereat, sed etiam ipse pane reficiatur & abundet. Dicit: Et quamdiu ego fame conficior? quamdiu filiquas appetam? cur & ego non reficior pane; quo abundant mercenarij? non debeo servire DEO ut mercenarius, sed ut filius; ex amore filiali ad DEUM ut Patrem reverti me convenit. Interim quia non sum dignus recipi in filium, admittar saltem in mercenarium.*

*Expende 3tò Verba illa: surgam & ibo ad Patrem meum. Surgam ex cæno vitiorum, ex volutabro porcorum, ex inveterata peccandi consuetudine, excutiam animi torporem, pondus illud iniquitatum mearum, quod me terræ, rebus vanis ac sensualibus affixit, abijciam, avellam, & abstraham violenter à terra affectum & animum, atque hac ratione surgam. Ibo ad Patrem meum; Ibo per fidem, quia pius, misericors, & Pater est, Ibo per spem & fiduciam in Bonitate ipsius. Ibo per desiderium DEO adhærendi, eique serviendi, per desiderium, DEUM ut Patrem amandi; Ibo per veram pænitentiam, per seriam vitæ emendationem, per aversionem mei à Creaturis, per conversionem ad DEUM. Ibo superatis difficultatibus, & motis impedimentis, ibo & meipsum vincam, Ibo à mundo, carne, & diabolo, quibus adhæsi. Ibo à por-*

porcis, filiquis, vanitatibus, & Mundi illecebris, super his omnibus, tanquam cibo vilissimo nauséat anima mea. Ibo ad Patrem, trahit me pissime Pater, paterna tua in filios charitas & clementia. Hæc mihi spem facit, quod non reijciar quia ad Patrem ibo, qui Pater Misericordiarum est, qui etiam; cum ego ab eo recesserim Pater esse, non desijt, qui Pater est, etiam tunc dum ego filius esse desij. Surgam & ibo. & quare non surgò? quare non eo? quare non venio? quousque differam & procrastinabo? Et quando tandem finis erit turpitudinis meæ? Ecce venio, jam exsurgò Adjuva me Domine, erige super pedes meos, fac ut eam ut curram, ut ad te perveniam.

*Expenda 4to* Cum adhuc longè esset vidit illum Pater ipsius & misericordiâ motus est. Hic est excessus Bonitatis & Misericordiæ Divinæ, in peccatores. Cum adhuc longè a Deo sumus, Pater Misericordiæ videt nos, benignissimo oculo respicit, sicut respexit Petrum, ut peccata nostra delectamus. Misericordiâ movetur, & sicut Pater miseretur filiorum. Ille nos excitat ut revertamur in nosmetipsos, ut surgamus, Ille auxiliante gratiâ sublevat, ut ad Ipsum veniamus super pedes nos statuit, ad se trahit, viam quâ debeamus redire Ipse ostendit, & ad se adducit. Hac optimi Patris bonitate accendere ô anima mea: velociter surgè & redi ad Patrem tuum, ne quæso metuas iram ejus, Pater est, tanquam Pater te redeuntem recipiet, dum adhuc longè es, antequam ipsi reconcilieris, jam te videt, jam super te misericordiâ movetur. Hoc ipsum, quod surgere, & ad Patrem ire velis, Ejus misericordiæ & gratiæ opus est; quantò magis cum ad ipsum redieris, intuebitur te tanquam filium, commovebuntur viscera, ejus, amplexabitur te, & deosculabitur.

**PUNCTUM III.** Audi ulteriora verba quæ se-

Et

quantur

quantur. *Dixit ei Filius. Pater peccavi in calumnia coram te, jam non sum dignus vocari filius tuus. Dixit autem Pater ad servos: Citò proferte stolam primam, & induite illum, date annulum in manu ejus, & calceamenta in pedibus ejus. Et ex his agnosce, quàm facilis sit reconciliatio filij prodigi cum Patre suo, facilis inquam sive ex parte Filij deprecantis culpam, & pœnitentis, sive ex parte Patris, in gratiam recipientis Filium. Iterum expende singula.*

*Ac inprimis expende verba: Dixit ei filius; Pater peccavi.* Pater ! quia Pater es, non potes non misereri. Quia Pater es, Major est misericordia tua, quàm iniquitas mea. Magna quidem hæc est non tamen talis, ut non consequar veniam. Pater peccavi, quia à te recessi, quia abij in regionem longinquam, quia, luxuriosè vixi, quia dissipavi tuam & meam substantiam: quia adhæsi uni civium regionis longinquæ, quia aspernatus panem filiorum, quo etiam mercenarij in Domo tua abundant, ad siliquas me converti, illisque ventrem implere cupivi quia in cæno vitiorum diu jacui; quia volens feci me fame perire, quia serò nimis ad te ô Pater redeo. Hæc peccata, pœnitens humiliter confiteor, & explicatius coram servis & Ministris Tuis, quibus paterni hujus fori judicium cōmisisti, confitebor adversum me omnem injustitiam meam. Peccavi in cælum, quia in te cæli Dominum, quia in Tuam Essentiam & Divinitatem, quia in omnes ac singulas Sanctissimæ Trinitatis Personas. Peccavi in cælum, quia Iure hæreditario cæli me privavi, quia cælum terræ postposui, quia Sanctissimos cælitè contristavi. Pater peccavi in cælum & coram Te, Non solum in Te, sed etiam Coram te peccavi ô Pater quia peccavi in oculis & in conspectu Tuo, peccavi te vidente, & averfante turpitudines meas; pecca-

vi cūm mihi, per immensitatem præsens adesses cūm mihi faceres magna, qui potens es, cūm me conservares, totque conferres beneficia, cūm stares ad osium cordis & pulsares, atque me à peccato retraheres, cūm Tuam circa salutem animæ meæ exercereres providentiam. Ita peccando: quomodò non coram te peccavi Pater?

*Expende 2dò Verba: jam non sum dignus vocari filius tuus, O detestanda peccata mea, quò me deduxistis? Per illa factus sum, non solum pastor, socius, sed etiam conviva porcorum: factus sum servus & mancipium infelicis civis regionis longinquæ, prodigus dissipator substantiæ mihi a Patre datæ, Et quâ ratione tuus ero filius ô Pater? Indignus planè sum vocari filius tuus, qui pridem talis esse desij: qui factus sum filius iræ, filius perditionis, filius gehennæ. tam digni Patris quomodo ero dignus filius? Quæ participatio Iustitiæ cum iniquitate? quæ societas lucis ad tenebras? Detestor & execior peccata mea. doleo de illis propter tuam bonitatem Deus, quia bonus: quia Pateri optimus es; Tibi ab hinc adhærere volo: & cūm non sim dignus vocari filius tuus, & ad privilegia filiorum admitti, patere me, Sanctissime Pater, in Domo tua tanquam mercenarium, interim ego amabo te, honorabo te, ut Patrem, nullum tuum deinceps transgrediar mandatum, non ex metu pænæ, ut servus, neque ex spe mercedis, ut mercenarius; sed ex amore filiali, ut filius; quia amo te. quia Deus meus & Pater meus es.*

*Expende 3tò Dixit autem Pater ad servos: Cito proferte stolam primam, & induite eum. O verè Pater qui tali pænitiâ, humili peccatorum confessione tam facilè placatur! Meruerat filius prodigus, ut contra ipsum iratus detonaret Pater, ut fulmina vibraret; nihil tale auditur à Patre, Amorem nonnisi loquitur; Cito proferte stolam primam*



*nam.* Executionem Paternæ benevolentiae servis suis, hoc est ministris Ecclesiæ mandat, stolâ primâ, seu primâ gratia, quam amiserat filius, jubet illum vestiri, stolâ præstantissimâ, veste nuptiali, in qua in Nuptijs Agni comparandum est. Cito illam proferri jubet, ut & in beneficij præstiti celebritate paternam exhibeat benevolentiam.

*Expende qto reliqua verba: Date annulum in manu eius.* Non solum redeuntem peccatorem recipit Pater cælestis in filium; sed etiam animam ejus sibi desponsat: & in signum perpetuæ dilectionis, quâ ipsum diligit, dat annulum, eoque illum sibi obligat, ut nullum alium amorem, nullumque amatorem admittat. Annulus symbolum est æternitatis, hanc Pater dat in manum filij, ut deinceps pro felici labore æternitate, ut operetur ea, quæ beata æternitate præmiari possunt. *Date calceamenta in pedibus ejus.* Hæc est providentia clementissimi Patris, ne via pænitentiae, via mandatorum Dei, via crucis & mortificationis aspera & ardua videatur. Pænitenti filio dat calceamenta, hoc est gratijs suis munit filium, ne sua asperitate via hæc, ipsum deterreat, ut aculeos viæ hujus spinosæ proterat, impedimenta & difficultates superet, & inoffenso pede viam hanc decurrat. *Admirare tantam Patris tui pietatem.* In spem consequendæ veniæ erigere. Personam filij prodigi indutus, actus ejusdem pænitentis elice: & seriam age pænitentiam, affectumque illum habe deinceps familiarem. *Pater peccavi in Cælum & coram te.*

*Colloquium.* Pater Misericordiarum, qui redeuntes ad te filios prodigos benignissimè recipis, nec quenquam illorum qui animo contrito ad Te revertuntur rejcis, imò ut redeant illos oculis tuæ pietatis respicis, gratiâ tua, ut resurgant, adjuvas, & ad Te potenti attrahis virtute. Recipe me qui in

ter filios prodigos, maximè sum prodigus, dum adhuc sum longè a Te respice me. Misericordissimè, jacentem erige, ut ex peccatis meis aliquando plenè confuggam, misertus mei trahere me ad Te. Durum cor meum contere, ut in spiritu humilitatis & in animo contrito, suscipiar à te Domine, Stulam primam hoc est gratiam tuam Sanctificantem, fac mihi restitui, in tuo amore me confirma: ac denique pedes meos præpara ad ingrediendum viam asperam pænitiendi, viam crucis & mortificationis, quam decurrendo; ad Te feliciter perveniam.

*In fine Pater noster*

## Meditatio II.

### De Morte

*Praludium 1.* Imaginare te ex gravi morbo in lecto decumbentem, in extremis constitutum, à medicis derelictum, illud à Confessario tuo audire. *Morieris tu & non vives, dispone de mui tua.*

*Praludium 2.* Pete gratiam ut vivacem mortis tuæ habeas apprehensionem, ex eaque spiritualia quàm plurima referas commoda, & discas tempestivè disponere te & præparare ad mortem.

PUNCTUM I. Audi illa verba Psalm. 18. *Et vos sicut homines moriemini.* Et Considera unicuique nostrum moriendum, sicut homines moriuntur: hoc est simili morte, morti aliorum hominum, seu morte tali, cui illæ conditiones & proprietates convenient, quæ conveniunt mortibus aliorum hominum. Porro conditiones & proprietates mortis, communes sunt. *1ma* Necessitas moriendi, quæ tanta est, ut ab hac moriendi lege, nul-

Ius quantumvis Sanctus, quantumvis fortis & potens: sapiens & dives sit exemptus, ita ut nihil certius sit hac veritate, quod moriendum sit. Quis fuit sanctior Christo Domino, Marteejus Sanctissimâ, S. Ioanne Baptista, Sanctis Patriarchis, Prophetis, Apostolis, aliisque Sanctis? qui tamen mortui sunt: vel si al qui necdum mortui sunt, tamen & illis moriendum est. Quis fortior & potentior Abrahamo, Samfone, Davide, Alexandro Magno, & tot alijs Heroibus? & tamen, etiam hos omnes mors devicit & superavit. Quis sapientior Sapientiâ incarnatâ, Rege Salomone, Philosophis illis Ethnicis, orbis Sapientibus, sanctis Ecclesiæ Doctoribus? qui tamen non evitaverunt mortis insidias. Quis ditior Salomone, tot Imperatoribus, Regibus, Principibus? qui tamen nullo pretio moriendi necessitatem redimere poterant. Necessitas hæc moriendi oritur tam ex Lege & decreto Divino, quo Deus ex altissimo suo consilio constituit, ut omnes moriamur, juxta illud Apostoli: *Statutum est omnibus hominibus semel mori*, tū ex peccato, cui præter Christum & Beatissimam, omnes subjecti sumus: peccati etiam pœna & stipendium mors est; tum ex ipsa natura hominis constituti corpore obnoxio multis alterationibus, morbis, vulneribus & similibus.

2da *Conditio* & proprietas mortis est incertitudo ejusdem quoad tempus, locum, & modum. Nemo enim nostrum scit quâ ætate, quo anno, mense, die, horâ sit moriturus: cum mors rapiat singulis annis, singulis diebus, horis, imò singulis momentis. Est etiam eadem mors incerta quoad locum. Mors enim ubique expectat, ubique insidiatur, ubique homines perimit. Abel in agro mortuus est, Saul & Ionathas in montibus, Heli ex Sella decedens, Iacob & Ioseph in Ægypto, Moyses, Aaron in deserto, Iosue & Caleb in terra promissæ;

promissionis. Incerta adhuc mors est quoad modum; idque sive per modum hunc intelligatur genus mortis: non enim omnes; eodem mortis genere moriuntur: quidam moriuntur morte violentâ, alij morte naturali: quidam moriuntur morte secutâ ex longiori morbo, alii morte subitaneâ, aliqui moriuntur in amentia, usu sensuum destituti, alij moriuntur sibi (ut dicitur) præsentes, rationis compotes, & utentes sensibus: Sive etiam per modum mortis intelligatur status interior animæ: quod adhuc modum mors incerta est, quia incertum est, in quo statu animæ. unum quemque nostrum mors inveniet. Non potest tibi constare, qui hæc meditaris, an mors te paratum, & in gratia Dei inveniet? an sis habiturus gratiam finalem? an habebis copiam Confessarij? an moriturus sis omnibus Sacramentis instructus? an inter amplexus Christi Crucifixi? an inter oscula imaginis Matris Beatissimæ? An ultimus tuus actus futurus sit actus supernaturalis, ferventis Charitatis & Amoris Dei? An ultimæ voces Sanctissima JESU & MARIE nomina? Tandem incertum est, arbor hæc à morte succisa, in quam partem cadet, an ad Austrum an ad Aquilonem?

3<sup>tia</sup> Proprietas & Conditio mortis est: quod mors sit ultima linea rerum hoc est; finis & terminus vitæ, viæ, & peregrinationis tuæ, statûs meriti & demeriti. Est terminus vitæ, a qua non datur regressus ad vitam nisi in communi resurrectione mortuorum. Est terminus viæ, quia dū vivis, viatorem agis. Vixisti bene? cucurristi viam Mandatorum DEI, ambulasti semitam Iustorum. Vixisti malè? ambulasti vias difficiles, lassatus es in via iniquitatis: ivisti viâ latâ & spatiosâ, quæ ducit ad interitum. Moreris? viæ attingis terminum, mors tua est ultimus viæ tuæ terminus. Est etiam mors ultimus terminus statûs

meriti & demeriti, ab hoc enim momento, quo moreris, tempus non erit ampliùs, nihil abhinc mereri, nihil pro salute animæ tuæ agere poteris. Finis hic & terminus vitæ, viæ, statùsquè meriti & demeriti, talis est futurus, qualis fuit vita. Vixisti Sanctè, morieris morte Sanctorum, in peccatis vixisti, in peccatis & sceleribus morieris; Tale enim mortem unicuique promittit S. Paulus 2. ad Corint. 11. *Quorum finis erit secundum opera ipsorum.* Ambulasti viam arctam, intrabis per angustam portam, quæ ducit ad vitam, ambulasti viam spatiosam, intrabis per portam latam, per ostium illud dilatatum, de quo scriptura: Dilatavit infernus os suum absque termino. Neque enim (ut ait S. Chrisostomus) *Potest quis pervenire ad Patriam, nisi ambulaverit in via.* Licet verò aliquando homines in vita sua scelerati & improbissimi vitam aliquando in vera pænitentia finiverint, licet latro bonus in morte, patentes sibi paradisi portas invenerit, hoc in exemplum trahi non debet; id enim ita rarò & extraordinariè factum est ut S. Hieronymus audeat dicere. *Vix de centum millibus hominum, quorum mala fuit semper vita, meretur habere à DEO indulgentiam unus.*

4ta tandem mortis proprietas est; quod sit Principium alterius vitæ, & ingressus domûs æternitatis. In Beatîs mors est principium vitæ felicissimæ, nullis miserijs, nullis doloribus obnoxia, in reprobris mors est principium vitæ infelicissimæ, vitæ illius in qua homines quærent mortem, & non invenient, vitæ quæ erit ipsa mors secunda.

Ex hac Mortis suarumque proprietatum consideratione erue sequentia dictamina practica, 1mo Stultum esse timeri mortem quæ evitari non potest. 2do. Cum hora & tempus mortis incerta sint, omni tempore te ad mortem paratum esse



esse, omnem quoque tuam actionem, præcipue verò omnem Confessionem sacramentalem & omnem sacram Communionem debere te ita peragere; atque si immediatè moriendum esset. 3<sup>to</sup> Cum locus mortis incertus sit, nulli loco te affici debere, sed ad omnem oportere te esse indifferenter. 4<sup>to</sup> Cum nescias quis sit futurus animæ tuæ status, & quæ dispositio? nunc dispositionem ad mortem inchoandum esse, curandumque tibi esse, ut semper Deo vivas, ut non sis tibi conscius peccati gravis, ut sis in gratia Divina. optima enim ad mortem dispositio est vita christianè & Sanctè instituta. Qui animæ tuæ status in vita fuerit, idem erit & in morte. Cum S. Augustinus asseveret neminem se vidisse male mortuum, qui benè vixerit. 5<sup>to</sup> Cum mors sit ultima rerum linea, debere te instanter nunc operari, merita cumulare, nullam merendi occasionem prætermittere.

6<sup>to</sup> Tandem Cùm mors in bonis, sit vitæ melioris principium, ad illam te debere aspirare cum Apostolo: *Quis meliberabit de corpore mortis hujus? Cupio dissolvi & esse cum Christo.*

Reflecte te supra singula hæc dictamina, quomodo te illis regulaveris, & regulare deinceps debeas, elice affectus materiæ huic servientes, resignationis in Dei voluntatem, circa mortis tuæ tempus, locum & modum. desiderij Sanctæ mortis, Doloris, &c. Postremò Christo agonizanti commenda agonem tuum, & postula ut ille suum tibi spiritum inspiret, quo anima tua vivificata, Ipsi per tuum reddatur agonem.

PUNCTUM II. Audi verba illa Psal. 34. *Mors peccatorum pessima.* Audi item Rationem, quam hujus ipsius reddit S. Bernardus Epist. 105. *Mala siquidem est in Mundi amissione, peior in carnis se paratione, pessima in vermis ignique duplici contritione*

zione. Et expende singula, atque.

*Confidera* imò Mortem peccatorum malam esse in amissione mundi. Peccatores dum vivunt, cum magno amore possident divitias, amplas possessiones modis indebitis acquirunt, congregant aurum, argentum, pecunias, thesauros maximos, & bona fortunæ coacervant, summo studio quærunt honores, famam, nominis celebritatem, dumque talia assequuntur, in his sibi cōplacent, talibus delectantur, ac in ipsis, maximam suam reponunt felicitatem. Quare dum deinde, hæc per mortem amittunt, idque amittunt irremediabiliter, jacturā hanc gravissimè ferunt, & ingenti hinc afficiuntur dolore. Siquidem ut ait S. Augustinus: *non Sine dolore amittitur, quod, cum amore possideretur.* Peccatores ut lucrentur mundum, æquo animo detrimentum suæ salutis subeunt: quanto igitur dolore cruciabuntur? si animæ suæ detrimentum passæ, etiam mundum amittere cogentur. Tandem peccatores sperant pollicenturque sibi, quòd longo tempore divitijs a se collectis, fortunā & mundo fruuntur, illud Epulonis Evangelici ingeminantes. *Anima mea epulare, ede, bibe, habes multa bona in annos plurimos reposita.* Quantum igitur in morte torquebuntur, dum advertent hæc omnia sibi eripi: in aliorum, idque frequenter in illas manus, in quas nollent devenire, brevî deventura.

2dò expende illud- *Mors peccatorum. pejor in carnis separatione.* Peccatoribus nihil dulcius, nihil amabilius, vitā hac corporali, de vita alia non cogitant, ad illam non aspirant, sed in voris unice habent, ut anima illorum nexu indissolubili, corpori semper sit conjuncta, in morte autem videbunt hanc se vitā spoliari, nexum illum dissolvere, animam à corpore separari, idque à corpore illo, quod tot Dei offensarum, & æternæ damnationis causa sibi existit; ab illo corpore: cui, tantum indolge-

dulgebant, cui nullas voluptates negabant, cujus concupiscentiis appetitibus & inclinationibus in omnibus obsequiebantur. Videbunt ulterius per hanc separationem, omnes voluptates finem accepturas, videbunt corpus brevè corrumpendum & in pulverem dissolvendum: animam verò infelicem à dæmonibus violenter rapi & in infernum trahi. Quantà igitur amaritudine replebitur peccator? cū quanto gemitu & ejulatu exclamabit miser? ficcine separas amara mors? O mors; quàm amara est memoria tui!

3<sup>ti</sup>o Expende verba illa: *Mors peccatorum pessima, in vermis, ignisque duplici contritione.* Vermis Conscientiæ gravissimè in vita torquet peccatorem; sed incomparabiliter gravius torquet eundem in morte. In vita, taliter eum torquet ut spes saltem, vermis hujus enecandi, illum solari possit: existimat enim peccator, per pæniteetiam quam se aliquando facturum proponit, vermem hunc se exstincturum. In morte vero siquidem peccator videbit jam se extra omnem spem salutis constitutum esse; facile advertet quod vermis ille semper sit ipsum cruciaturus. Cogitabit miser & dicet, Ego quidem morior; sed vermis conscientiæ, qui me torquet, non morietur in æternum. Nulla arbor sic à verme roditur, & in pulverem conteritur, atque vermis conscientiæ rodet & conteret peccatorem. Ignis etiam infernalis; quem sibi paratum esse moriens peccator intuebitur & in quem à malignis trahetur spiritibus, conteret eundem; mortemque ipsius pessimam & infelicissimam reddet. Hunc ignem recogitans, dolore plenus ululabit miser: Quis poterit habitare cum igne devorante & ardoribus sempiternis? respondebitque sibi: in histibi habitandum est in æternum.

*Ex horum consideratione, hæc dictamina erue. 1<sup>mo</sup>.* Cū per mortem amissurus sis mundum, velis

velis nolis: An non ultroneè tempestivé fit dimit-  
tendus? Felix es si hunc amore Christi contem-  
psisti & reliquisti; si vivendo in Religione; intra  
hanc non quæris mundum: hoc est, si non quæris  
vanitates, honores, plausus, officia speciosa, exqui-  
sita commoda &c. Confide in Bonitate Divina  
non fore tibi mortem tuam gravem ex mundi  
amissione. Quòd, in mundo vivis, nec hoc vi-  
tæ genus: fas est tibi relinquere, age ut vivens in  
mundo, non sis de hoc mundo; ut affectu non ad-  
hæreas ad ea quæ mundi sunt, ut non inhies divi-  
tijs aggregandis; quærendis honoribus, nè hæc ti-  
bi mortem tuam, malam reddant & amaram. 2<sup>do</sup>  
non indulgendum esse carni, sed potius eam esse  
affligendam; mortificandam, tanquam hostem  
persequendam, commoditates illi negandas, bel-  
lum continuum gerendum; adversus eius concu-  
piscencias; ita enim fiet; ut mors quæ gravis solet  
esse malis, ex carnis separatione; tibi non sit futu-  
ra gravis. 3<sup>to</sup> Custodiendam tibi esse consci-  
entiæ puritatem; nullum committendum pecca-  
tum; de commissis pœnitentiam seriam, tempesti-  
vè faciendam; ne in morte conscientia te arguat  
de peccato, maximè gravi: ne vermis non mori-  
turus te conterat; ne item ignis infernalis in te in-  
veniat, quod totà exurat æternitate.

*Refleste* te deinde si nunc tibi moriendum  
esset; qualis mors tua foret; an non esset mala in  
mundi amissione, an non pejor in carnis separa-  
tione; an non pessima in vermis & ignis duplici  
contritione? Exhorresce ralem mortem, fac pro-  
posita, elice affectus materiæ accommodatos.

PUNCTUM III. Audi illa verba Psal. 115.  
*Pretiosa in conspectu Domini mors Sanctorum ejus*  
Audi item verba Mellisui Doctoris D. Bernardi.  
hunc locum explicantistermone in transitu S. Mala-  
chiæ. *Pretiosa mors Sanctorum, tanquam finis labo-*

*rum*

*rum, tanquam victoria Consummatio, tanquam victoria janua, & perfecta securitatis ingressus.* Expende iterum singula, & imprimis expende & considera, Pretiosam esse mortem Sanctorum, ex eo, quod sit finis laborum. hoc est, quod sit finis omnium ærumnarum, omnium dolorum, omnium gemituum. In morte enim sperat homo justus brevi se eò perventurum ubi neque luctus, neque clamor, neque labor, neque dolor erit ultra. Mors Sanctorum erit laborum finis, sed simul merces eorundem, idque merces magna nimis, merces non alia nisi per quam possidebitur DEUS. O quanto iusti in morte superabundabunt gaudio? dum intelligent se non in vanum laborasse, non recepisse se mercedem in vita sua, sed illam sibi reservari reddendam in altera vita, consecuturos se finem, in quem suis Actionibus & laboribus collimabant.

Expende 2dò. illud: *Pretiosa mors Sanctorum tanquam victoria consummatio.* Iusti cum viverent, præliabantur bella Domini, adversus mundum, carnem, & Diabolum, infensissimos DEI & hominum hostes. Militia fuit vita eorum super terram. Decertabant incerti quo eventu pugna ipsorum esset terminanda. Inter spem & metum toto vitæ tempore fluctuabant; In spem victoriæ erigebat ipsos Christus Dux eorundem, erigebant tot Sanctorum exempla, qui de hostibus triumpharunt, Auxiliorum Divinæ gratiæ abundantia &c. Metu percellebat illos propriæ fragilitatis Conscientia, Hostilium insultuum seu tentationum assiduitas & vehementia. &c. In morte constituti vident se victores exstitisse, vident & pugnam & victoriam suam consummatam esse, vident parari sibi victrices palmas, triumphales coronas, & palmas strenui sui certaminis. Quantum igitur lætitiæ, quantum gaudij inde percipiunt? Nunquam sic exultant victores captâ prædâ, dum dividunt spolia,



spolia, quantum Sancti exultabunt in morte, de obtenta & consummata sua victoria.

Expende 3<sup>ti</sup>o Pretiosa mors Sanctorum, tanquam visa Janua & perfecta securitatis ingressus. Iustus cum viveret suspirabat sæpius, ut portæ, cælestis Ierusalem sibi paterent. In morte videt has portas sibi patere, videt cum Stephano cælos apertos, videt IESUM stantem, Matrem ejus Sanctissimam, aliosque Cælitæ invitantes; videt mortem suam vitæ alterius, ejusque summè felicitis, & æternæ, esse sibi januam. Videt se omnibus periculis quibus hic jactabatur eripi, suis omnibus salvis & integris, salvis meritorum & bonorum suorum operum, gratiæque Divinæ thesauris: quibus infernales prædones spoliare ipsum volentes; insidiabantur, in securissimo portu constitui. Est igitur Iusto, mors dulcis, mors pretiosa, tanquam vitæ janua, & perfectæ securitatis ingressus,

His expensis, gratulare in animo, mortem tam felicem, tam pretiosam Sanctis & electis DEI. Talem tibi exopta; & ut consequaris, vivere stude secundum Sanctorum exempla.

In Colloquio postula à Christo & Sanctissima DEI Parente, ut Ipsorum meritis vita hæc tua quæ inter mortales vivis, sit vita Sanctorum, ut sit pretiosa propter labores pro DEO & DEI gloria susceptos; sit pretiosa propter fortem adversus animæ tuæ hostes; & victricem semper pugnam: sit pretiosa propter constantem tuum per vias vitæ cursum. Post vitam verò hanc mortalem ut obtingat tibi mors Sanctorum, quæ sit pretiosa, tanquam finis & merces laborum, tanquam victoriæ consummatio, tanquam vitæ janua, & perfectæ securitatis ingressus. Et ut non aliter januam vitæ illius beatæ ingrediaris nisi deducentibus te Sanctissimis his Ducibus IESU & MARIA.

*In fine Pater noster, Ave Maria*

MEDI-

## Meditatio III.

### De Judicio Particulari.

*Praludium* 1. Imaginare te esse villicum iniquitatis, & constitui ante Christum Judicem, ut reddas rationem villicationis tuæ, jamque tibi declarari, quod amplius non poteris villicare.

*Praludium* 2. Postula gratiâ, ut intelligas quanto rigore, in Judicio particulari, tuarum actionum exigitur à te ratio, & ut in vita tua Christum Judicem pro hora vel momento particularis tui judicij placatum tibi reddere possis.

PUNCTUM I. Audi verba illa Ecclesiast. 11. *In fine hominis denudatio operum eius.* Et revoca tibi in memoriam id, quod fides & Sancti Patres docent, quod anima cujusvis hominis, immediate post obitum, sistenda sit tribunali supremi simulque justissimi Judicis, ab eoque sit judicanda. Cujus judicij formam quod melius cognoscas.

*Considera* Coram illo Tribunali denudanda & manifestanda omnia opera hominis, quæcunque homo à primo rationis usu, ad ultimum halitum fecit, sive benè sive malè, omnia hæc clarissimè patebunt, & uno intuitu conspicientur. Denudabuntur opera occultissima, quorum neminem in hac vita consciû esse voluimus, quæ ut tegeremus rubor nobis & verecundia persvaserat. Denudabuntur illa, quæ velabantur aliquâ externâ specie pietatis, virtutis &c. decident velamina excusationum, quibus aliqua opera nostra involvebamus, sive in confessionibus, sive coram illis, quorum jurisdictioni subiecti aliquâ ratione fuimus, sive etiam apud nosmetipsos. Idque denudabuntur non solum verba, non solum opera, sed etiam secretissimæ cogitationes, & actus interni voluntatis. Revelabitur &

manifestabitur non solum id, quod fecimus, sed etiam quod omisimus, quod negleximus. Denudabuntur etiam ea, quæ bene egimus, & patebit, quo fervore, quâ intentione, unum quodque opus bonum egerimus; patebit quam intentionem in nostris actionibus habuerimus? quem finem per eas intenderimus? an majorem Dei gloriam, nostramque salutem & perfectionem, an certè vanitatem, inanem gloriam, aut aliquem respectum humanum;

Porro hæc denudabuntur omnia 1<sup>mo</sup>. Coram oculis ipsius Judicis, non quia hos oculos aliquando latebant, sed quia latere putabantur, tunc autem anima judicanda, clarissimè cognoscet, in omnibus se deprehensam esse, omnia sua opera optimè nota, ac perspecta fuisse suo Judici. O quanta tunc erit confusio animæ peccatricis? agnoscere, quod suæ tantæ fæditates, oculum supremi Judicis non latuerint. Denudabuntur adhuc, eo etiam sensu omnia opera hominis, coram eodem Judice, quia etsi Deus viderit illa ante, non vidit tamen illa tanquam Judex, non vidit taliter, ut de illis, & peccatore, ultimam suam ferret sententiam; non vidit eo fine ut illa præmiaret, vel puniret, præmio vel pænâ, quâ merentur; sed vidit, ut mala opera nostra misericorditer remitteret, vidit, ut nos ad pœnitentiam provocaret. In fine autem, hoc est: in morte hominis, Deus Judicem aget, ut Judex nostra opera inspiciet, cùm antea misericordissimum Patrem ageret, fueritque paratus nostra remittere peccata, nobis ad se in toto corde conversis.

2<sup>do</sup> Eadem opera hominis, in illo Judicio, denudabuntur coram oculis ipsius animæ, quæ judicabitur; tunc enim hæc in momento separationis suæ à corpore, clarè cognoscet omnes suos actus, omnes ipsi in uno instanti repræsentabuntur, quid quovis tempore cogitaverit, dixerit, fecerit?

In-

Intelliget perspicacissimè quomodò usa sit medijs salutaris suæ, auxilijs gratiæ Divinæ, sensibus, potentijs, talentis suis, ad salutem & perfectionem consequendam. Nescivit anima, dum in corpore esset, an amore, an odio digna fuerit? an peccata sua fuerint sibi dimissa, an sufficientem de ipsis pœnitentiam egerit? De plerisque suis peccatis fuit dubia, an attigerint gravitatem culpæ lethalis? an commissa sint cum plena deliberatione? sciet tunc dignitatem vel indignitatem suam. Omnia sua dubia clarè dissolventur. Denudabuntur opera hominis coram proprijs animæ oculis; tunc enim opera illa, quæ apud se & corâ alijs excusabat, apparebunt ipsi talia, qualia in seipsis, & coram oculis Dei fuerunt. Tandem coram oculis animæ denudabuntur opera ejus, quia tunc anima longè aliud judicium formabit de rebus omnibus, quàm judicaverit ante, suæque priora judicia & dictamina fuisse mala; & perversa, fuisse insanias falsas, vanitates vanitatum, & magnas stultitias cognoscet.

3<sup>to</sup> denudabuntur eadem opera hominis coram severi Judicis Assessores, scilicet corâ tot Cælitibus & Beatis Spiritibus, coram S. Angelo Custode, qui miseriæ animæ peccatrici exprobrabit suorum instinctuum & monitionum contemptum, tot suas irreverentias, tantas ingratitudines, pro impensis circa eam obsequijs &c.

4<sup>to</sup> Tandem denudabuntur opera hominis coram ipsis Dæmonibus, qui peccatori tunc vel maxime insultabunt, accusabunt eundem, & damnationis sententiam à Judice exposcent.

*His* consideratis, reflecte te, quomodò tunc feres conspectum supremi Judicis; quanta tua erit confusio audire tunc exprobrationem S. Angeli tui Custodis, S. Patroni nominis tui, Fundatoris Religionis, si Religiosus es, aliorumque Cælitum; quæ graves tibi erunt insultationes hostium animæ tuæ.

*Ex* eadem consideratione, erue hæc dictamina practica 1<sup>mo</sup> Debere te, in omni actione tua, pra oculis habere DEUM, quẽ aliquando experturus es severum Judicem. Debere te, meminisse, quod DEUS omnes tuas actiones spectet, omnes semitas observet, vestigia pedum tuorum consideret, & gressus dinumeret, quod (ut loquitur S. Augustinus) ipse erit Judex causæ tuæ, qui modò est testis vitæ tuæ.

2<sup>do</sup> Nè ad tuā confusionē denudentur corā DEO Judice opera tua, debere nunc te ipsum per humilem, integram, & sinceram Confessionem, superato quovis pudore & verecundiā, denudare hæc ipsa opera coram Sacerdote, Christi locum tenente. 3<sup>tin</sup> Ita tibi nunc vivendum esse, ut non sit de quo tantopere confundi te oporteat in illa operū denudatione.

4<sup>to</sup> Debere te nunc talia de rebus formare judicia, qualia formaturus es, in terribili illo judicio. 5<sup>to</sup> S. Angeli Custodis instinctibus monitionibusq; internis obtemperandum esse, ipsique in omni loco, in omni angulo, maximam reverentiam exhibendam.

*Fac* proposita, elice affectus confusionis, de tot tuis malis operibus, doloris, deprecationis, desiderij, perfectæ emendationis. Tandem postula à Matre Beatissima, ut illa suo contegat pallio nuditatem tuam, ut tibi, tanquam filio prodigo impetret primam stolam, quā vestitus; coram illo tribunali securus, & sine metu confusionis, ex denudatione operum tuorum compareas.

PUNCTUM II. Audi illa verba DEI Judicis, apud Psalmistam dicentis Psal. 74, *Cum accepero tempus, Ego justitias judicabo* Et considera, in particulari hominis judicio, post denudationem & manifestationem operum ejus, hæc ipsa opera, à justissimo Judice, discutienda, examinanda & rigidissime judicanda esse. Porro non aliter Judex ad causā dijudicandā accedet, nisi, accepto prius tēpore; *Cum accepero tēpus, Ego justitias judicabo*, hoc est quādo non erit amplius



est aptius tēpus merendi, tēpus pænitendi, quando transibit tempus miserendi, quando jam nobis nec intercessio Sanctorum proderit, nec ullæ nostræ supplicationes exaudientur: quando nullis lacrymis, nullis gemitibus, nullâ pænitentiâ, Judex flecti poterit. Post hoc tempus acceptum, quando homo jam erit in limine æternitatis, Christus, Judicis personam assumet.

*Ut* verò melius intelligas rigorem & severitatem illius Judicij, noveris, quia ipias etiam justitias judicabit. O quantas in his injustitias & imperfectiones inveniet? *imo* judicabit justitias non quòd tales in se fuerint, sed quod pro talibus à nobis habitæ fuerint: sæpe enim (ut ait S. Augustinus) *in oculis Judicis DEI sordet, quod fulget in conspectu operantis*. O quanta tunc judicij Divini à nostris judicijs diversitas apparebit? judicamus frequenter esse nos justos, & DEUS arguet nos de peccato. Fortasse (ut dicit idem Augustinus,) *dum te putas agnum, DEUS probabit te esse hircum.* Unde exclamat ulterius: *Væ etiam laudabili vita hominum, si remotâ misericordiâ, discutias eam.*

2dò Judicabit Judex ille supremus justitias etiam hoc sensu: quia judicabit illas actiones, quarum natura ipsa exigit, ut sint justitiæ, ut sint sanctæ, ut ordinentur ad DEI gloriam & animæ salutem. Quales actiones sunt confessiones & communioniones sacramentales, piæ preces, meditationes rerum spiritualium, examina conscientiæ, opera misericordiæ, aliæque his similes actiones. Has omnes examinabit DEUS Judex; an non fuerint sacrilegæ? quâ perfectione factæ sunt? quâ dispositione & animi applicatione? quâ intentione? quo fine & respectu? quo item fructu? scrutabiturque Jerusalem in lucernis, hoc est: minimos defectus, tantò magis palmares imperfectiones, tepiditates, tædia, quæsitæ distractiones investigabit.

Judicabit 3<sup>tiò</sup> iustitias veras. Quod si autem has judicabit, tantò magis iustitias fectas & simulatas, quæ extrinsecùs patent, intrinsecùs verò sunt veræ impietates. Quod si Judex ille judicabit iustitias, subiungit S. Bernardus. *Quid injurias? quid contumelias; quid blasphemias; quid scandala & tot aperta scelera.*

Hæc considerans, reflecte te; quæ & quanta DEUS Judex in te judicaturus & condemnaturus est? Reflecte te supra tuas iustitias, supra pia opera tua, an non sint vitiata studio vanitatis? respectibus humanis? alijsque imperfectionibus? Reflecte te, supra tuas confessiones, absque prævia conscientiae discussione, sine seriò dolore & emendationis proposito, & fortè cum non requisita integritate factas, supra Communiones tepidè & nonnisi ex consuetudine peractas, & agnosce iustitias has rigidè à Christo judicandas. Reflecte deinde te, supra aperta tua vitia, scandala à te data, supra conversationes tuas, supra legum tam Divinarum, quàm humanarum transgressiones. Omnia hæc, copiosa materia judicij Divini est futura.

*Quòd si nolis de his à DEO Judice judicari, ipse te nunc judica, tuo te condemna judicio, condemna tuas imperfectiones & nequicias, de his te accusa, ea in te vindica.* Hoc medium, effugienti judicij Divini proponit S. Paulus Apostolus: *Si nos ipsos judicaremus non utique judicaremur à Domino.* Vel certè contra te ipsum aëtoris & accusatoris personam assume, & coram Sacerdote, Christi Vicario, te accusa, & ipsius judicio ac sententiæ humiliter subijce, ab hoc absolutus, judicium illud ne formides. Quidquid hîc solutum fuerit, erit solutum & in Cælis. Cave etiam ne facilis sis in judicandis & malè interpretandis aliorum aëctibus, Christo ipso monente: *Nò te judicare & non judicabimini nolite condēnare & non condemnabimini*

*Elice affectus, confusionis, aliosque materiae accommodatos: fac etiam proposita particularia. Ad extremum, humilia te coram Iudice tuo, ab eoque supplex postula, Non intres in iudicium cum servo tuo Domine, quia non justificabitur in conspectu tuo, omnis vivens.*

PUNCTUM III. Audi Ecclesiasticum Cap. 11 dicentem. *Facile est coram DEO, in die obitus retribuere cuique secundum vias suas.* Et considera, in particulari iudicio, quod fit in die obitus, seu in morte cujusque hominis, post manifestationem & denudationem omnium operum, post rigidum eorundem examen & discussionem, ex nunc ferendam esse ultimam sententiam & decretum, post quod latum, intra idem momentum perfecta ejusdem sequetur executio. Nullae tunc erunt difficultates in formando decreto; quia infinitae Judicis sapientiae nulla astutia & versutia fucum facere poterit, quominus totam causam plenissime cognoscat, & perspectam habeat, adeoque, ut aliquam dilatione opus sit, propter meliorem causae cognitionem. Praeterea nulla tunc remedia juris locum habebunt, nullae etiam preces, nulla patrocinia evincere poterunt, ut sententiae pronuntiatio differatur. Non erit etiam ulla difficultas in executione decreti, quia à supremo Iudice ejusque sententia, nulla restabit provocatio, nulla appellatio.

*Porro Decreti executio, fiet per retributionem cuique secundum vias suas. Justi tunc praemiabuntur, impij punientur. Qui ambulaverunt vias vitae, ibunt in vitam aeternam, qui ambulaverunt vias mortis, lassati sunt in via iniquitatis, ibunt in supplicium aeternum, ubi mors depascet eos. Anima quae progreditur speciosis pedibus tota pulchra & sine macula, à Sponso caelesti, ad praemia aeterna evocabitur. Quae verò inquinatis & lutosis pedibus apparebit coram illo Iudice, & quibus aliquid de*

luto & imperfectionum pulveribus adhæsit, Anima quæ ita est munda tota, ut tamen indigeat ut pedes lavet: hæc in purgatorio prius purgabitur, siquidem nihil coinquinatum intrabit in regnum cælorum.

*Hic* consideratis, intueri mentis oculo, & observa vultum & faciem animæ in cælum eun-  
tis, quàm animæ ad purgatorium relegatæ, quàm  
etiam animæ ad pœnas, & supplicia æterna damna-  
tæ. simulque te reflecte, cujus animæ sortem ex-  
optes. Nec dubium est, quòd omnibus votis & de-  
siderijs suspires, ut inter Sanctos & Beatos fors tua  
obveniat. Hoc ut assequaris, noveris; sortem hanc  
retributionem esse secundum uniuscujusque vias,  
adeoque, nemini alteri obtingere posse; nisi illi, qui  
vias vitæ ambulat, qui Christum per imitationem  
ejusdem, sequitur, qui procedit semitâ Juitorum.

*Statue* firmiter recto justitiæ tramite te pro-  
gressurum, illâ viâ, quam tibi Spiritus S. per voca-  
tionem suam ostendit, quâ te ducit; Dux & Caput  
omnium Electorum Dominus noster JESUS CHRIS-  
TUS, nec te unquam viam hanc derelicturum.

*Colloquium* ad Christum Dominum, à quo pos-  
tulabis, ut qui aliquando Judex tuus est futurus, sit  
modò Advocatus tuus, ut eâ te via ducat, secun-  
dum quam, in die retributionis, retribuatur tibi vitam  
& beatitudinem æternam.

*In fine Pater noster.*

## DIEI. IV.

### Meditatio I.

### De *Judicio universali.*

*Praludium* 1. Imaginare te in pulvere sepulchrali  
dormien-

dormientē, audire tubam Archangeli, eāque ad  
judicium universale evocari.

*Praludium* 2. Pete à DEO gratiam, ut hæc  
tuba ita sonet in auribus tuis, sicut aliquando sona-  
bat in auribus S. Hieronymi, hoc de se ipso testantis,  
utque DEUS timore hujus judicij, carnes tuas con-  
figat.

PUNCTUM I. Audi verba illa DEI Judicis, apud  
Jöëlem Cap. 3 *Congregabo omnes gentes, & dedu-  
cam illas in vallem Josaphat, & disceptabo cum eis.*

Attende: præter judicium illud particula-  
re, quod fiet in fine hominis, hoc est in morte uni-  
uscujusque, aliud judicium universale instituendum  
in fine mundi, juxta formam, adductis Prophetæ  
verbis expressam: scilicet.

*Congregabuntur* imprimis omnes gentes, per  
admirandam corporum resurrectionem: quòd ip-  
sum, tali ratione fiet: congregabuntur prius omnes  
pulveres, in quos, unumquodque corpus mortuū  
hominis dissolutum fuerat, ex ijsque congregatis, co-  
alescet corpus, cui deinde corpori, sua reunitur a-  
nima, quæ illud ante informabat & animabat, Atq;  
hoc modo, congregabuntur omnes gentes, omnes  
scilicet homines, a primo nostro Parente Adam in-  
cipiendo, ad ultimum hominem nasciturum. Nul-  
lus poterit se subducere, nullus effugiet judicium il-  
lud, sed omnes omnino oportebit resurgere & ma-  
nifestari. Quare congregabuntur tam justī, seu Be-  
atī: quā etiam impij, seu damnatī. Beati congre-  
buntur, ut in reassumpto corpore glorificentur,  
damnati congregabuntur, ut qui ante Judicij diem  
solum in anima puniebantur, postea etiam in cor-  
pore pœnam damnationis suæ sustineant. Beatorū  
animæ, ut se coram illo tribunali fistant, libenter  
relinquent sedes illas, quas in cœlis occupant, descen-  
dent exultantes à summo cœlo ad sua corpora,  
quibus reunitæ, ibunt obviam Christo in æra: qui  
F5 deim-



deinde, cum iisdem veniet cum Majestate magna. Dammati autem inviti ex inferno trahentur ante illud tribunal: vellentque protunc in inferno profundissimè mergi, vellent à montibus cadentibus tegi; ne vultu irati Judicis feriantur, & ne intolerabili illà confusione; quàm sustinere cogentur, repleantur.

*Considera 2dò* Quòd ipse Judex, illas ònes gentes deducet in vallem. Josaphat, hoc est non casu aliquo fortuito, in valle illa congregabuntur; sed congregabuntur ex altissimo DEI Judicis consilio. Deducet illas (id est, omnes creaturas rationales) Quia ipse Christus in illo Iudicio Judex futurus, personàlìter descendet & veniet, ipse sedem Judiciorum occupabit & coram suo Tribunali easdè creaturas statui volet. Deducet illas in vallem Josaphat, per ministros suos, qui in illa die, separabunt malos de medio Iustorum, malosque statuent à sinistris, bonos autem à dextris.

*Considera 3tìò* Quòd Judex, in illa die pro tribunali sedens disceptabit cùm gentibus, seu creaturis à se judicandis. Vultum terribilem Judicis inspicere, intolerabile erit. Ejus enim oculi erunt tanquam flamma ignis, ex ore verò procedet gladius, utrâque parte acutus. Quantò magis intolerabile iisdem erit, audire non tam verba, quàm fulmina de ore judicis procedentia. Satis esset ad confusionem damnatorum, videre Eum, quem confixerunt: quò autem major sit confusio ipsorum, disceptabit cùm eis Christus Judex, exprobrando ingratitude illorum, & in se crudelitatem ac tyrannidem, contemptum tot gratiæ suæ auxiliorum, tot mediorum ad consequendam salutem, à Deo ipsis liberaliter oblato, neglectum tot inspirationum, tot merendi occasionū, neglecti obsequij & servitij sibi debiti, neglectæ pænitiæ. Disceptabit tunc cum unoquoque, rationem exigendo omnium fa-

ctorum

torum, dictorum, cogitatorum, totique mundo, & universis illis, qui se huic sistunt iudicio, manifestabuntur cujusvis scelera. Has exprobrationes Christi Judicis, cum ipsis disceptantis, audientes reprobi, ô quantâ confusione replebuntur? o quanto afficientur dolore: Ululatus ipsorum, replebit universam terram.

*His consideratis, reflecte te supra teipsum & memineris: etiam te sistendum illi tribunali: sistendum inquam in hoc corpore, in quo modo vivis, deduceris in vallem Josaphat. Sed ubinam tunc invenieris? an inter oves an inter facientes hædos? num à dextris, an fortè à sinistris? num inter Beatos, an certè inter reprobos & damnatos? Reflecte iterum te, quomodo tunc feres vultum terribilem irati Judicis, audebisne in illum tuos levare, oculos? Te iptum interroga cum Iob. *Quid faciam cum surrexerit ad Iudicium Deus, & cum quaesieris quid respondebo. Quid respondebo? cum quaesierit & rationem sibi reddi voluerit, tam malè collocati temporis, neglectorum mediorum salutis, & gratiæ suæ auxiliorum, tot & tantorum scelerum à me patratorum. Certè non aliud respondere poterò, nisi quod tunc mihi dictabit, in quo me condemnabit conscientia mea. Fatebor tunc iniquitates meas, confitebor adversum me peccata: sed mea illa confessio, non erit ad obtinendam veniam & salutem.**

*Agnosce modò ò Anima & desle culpas tuas, corrige errata tua, & tunc Judicem propitium invenies. Procide ad pedes Christi Crucifixi, tuorumque delictorum veniam supplex postula illis Ecclesiæ verbis: *Iuste Iudex ultionis, donum fac remissionis, ante diem rationis. Ingemisco tanquam reus, culpâ rubet vultus meus, supplicanti parce DEVS.**

PUNCTUM II. Audi illa verba Matth. 25  
Tunc dicet Rex his, qui à dextris ejus erunt. Venite Bene-

*Benedicti Patris mei: possidete paratum vobis regnum à constitutione mundi: esurivi enim & dedistis mihi manducare, &c. tunc dicet & his, qui à sinistris erunt, discedite à me maledicti in ignem æternum, qui paratus est diabolo, & Angelis ejus, esurivi enim & non dedistis mihi manducare &c.*

Et considera post disceptationem Christi Judicis cum gentibus, seu creaturis rationalibus, proferendam esse ab Eodem, in omnium auribus sententiam: tam in bonos quàm in malos. Formam utriusque sententiæ clarè expressam habes in adducto Evangelij textu.

Expende prius sententiam ferendam in Beatos. *Tunc dicet Rex* Ipse supremus, Rex & Judex, ore suo proprio, & per seipsum, non verò per aliquem suum ministrum, sententiam promulgabit; ad majus ipsorum solatium, ad manifestandam suam in ipsos benevolentiam & amorem. Promulgabit ipse ore suo hanc sententiam, ut Beati sint iecurissimi suæ beatitudinis & felicitatis, cum optimè sciant; quòd Deus verbum de ore suo procedens non faciat irritum. *Dicet Rex, Venite Benedicti Patris mei.* Vobis enim benedixit Pater Misericordiarum, faciendo vobiscum misericordiam. Odor vestrarum virtutum & meritorum, ostendit, vos esse agrum illum fertilem, plenum, frugiferum, cui benedixit Dominus. Possidete regnum, propter contemptas possessiones terrenas. Possidete regnum, vos enim estis Filij & hæredes regni. *Possidete regnum paratum vobis à constitutione mundi.* Tanti Deus æstimavit merita vestra, ut antequam essetis; statim à constitutione mundi regnum vobis præparaverit: priùs Deus præparavit vestra præmia quàm vos feceritis vestra merita. *Esurivi enim, & dedistis mihi manducare.* O quanti Christus æstimat minutias nostras, ut eas coram toto orbe sit prædicaturus in die iudicij. O felices refectio-

nes

nes Christi; refectiones pauperum! quas ipsum Verbum Patris disertissimâ laudabit panegyri. Mortificas gustum tuum, subtrahis sensualitati tuæ, propter imitationem Christi esurientis & sitientis, ex amore ipsius, ut de eo, quod tibi subtrahis reficias pauperem, reficis ipsum Christum. Mortificationem hanc tuam, hanc pauperis, & in paupere, Christi refectionem, totus orbis, in extremo iudicii die, ab ipso Christo deprædicatore cognoscet.

*Expende deinde sententiam Iudicis in impios.*

*Tunc dieet ex his qui à sinistris erunt.* Etiam in impios sententiam, ipse Iudex Christus ore suo promulgabit, ut tinniant ambæ aures eorum, ad maiorem confusionem & afflictionem ipsorum: maiorem item veniæ & salutis desperationem, & damnationis suæ certitudinem & sententiæ latæ immutabilitatem. Dicit. *Discedite à me*, procul à me estote, discedite, hoc est: non quomodocunque recedite, sed properate ab oculis meis. At quonam discessuri sunt? si ascenderint in Cælum, tu illic es Domine, si descenderint in infernum, ades. Discedite à me, hoc est: à gratiâ meâ, à mea misericordia, benevolentia, liberalitate, felicitate, à bonitate & charitate mea. Discedite maledicti, maledicti à me, à Patre meo, à Sanctissima Trinitate, maledicti ab omni creatura, maledicti etiam ore & confessione vestrà. Maledicti propter odium, quo Deus vos totâ æternitate persequetur: maledicti propter excisionem à statu felicitatis æternæ: maledicti propter supplicia æterna. Discedite in ignem æternum. Ignis hic complectitur omnia tormenta & omnes cruciatus, hic ultor erit injuriæ Dei, ipse in furore Dei accensus est. *In ignem qui paratus est diabolo etc.* Ignis hic non vobis à me fuerat paratus, vobis siquidem regnum Cælorum paraveram: hoc regnum, Sangvinis mei pretio vobis emeram, sed vos, ab hoc regno, vestrà culpâ, excidistis

excidistis & vestrâ culpâ ignē diabolo paratū vobis, met ipsis excitastis. O miser quisquis es, peccator: perditio tua ex te est! ex DEO autem tantummodò auxilium tuum. *Eſur: vi enim non dedisti mihi manducare.* Si DEUS negligentias omissiones bonorum operum, æterno igne est puniturus, quid faciet de fœdissimis commissionis peccatis? quid de gravissimis alijs sceleribus? Quo inferno ad hæc vindicanda opus erit? Ad hanc Iudicis exprobrationem, quanta confusio impiorum est futura? Exprobratio hæc generabit impijs opprobrium sempiternum, & ignominiam æternam, quæ nunquā oblivione delebitur.

*His consideratis tecum ipse perpende. Quamnam ex his audire velis sententiam? Quodli sola prior sententia tibi placet, ita vive, ut Christum tuarum virtutum laudatorem in die extremi iudicij habere merearis.*

*Ab Eodem pete gratiam, hic sanctè & laudabiliter vivendi, ut in die iudicij favorabilem sententiam audire possis, usus illis ex proſa Ecclesiæ verbis: Inter oves locum præſta, & ab hædis me ſequereſtra, ſtatuens in parte dextra. Conſutatis maledictis, flammis acerbis addictis, voca me cum Benedictis.*

PUNCTUM III. Audi illa verba Matth. 25. *Ibunt hi in ignem æternum. Juſti autem in vitam æternā.* Et considera extremū illud Univerſale iudiciū hoc exitu eſſe terminandum quod impij poſt latam ſuæ damnationis ſententiam, diſceſſuri ſint in ignem æternum. Juſti autem auditā pariter de ſe ſententia, ituri ſunt in vitam æternam. Expende iterum ſingula, & *Imprimis:* considera infelicem circa damnatos Iudicij extremi exitum. Ibunt hi (damnati & impij designantur) poſt Chriſti ſententiam, ita infelices, ut nec titulum nec appellationem communem habeant, ut nullus terminus ſuæ infelicitatis



licitatis, satis expressivus inveniri, possit. Ibunt hi. O quanta disrumpentur invidiâ miseri illi; quod ipsi ibunt in perditionē & non alij, quod alij ibunt in vitam æternam & non illi. Ibunt in vitam æternam amici, Parentes, vicini, contubernales, quandoque suorum criminum complices, illi autem in supplicium. O quantus dolor; o quàm amara separatio? o quanto tunc impij odio exardescant adversus peccata sua, imò adversus etiam seipsos? Ibunt. Non ita pridem ad tribunal Dei Judicis trahi debuerant, post latam verò sententiam, eâ ipsâ urgente, simulque urgente nimîâ confusione ipsorum, non ferentes tantam suam ignominiam, non ferentes, ultra vultum irati Judicis, exprobrationes Christi, insultationes Sanctorum, approbationem latæ in ipsos sententiæ ab omnibus factam, ibunt, nec trahi amplius debebunt, omnia potius inferni supplicia experiri parati, quàm tantâ repleti confusione. Ibunt, in æternitate enim solus est progressus, terminus nunquam. Ibunt in ignem æternum, non redituri unquam, ibunt in ignem & supplicium æternum, propter momentaneum illud, quod ipsos cum offensa Dei delectabat.

*Considera* zdò, & expende ea, quæ post promulgatam in Beatos sententiam consequentur. *Justi autem:* si illi Justî, tu Domine justus & pius es, quia illorum præmiis merita. Justî ibunt, felices, qui ante ibant & flebant, virtutum & meritorum spargentes semina, tunc ibunt cum exultatione portantes manipulos suos. Ibunt insultantes improbis, stultitiam ipsorum accusantes, quod ipsis benè urentibus, gratiæ Divinæ auxilijs, meritis Christi, aliisque obtinendæ salutis medijs illi hæc omnia contempserint, eaque præelegerint; de quibus coguntur nunc erubescere. Ibunt Justî, sequentes Christum, in comitatu Beatissimæ Dei Parentis SS. Angelorum, ac Beatorum omnium. Ibunt in splendori-

doribus Sanctorum, damnatis illam ipsorum gloriam cum summo dolore spectantibus. Ibunt in vitam, qui moriebantur quotidie, qui continuam Christi mortificationem in corpore suo circumferebant, qui vitam suam pro Deo; prompto & alacri animo impendebant. Ibunt in vitam, nimirum: ut per visionem intuitivam DEUM clarè cognoscentes, Eodem fruantur, ut item fruantur Christi Redemptoris & Salvatoris sui conspectu, & clara iidem cognitione, in quali utrâque cognitione; consistit vita æterna. Ibunt in vitam æternam; quia introibunt in potentias Domini, & in ipsam DEUM, qui est Vita perfectissima, transformabuntur per amorem. Ibunt in vitam æternam, pro tantillis laboribus, copiosam & superabundantem mercedem recepturi. Ibunt in vitam æternam, non solum quoad animam, Deo, & suæ Beatitudini in æternum victuri, sed etiam victuri in glorioso corpore, quod mercedem æternam participabit cum Anima.

*His consideratis exhorresce infelicitatem impiorum. E contra gratulare Beatis felicem ipsorum sortem. Accendere desiderio, unâ cum Beatis evolandis ad præmia æterna. Fac proposita particularia de adhibendis medijs, per quæ possis consequi præmia Justis præparata.*

*Colloquium institue ad Christum euntem ad mortis & supplicij sui locum, ab eoquè humillimè postula, ne cogaris aliquando, propter tua scelera, ire in supplicium æternum.*

*In fine Pater noster.*

## Meditatio II. De Inferno.

*Preludium I Imaginare Evangelicum Epulo-*

RE EM

nem in flammis inferni ardentem, & ab Abrahamo postulantem, ut Lazarum in sinu suo recubentem mittat ad fratres ejus, qui illis prædicet, ne & ipsi veniant in eum tormentorum locum.

*Preludium 2dum.* Pete gratiam, quâ illuminatus, agnoscas pœnarum inferni gravitatem, & earum horrorem concipias.

PUNCTUM I. Expende illa verba Lucæ 16. *Ne veniant in hunc locum tormentorum.* Et considera, nec veriùs, nec meliùs, infernum definiri & explicari potuisse, quàm per hoc quòd sit locus tormentorum. Infernum sic definit. Epulo Evangelicus, qui propriâ didicit experienciâ, quid sit infernus, si quispiam alius, hoc nomine infernum appellasset, non mereretur fidem; meretur fidem Epulo, quia ex experientia loquitur. Cæterum huic veritati testimonium ipsius DEI, quòd majus est suffragatur. Siquidẽ Spiritus Sanctus quasque pœnas, & quaecunq; mala à nobis cogitabilia, partem non nisi pœnarum inferni appellat, dum *Psal:* 10. dicit; *Ignis, grando, nix, spiritus procellarum, pars calicis eorum.* Ut verò meliùs adhuc multitudo, vis, & gravitas tormentorum inferni innotescat.

*Expende ulterius imò* In inferno, damnatos cruciandos pœnis, & doloribus gravioribus, quàm sint quaecunq; pœnæ, quantumcunq; graves & atroces, quæ aliquando hominibus in hac vitâ inflictæ sunt, vel infligi poterant. Percurre pœnas & tormenta, quæ aliquando sive Sanctis Martyribus, sive quibuscunq; alijs mortalibus inflicta sunt. Imaginare rogos & pyras ardentes, imaginare fornaces Babylonicas ita succensas, ut flamma supra fornacem erumperet & ascenderet cubitis quadraginta novẽ. Imaginare ignitos Phalaridis boves, rotas novaculis & uncis ferreis armatas, crebris & acutis præfixas gladiis. Imaginare crurium contractionẽ, dissectiones mēbrarum factas, acutarū arundinū infixiones

cutis detractiōem, laterum candentibus laminis vel facibus exustionem, volutationes in testarum fragmentis, aquâ ferventi vel metallis liquatis perfusiones, Japonica, per aquâ in os infusionē & ejusdem violentam expressionem, tormenta, aliaq; similia innumera. Omnia hæc respectu pœnarum quas in inferno patiuntur damnati, umbra sunt & refrigerium, si post inferni cruciatus, talia tormenta pati quēpiam damnatum contingeret, is pro mollioribus rosis hæc haberet. Imaginare itē gravissimorū morborum dolores, dolores capitis, dentium, calculi, podagræ, Artrikidis, ventriculi, lienis, hepatis &c. Omnibus his doloribus incomparabiliter graviores experiuntur damnati.

*Expende 2dò* Gravitationem pœnarum inferni ex eo, quia omnia elementa & Creaturæ cruciabunt peccatores. Cruciabit Ignis, hic enim specialius assumetur pro instrumentō Justitiæ Divinæ non solum ad corpora damnatorum urenda, sed etiam ad torquendas ipsas animas, & spiritus, affligetque dānatos gravissimè ut meritō scriptura dicat. *Quis poterit habitare cum igne devorante & ardoribus sempiternis.* Cruciabit aqua jam fervore & calore intensissimō, iā frigore rigidissimō, duplex ibi stagnum dabitur unum gelidissimū alterum ferventissimum bullientium aquarum, vel certè ignis sulphuris & liquatorum metallorum. Hæc stagna erunt balnea damnatorum. Cruciabit ær suō pestilentissimō afflatu, intolerandō fœtore, Cruciabit concitatis procellis dānatos, tanquam folia rapiendo & transferendo de unō tormentorum locō in alium. Cruciabit terra absorbendo damnatos, suō pondere eosdem conterendo, saxa in ipsos ejaculando, ignes, cineres copiosos evomendo, metallis miseros perfundendo, in iisque demergendo. In spectris varia animalia & Creaturas repræsentantibus cruciabunt damnatos, serpentes, viperæ aspides, vultures, milvi &c. Devorabunt

bunt eos & discerpent morsu amarissimo, leones dentibus comminuent, urfi unguibus dilacerabunt &c. Omnesque aliæ Creaturæ simili modò armabuntur in ultionem inimicorum DEI. Modò dum sumus in hac vitâ mortali, Creaturæ sunt exarmatæ, & tamen graviter affligere & cruciare possunt. Quanta vis earum erit in excrucian- dis improbis, dum ab ipsò DEO armabuntur! Quantam stragem gladius ille faciet de quò scriptura loquitur, *si exaceruo ut fulgur gladium meum*. Ipsi dæmones immanissimi nostri hostes, quorum suggestionibus & tentationibus, tam facilè modò obsequimur, crudelissimi damnatorum tortores sunt futuri. Odium & furorem quò in DEUM exæstuant, in miseram animam DEI imagine insignitam tunc evoment, ad instar Pantheræ. quæ cum non possit nocere homini, rabiem suam in ejus imaginem effundit, eamque ( si in hanc incidat ) in frusta discerpit. Sed supra quascunque Creaturas, ipsa Justitia Divina atrocissimè sæviet in damnatos. Deus enim tunc ager in virtute propriâ, in fortitudine brachij sui, ut agens potentissimum, Creaturæ autem agent in virtute alienâ, tanquam instrumenta DEI, ut agentia debilia & imperfecta. Deus suas tunc ulciscetur offensas & injurias, quapropter pro mensurâ & modò, quò eas averfatur, proportionatè ipsas puniet & vindicabit.

*Expende 3tio, & percurrere singulos sensus, in quibus cruciabuntur damnati post corporum resurrectionem. Cruciabitur gravissimè visus, densissimis tenebris, à quibus scriptura infernum appellat tenebras exteriores. Cruciabitur fumò illò ignis tartarei molestissimo. Turpissimis dæmonum spectris horrore teterrimis, illius infernalis carceris, conspectu instrumentorum ad excruciandos damnatos servientium, totque gravissimorum tormentorum. Tandem cruciabitur visus ipsis lacrymis, quas copio-*



fiffimè damnati profundent, educante eas ex oculis vi cruciatuum, & doloris ac triftitiæ magnitudine. Auditus cruciabitur mœtiffimis desperantium ejulatibus, lamentabili væ incessanter perfonante, triftibus gemitibus, non tolerandis maledictionibus, per quas filij parentibus, parentes filijs maledicent. Singuli damnati maledicent diei, in quo nati sunt, tempori, quo in peccatum prolapsi sunt, complicitibus suis, quibus ad offensam DEI abusi sunt, quorum pravo exemplo inducti sunt ad peccatum. Cruciabitur auditus stridore dentium, fremitu inferni, inconditis dæmonum clamoribus, horrendis in DEUM & Christum, in Sanctiffimam DEI Parentem, & in Sanctos, blasphemijs, illis mutuis graviffimis damnatorum sibi invicem insultationibus, improprijs, & exprobrationibus, ad quæ omnia, tinnient ambæ damnatorum aures. Cruciabitur gustus fame illâ acerbiffimâ, fame caninâ, de qua scriptura loquitur, *famem patientur ut canes*. Cruciabitur gustus siti illâ ardentiffimâ, quam nunquam reftingvere poterunt, volent damnati cùm Epulone vel unicâ guttâ, ex intineto Lazari digito defluente, exultas lingvas suas refrigerari, sed hanc gratiam nunquam impetrabunt. Gustus damnatorum, cruciabitur felle draconum, & veneno aspidum insanabili, Cibus illorum non alius est futurus quàm ignis ille infernalis, quàm omnium sordium colluvies. Potus damnatorum pix liquata metalla, sulphur ignis, grando, nix, glacies, spiritus procellarum erit pars calicis quò potabuntur.

Cruciabitur odoratus graviffimò illò fætoze, quem putrida & adusta damnatorum corpora exhalabunt, sulphureo stagni infernalis vapore, graveolentiffimis exhalationibus ascendentibus ex sentinis foetidiffimis. Cruciabitur denique tactus igne infernali, tóta damnatorum corpora penetrante, imò etiam & ipsa pervadente ossa, graviffimis om-

nis generis cruciatibus & per omnia membra doloribus. Totum corpus damnati ardentem carbonem vel ferrum ignitum referet, igne avernali intimas carnis & ossium medullas depascente.

*Expende qđ & percurre potentias Animæ, cruciatulque, quibus illæ cruciabuntur.* Cruciabitur Memoria recordatione honorum, divitiarum, voluptatum, quibus dum viverent affluebant impij, propter quæ in vitâ felices & beati censebantur, per totam verò æternitatem miseri & infelices sunt futuri, Ad hanc recordationem bonorum, quibus in vitâ fruebantur, exclamabunt; Quid nobis profuit superbia nostra, aut divitiarum jactantia, quid contulit nobis, transierunt omnia & nos in malignitate nostrâ consumpti sumus. Cruciabitur memoria recordatione gratiarū & inspirationum divinarum contēptarum, tot mediorum salutis neglectorum, occasionum & commoditatum merendi ac pœnitentiam agendi omissarum, tanti temporis, in quò salutē consequi poterant miserè perditī & collocati. Cruciabitur adhuc memoria, recordatione aliorum cœqualium, consodaliū, quibus convixerunt, qui in similibus occasionibus, tentationibus existentes, similibus inclinationibus ad malum obnoxij, æqualibus gratijs adjuti, ibi strenuè decertarunt & de hoste triumpharunt, ubi illi miserè prolapsi, se in perditionem præcipitarunt, & æternæ damnationis reatam incurrerunt. Cruciabitur ulterius memoria, recordatione conversationis malæ, cum ijs, cum quibus nunc torquentur, & quorum maledictis impetuntur: tandem cruciabitur tot & tantorum delictorum, ab ipsis commissorum conscientia.

*Intellectus* cruciabitur vivâ apprehensione & consideratione implacabilis odij, quo Deus damnatos tanquam hostes sibi maximè exosos, persequetur per totam æternitatem. Implacabilis item odij quò eosdē prosequetur Christus Dominus, Beatissima Mater ejus, S. Angelus Custos, alijque Sancti

Caelites. Consideratione etiam odij, quò unum quemque damnatum prosequuntur dæmones, alijque suæ damnationis consortes. Cruciabitur præterea intellectus apprehensione vivâ & forti omnium tormentorum, eruciatuum, dolorum, quos vel actu patitur damnatus, vel totâ deinceps æternitate est perpeffurus. Idem intellectus cruciabitur judicijs illis, quibus judicabit se esse infelicitissimum, vana, misera, nec diuturna fuisse illa omnia; propter quæ perijt in æternum. Postremo cruciabitur intellectus, illis discursibus & illationibus *Ergo erravimus*; Ergo totâ æternitate luemus pœnas, ergo nunquam misericordiam consequemur.

Voluntas præ alijs potentijs cruciabitur singularissimè, sicut enim hæc existit potissima imò unica damnationis causa, ita ut verè dictum sit, cesset propria voluntas, & infernus non erit, ita in ipsam potissimum sæviet ultrix scelerum justitia Divina. Cruciabitur verò (quantum capiti intellectus nostri assequi licet) furamâ in malò obstinatione, odiò implacabili, quò averfabitur DEUM, humanitatem Christi, pretiosissimam DEI Parentem, Sanctos omnes. Rabie & furore immanissimo in omnes creaturas, & imprimis in seipsum. Infelici sed simul inefficaci appetitu mortis, suæque annihilationis. Tandemque summâ illâ disordinatione, ex vi cujus non poterit quidquam velle nisi malum, non poterit odisse nisi bonum.

*Expende 5tò* Duplicem fore damnatorum pœnam, unam, quam vocant pœnam sensûs, alteram, quam vocant pœnam damni. Pœna sensûs consistit non solum in cruciatibus, quos corpora damnatorum, in suis sensibus sive externis, sive internis patientur, sed etiam in illis cruciatibus, quos in Potentijs animæ sustinebunt damnati, quos item ipsæ animæ ac spiritus corporis expertes, nimirum dæmones perpetientur ab igne infernali, quò  
 eodera

eosdem spiritus ( ut dicit S. Augustinus ) *torquet & torquebit veris & miris modis.* Poena damni consistit in exclusione damnatorum ab æternâ beatitudine & gloriâ cælesti, hoc est â visione intuitivâ DEI, & amore ejus fruitivô. Poena hæc gravissimè affliget & torquebit damnatos. Non dolet tantum Rex propriô expulsus regnô, & ad extremam redactus egestatem, de tam infelici & calamitosô suô statu. Non dolet tantum filius de exclusione sui ab hæreditate jure naturali sibi debitâ, quantum ingemiscunt damnati de sui exclusione ab illô regnô, ab illâ hæreditate, quâ potentiuntur Beati. irrugit Esau, postquam intellexit se privatum esse jure filij primogeniti, & benedictionem Patris à fratre suô sibi surreptam fuisse. Multò magis irrugient damnati, dum intelligent, se, qui aliquando filij regni fuerant, vel esse poterant, ejici, & in æternum præcipituri supplicium. Hæc poena adeo gravis est futura damnatis, ut S. Chrysostomus dicere audeat. *Decem mille quis ponat gehennas, nihil tale dicet, quale est, Beatâ gloriâ excidere.* Porro ex eò damnati tam graviter hanc poenam damni sentient, Quia vivaci apprehensione advertent, quod ipsorum ultimus finis, ad quem consequendum omnia eorum studia, omnes actus collimare debuerant, fuerit DEUS, ut clarè & intuitivè visus; quod hic unice potuerit esse expletivus & satiativus ipsorum appetitûs, quod in hoc unice conquiescere potuerint; quod cum hoc tantò bonô omnia pariter bona ipsis obtigissent. Quod hic finis tantæ excellentiæ & præstantiæ sit; ut & ipse Deus non aliunde sit & fuerit, semperque erit summè felix & beatus, nisi quod seipsum perfectissime videat & cognoscat, seque ipsum summô amore amet. Ab hoc ergo fine, siquidem advertent damnati, se æternaliter excidisse, jamque se esse extra omnem spem talis beatitudinis & felici-

tatis obtinendæ, serò agnoscent, quàm grave incurrerint damnum, tantique damni pœnam sentient acerbissimè. Augebit dolorem illorum, ex tali pœnâ, irritatio appetitûs eorundem, tum per gaudia Beatorum ab ipsis in die extremi iudicij cognita, tum ex splendore, & maiestate magna supremi Iudicis, ad iudiciûm universale venientis ab ipsis conspectâ.

*His expensis reflecte te, an & tu non merueris aliquando, ut venires ad infelicem illû tormentorum locum, an non pluries tibi debebatur infernus. Cogita qua ratione factum est, quod adhuc cum Epulone non ardeas, & exclama: Misericordia Domini, Quia consumpti non sumus. Recogita quis in te animi sensus, an poteris sustinere inferni pœnas? an poteris habitare cum igne devorante? Experire quantum hic ignis noster urat, quod si illius ardores sustinere non vales, quomodo poteris habitare, cum sempiternis, ignis infernalis ardoribus.*

*Hinc autem facîle deduces 1mò. Non debere te unquam gravi mortali peccato DEUM offendere, cum propter quodvis peccatum mortale, incurras reatum sustinendi æternas inferni pœnas. 2dò. De peccatis à te commissis debere te convenientem agere pœnitentiam Si enim commisisti peccatum mortale, jam infernum meruisti, à cuius reatu potes adhuc liberari in hac vita, non alia tamen viâ, nisi per pœnitentiam, eamque seriam, ac talem, qualem à te Christus requirit.*

*3tò. Pœnitentiam hanc non differendam esse, quia incertus es, an commoditatem, quam nunc, habes ad pœnitendum, habiturus es postea? an tempus illud, in quod tuam differs pœnitentiam, mors & æterna tua non præveniet damnatio. 4tò providendum tibi esse, ne deinceps mortaliter pecces, ut si in certo & fixo vitæ statu constitutus es, habeas modos & media statui huic convenientia, ad sancte*



Sanctè & laudabiliter vivendum, & DEUM non offendendum unquam, maximè peccato lethali. Si necdum es in certo statu vitæ, illum statum eligas, in quo securus esse possis de non offendendo DEO mortaliter, & non incurrendo periculo damnationis æternæ.

*Fac* proposita, Lacrymis pœnitentiæ desse tua peccata, ipsæ de te sume tuorum scelerum vindictâ ne tota æternitate ea deslere & æterna supplicia sustinere cogaris. DEO te offeras ad quasvis crucces & pœnas in hac vitâ sustinendas, ut pœnas æternas effugias, dicendo. Hic ure, hic seca, modò in æternum parcas.

PUNCTUM II. Audi illa verba Deuteron. 25. *Pro mensura delicti, erit & plagarum modus.* Et considera, licet in inferno omnes damnati gravissimas pœnas sint perpassuri, sive pœnas sensûs, sive pœnas damni, inter has tamen ipsas pœnas, quas diversi sustinebunt, magnam futuram esse inæqualitatem, nam graviorum & plurium delictorum rei, graviores sustinebunt pœnas, quàm ille, qui unius peccati mortalis vel pauciorum & leviorum fuerit reus. Quod ut melius perspicias.

*Expende* imò Diversa peccata, diversis in inferno punienda pœnis. Et sic aliâ superbi, aliâ gulosi, & ebriosi, aliâ avari, aliâ luxuriosi, aliâ alienæ famæ detractores, aliâ iracundi, alia invidi &c. punientur pœnâ. Superbi punientur gravissimè humiliatione & depressione sui, in qua illud sibi occident: *Quomodo cecidisti Lucifer, qui manè oriebaris.* Gulosi ebriosi punientur gravissima fame & siti, & qui cum Epulone quotidie epulabantur splendidè, unicam aquæ guttam, ad refrigerandam linguam postulabunt. Avari punientur & affligentur maxima egestate illudque de ipsis verificabitur: *Viri divitiarum dormierunt somnum suum & nihil invenerunt in manibus suis.* Luxuriosi, gravissimâ toto corpore per-

petientur tormenta. Juxta illud Apocalypsis *Quantum indeliis fuit, tantum illi date tormentum*, Detractores punientur in lingua & suâ propriâ famâ. Inverecundi aspectus punientur oculorum cruciatu, Rapinæ per torturam manuum.

*Expende 2dò* Quò plura sive numero, sive specie aut genere diversa peccata quis commisit, eò plures numerò sive specie, aut genere diversas in infernò sustinebit pœnas. Multiplicitati enim peccatorum genericæ, multiplicitas generica pœnarum, multiplicitati specificæ, aut numericæ peccatorum respondebit, multiplicitas specifica aut numerica pœnarum. Intensionem etiam majori peccati, correspondebit intensio proportionata pœnæ. Circûstantijs aggravantibus respondebant aggravantes circumstantiæ pœnarum, ita enim fiet, ut pro mensura delicti sit plagarum modus, & ut retribuatur cuique juxta vias suas. Verificabitur & illud: *Potentes potenter punientur*. Illud item *Cui plus datum plus requiratur ab eo*.

*Expende 3tò* Etiam venialia in hac vitâ non expiata, in damnatis, pœnis inferni punienda esse per accidens. Et sic si quis plurium venialium reus, committat peccatum mortale, post illudque impœnitens moriatur & damnetur, talis in infernò non solum peccati lethalis a se commissi luet pœnas, sed etiam patietur pœnas peccatorum venialium. Idque aliqui Theologi docent in talibus damnatis venialia in infernò plectenda esse pœnâ æternâ alij docent pœnam ipsorum futuram temporalem.

*His expensis* quàm extrema sit dementia, eorum, qui in unum prolapsi peccatum mortale: resolvunt se etiam in alia, & peccatis peccata accumulânt, idque frequenter non numerò tantum, sed specie & genere diversa, tanquam si parùm esset unum illos meruisse infernum, ut velint tot infernos tot gehennas, tot pœnas numerò, specie, & genere di-  
versas

versas sustinere. Cogita iterum, quàm timenda sint beneficia Divina aut potius quàm timendum sit post accepta Dñi Beneficia, post collata uberiora gratiæ ejus auxilia, & habitas opportunitates ad tentationes vincendas, iisdem succumbere & Deum offendere, à talibus enim plus requiretur, siquidem ipsis plus datum est. Cogita ulterius, quomodo non sint contemnenda, peccata venialia; quando, quidem hæc per accidens in damnatis puniuntur poenâ inferni. Non potest tibi constare, quod post multiplicata venialia, non sis prolapsurus in mortale, imò contrarium est præsumendum; quod si lapsus fueris in mortale, & propter hoc dānaberis, etiā venialia teneberis exsolvere poenis inferni.

Fac reflexiones materiæ accomodatas, fac item proposita, & varios elice affectus.

PUNCTUM III. Audi illa verba: *Momentaneum quod delectat, æternum quod cruciat.* Et considera poenarum inferni, quibus mortalia puniuntur, hanc futuram gravissimam proprietatem, quod sint tota æternitate duraturæ, quod momentaneæ impiorū delectationes quibus in vita Deum mortaliter offenderunt, per totam æternitatem sint puniendæ.

Vis nosse quid sit infelix illa æternitas? Est duratio gravissimarum illarum poenarum, carens fine & termino, hoc est nunquam terminanda. Elabentur millia annorum, miliones milliones millionū ab inchoatâ dānatione, num fortè tot saltem elapsis annis finietur poena damnati! nequaquam. Imò hæc primū dolorum & damnationis erunt. Fac cogitabiles suppositiones, calculationes, ut pervenias ad terminum æternitatis, per nullas ad illum pervenies. Intra mille annos unus damnatus unicam lacrymæ guttam profundat, ex ita profusis guttis si conserventur, coalescet oceanus, & ad terminum æternitatis non perveniet. Intra millionem annorum producat Deus, pulvisculum unum

unum, singulisque annorum millionibus, alios & alios pulvisculos creet & reponat in spatio quod est inter centrum terræ & inter supremi cœli concavum. In hunc modum factâ pulvisculorum productione, pulvisculis replebitur totum memoratum spatium, & non pervenietur ad æternitatis terminum, ad id enim, quod nec est, nec esse potest, perveniri nequit.

*Essentia* & natura æternitatis plenè & sufficienter explicatur, duobus illis adverbijis *semper, nunquam* semper necabit tartarus, nunquam, tamen enecabit, semper vorabit tartarus, nunquam devorabit. Semper trucidat tartarus, nunquâ conquiescit. Heu semper ardet tartarus, nunquâ focus quiescit, arsurâ sēper fulmina & sopienda nunquam.

*Æternitatis* illius infelicis mensura futura est ipsius DELi æternitas, tamdiu enim pænæ inferni durabunt, quamdiu in DEO manebit jus ad exigendas de peccatore pœnas, propter offensam sui, ab eodem commissam. Hoc autem jus, tamdiu manebit, quâmdiu DEUs erit DEUs, quia tam diu manebit illud jus quamdiu non exhibebitur, vel satisfactio condigna pro peccato, vel satisfactio æqualis eidem. Porro satisfactio condigna pro peccatis damnatorum nunquam exhibebitur, quia ex inferno nulla est redemptio. Satisfactio etiam æqualis, gravitati peccati mortalis nequaquam exhiberi potest, quantâcunque enim satisfactio, quomodo-cunque intensâ, & quantumcunque quoad suam durationem protractâ & extensâ adhuc major & major satisfactio debebitur. cū nulla possit ad eam æstimationem in suo ordine pertingere, quam habet offensa mortalis, ut DEUs offensus dicere possit, Jam pro mea offensa his pœnis mihi plenè satisfactum est. Jam jus meum ad irasci extinctum, non amplius exigo ultiores cōmissi peccati pœnas.

*Æternitas* hæc pœnarum, quantum augebit  
• & aggra-

& aggravabit damnatorum poenas & cruciatus, explicari non potest. Nunc in maximis ærumnis illud habetur solatii, quod hæc aliquando sint terminandæ, quod mors saltem sit ipsas terminatura. Quanta igitur è contrario damnatorum afflictio erit? quod ipsorum calamitates & miseriæ finem nunquam sint accepturæ. Illud infelices damnati, inter suos cruciatus sibi lamentabiliter occinent. Perijt eheu! perijt finis meus! Ipsa mors damnatorum non erit terminus ærumnarum, quas patientur. Hæc enim ita depascet, ut semper morientes, moriantur nunquam, quærent tunc miseri mortem & non invenient. Molestissima fuit Ezechielii Prophetæ, per trecentos nonaginta dies, in uno latere cubatio, molestissimum etiam alijs est, in molli culcitra longiori tempore decumbere. Quid putas quàm molestum erit tota æternitate excruciaci, tota æternitate super ignitos carbones super durissimas ardentes & æstuentes cubare crates.

His expensis compara rigidissimam pœnitentiam per totam vitam continuatam, cum æternitate pœnarum inferni, quàm levis hæc, & brevis, illius æternitatis comparatione esse debeat. & reflecte te supra tuam a b austeriore vita & à statu pœnitentiæ abhorrentiam, ad talemque te vitam magno animo resolve. Reflecte te item supra momentaneas delectationes, vanitates &c. quam facilis fueris ad eas sectandas, & cum infelici æternitate commutandas. Terreat te in posterum infelicissima hæc æternitas; terreat æternum illud quod cruciat; dum te invitabit momentaneum quod delectat. Accendere etiam ardentissimo zelo, quærendi tot animas miserè pereuntes, easq; ex inferni faucibus extrahendi.

*Colloquium* institues ad Patrem æternum illo S. Francisci Xaverij affectu. Æterne rerum omnium effector DEUS, memento abs Te animas infidelium



infidelium & peccatorum procreatas easque ad imaginem & similitudinem tuam conditas. Ecce Domine in opprobrium tuum his ipsis infernus repletur. Memento JESUM Filium tuum, pro illorum salute, atrocissimam subiisse mortem. Noli quæso Domine ultra permittere, ut Filius tuus, ab infidelibus & peccatoribus contemnatur. Sed precibus Beatissimæ Virginis, Sanctorum omnium, & Ecclesiæ Sanctissimæ Filij tui sponsæ placatus, recordare misericordiæ tuæ, & oblitus impietatis eorum, eos ex faucibus inferni potenti manu tuâ extrahe, & effice; ut ipsi quoque te vivâ fide & vitâ Sanctè actâ, agnoscant aliquando, & quem misisti, JESUM CHRISTUM; per Eumque salvati & liberati, Te per totam æternitatem cum Sanctis tuis glorificent.

*In fine Pater noster, Ave Maria.*

### Meditatio III.

### De Regno Christi.

*Preludium I.* Imaginare Christum obeuntem Synagogas, Oppida & pagos Iudææ, Galilææ & Samariæ, & ubique prædicantem Evangelium & Regnum DEI.

*Preludium II.* Pete gratiam, ut Christum Regem tuum esse agnoscas ejusque jussa & sanctissimam voluntatem in omnibus exequaris.

PUNCTUM I. Audi verba illa Psalmistæ in Persona Christi dicta Psal. 2. *Ego autem constitutus sum Rex, ab eo super Sion, Montem Sanctū ejus etc.*

Considera imò Christum Dominum non solum quatenus DEUS est, sed etiam quatenus est Homo, Regem esse. Quatenus est DEUS, REX CHRISTUS est, quia est Dominus univerforum, quia titulò creationis & conservationis, per quam singulis momentis omnes res creatas conservat, titulò etiam

etiam gubernationis, quâ gubernat universa, omnia subsunt ipsius imperio, & altissimæ ejus regię potestati. Quatenus etiam Christus est Homo, est REX & Dominus, & REX Omnium Creaturarum. Regia potestas & autoritas Christo Homini convenit propter unionem cum Personâ Divinâ. Est unctus Domini unctione Spiritûs S. est REX constitutus super montem Sanctum Sion, data est ei potestas in Cælo & in terra. Pater æternus misit in terras unigenitum Filium suum accipere sibi regnû & reverti.

*Considera 2dò* Christum, quodd futurus esset REX, & Prophetæ prædicaverunt & Angelus Gabriel annuntiavit. Dabit ei Dominus, sedem David Patris ejus, & regnabit in Domô Jacob in æternum. Et Sancti tres Reges Christum ut Regem inquisiverunt, adoraverunt ut Regem, datisque muribus Regem recognoverunt. A populo insuper Iraliticô tanquam REX est salutatus, tandemque ob hanc causam, quod REX esset, ad mortem est condemnatus.

*Considera 3tiò* Christum Dominum omnibus regijs dotibus & præstantissimis virtutibus instructum fuisse, ut pro Rege maximò, potentissimò, sapientissimò, &c. cui nullus par, vel similis esse possit, haberi debeat. Habes in Christò sapientiam majorem quàm Salomonis, fortitudinem tantam, ut & vectes ferreos confregerit, & portas æreas destruxerit, & mortem ac infernum, debellaverit. Habes liberalitatem & munificentiam in subditos majorem quàm Assveri, ipse tibi paravit mensam adversus eos qui tribulant te, ipse suò corpore te reficit, suò sanguine potat, infinitò meritorum suorum thesaurò ditat, & divitias Bonitatis, & gratiarum suarum in te effundit. Vis nosse quanta sit gloria & Majestas Regis hujus? Licet eam Christus dum inter mortales viveret, latere voluerit

rit; nihilominus eandem aliquomodo manifestavit in suâ gloriosâ transfiguratione. Si lilia DEUS sic vestit, ut nec Salomon in omni gloriâ suâ possit illis comparari, quanto magis gloriæ, quæ ab intus fuit, Regis gloriæ Christi, à quâ idem Christus est REX gloriæ, nulla terrenorum Regum gloria cōparari potest. Si etiam nosse desideras, quantus Regis Christi amor sit in subditos; hinc agnosce. Ipse alligat vulnera nostra, ipse illis pretioso Sangvinis sui balsamo medetur, ipse ut hominem de servitute dæmonis liberaret, dedit se in pretium & redemptionem; totum se expendit in nostros usus & commoda. Ad extremum Christus pro subditis suis animam suam posuit, quâ charitate maiorem nemo habet.

*Considera 4to* Christum Regem esse taliter, ut Regnum ipsius non sit de hoc mundo. Christus REX est, non ad exigenda tributa, quia bonorum nostrorum non eget, quod si exigit aliquod tributum, non exigit aliud, nisi amorem sui & imitationem, ut illi cor tuum dones, ut ipsum ex toto corde ames. Christus item est Rex, non ad exercitum ferro armandum, & hostes visibiles, visibiliter debellandos, cum occultâ suâ virtute id præstare possit, efficacissimè, sine visibilibus armis & ferro, idque fecerit in prostratis illis militibus, qui ad se comprehendendum venerant. Sed ut dicit S. Augustinus: *Est Rex per hoc, quod mentes regat, quod in æternum consulat, quod in Regnum Celorum credentes sperantes & amantes perducatur.*

*Considera 5to* Christum esse Regem super omnes Creaturas, esse Regem non solum hominum, sed etiam Angelorum. Ipsi ministrant & ministrabant Angeli, ipsi etiam dæmones obtemperant, subijciuntur. In Nomine JESU omne genu flectitur Cœlestium, terrestrium & infernorum. Sed maximè Christus sibi cōplacet in hoc titulo, quod

quod sit REX super Sion montem sanctum ejus, quod sit REX super populum electum, super filios Regni. Christus item est REX, ut homines eruat ex servitute diaboli. ut vocet eos in libertatem filiorum DEI. Est REX Regum, & Dominus Dominantium, ipse enim suos subditos Reges facit, eosque constituit Principes super omnem terram, vult eos dominari suis affectibus, se ipsis, & totò mundo vult esse superiores. Maximus dishonor Christi esset, inter suos subditos numerare servos & mancipia, habere serviles animas, cum ipsum servire Christo regnare sit.

*Considera* tandem 6rò, Christum Regem maxima præmia præparasse subditis sibi adhærentibus. His paratū est regnum cœlorum ante constitutionem Mundi. Ipse daturus est præmia maxima, præmia æterna, pro brevibus obsequijs, & exiguis meritis. Præmia hæc erunt, salus animæ & æterna subditorum suorum felicitas & beatitudo. Ipse DEUS, Ipse Christus, futura est merces eorum, idque merces magna nimis.

*Hæc* Considerans, admirare stultitiam & cæcitatem hominum, quod non adhæreant Regi huic amabilissimo, quod eū ex throno suo, hoc est ex Animâ, quæ Christi sedes, imò regnum est, quod ille sanguine suo acquisivit, ejciant, & in hoc regnò velint regnare, carnem, mundum & diabolum infensissimos Animæ, & ipsius Christi hostes.

*Statue* firmissimè adhæsurum te semper Regi tuo. Protestare, non agnoscere te alium Regem nisi Christum, velle te illi constantissimè servire. Postula, ut te erutum ex servitute diaboli, in servum perpetuum recipiat.

PUNCTUM II. Audi illa verba Christi apud S. Matth. Cap. 10. *Non veni pacem mittere sed gladium.* Et considera Christum Regem totum in hoc esse, ut universos Mortales suò subijciat imperiò,

periô, ut infideles & hæreticos, ad fidem veram, peccatores ad poenitentiam adducat, & hostes generis humani debellet, ex eorumque potestate, si quos mortales captivos detinent, eruat, ac ipsos suæ felicitatis & regni Cohæredes faciat.

Ad hoc bellum hostibus generis humani inferendum, omnes adhærentes sibi subditos, REX Christus invitat, & eos, arma sumere jubet, *Non veni pacem mittere, sed gladium.* Illudque maximè cavet, nè cum hostibus nostris, carnè, mundò, & diabolò, pacem aliquando ineamus, ne ad tractatum faciendum descendamus, vel armistitium etiam ad breve tempus indulgeamus. Ad hoc inferendum bellum, omnes qui adhærere sibi voluerint, & te inter ipsos adhortatur, talique alloquitur oratione.

Fideles mei subditi, in animo mihi est, hocque meum est immutabile decretum & propositum, universas infidelium regiones, meæ ditioni subijcere, meos & vestros acerrimos hostes, carnem, mundum, & diabolum profligare, de ijsque triumphare bellum inferre perfidiæ, & omnibus vitijs. Ad hujusmodi bellum & armorum, societatem vos invito, ut mecum pariter contra communem hostem DEI & hominum decertetis, ut infidelium regiones, meò subijciatis imperiò, totique sitis, in perfidiâ & vitijs debellandis, & liberandis peccatoribus ex servitute peccati. Confidite, Ego vici mundum, & vos in hoc bellò feliciter triumphabitis. Hoc persuasum vobis esse volo. Quod in bellò, primus ego hostem sum aggressurus. Ipse in vobis & pro vobis decertabo, vires & robur, cui non poterunt resistere adversarij vestri, suppeditabo, totumque hostilem impetum ipse sustinebo. In perferendis injurijs, incommodis, ipse vobis præire volo. In persequendis hostibus nullis parcam laboribus, nullis sudoribus. Corpus meum in vulnera & dolores expono, vitam denique meam, & Sangvinem libentissimè



bentissimè profundo, pro vestrà incolumitate & salute. De annonâ, commeatû, & necessarijs belli impensis, & sumptibus, ne sitis multum solliciti. Meum erit hæc providere. Præmium etiam fortitudinis vestræ, certum vos manet, illudque mihi & vobis commune. De spolijs tantum quisque participabit, quantum impendet laboris. Illud quâ maximè ab omnibus desidero, ut me præeuntem sequamini. Unumquemque vestrum paratum esse, oportebit, non aliò uti victû, vestitû, & armis, nisi quibus me utentem conspexerit. Proinde victus cuique erit jejunium, inedia, opprobria, his enim ego saturabar. Potus, erunt amaritudines, fel, acetum, salus, & conversio animarum, lacrymæ pœnitentium. His ego sitim meam restinguebam. Vestitus erit, vestis irrisoria, confusio faciei, contumeliæ, contemptus. Hæc enim sunt vestis & insignia mea, his etiam vos uti oportebit. Estque necesse, ut ad exemplum meum, talî cibò & potû reficiamini, & ut vestibus ac insignibus Regis vestri induamini, meum & vestrum hostem non aliter debellaturi.

Adhortatione hac Registui accendere, ad ei obsequendum, ad eum comitandum, & quàm perfectissimè imitandum, cum eòque contra communem hostem, strenuè decertandum.

PUNCTUM III. Audi verba illa S. Petri : *Domine tecum paratus sum & in carcerem & in mortem.* Et considera per illam Regis tui adhortationem, quam puncto præcedenti, mente perpendisti, exigi à te tuum responsum, & ultimam tuæ voluntatis resolutionem. Esne comitaturus Regem tuum, ad bellû, perfidiæ, vitij, alijsque, hostibus inferendum, esne strenuè contra ipsos decertaturus? Paratusne es, ut eò victû, vestitû, armis, & insignibus utaris, quibus usus est Rex tuus Christus, nimirum, esne paratus ad jejunia, inedias, amaritudines,

nes, ad frigus, nuditatem, cæteraque incommoda, dolores, imò & ipsam mortem, amore Regis tui, & propter imitationem ejusdem, perferendam An exoptes indui vestibus & insignibus Domini tui, Jesu Christi? nimirum an exoptes contumelias, contemptus, irrisiones, variasque confusiones, & ut pro illud habearis? Tandem an velis Regem tuum comitari indissolubiliter, eumque quàm perfectissimè imitari?

Certè si Rex quispiam terrenus, tali adhortatione, quam aure internâ audisti, subditos suos ad bellum invitaret, cum talibus & tantis appromissionibus, omnes paratissimos se esse ostenderent. Et si quis se non offerret, sed detrectaret, cum eodem Rege contra hostem progredi, is pro inerti & ignavo, nec satis sanæ mentis homine haberetur, sanhisque & irrisionibus ab omnibus impeteretur. Hæc te labes manet, has cæli subsannationes experieris, nisi Regis tui Christi, justæ obsecundaveris petitioni.

*Reflecte te, à quò tempore Rex tuus Christus te invitat ad bellum, vitijs & hostibus ejus inferendum, ad subjugandos infideles svavi jugo Christi, ad convertendos peccatores, ad Regem tuum per vitam sanctiorem & perfectiorem imitandum. Confundere quod suis adhortationibus, svasionibus & exemplis parum, aut nihil, hætenus Rex Christus in te effecerit. Protestare quod Christum ab hinc sequi velis, illis S. Petri Apostoli verbis, Domine tecum paratus sum etiam in carcerem & in mortem. Illis item 2di Regum 15, Vivit Dominus & vivit Dominus meus Rex, quoniam in quocunque loco fueris Rex, sive in morte, sive in vitâ, ibi erit servus tuus.*

*Conclude affectû & protestatione, desumptâ ex Exercitiò S. Patris Ignatij de Regnò Christi. En ò Rex supreme, ac Domine Univerſorum, tuâ ego licet*

est indignissimus fretus tamen gratiâ & ope, me tibi penitus offero, meaque omnia, tuæ subijcio voluntati, attestatis coram infinitâ bonitate Tuâ, nec non in conspectu gloriosæ Virginis Matris Tuæ, totiusque curiæ Cœlestis, hunc esse animum meum, hoc desiderium, hoc certissimum decretum, quod quam proximè velim te sequi, & imitari in ferendis injurijs, & adversis omnibus, cum verâ tum Spiritus tum etiam rerum paupertate, si Sanctissimæ Majestati tuæ placuerit, me juxta statûs mei rationem, ad hæc eligere & recipere. Quod velim tuis vestibus, & insignibus indui, bellum perfidiæ ac omnibus vitijs inferre, & contra tuos & Animæ meæ hostes strenuè decertare.

*In fine: Suscipe Domine universam libertatem*

## DIE I. V.

### Meditatio I.

### De Incarnatione Filij DEI.

*Preludium I.* Imaginare tres Personas Sanctissimæ Trinitatis consultare de modo, quò possit genus humanum per peccatum, Adæ perditum reparari. Et cum nollent illud aliter reparari, nisi dependenter à condignâ satisfactione Justitiæ Divinæ pro peccatis hominum exhibitæ, decernere ut Unigenitus DEI Filius Carnem humanam assumat, in eâque Justitiæ Divinæ satisfaciatur.

*Preludium 2.* Imaginare hoc consilium & decretum Sanctissimæ Trinitatis, per Angelum Gabrielem in Domû Nazarethana annuntiari Beatissimæ Mariæ Virgini, ejusque assensum expeti, ut de ejus purissimô Sangvine, carnem humanam

nam DEI Filius assumat, in ejusque Sanctissimò utero concipiatur Salvator mundi DEUS homo.

*Preludium* 3. Pete gratiam ut intimè cognoscas beneficium Incarnationis Filij DEI, & ex eò cognito inflammeris ad DEUM ardentius amandum, illique studiosius serviendum,

PUNCTUM I. Expende illa verba Joan. 3. *Sic DEVS dilexit mundum, ut Filium suum unigenitum daret.* Et considera, licèt homo creatus sit à DEO ad hunc finem; ut Dominum DEUM suum laudet, revereatur, eique serviens tandem salvus fiat, per peccatum tamen Adæ, ac deinde per peccata sua personalia, ita ab hoc fine excidit, ut impossibilis illi fuerit dicti finis consecutio.

Nam neque illum consequi potuit manente suò peccatò, & reatu per peccatum contractò, ac indignatione Divinà, quā peccatori propter peccatum indignabatur DEUS, perseverante. Hæc enim potius exigebant, ut peccatum, Justitia Divina poenis inferni, & æternā damnatione vindicaret. Neque etiam miser homo potuit se peccatò suò liberare, illudque tollere. Deberet enim illud tollere, per condignam satisfactionem pro peccatò, quæ & illi, & cuivis puræ creaturæ est impossibilis. Tantæ enim malitiæ & gravitatis est quodvis peccatum mortale; ut nulla pura creatura possit pro eò ad æqualitatem satisfacere Justitiæ Divinæ. Nihil ergo restabat, nisi ut post peccatum Adæ, in omnes ejus posteros, origine transfusum, & post alia peccata personalia hominum, totum genus humanum, peccati ejusdem & quorumvis personalium mortaliū poenas in infernò lueret æternas.

Infelicem hanc hominis sortem intuetur DEUS, cujus natura Bonitas, & qui non vult mortem peccatoris, sed magis ut convertatur, reparetur, & vivat. Ne perderet quos condidit, cogitat de remedio, de eoque afferendo consultant omnes,  
Sanctissimæ

Sanctissimæ Trinitatis Divinæ Personæ, & cum unicus hic esset modus, exhibendæ DEO ab homine condignæ satisfactionis pro peccato mortali, si aliqua ex Divinis Personis naturam creatam rationalem assumeret, in eaque Justitiæ Divinæ satisfaceret; concluditur & decretnitur, in eô Sanctissimæ Trinitatis consiliô, ut Filius DEI unigenitus, carnem humanam assumat, in eaque se humiliet usque ad mortem, eamque crudelissimam subeundo, satisfaciât pro peccatis generis humani, Justitiæ Divinæ.

Consilium hoc, & decretum in tempore consensu exequuntur, eadem Personæ Divinæ. Et interim Pater Æternus, ex amore quo genus humanum prosequitur, Unigenitum suum Filium, de quo postea ipse testatus est: *Hic est Filius meus dilectus, in quo mihi bene cõplacui*, mittit in mundum, ut carnem humanam assumat, ut in eâ humilietur, indignè tractetur ab hominibus, morte crudelissimâ occidatur, Sanguinem suum in Mundi pretium fundat, & Justitiæ Divinæ pro peccatis nostris satisfaciât; *Sic DEVS dilexit mundum, ut Unigenitum suum daret.*

Admirare Divinæ Bonitatis & dilectionis; quâ mundum dilexit, magnitudinem, misce gaudio lacrymas, super tantô amoris Divini excessu. Et illud tecum perpende, Deus ita dilexit Mundum, ut Unigenitum suum daret, & tu quomodo hæcenus dilexeris DEUM? Quid DEI tui amore, & ad amorem tuum in DEUM comprobandum, feceris? quid deinceps facies? Ille proprio Filio non pepercit, sed pro te illum tradidit, fecit illum pro te immolari, & Tu non immolabis DEO illas creaturas, illos amicos, illas conversationes, commoditates, sensualitates, vanitates, quibus tantum inordinatô tuô affectû adhæxisti? Perpende & illud. Ut pro tuis peccatis, satisficeret Justitiæ Divinæ, necesse fuit



Filium DEI humiliari, contemni, crucifigi, crudelissimâ morte neeri, & tutantum criminum reus, abhorrebis à tui humiliatione & contemptu, fugies crucem, nec carnem tuam spiritui rebellem, mortificabis, non vindicabis in te scelera tua, nec per pœnitentiam satisfacies Justitiæ Divinæ, adimplendo quæ defunt passionibus Christi?

Fac proposita materiæ accommodata, variosque ex tanti beneficij æstimatione, elice affectus.

PUNCTUM II. Audi verba illa Gabrielis Archangeli ad MARIAM. *Ecce concipies & paries Filium, & vocabitur Altissimi Filius.*

Considera Secundam Personam Sanctissimæ Trinitatis Filium æternum, in negotiô reparationis hominis vel maximè operatam esse, ipsiusque amorem erga genus humanum singulariter in hoc elucere mysterio. Filius enim hic Unigenitus Patris Æterni, quando venit plenitudo temporis descendit in uterum Virginis. *Exultavit ut gigas ad currendam viam à summò calò egressio ejus.* Miser homo nesciebat miseriam suam, non cogitabat se mortis æternæ reum esse, non agnoscebat, vel minus apprehendebat latam in se æternæ damnationis sententiam. In tantis is ludebat periculis, in bonis transitorijs ducebat dies suos, exultabat in rebus pessimis, & peccata peccatis accumulabat, majorem contra se provocans indignationem Divinam.

Videt hæc Altissimi Filius, ad terras properat, ruentem in perditionis baratrum, servulum detinet. è dæmonis eruit faucibus ac ejus debita adæquatô exsolvit pretiô. Rem hanc ita describit mellissimus Doctor S. Bernardus serm. 3 in Natali Domini. *Ludebam ego foris in platea, & in secreto regalis cubiculi super me ferebatur judicium mortis, audivit hoc Unigenitus DEI, exijt posito diademate, sacco indutus, aspersus cinere caput, nudus pedes, fletus*

*ejulans, quod damnatus esset servulus suus.* O admirabilem charitatem Filij DEI! dum intelligit ferri in hominem, mortis sententiam, exit posito Diademate, hoc est illâ gloriâ & Majestate, in qua fuit ab æternô, Patri per omnia cœqualis, quodammodo relictâ, & per humilitatem carnis nostræ obscuratâ, saccum induit mortalitatis nostræ, aspergit cinere caput, quia repræsentat personam peccatoris, & cum ipse peccatum non fecerit, in personâ & nomine omnium nostrum, se Æterno Patri humiliat, atque Justitiæ Divinæ tanquam verus pœnitens, quæ non rapuit, exolvit, & pro nostris peccatis condignam exhibet satisfactionem. Venit etiam nudus pedes, quia paupertatem divitijs, contemptum honori prælegit. Tandem venit pens & ejulans, Quia nostras miseras, nostros dolores, & infirmitates, non dedignatur, ut servum morte damnatum liberet.

Ex his consideratis, deduc practica dictamina, quæ insinuat idem S. Bernardus in memorato sermone. 1<sup>mo</sup> serio apprehendendam & magni animi sensû sentiendam esse infelicitatem, & pericula miseræ animæ, ex peccatô provenientia, quandoquidem Unigenitus DEI Filius tantam super his malis nostris exhibet compassionem. Pudet, è mente Bernardi, propriam negligenter dissimulare passionem, cui tantam à Majestate tantâ, exhiberi video compassionem. 2<sup>do</sup> Ex consideratione tam præstantis & excellentis remedij æstimandam esse peccati gravitatem, & periculi in quod nos conjicit, magnitudinem. Nesciebam, sanus mihi videbar, & ecce mittitur Virginis Filius, Unigenitus DEI Filius, & jubetur occidi, ut vulneribus meis pretiosô sanguinis sui balsamô medeatur. Agnosce ô homo, quàm gravia sint vulnera, pro quibus necesse est, Dominum Christum vulnerari, si non essent hæc ad mortem, & mortem, sempiternam,

H;

nunquam

nunquàm pro eorum remediò DEI Filius moreretur. 3<sup>tiò</sup> Si Unigenitus DEI Filius peccata tua deflet, si ad averteñdā mortis, in te latā sententiam, saccum mortalitatis nostræ induit, si aspersus cinere caput, nudus pedes, exit flens & ejulans, hoc est si per tantam exinanitionem, & humiliationem sui usque ad passionem, & mortem crudelissimam, satisfacit Justitiæ Divinæ, pro tuis delictis, tibi servulo, inter mala propria, & in maximis periculis constituto, non esse ludendum, non esse ridendum, sed per pœnitentiæ lamenta, desendum esse infelicem statum animæ tuæ, & cum plorante DEI Filio plorandum.

*Fac* proposita dictaminibus conformia. Elicce affectus gratitudinis, & profundissimæ gratiarum actionis Unigenito DEI Filio, quòd tui gratiā non dedignatus est Virginis uterum, & unionem cum carne humanā: pro tam præstanti, & efficaci remediò, malis tuis allatò. Tandemque ad seriam pœnitentiam verbis ejusdem S. Bernardi te excita. Ergone ludam & deludam lacrymas ejus, si insanus sum & mentis inops, non sequar eum, nec simul cum lugente non lugebo.

PUNCTUM III. Audi illa verba Gabrielis Archangeli ad MARIAM VIRGINEM, *Spiritus S. superveniet in Te, & virtus Altissimi obumbrabit Tibi.* Et considera circa Incarnationis verbi Divini Mysterium, non solum Patrem Æternum operatum esse, ex dilectione, quā dilexit mundum, mittendo Unigenitum suum Filium; nec præterea ipsum nonnisi Filium Æternum operatum esse, assumendo carnem & infirmitatem nostram; sed insuper Spiritus S. suā operatione, ad tantum concurrit Mysterium, superveniendo in MARIAM.

*Expende* ulterius, in punctò præsentī, quid, & quæ egerit circa Incarnationem Filij DEI, Spiritus S. superveniens in MARIAM? Egit & quidem plurima.

plurima. Egit *1<sup>mo</sup>* illud, quòd in Sanctissimâ Virgine MARIA dignum Filio DEI habitaculum præparaverit, eam ab omni non solum culpæ actualis, & personalis, sed etiam originalis labe immunem præservando, gratiâ sanctificante amplissimâ, supra omnes puras creaturas intensiore, & excellentiore, alijsque donis infusis pariter intensis & excellentibus exornando: auxilijs item gratiæ actualis efficacis, & semper victricis, fortissimis & amplissimis muniendo & adjuvando. Egit Spiritus S. illud, in Sanctissima MARIA, quòd præcipuis quibusq; privilegijs nulli unquam Sanctiorû concessis, futurâ DEI Matrem decoraverit, eamque locupletaverit meritis & virtutibus.

Egit *2<sup>do</sup>* Spiritus S. illud, quòd per missum ad eandem Sanctissimam Virginem Legatum Gabriele Archangelum, tractatum illum toti mundo optatissimum, de Verbi Divini Incarnatione, cum eadem Virgine perfecerit & concluderit, quòd Virgini Castissimæ inspiraverit, eamque efficaciter permoverit, ut hospitium in uterò suò, Filio DEI incarnando concederet, suum purissimum Sangvinem pro carne DEI hominis offerret, & in opus tanti mysterij consentiret, illudque humilitate suâ acceleraret.

*3<sup>to</sup>* tandem illud egit Divinissimus Spiritus: quòd ex purissimò Virginis sanguine, membra & corpus, quod Divinitas inhabitatura erat, efformaverit, quòd Sanctissimo huic corpusculo, animam, quæ illud animaret, infuderit, quod Naturam humanam Christi, ijs donis sive naturalibus, sive supernaturalibus, quæ digna essent Personâ Fili DEI, exornaverit, illaque copiosissimè contulerit, quòd per sacratissimam unionem hypostaticam Verbum Divinum, eidem Naturæ humanæ univerit, feceritque, ut purissima illa Virgo, MATER DEI diceretur & esset, imò esset non solum DEI hominis MA-

TER, sed etiam MATER omnium nostrum, Regina mundi, & Domina omnium Creaturarum, Mediatrix inter peccatores & suum Filium, Cooperatrix nostræ salutis, & perditæ generis humani Reparatrix.

His consideratis age gratias humillimas, singulis quidem Personis Divinis, pro Beneficiò Incarnationis, in hoc tamen puncto singularissimè age gratias Divinissimo Spiritui, pro tantò gratiarum & donorum, sive Humanitati Filij DEI, sive Matri ejus Sanctissimæ, sive per horum merita toti generi humano collatorum, pro tantò inquam & tam copioso ac superabundanti thesaurò. Et ex eadem consideratione hæc erue dictamina imò Æstimandam tibi esse tuam à jugo servitutis peccati liberationem, pro qua, ut fieret, tantum actum est ab omnibus Sanctissimæ Trinitatis Personis. 2dò Summò studiò curandum tibi esse, ut finem, ad quem creatus es, consequaris, postquam non solum restitutus es illi statui, in quo eum consequi potes, sed insuper tot habes media, & adjumenta ad eum facilius & abundantius consequendum.

3iò Post tantum remedium ad tui curationem allatum, nullam te coram DEO excusationem habiturum, si à fine tuo excideris, si in peccata relapsus fueris, & propter hæc æternæ damnationis supplicium incurreris.

*Fac Proposita, elice affectus &c.*

*Colloquium* ad Beatissimam Virginem DEI Parentem. Cui ex intimo cordis affectu gratulaberis, quod in DEI MATREM, ex omnibus & præ omnibus electa sit, tantis muneribus, & privilegijs decorata, quod Mater & refugium peccatorum facta sit. Supplica eidem humillime, ut te in suam protectionem recipiat, contra hostes animæ te potentissimè tueatur, postula item, ut virtute & efficaciam meritorum Filij sui, & suam Sanctissimam intercessionem, à tuis peccatis libereris, veram de illis poenitentiam



nitentiam agas, nunquam deinceps in ipsa relabaris, & tandem finem tuum, hoc est animæ tuæ salutem feliciter consequaris.

*In fine Ave Maria.*

## Meditatio II.

### De duobus Vexillis.

*Preludium 1.* Imaginare quòd consistas inter duos contrarios exercitus ad conflictum paratos, quòd oculis spectes Duces horum Exercituum, conscribentes militem & sub signa, quos possunt, vocantes, quòd audias personari classica, quòd fulgore armorum feriantur tui oculi.

*Preludium 2.* Pete à Deo gratiam, ut relictis castris illius Ducis, à quò non aliud stipendium sperare potes, nisi mortem & damnationem æternam, illum Ducem præeligas, qui certantibus reposuit Coronam Justitiæ.

**PUNCTUM I.** Audi verbâ illa Job. 41. de Luciferò dicta, *Ipse est Rex super omnes Filios superbia.* Hæc audiens, intuere in campò Babylónico, Luciferū vultu terribilem, in cathedrâ igneâ & fumosâ sedentem, hominesque ad sua castra invitantem, & ad ea persuos ministros deducentem, & quo alacrius eum sequantur, promittentem honores, voluptates, divitias, permittentem omnes licentias, atque his ipsis tanquam catenis constrictos mortales ad se trahentem.

Circa quod ipsum ulteriùs expende sequentia.

Imò Ducis pestilentissimi majestatem & proprietates. Est figurâ & vultu terribilis, quia ut describit illum Job. Cap. citato. *De ore ejus lampades procedunt, tanquam tecta accensa; de naribus*

*bis ejus procedit fumus sicut olla succensa & ferventis.* Est terribilis, quia torus est, ut noceat, ut omnes secum in perniciem trahat. Quia tantæ potestatis & fortitudinis est; ut non sit potestas super terram, quæ comparatur ei, qui factus est, ut nulum timeat. Est terribilis, quia per peccatum amisit omnem gratiam, quæ sola illum verè amabilem reddere potuit. Quia per peccatum turpissimè est deformatus. Sedet in cathedrâ igneâ, ignem enim spirat. Omnes ejus suggestiones, sunt ille halitus, qui prunas (hoc est homines talibus tentationibus succumbentes) ardere facit ignibus suarum concupiscentiarum. Tentationes ejus sunt flamma, de ore ejus egrediens, inflammas eos, qui hanc flammam protinus non excutunt nec extinguunt. Sedet in cathedrâ igneâ, quia ignis æternus ipsi & Angelis ejus est præparatus; hicque ignis ubique illum comitatur, ubique cruciat, hic ignis thronus & sedes, imò & domus ipsius est. Sedet in cathedrâ igneâ, quia in sequacium suorum cordibus, ignes & flammæ iracundiæ, libidinis, Avaritiæ, &c. perpetuò suscitatur.

Sedet in cathedrâ fumosâ, quia est Princeps tenebrarum, Quia quæ promittit sibi adhærentibus, vana sunt, & sicut fumus evanescunt & deficient. Admirare cæcitatem hominum, quòd pestilentem hunc Ducem tam multi sequantur, nec ab eò sequendò, tali ejus majestate deterreantur.

*Expende 2dò* Qui & quales sunt ministri hujus Ducis. Ministri ipsius sunt imprimis alij dæmones, æquè studio nocendi animabus flagrant, atque Dux ipsorum. Ministri hi, sunt infensissimi animæ hostes, sunt Leones rugientes, qui continuò circumeunt, & quærunt ut aliquem devorent, sunt canes per suas tentationes, & suggestiones pravæ semper latrantes & sollicitantes, qui tamen morderi non possunt nisi volentem; sunt Lupi mactantes

tes & lacerantes, sunt Angeli colaphizantes, sunt Angeli mali transfigurantes se in Angelos lucis. Sunt liſtores immaniffimi, catenis, hoc eſt, noſtris ipsis cupiditatibus noſinet vincientes, & vinctos in perniciem trahentes.

Ministri præterea peſtilentis huius Ducis ſunt homines mali, ſive exemplò ſuò malò corrupentes alios, ſive conſilio aut alienæ virtutis perſecutione, irriſione, ſugillatione, à virtute deterrentes, & bonorum propoſitorum executione ac legum; ſive Divinarum, ſive humanarum obſervatione retrahentes. Tales omnes miniſtri, peſtilentiſſimo illi Duci ſunt gratiſſimi, ſunt instrumenta Luciperi, per quæ ille plus ſubinde lucratur, quàm per ipſos Dæmones.

*Expende 3<sup>ti</sup>o* & Conſidera quinam huic Duci adhæreant? ejuſque caſtra ſequantur. Sequuntur maximè filij ſuperbiæ. Unde etiam Dux ipſe dicitur eſſe Rex ſuper omnes filios ſuperbiæ. Sequuntur quidem caſtra Luciperi etiam alij, nimirum avari, gulofi, luxurioſi, invidi, iracundi, acedioſi, ſed maximè Ducem hunc ſequuntur filij ſuperbiæ, hoc eſt homines ſuperbi, elati, de ſe multum præſumentes, ſui honoris æſtimatores, ſectatores vanitatis, ambitioſi &c. Quia tales milites in ſuis caſtris plurimos Dux ille numerat. Et licèt plures ipſorum, alia vitia ad hæc caſtra traxerint, in eis tamen tenet eos ſuperbia, dum ſuos errores damnare & corrigere nolunt, dum ſe non humiliant ſub potenti manu Dei, nec humili confefſione ſuorum peccatorum, excutiunt jugum ſuperbi illius Ducis. Aut etiam omnes peccatores ex eo ſunt filij ſuperbiæ, quia ſunt filij ex Patre diabolò, qui ab initio ſuperbus fuit, progeniti.

*Expende 4<sup>to</sup>* Quas leges ſtatuat ſuis affectis Dux ille impius, quos militares articulos? Hæc unica ipſius lex eſt, ut qui ſub caſtris illius militant,  
ſind

sine Deo & sine lege vivant, ut in omnibus suas cupiditates expleant, ut suorum appetituum & inclinationum sensualium sive passionum sint servi, mancipia, ut tanquam muta animantia in his, quæ naturaliter norunt, corrumpantur, tandemque ut his qui sua castra sequuntur, nulla sit fides pietasque; O Legem immanissimam.

*Expende 5to* Adversus quem hostem, exercitus tam numerosus à malitiosissimò hoc Duce colligitur? Et noveris non contra hostem, sed contra Deum, legitimū Principē & Dominū, contra Creatorem, Patrem & munificentissimum Benefactorem, totum hunc exercitum congregari. Non alia mens est iniquissimi Ducis, nisi Deo bellum inferre, eum impugnare, laudem ipsi eripere & gloriam ejus tollere. Hoc propositum & immutabile decretum Ducis improbi est, Deum ex suo soliò, hoc est ex eordibus & animabus hominum, in quibus tanquā in suā sede per gratiam residet, exturbare. Movet præterea sua castra idem Dux, contra justitiæ & virtutis amatores, ad expugnandam virtutem, eam è cordibus mortalium penitus ejciendam, ut servituti Ducis hujus, totum hominum genus subijciatur & in æternam trahatur perditionem.

*Expende 6to* Quæ præmia quæ stipendia Dux iste daturus sit suis Militibus? Non alia stipendia solvit ille, nisi ipsa peccata, cupiditatum expletiones, vanitates, voluptates momentaneas &c. Hæc autem ipsa consequitur aliud stipendium, illud nimirum, cuius meminit Apostolus, *Stipendiū peccati mors*. Mors inquam Animæ, non solum per amissionem gratiæ Sanctificantis, sed etiam mors secunda per amissionem vitæ æternæ.

*His expensis, Reflecte te, An & tu sub signis hujus Ducis non merueris stipendia, vel etiam nunc non merearis? An Dux ille ex cathedrâ suâ igneâ & fumosâ non suscitet in te cupiditatum tuarum*  
ignes,

ignes, an tibi non propinet vanitatum fumos? Reflecte te 2<sup>do</sup> An hujus pestilentis ducis non fueris aliquando minister, & instrumentum, sive pravo exemplō corrumpendo alios, sive perversis pseudopoliticis principiis, consiliō & suasionē inducendo in legum Divinarum, vel humanarū transgressionem, sive virtutis alienæ fugillatione & perstrictione, à virtute, bonis operibus, & perfectione deterrendo. Reflecte te 3<sup>tiò</sup> An non sis filius superbiæ, an non sentias aliam legem in membris tuis, repugnantem legi mentistux, captivantem te in lege peccati. Tandem te reflecte quæ stipendia ab hoc duce acceperis, an non sensualitates, voluptates prohibitas, an non vanitates & commoda studiosius à te quæsitæ? An mors animæ, amissio gratiæ, non fuerint stipendium tuum?

Confundere coram DEO. Fac proposita: Ejura & detestare castra & signa Dæmonis. Postula ut DEUS, te, potenti manū suā eruat, ex servitute Diaboli; & ad Christi castra transferat.

PUNCTUM II. Audi illa verba Patris æterni de Christo, Isaïæ 55. *Ecce testem populi dedi eum Ducem ac præceptorem gentibus.* Et imaginare, Christum tanquam Ducem summè amabilem, in loco humili constitutum, in amplō & amænō juxta Hierosolymam, Campo, sua signa explicare, & sub ea omnes invitare Mortales: expedire etiam suos ministros, ut omnes homines, ad se congregent & sub sua convocent signa.

Expende iterum 1<sup>mò</sup> Qualitates Ducis Christi. Dux iste est Rex regum, & Dominus Dominantium, cui omni titulo famulari, & sub ejus signis militare obligaris. Est Dux amabilissimus, quia speciosus formâ, præ filiis hominum, quia omnis figura ejus, amorem spirat, quia non suum bonum & emolumentum, sed nostrum bonum quærit. Quia non vult mortem cujusquam, sed ut, omnes  
I vitam



vitam habeant, & abundantius habeant. Quia hic ipse Dux, vulnera nostra alligat & sanat, ipse Pharmaca propinat, ipse transit benefaciendo & sanando omnes. Est Dux amabilissimus, quia omnia providet suis militibus, vires & robur suppeditat, ut vincant & triumphent, Explicat signa sua, in loco humili constitutus, quia & consiliis à se datis & proprio exemplo humilitatem suos milites docet, Docet ab hoc inchoandum esse, in illà, toto vitæ tempore consistendum, nec aliter Ducem superbiæ nisi humilitate debellandum. Explicat signa sua in campo: nimirum infirmitati nostræ condescendendo, planâ & facili virtutis viâ, accedentes milites ducit, ut postea ad sublimiorem perfectionem, & sanctitatis elucentur fastigium. Explicat sua signa, in amplo campo, per quod ostendit, eos qui Christi Ducis signa sequuntur, amplissimum habere campum exercendæ virtutis, faciendi in viâ perfectionis, progressus, habere item omnem commoditatem debellandi hostis, metendi palmas, laurus, & triumphales coronas, atq; fructu centuplum colligendi. Explicat sua signa, in amænâ, juxta Hierosolimam, campô, quia illis, qui Christum sequuntur, amæna sunt omnia, consolationibus abundant, & casta, eâq; verâ fruuntur voluptate. Consistunt tales, juxta Hierosolimam quæ, visionem pacis significat. Quia hi, pacem cum DEO colunt & custodiunt, de illâque, ex conscientie suæ testimoniô, sunt securi, in ô eam quodammodo intuentur & vident. Et exinde serenitate animi, & magnâ, conscientie, fruuntur tranquillitate. Signa quæ Christus explicat, sunt crux, flagella, spinæ, omniaq; Passionis Christi instrumenta, quæ licet aspera videantur, consolationibus tamen cælestibus, quibus condiuntur, redduntur, suavia & amæna.

*Expende 2dò Quos & Quales ministros habeat*

beat Dux iste Sanctissimus, per quos, sub sua signa milites convocat. Ministri ejus sunt Sancti Angeli, quibus, de unoquoque nostrum mandatum est, ut eum custodiant in omnibus vijs suis. Hi, sub signa Ducis hujus invictissimi vocant nos, per internos instinctus, excitando unumquemq; ut Christo serviat, ut sub ejus signis militet, & stipendia mereatur. Ministri Ducis hujus sunt præterea Sancti Apostoli, Prædicatores Evangelij, omnesq; alii circa salutem proximorum laborantes, qui non solum verbò & doctrinâ, erudiunt multos ad justitiam, & viam DEI, in veritate docent, sed etiam bonò exemplò provocant alios, ut glorificent Patrem, qui in cælis est

*Expende 3<sup>ti</sup>o.* Quinam, Duci huic adhæreant & castra ejus sequantur? Adhærent Christo, qui non adhærent nec acquiescunt carni & sanguini, qui exuunt omnem sæculi affectum, qui Diabolo & operibus ejus renuntiant, qui abnegant semetipsos, crucem Christi tollunt, carnem suam cum concupiscentijs crucifigunt, & Christi mortificationem, in suo corpore, semper portant. Ducem hunc cælestem sequuntur, qui armis ab ipsò ministratis utuntur, ad debellandum hostem, qui induuntur loricâ justitiæ, sumunt scutum fidei, assument galeam salutis, pugnantq; in gladio spiritûs, qui Christi vestibus & insignibus, pro ejus amore & reverentiâ utuntur, optantq; contumelias, falsa testimonia & injurias pati, ac stulti haberi & reputari.

*Expende 4<sup>to</sup>.* Quas leges Christus, suis militibus statuatur? Leges militum Christi, sunt per omnia contrariæ legibus Ducis infernalis. Leges militum Christi sunt: *si vis ad vitam ingredi, serva mandata: si vis perfectus esse, vade & vende omnia, & sequere me.* Lex militû Christi est, quàm perfectissimè imitari Ducem suum, ut quemadmodû ille

fecit, ita & milites ejus faciant. Lex militum Christi est: Ducis sui insignibus indui, abnegare seipsum, crucem suam tollere, & consilia Evangelica implere.

*Expende 5to.* Contra quem hostem Dux Christus colligit suum exercitum? Hostes hi sunt concupiscentia carnis, concupiscentia oculorum, superbia vitæ, seu caro, mundus, & Diabolus, hi hostes contra quos, militibus Christi pugnandum est, sunt quæcunque vitia, pravæque nostræ inclinationes, Passiones, & habitus. Contra hos hostes, die ac nocte decertandum est: victoriæ de his hostibus reportandæ: dummodo aggredi eos, & strenuè contra ipsos pugnare velimus, spem nobis facit Dux noster, suòq; animat exemplò: Confidite, ego vici mundum.

*Expende 6to.* Quæ præmia, quæ stipendia, Dux Christus daturus sit suis militibus? Et ab ore ipsius discite: *Non quemadmodum mundus dat, ego do vobis.* nimirum longè diversa esse stipendia Ducis Christi, & Ducis Babylonici. Dux Babylonicus, in stipendium dat voluptates momentaneas, Christus, æterna gaudia: ille, transitorias divitias, Christus thesauros indeficientes in cælis, ille honores mundi, & gloriam transeuntem: Christus, gloriam cælestem, & honorem illum, quò, nimis honorati sunt amici tui DEUS: stipendium & merces militum, Duci Babylonico adhærentium, sunt bona extrinseca, sensualia, temporanea: stipendium militum Christi, est gratia Divina sanctificans, & dona DEI supernaturalia, gaudium, pax, conscientia tranquillitas exsuperans omnem sensum, consolationes internæ & spirituales, visio DEI perpetua & amor ejus Beatificus. Stipendium, quòd suis solvit Lucifer, est mors, perditio & damnatio æterna: Stipendium, quòd Christus solvit, est vita, salus, & æternum in cælis præmium.

*His expensis, iterum tecum dispice an sis Christi miles. Decurre singula quæ expendisti & facile advertes an ad signa & castra hujus Imperatoris pertineas.*

Elice affectus, forma proposita, pete à Christo, ut te inter suos milites connumeret.

PUNCTUM III Audi illa verba Eliæ Prophetæ 3tij Regum 18. *si Dominus est DEUS, sequimini eum, si autem Baal, sequimini eum*, Et considera ex his duobus Ducibus quorum unus est Christus alter Lucifer, alterutrum omninò cuivis adeoque & tibi eligendum & uni ipsorum adhærendam esse. Nequè enim fieri potest, ut quis utrumq; hunc Ducem sequatur, cum hi duces sibi sint per omnia contrarii, unus incessanter oppugnet alium, eiq; omni conatu & viribus adversetur. Non potest etiam fieri, ut quis sit neutrarum partium, & neutri ex his ducibus adhæreat, siquidem Veritas dicit. *Qui non est mecum, contra me est*. Et S. Augustinus expresse affirmat: *Aut cum Christo, aut cum Diabolo nos esse oportet, non est locus medius*.

Quisnam vero ex his ducibus eligi debeat, ex adductis Prophetæ verbis, facile intelligi potest. Nimirum illi duci adhærendum est, & sub ejus signis militandum, qui DEUS Tuus est. *Si Dominus est DEUS, sequimini illum*. Tum quia si Dux ille, quem secutus fueris, DEUS est, eò ipsò Bonitas imò fons omnis boni, adeoque summè amabilis, & per consequens summè dignus est, ut illi adhæreas. tum quia si Dux tuus DEUS erit, eò ipsò est sibi sufficientissimus, bonorumq; tuorum non indiget, adeoque si vult ut eum sequaris, in hoc ipsò non suum sed tuum bonum quærit & intendit. Tum quia si Dux tuus DEUS est, bellum quod hostibus ejus inferes justissimum erit, victoria indubitata, præmium certissimum & merces superabundans.

Cum ergo Dux Christus

DEUS sit : DEI Filius, DEUS verus de DEO verò; Dux verò Babylonicus sit creatura, eaq; ratione peccati, & odij, quò DEUS ipsam, & vicissim illa DEUM prosequitur, ac etiam ratione suæ æternæ damnationis vilissima & infelicissima, clarum est Christum in Ducem tibi & omnibus eligendum esse.

Sed forte dices per hoc ipsum, quò Christianus sis, pridem te Christum in Ducem elegisse. Utinam verò ita sit, sed hoc adhuc necessarium est, ut Christum non à longè solum sequaris, sed ut illi adhæreas, ut illum assequaris, quid enim prodest Christum sequi, si non contingat consequi, necessarium est ut non solum professione, quia Christianus es, sed etiam re ipsâ, Christum sequaris. Multi siquidem etiam Christiani ad pestilentem Ducem pertinent, qui nomen habent quod vivant & mortui sunt, qui ore & fide confitentur DEUM & Christum, factis autem negant, necessarium autem est, ut si etiam re ipsâ secutus fueris castra Ducis Christi, ut constanter hæc sequaris, ne illa per peccatum aliquando deseras, & ne ad hostiles partes te transferas.

Fac reflexiones quæ ex præsentī consideratione erui possunt, protestare quòd velis militare sub Christi signis, Duciq; huic sanctissimo adhærere, & nunquam ab eo avelli.

*In Colloquio* pete suppliciter à Patre æternò ut ille te potenti suâ virtute & gratiâ, trahat ad Christum, ad quem nemo potest venire, nisi Pater æternus traxerit illum, nemo eidem potest firmiter adhærere, nisi ipse tenuerit eum.

Pete etiam à Christo, ut ille te ad se attractum, suscipiat in suum militem, inferno terribilem efformet, nec te unquam separari à se permittat.

*In fine, Anima Christi*



## Meditatio III.

## De tribus hominum Classibus.

*Praludium I.* Imaginare à diversis Christo Domino proponi illam quæstionem: *Magister quid faciendo vitam æternam possidebo.* Proponitur à Legisperito Lucæ 10. Quæstioni quæstionem opponit Christus: *Quid in lege scriptum est* & solis diversis interrogationibus, res tota absolvitur, nec quidquam præterea egisse Legisperitus scribitur.

Proponit deinde eandem quæstionem dives aliquis Princeps Lucæ 18. cui cum Christus respondisset, ut non contentus observatione mandatorum, venderet omnia, daret pauperibus, & Christum sequeretur, audiens hæc idem Princeps cum non ad suum votum essent, contristatus recessit.

*Praludium II.* Pete à DEO gratiam quâ à DEO illumineris: quomodo in negotio salutis & perfectionis tuæ, te gerere debeas.

**PUNCTUM I.** Audi illa verba Proverb: 21. *Desideria occidunt pigrum, noluerunt enim, quidquam manus ejus operari: tota die concupiscit & desiderat.* Et considera, his Scripturæ verbis descriptos esse illos homines, qui in divisione hominum, de tuâ salute, aliquomodo cogitantium, in tres hominum classes à S. JENATIO factis, ad primam hominum classem spectant. Hanc, dictus sanctus Pater, in suo exercitio de his classibus, alijs verbis, sed sensu eodem, sic describit. *Ima classis optat quidem acquisitionis rei exuere affectum, ut conciliari DEO possit; sed media & adminicula, totò vitæ tempore non admovet.*

Classis hæc optat acquisitionis rei exuere affectum, optat conciliari DEO. En desideria! idque bona & pia desideria: quia, ad salutis negotium spectantia. Quia verò, non admovet media & ad

minicula, habes hominem pigrum :cujus manus nolunt operari quidquam. De pigro dicitur: vult & non vult piger. Tales homines sunt ad primam classem spectantes: illi pariter unum idemque volunt & nolunt. Volunt: quia optant exuere affectum ad res creatas: quia optant conciliari DEO. Nolunt: quia manus eorum nolunt operari quidquam: quia media & adminicula non admovent, sine quibus, finis non obtinetur: & quæ nolle adhibere, est nolle ipsum finem consequi.

Hujusmodi desideria inefficacia occidunt hominem pigrum, ipsosq; homines ad primam classem spectantes perdunt. Dum enim negligunt media salutis, non consequuntur salutem, Tales non habent exultationem in peccatis suis. sed sicut illis Philosophis, qui, cum cognovissent DEUM, non sicut DEUM glorificaverunt, sed evanuerunt in cogitationibus suis, cognitio ipsa DEI, ita sterilis & infructuosa, fuit in majorem condemnationem, ita eos, qui in desideriis suis, circa res salutis & perfectionis evanescunt, nec illa exequuntur, aut media adhibent, hæc ipsa desideria condemnabunt & occident.

Hujusmodi homines, sunt infirmi illi, qui ita appetunt sanitatem, ut respuant omnes medicinas, quibus, si non utantur, nullâ ratione sanari possunt. Sunt faucij, qui membri corrupti & pestilentis, suum virus, in corpus reliquum diffundentis abscissionem nullatenus pati volunt, cum tamen curari exoptent. Sunt naufragantes, qui ita ex naufragio enatare volunt, ut tabulam, sibi oblatam, qua salventur, nunquam arripiant & sic infelicitate pereant.

Illud vel maximè dolendum, quòd totâ vitâ non adhibeant media: quòd totâ diè concupiscant & desiderant, & interim nihil manus eorum, operentur. Differunt executionem suorum desideriorum

sideriorum, propositorum, differunt pœnitentiam & fructuosum circa salutem laborem, ad horam 11. diei, hoc est ad finem vitæ: sed quia noluerunt qui-  
quam operari, cum, per bona desideria excitarentur à DEO, in pœnam talis procrastinationis, DEUS permittit, ut de die in diem, executionem desideriorum differendo, in finali impœnitentiâ moriantur, adeoq; quòd talia desideria ipsos occidant.

Fac reflexionem supra tua proposita, quæ sæpius elicis, sive in Sacramento pœnitentiæ, sive dum accedis ad Sacramentum Eucharistiæ, sive in examinibus conscientiæ tuæ, in meditationibus rerum cælestium alijsque occasionibus: An hæc exequaris: an de exequendis seriò cogites: an media & adminicula abhibeas? An post repetita toties, hujusmodi proposita, vitam tuam corrigas: an non immeditate statim in eosdem relabaris defectus? Vide ne hæc proposita ita inefficacia & inutilia, te mergant in interitum & perditionem.

Excute aliquando, ô! Anima mea noxium hunc torporem. Manum operi admove & ut desideria ac bona proposita tua, quàm primum exequaris, toto conatu allabora. Adhibe industrias, adverte, quid maximè impediât, proposito-  
rum tuorum executionem: atq; hæc impedimenta amove, vince humanos respectus, vince vanos metus, vince difficultates. Adverte etiam quæ te media, maximè juvare possunt ad exequendum, quod proponis & desideras; & quæ opportuniore ac efficaciora videbuntur, illa assume, ac te ipsum urge, ut incipias: urge cum inceperis, urge iterum ut cœpta perficias, nec à labore circa salutem & perfectionem tuam, unquam desistas.

Supplica Divinæ Omnipotentis, ut non quomodocunq; tua proposita & desideria confirmet, sed ut efficiat, quatenus illa opere compleas; & ut invictâ ac insuperabili virtute gratiæ suæ, tuam,

quantumvis rebellem voluntatem, compellat, ad exequendum suæ voluntatis beneplacitum,

PUNCTUM II. Audi illa verba Marci 10. *Accedunt ad JESUM Jacobus & Joannes, filij Zebedæi dicentes: Magister volumus ut quodcundq; petierimus, facias nobis.* Et considera, hos duos Apostolos taliter Christum alloquentes, esse secundæ classis hominum, quam sic describit S. Pater JGNATIUS. Secunda (intellige hominum classis) affectum malè ordinatum auferre cupit, sed rem ita mordicè tenere, ac DEUM potius trahere ad votum proprium, quàm relictò impedimentò, per conducibiliorem statum, ad illum tendere.

Fac comparisonem cum illis duobus discipulis, hominum secundæ classis. Accedunt illi ad JESUM, hi affectum malè ordinatum auferre cupiunt, quòd desiderium, est quidam motus & accessus ad DEUM. Dicunt illi: volumus ut facias, hi rem mordicè tenent: utrique non contenti solis desiderijs, voluntatem efficacem habere & ad media adhibenda progredi videntur. Illi volunt, ut quodcundq; petierint, DEUS homo Christus ipsis faciat: hi pariter volunt trahere DEUM ad vota sua, hoc est, ut DEUS faciat, quod ipsi volunt. In particulari, duo illi Discipuli Jacobus & Joannes petebant, ut sederent in gloria & Regnò Christi, unus ad dexteram, alter ad sinistram, de laboribus verò, de cruce ferenda, de bibendo calice passionis, ne cogitabant quidem. Etiam hi, nimirum, qui, ad secundam hominum classem spectant, in votis habent, ut per honores, gloriam, bonam famam, æstimationem, munia & functiones honorificas, ac per omnes commoditates ducantur, ut in ulteriori vitâ suâ tanquam in monte Thabor gloriose transfigurentur & ad hæc vota sua, DEUM trahere volunt. Non cogitant verò, quòd, hæc sint impedimenta, ne ad DEUM perveniant, quod

quòd, conducibilior modus perveniendi ad DEUM sit contentū esse his, quæ de ipsis DEUS statuerit, & plenè se relinquere voluntati & dispositioni Divinæ.

Discipuli illi duo reprehensionem Christi, aliorū verò Apostolorū indignationē promeriti sunt. Hæc merentur & illi, qui in electione mediorum, per quæ ad DEUM perveniant, DEUM ad sua vota trahere & inclinare conantur. Certè magna satuitas & dementia est, primæ & infallibili reguke, voluntati Divinæ statuerere, pro regula arbitrium & voluntatem creatam, cui illa, se conformare debeat: supremo Legislatori legem ferre, quam sequatur: velle ut Dominus universorum dependeat a placitō & nutū vilissimi sui servuli & mancipij: Regi sæculorum præscribere modum, quo mundum, & te gubeinet, coronam illi detrahere: & de throno suo ipsum deturbare velle: In creatam docere sapientiam, quid illa facere, & per quæ media, te ad finem tuum ultimum, & ad se perducere debeat. Non tolerandā indignitas est, quòd pulvis & atomus intumescat, & in montem excrecere velit, quòd lutum & figmentum contra fectorem suum expostulet, ut ex se, vas non in contumeliam sed in honorem efformet, quòd vile lignum, scipionem manibus nobilissimis gestandum, ex se, elaborari potius quam titicnem exambiat.

Dum DEUM, ad vota tua trahis, tanquam insanus & mentis inops puer, cultrum petis, quo te saucies: tanquam naufragus, ferrum vel molarem lapidem postulas, non ut enates, sed ut mergaris facilis, tanquam æger phreneticus, non medicinam, sed venenum appetis, quò te conficias: tanquam viator viæ ignarus, Ducē cæcum, quia cæcā tuā voluntatem eligis, quæ tibi, non nisi est futura dux in præceps.

Hæc considerans reflecte te, an non sis ex hac hominum classe: an non trahis ad vota tua



DEUM? An ut ad DEUM pervenias non eligis media, quæ tibi magis placent, quæ magis arri-  
dent sensualitati & inclinationi tuæ, atque amor  
proprio? An non dicis cum Petro: *Domine jube  
me venire ad te super aquas*: an, dimissâ naviculâ  
quâ securè potes ad Christum & felicem portum  
pervenire, non vis ambulare super aquas? hoc est,  
an omissâ viâ asperâ, saxosâ, non eligis viam mol-  
lem & facilem: *scilicet* mari & aquis te commit-  
tis, non attendens firma & fixa vestigia, te, in hoc  
elemento in tali viâ, in tali statu figere non posse,  
nec prius te ambulare super aquas, quam incipi-  
as mergi, & fluctibus absorberi.

Expressius loquendo reflecte te, si necdum  
in certò vitæ statu, es constitutus, an non velles ad  
eum te vocari, ad quem te vitia tua ducunt, ad  
quem inclinant rationes humanæ, respectus vani,  
amor proprius sensualis. An ad talia vota non  
velis DEUM trahere. Quòd si jam, in determi-  
nato, vitæ statu es constitutus, quisquis demum il-  
le est, cogita quid in tali tuò statu quæras? quid in-  
tendas? Quæ vota, quæ desideria tua? fortassis  
velles, ut DEUS te ducat viâ rosis confitâ, viâ  
molli & facili, per honores, per ministeria hono-  
rifica, per plausus, magnum nomen, bonam fa-  
mam, æstimationem talentorum, per pretium &  
amorē tui apud omnes, valetudinē firmâ & integrâ,  
commoditates sensuales, opes, divitias & similia.

Erubescere tantam tuam imperfectionem.  
Detestare & corrigere stude defectus, quos adver-  
tes: protestare, quòd optes & desideres, ut deinceps  
non tua, sed DEI voluntas fiat, ut cum DEO, ita  
tibi sit unum velle & nolle, ut tua voluntas, Divi-  
nam semper sequatur, illiq; tanquam suæ Regulæ,  
in omnibus conformetur.

PUNCTUM III. Audi illa verba Apostoli 1. Corinth.  
10. *Sive manducatis, sive bibitis sive aliud quid faci-*

*tis*

*tis, omnia in gloriam DEI facite.* Et considera, eos, qui juxta hanc Apostoli doctrinam, in omnibus suis actionibus, gloriam DEI quærunt, & intendunt, in tertiâ hominum classe constitui, quam sic explicat S. Pater JGNATIUS. Tertia classis affectum insincерum volens abijcere, rem ipsam vel tollere vel tenere, æquè parata est, prout ad Divinum cultum commodius fore, vel ex Divinò instinctu vel ex rationis dictamine animadverterit: nec aliam admittit relinquendæ aut retinendæ rei acquisitæ causam, præter rationem ac desiderium Divinæ gloriæ, ut quàm maxima sit. Circa quam hominum classem.

*Considera ulterius 1mò.* Insincерum affectum non abijci, nisi per indifferentiam, & animi præparationem ad volendum vel nolendum id, quòd cum gloriâ DEI fore, ex Divinò instinctu & rationis dictamine intelligitur. Insincерus affectus est, quò non sincere DEO adhæremus, non sincerè eum amamus. Qui sincerè DEUM amat & quærît, amat & quærît gloriam ejus, nec qualicunq; contentus est Divinâ gloriâ, sed quærît, ut quàm maxima sit: non adhæret affectu, creaturis, nec aliter ipsis afficitur, nisi, in quantum conferunt ad cultum, gloriam, & amorem DEI, ac ista, magis ac magis promovent.

*Considera 2dò* Indifferentiæ huius, per quam, abijciendus est affectus insincерus, in obsequiò DEI, resolutorium & regulam, secundum quam, eadem indifferentia tolli & determinari debet, non aliam esse debere, nisi gloriam DEI, ejusq; cultum, ita ut cum, te reduxeris ad plenam & perfectam indifferentiam, ex vi cujus, paratus sis ad id volendum vel nolendum, quòd cum gloriâ DEI est futurum, non ad aliud quid attendere debeas, ut te ad unum determines, nisi unicè ad laudem & gloriam DEI, ut unica, & non alia sit causa motiva: omnium  
vol-

volitionum & electionum tuarum, nisi ratio, spes, desiderium gloriæ Divinæ; ut hæc sit quam maxima: et ex his, ad quæ es indifferens, illud eligas, quod confert & conducit ad finem majoris gloriæ Divinæ.

*Confidera 3tò* In his quæ circa te eveniunt dependentque non tam à tua, quam à Divinà vel etiam creatà quacunq; voluntate; à te autem eatenus dependent, ut ea acceptes, eisq; ad cultum & gloriam Divinam utaris; qualia sunt: bona valetudo vel infirmitas, longior vel brevior vita, opes seu divitiæ, vel paupertas, honores, plausus, æstimationes, vel contemptus; in his inquam antequam eveniant, hæc tenenda est regula. Oportet te indifferentem & æquè paratum esse ad id, quod è majore gloria DEI sive ipsum beneplacitum Divinum, sive arbitrium voluntatis, & cujuscunq; potestatis creatæ determinabit, & ad DEI gloriam conferre censebitur. Postquam vero aliqua evenerint, ea, quæ te magis assimilant Christo pauperi, contempto, humiliato, nostras infirmitates perpesso, & viâ crucis ac tribulationis te progredi faciunt, hæc inquam libenter acceptare convenit, in his singularis habendus est gustus, persvadendumq; tibi est, per hæc, gloriam DEI quam maxime promoveri. Ab his verò, quæ circa te eveniunt, & videntur amoris proprio & corruptæ naturæ inclinationibus congruere, quæ cui DEUS confert, censetur illum molliori sed simul periculosiori viâ ducere: qualia sunt sunt bona valetudo, speciosa officia, honoratiora munia, felix functionum successus, plausus, respectus & affectus hominum &c: ab his inquam abhorre, taliaque beneficia Divina timere convenit, An etiam aliqua acceptari expediat, magnâ deliberatione opus erit. Quodsi, non erit tuæ potestatis illa declinare, cautè per hæc incedendum est, tibiq; multum

tum invigilandum, ne te amor proprius decipiat; ne visco vanitatis inhæreas; omniaq; hæc magno studio, in DEI gloriam, ut hæc per te, ac illa omnia promoveatur, ordinanda erunt. In ijs verò, quæ à tuâ electione & voluntate immediatè dependent, ut sunt, electio certi & determinati, vitæ statûs, acceptatio vel contemptus honorum, & dignitatum, statui tuò non repugnantium, intra statum, in quò constitutus es, electio vitæ perfectioris : in his inquam & similibus, præ oculis, unicè habere debes gloriam Divinam, illudq; eligere, quod ex Divinò instinctû, vel rationis dictamine, advertis futurum, cum DEI gloriâ majore.

*Considera 4<sup>to</sup>* Per Divinum instinctum deprehendi, esse vel fore cum majore DEI gloriâ, quando acribus stimulis & forti voluntatis impulso, de quò judicas prudenter, impulsû Divinum esse, sentis te impelli ad hoc potius, quàm ad aliud eligendum; idq; non ob alium finem, nisi unicè, ob finem gloriæ Divinæ promovendæ; quam hac ratione promovendâ esse magis, quàm per oppositû persuades tibi, ex internâ Divinâ illustratione. Per dictamen verò rationis, id ipsum deprehendis, quando, factò aliquò intellectûs ratiociniò, & expensis rationibus ac motivis pro utrâq; electionis parte, Divinò lumine illustratus, & auxiliò supernaturali adjutus, advertis rationes fortiores & validiores esse, pro unâ potius, quàm pro alterâ parte : Et quòd, talis electio conducibilior sit ad cultum Divinum, ejusq; majorem gloriam.

*Considera 5<sup>to</sup>* Hanc classem hominum esse, in quâ, omnes nos esse oportet, ut salutis nostræ certi & securi esse possimus. Laboriosum hoc promovendæ Divinæ gloriæ studium, esse unicam tabulam qua inter frequentia, vitæ hujus mortalis pericula, inò naufragia, salvari, & ad felicem, æternitatis portum, enatare possimus. Spes & deside-

rium

rium gloriæ Divinæ, est stella illa, ad quam, dum procelsum hoc navigamus mare, respicere, & quâ cursum nostrum dirigere oportet : Est medicina probatissima, quâ, vitam animæ nostræ servamus, omnesq; morbos, & infirmitates depellimus.

*His consideratis, reflecte te ad singula, qualiter te, hac in parte gesseris hætenus, qualiter deinceps gerere debeas. Præpara animam tuam ad Craces, tribulationes, persecutiones & confusiones: hæc enim tristissima & recurritima via est, assequendæ gloriæ Divinæ. Nihil faciendum aggredere, nisi quod cognoveris, conferre ad DEI gloriam, eamq; promovere.*

Elice affectus confusionis, desiderij promovendi quam maximè gloriam Divinam, hancque unicè respiciendi, in omnibus tuis actionibus. Erue ex his omnibus considerationibus, & reflexionibus, convenientia proposita, illorum exequendorum tempora, occasiones, circumstantias & modum designa.

*In colloquio* Postula à DEO gratiam ut juxta illud Isaïæ 48. *Laude mea infranabo te, ne intereas*, ut inquam te laude & gloriâ suâ infranet. Confitere te tanquam indomitum equum, tuis pravis inclinationibus & malâ voluntate in præceps in interitum ferri, & nisi, te hoc frænô detinuerit manus Divina, omnino perit. tam. Solus DEUS efficere potest, ut non intereas, ut in omnibus illi consentias, si te tali circumduxerit fræno.

*In fine, Anima Christi.*

## DIEI VI.

### Meditatio I.

### De tribus modis seu gradibus Humilitatis

*pre*



*Praludium* 1. Imaginare Christum humiliatū usque ad pedes Judæ, humiliatum item cum exinanitione sui, usque ad mortem Crucis.

*Praludium* 2. Postula gratiam, quā illuminatus, cognoscas in quō flet vera humilitas, ut illam consequi possis.

PUNCTUM I. Audi illa verba Matth 19, *Si vis ad vitam ingredi serva mandata*. Et illa 1. Petri 5 *Humiliamini sub potenti manu DEI*. Et considera primum modū humilitatis consistere in hoc, ut Deo aliquid prohibenti, vel præcipienti, sub obligatione peccati mortalis, humiliter obediamus, & talia ejus præcepta, imò & præcepta, humana sub mortali obligantia, sanctè observemus, quæ servare est humiliari sub potenti manu DEI, sub illà sententia, quæ potest animam mittere in gehennam. Hunc humilitatis gradum S. Pater Ignatius his proponit terminis: *Primus Humiliatis modus hic est ad salutem necessarius, ut ne penitus subdam Divine legi observandæ, atque ut Mundi quidem totius oblatio mihi Dominiò, vel extremò vitæ discrimine objectò transgrediar ex deliberatò mandatum ullum Divinum vel humanum, quod quidem peccati mortalis vinculo nos obliget.*

Expende singula. Et *Imprimis*: Observatio hæc mandatorum, sub peccatò mortali obligantium, est vera humilitas, est enim subjectio Creaturæ rationalis, suo Creatori, tanquam supremo Domino & Legislatore, cum recognitione supremæ ejus potestatis, idque est subjectio in rebus difficilibus, quia in rebus sensui repugnantibus, idque cum jacturâ & dispendiò totius mundi, imò cum ipsius etiam vitæ discrimine, est subjectio non solum legibus Divinis, sed etiam humanis, si tam hæ, quam illæ, obligent sub mortali.

2do Hic modus humilitatis, est necessarius ad salutem, nam impletio & observatio mandatorum,

requiritur, ut quis salutem consequatur. Dicit enim Veritas æterna: si vis ad vitæ ingredi, serva mandata.

3<sup>to</sup> Hic modus humilitatis requirit in nobis eam animi constitutionem, ut ne oblatio quidem totius Mundi dominio, vel vitæ discrimine objecto, resolvat se quis ad transgressionem præcepti sub mortali obligantis. Quare ad perfectionem hujus gradus non sufficit, ita legi sub mortali obliganti subijci, ut illam deliberatè non transgrediamur, si ad transgressionem invitemur, brevi, & momentaneâ voluptate, si invitemur privato aliquo & particulari emolumentò, & lucrò moderatò bonorum fortunæ, vel famæ, & honoris, sed, ut quis primum humilitatis conscendat gradum, necessarium est, ut ne totius quidem Mundi Dominiò, supremisque honoribus & maximis voluptatibus oblatis, paratus sit propter hæc, mandatum graviter obligans transgredi. Et hæc est illa humilitas Christiana, de qua dicebat S. Agatha Virgo & Martyr. *Multò præstantior est, Christiana servitus & humilitas, regum opibus ac superbiâ.* Parùm item est, nec sufficit ad conscendendum hunc humilitatis gradum, si quis non transgrediatur mandata sub mortali obligantia, propter evitanda aliqua minora vel leviora mala, ut ad evitandam indignationem amici, item ad avertendum damnum, qualia communiter & ordinariè evenire solent in bonis famæ, fortunæ, corporis, etiã in ad declinandum vitæ discrimen non debes deliberatè transgredi, mandatum sub mortali obligans.

4<sup>to</sup> Ad eundem humilitatis gradum, ejusque perfectionem spectare videtur, ut non solum objecto vitæ corporalis discrimine, sed etiã objecto discrimine vitæ & salutis æternæ, non transgrediaris ullum mandatum, sub mortali obligans, hoc est, si de animæ tuæ salute ageretur ac evitanda morte æternâ, pænisque inferni ex una parte, ex altera parte ageretur de committendo etiã unico peccato

to mortali, essetque necessario, alterutrum eligendum; potius deberes eligere mortem æternam & pœnas inferni, quàm in peccatum mortale consentire.

Humilitatis, vitam corporalem aspernantis, nec ejus objecto discrimine adduci se permittentis ad committendam culpam lethalem, habes exempla in S. Casimiro Regio Poloniæ Principe, qui mori potius elegit, quàm labe factatâ suâ pudicitia sædari: in Sancto item Ludovico IX Galliarum Rege, qui hanc humilitatem edoctus à Matre suâ sanctissimâ, S. Blancâ Regina, constitutum firmissimè habuit, prius mortem oppetere, quàm in lethale peccatum consentire. Humilitatis verò, vitæ insuper æternæ, & saluti animæ renunciantis, nec talis vitæ discrimine objecto resolventis se in transgressionem mandati, obligantis sub mortali, exemplum habes in S. Anselmo Canthuariensi Archiepiscopo, qui sæpius protestari solitus fuit: *Si hinc peccati horrorem, inde inferni dolorem, corporaliter cernerem; & necessario uncorum immergi deberem, prius infernum, quàm peccatum appetere.* Idem Sanctus, Cœlo etiam renuntiabat, si cum peccato illud obtenturus esset; ut habetur lib. de Beatis. *Mallem prius à peccato innocens, gehennam intrare, quàm peccati sordè pollutus, Celorum regnâ tenere.*

Hæc considerans erue inde sequentia dictamina. *1um.* Propter nullum quocunque bonum consequendum, etiam propter totius mundi Dominium, committere te debere peccatum mortale.

*2um.* Propter nullum bonum possessum, ulteriùs retinendum, illiusque jacturam ac damnum avertendum, etiam pro retinendâ & defendendâ vita, committere te debere, ullum peccatum mortale.

*3tum:* Ad avertenda, etiam quæcunque mala quantumcunque magna, quæ fortè sustines, non debere te risolvere in peccatum mortale.

atque ad avertenda mala, quæ nondum pateris, timere tamen potes, & quæ fortè imaginariis tibi evenitura, nullatenus tibi committendū esse, ut transgrediaris mandata, sub peccatō mortali obligantia.

*Reflecte* deinde te, an primum hunc humilitatis, jam conscenderis gradum? scito verò, conscendendum omnino esse, si vis, ut in cælum ascendas, & ad Cælum pervenias. Percurre singula, quæ expendisti, & fac reflexiones convenientes.

Fac item proposita, ac etiam protestationes à Sanctis, Casimiro, Ludovico, & Anselmo usitatas. Confundere, si fortè necdum hunc gradum attigisti. Quod si conscendisti jam eundem, age Divinæ Bonitati gratias, humilia te sub potenti manū Dei, & postula ut Deus, eadem potenti manu suā in hoc humilitatis gradū, firmum te & constantem teneat; ne ex eō aliquando decidas.

PUNCTUM II. Audi illa verba Christi Matth. 23. *Quicumque se humiliaverit sicut parvulus iste, hic est major in Regno Cœlorum.* Et considera secundum humilitatis gradum, à S. Patre Ignatiō per hoc describi: ut fixō animō, ad divitias, & paupertatē, honorem & ignominiam, brevitatem vitæ, & longitudinem, æquē sim propensus, ubi æqualis est Divinæ laudis, & salutis meæ occasio: utque nullā vel humanæ quantæcunque felicitatis vel propriæ mortis, conditione propositā, adducar unquam ut culpam, licet venialem tantum, decernam admittere. Sic descriptus, secundus gradus humilitatis, videtur expressus esse sufficienter, per similitudinem humilitatis parvulorum, in adductis Christi verbis. Parvuli enim non sunt solliciti de divitijs, honoribus, longitudine vitæ; sed ad hæc videntur æquē indifferentes, atque ad paupertatem, ignominiam & brevitatem vitæ, itā ut horū vel illorum electionem & tolerantiam, persvadeat illis facile, Parentum priorum voluntas vel conditio.

*Idem.*

Iidem per suam simplicitatem, & innocentiam, non solum suis Parentibus, sunt obsequentes, in rebus majoribus & gravioribus, sed etiam in minimis.

Porro ut ad hunc secundum, humilitatis gradum ascendatur.

Necessarium 1<sup>mò</sup> est, ut fixò animò, simus æquè propensi, ad divitias & paupertatem, ad honorem & ignominiam, &c. ubi æqualis est Divinæ laudis, ac salutis nostræ occasio. Ad humilitatem enim veram spectat, ut non quæramus nosmetipsos sed DEUM: ut nostra comoda, emolumenta & nosmetipsos, postponamus honori, & gloriæ Divinæ. Jam verò qui determinati, vel certè magis propensi sunt ad quærendas divitias, honores, & similia, si laudis Divinæ, major sit occasio per paupertatem, ignominiam, hi seipsos, sua emolumenta & comoda, quærunt, atque præferunt DEO, ejusque laudi & gloriæ. Qui etiam, dum æqualis est occasio laudis & gloriæ Divinæ, sive per divitias, & honores, sive per paupertatem & ignominiam, non sunt æqualiter propensi ad utraque, sed magis sunt inclinati, & determinati ad divitias & honores, illi seipsos, suæque bona & comoda, & non solum DEUM, ejusque gloriam quærunt & assilimant; adeoque in verâ humilitate deficiunt, quæ DEUM ita præfert; ut perfectè hominem, ejusque omnia bona, DEO subijciat ac postponat, & hæc propter DEUM, contemnere faciat.

2<sup>dò</sup> Necessarium est ad acquirendum secundum humilitatis gradum, ut nullâ vel humanæ quantæcunque felicitatis, vel propriæ mortis conditione, adducamur unquam, ut culpam licèt venialem tantum committamus. Hanc animi dispositionē exigit, non solum ipsa DEI dignitas, & excellentia, ut hunc, ne leviter quidem offendamus, non solum item, peccati venialis malitia & odibilitas, quæ tanta est, ut veniale non possit assumi, pro mediò ad



consequendum etiam maximum bonum, aut evitandum quodcunque malum, cum non sint facienda mala, ut eveniant bona : Sed insuper, eandem dispositionē & præparationē animi exigit ipsa subjectio Naturæ rationalis creatæ, suo Creatori, Supremoq; Domino ac Legislatori; ut creatura hæc humiliet se Deo, ejusque legi subijciat, etiā tunc, dum hæc solum obligat sub veniali.

Hic humilitatis gradus, non est quidem simpliciter necessarius, ad salutem, ut primus, facit tamen, ut quis abundantius vitam habeat, & per media perfectiora, consequatur salutem, & ut sit major in Regno Cælorum, ut item nihil hominem retardet in obtinendâ salute. Per accidens etiam potest esse, ad salutem necessarius, quatenus qui non contentit, hunc gradum humilitatis conscendere, etiam de primo gradu decidit.

Ex his consideratis hæc apud te conclude & statue firmiter, 1<sup>mo</sup> quod omnem affectum ad tua commoda, honores, bonam famam, valetudinis firmitatem, vitæ longitudinem ita sis moderaturus, ut non magis ad hæc propendeas, quam ad opposita, si utraque æqualiter, Divinam promovebunt gloriam, & te ad tuum finem consequendum juvabunt. 2<sup>do</sup> quod nullum veniale, maximè delibetratum sis commissurus, propter quodcunque bonum, quantumcunque illud fuerit, consequendum, vel malum, etiam maximum avertendum. Licet verò aliqua venialia humilitati specialiter repugnantia numerentur, qualia sunt : dicere aliquid in laudem sui : vanam laudem ex suis actionibus appetere : ex fine vanæ gloriæ aliqua facere, complacere sibi in sui æstimatione, plausibus, & similibus, præferre se alijs : moveri invidia, si alij laudentur, lætari, si contemnantur, si contemnaris, affligi, si reprehendaris, excusare te ipsum, tuasque actiones : & similia, ~~tamen~~ non solum hæc, sed etiam quæcunque venialia

alia secundo humilitatis gradui repugnare, pro  
certò & indubitatò habebis & omnia ac singula,  
studiò præcipuò cavebis. Fac iterum refle-  
xiones convenientes, elice affectus, & proposita, Di-  
vinamque opem ad ea exequenda implora.

PUNCTUM III. Audi illa verba Christi Matth.

II. *Discite à me quia mitis sum, & humilis cor-  
de.* Et cogita, tertium humilitatis gradum consi-  
ficere in perfectà imitatione humilitatis Christi. S.  
P. Ignatius hunc humilitatis gradum, ita explicat.  
Tertius est modus humilitatis absolutissimæ, ut pri-  
ores jam duos adeptus, etiamsi nullò superadditò,  
laus DEI par foret; ad maiorem tamen imitatio-  
nem Christi, eligam potius, cum eò paupere, spretò,  
& illusò, pauperiem, contemptum & insipientiæ  
titulum amplecti, quàm opes, honores, & sapien-  
tiæ existimationem.

*Expende singula 1<sup>mò</sup>* Ad hunc humilitatis gra-  
dum conscendendum, necessarium esse, ut quis pri-  
ores duos, humilitatis gradus sit adeptus. Frustra e-  
nim vult sequi consilia, qui præcepta Divina negli-  
git: frustra laborat in perfectè imitandò Christò,  
ejusque perfectione, exactè in se exprimendâ, qui  
necdum habet rudimenta vitæ Christianæ.

*Expende 2<sup>dò</sup>* Etiamsi nullò superadditò laus  
DEI par foret &c. hoc est, etiamsi seclusâ imitatio-  
ne humilitatis Christi, & independentè à tali fine  
& respectù, ex alijs circumstantijs & rationibus  
præcisè consideratis, laus DEI par foret ex paupe-  
rie, contemptu, atque ex opibus, honoribus: in quò-  
casu indifferentia ad utrumque curanda est, tamen  
propter imitationem humilitatis Christi eligendam  
esse, pauperiem, contemptum, insipientiæ titulum.  
Quòd si independentè ab hòc fine & respectù imi-  
tationis Christi, major laus DEI esset ex unò, quàm  
ex aliò, certum est, illud esse eligendum, ex quò  
major laus DEI est futura.

*Expende 3tò* Ad maiorem imitationem Christi pauperis, ipreti, illusi, pauperiem, contemptum, insipientiæ titulum eligenda, esse. Hòc ipsò enim, quòd Christus hæc elegerit magnum fecit pretium & æstimationem paupertati, contemptui, ut hæc eligi debeant præ oppositis. Hòc ipsò ista magis conducunt ad perfectionem, siquidem Christus, qui est idea omnis virtutis & perfectionis, hæc præelegit. Hòc ipsò, major Dei gloria est, ex præelecta pauperie & contemptu, cum magna sit inde laus Dei & gloria, quòd Christum Filium Dei imitemur. Hòc ipsò denique certior esse potes, salutis tuæ consequendæ: illa enim certius obtinetur, per paupertatem, contemptum, & similia, siquidem Christus qui est Dux & Magister noster, Viâ, Veritas, & Vitâ, Hanc viam per paupertatem contemptum, & tribulationes ostendit ad salutem? hæc exigit à sequentibus sua signa. Cùm è contra à Christi signis avocet, & ad sua signa invitet diabolus, propositis divitijs, honoribus, ac per hæc, mortales, in perditionem trahat:

Reflecte te, & tecum recogita, quem habes animum ad conscensionem hujus gradus humilitatis. In meditatione de Regnò Christi, invitavit te idem Christus Rex tuus, ut ijsdem insignibus, & vestibus induaris, quibus ille induebatur si tunc necdum te resolvisti, iterum te invitat in præsentì, vide quid te facere conveniat. Illud noveris in nullò vitæ statu, quemquam Sanctorum (quisque verò status plures magnos Sanctos numerat) ad magnam perfectionem & Sanctitatem aliter conscendisse, nisi conscensò hòc tertiò humilitatis gradû. Quare etiam tibi, conscendendus es, si nolis esse trivialis tantum & imperfectus Dei, servus. Quò vero paratior, & promptior sis, ad ferendam & eligendam paupertatem, contemptum, insipientiæ titulum, & similia: ipse te contemnere stude, de te  
sentias

sentias quàm abjectissimè, reputes te peccatorum maximum, ipsò Diabolò & damnatis pejoem, Dei gratià & quibuscunque ejus beneficijs, ac etiam aliorum consortiò indignissimum, reputa nihil tibi deberi; non deberi tibi ullum honorem, ullam æstimationem, ullos respectus, actiones tuas plenas esse defectibus, & imperfectionibus. Opta, ut in tuis talentis, non advertatur nisi ad solos defectus, & ut ea, quæ possent æstimari prætereantur. Ad omnes tuas laudes, tanquàm tibi indebitas, atque si tui essent irrisoriæ, confundere. Lætare, si parvi æstimeris ab alijs, si tua talenta extenuentur, si alijs postponaris. Quære occasiones tuæ humiliationis & contemptûs, suscipiendo obsequia proximorum viliora, ad eas functiones, Dei gloriam promoventes, promptè te offerendo, quæ te magis contemptibilem reddunt.

*Colloquium* triplex, primum ad Beatissimam, postulando, ut quæ humilitate suâ placuit Altissimo, impetret tibi perfectissimam humilitatis Filij sui imitationem. 2dum ad Christum Hominem, ut impetret à Patre æterno hanc ipsam gratiam 3tium ad Patrem æternum, ut annuat petitioni Christi Domini, & intercessioni Sanctissimæ ejus Parentis.

*In fine: Anima Christi.*

## Meditatio II.

De fine & obligatione Homi-  
nis Christiani, ac medijs ad su-  
um finem.

*Praludium* 1. Imaginare Christum Dominum datum esse, non solum in Redemptorem Mundi,

sed etiam in Ducem, veritatis Magistrum, & exemplar omnis virtutis, ac perfectionis, quem si sequantur Christiani, doctrinam ejus impleant, & exempla imitentur, magnum hinc adjumentum habent, ad finem suum consequendum.

*Præbodium 2.* Pete gratiam, quâ illuminatus possis cognoscere, finem & obligationem hominis Christiani, ac etiam media, ad hunc finem consequendum, atque ut his medijs juvari possis.

PUNCTUM I. Audi ilia verba Christi Joan. 10. *Ego veni ut vitam habeant, & abundantius habeant:* Est considera finem, hominis Christiani hunc esse debere, qui etiam est finis cujusvis hominis, nimirum ut Dominum DEUM suum laudet, revereatur, eique serviens, tandem salvus fiat. Cum aliquâ tamen differentiâ circa modum, quô DEUM laudare, revereri, eique servire homo Christianus debet, cum aliquâ item differentiâ circa salutem, quàm consecuturus est. Finis itaque hominis Christiani est, ut non solum sacri Baptismi susceptione, & verâ fide in Christum, sed etiam bonis operibus, & vitâ Christianâ hoc est conformi doctrinæ Christi, & ejus, veræ Ecclesiæ, confiteatur se DEUM & CHRISTUM nôsse: et ut illustratus veræ fidei lumine, intra Ecclesiam à Christô ipsô, supra firmam petram, hoc est, supra Petri fidem fundatâ, DEUM in essentiâ unum, in Personis trinum laudet, vitâ & actionibus, doctrinæ Christi conformibus, eundem reve-reatur, observatione non solum præceptorum decalogi, aliorumque legis Naturæ, sed etiam præceptorum Christi Evangelicorum, & præceptorum ipsius Ecclesiæ, eique taliter serviens, tandem salvus fiat.

Hic ipse, cujusvis Christiani finis expressus est, brevibus illis Christi verbis: *Veni, ut vitam habeant & abundantius habeant:* Finis cujusque Christiani à Christo intentus, eique præfixus est, ut vitam, /  
tam



tam spiritualement animæ intellige) non quomodo-  
cunque, sed abundanter habeant. Porro vita ani-  
mæ duplex est, una, quâ anima, in hoc adhuc cor-  
pore mortali existens, vivit Deo per gratiam san-  
ctificantem. Altera vita animæ est, quâ post mor-  
tem carnis, anima Deo vivit, per æternam felicitatem,  
ejusque visionem & amorem. Cura igitur, &  
singulare studium, hominis Christiani esse debet, ut  
utramque hanc animæ vitam, abundantius habeat.  
Quia verò vita illa felicissima, quâ anima Deo vi-  
vit in gloriâ, & Patriâ cœlesti, consequitur vitam il-  
lam, quâ anima existens in corpore, Deo vivit per  
gratiam, talisque vitæ est præmium, cui tanquam  
suo merito proportionata respondere debeat, eâ ra-  
tione ut qualis vita præsens animæ, & quâ abun-  
dans fuerit, tam abundans, aut potius proportiona-  
tè superabundans, futura sit vita cœlestis; ideo om-  
nes vires, & omnia studia homini Christiano con-  
ferenda sunt unicè, ut vitam animæ per gratiam,  
dum in corpore vivit, habeat, & abundantius, imò  
abundatissimè habeat.

Per hoc autem, mi Christiane, vitam animæ,  
per gratiam habes, quòd DEUM verum & JE-  
SUM CHRISTUM, propter tuam salutem missum in  
mundum, vivâ fide cognoscas; quòd cognoscas il-  
lum, & confitearis non solum ore, & intellectu tuò,  
sed omnibus potentijs tuis, omnibus sensibus; om-  
nibus actionibus & operibus tuis, quod omnia of-  
ficia tua dicant Deo: *Domine quis similis tibi?* siqui-  
dem ex oraculò Sapientiae Incarnatæ: *Hæc est vi-  
tâ æternâ* (hoc est ad felicem æternitatem homi-  
nem ordinans, & vitæ illi æternæ præludens) *ut  
cognoscant te solum DEUM Verum, & quem misisti  
JESUM Christum.* Habes vitam animæ, si rege-  
neratus in Christo per baptismum, gratiam ba-  
ptismi conservas & custodis, & peccata mortem  
animæ afferentia sanctè caves & declinas. Si  
etiam

etiam eandem gratiam, & innocentiam baptismalem, per grave peccatum fortè amissam, per Sacramentum pœnitentiæ reparare studuisti, ejusque conservationi, majori supra teipsum vigilantia & sollicitudine, invigilas.

Hanc ipsam animæ vitam habes abundantius, si gratiam Sanctificantem in baptismô acceptam, vel etiam post sui amissionem, per Sacramentum pœnitentiæ restitutam, non solum conservare sed etiam per majora, & majora semper incrementa augere studes, Sacramenta Ecclesiæ frequentando, eaque cum dispositione conveniente suscipiendo, pietatis, & charitatis opera exercendo, in virtutibus homine Christianô dignis proficiendô, consiliâ Christi adimplendo, exempla imitando, ejusque merita & satisfactionem usurpando, & tibi appropriando. Habes vitam abundantius, si abundas in omne opus bonum, si facis, ut justitia tua abundet, plus quàm scribarum & Phariseorum, nec permittis, in implendis præceptis Religionis tuæ, vincere ab infidelibus & hæreticis, eorumque studiâ circa implenda præcepta per sectas ipsorum præscripta.

Hæc considerans fac reflexiones, quæ cura tua sit & fuerit hætenus circa consecutionem finis hominis Christiani? Qualis item sis Christianus? an non solo nomine, an non ex charactere tantum in Baptismô acceptô? an non ille? qui ore confiteris te nosse Christum, factis autem negas? An DEUM laudes & reverearis, juxta Christi & Ecclesiæ ejus doctrinam & institutionem? in templis DEO & Christo in Eucharistia præsentî quam reverentiam & honorem exhibes? An de illâ tuâ laude, quam DEO reddis non verificetur illud: *Non est speciosa laus in ore peccatoris* An in omnibus tuis actionibus cultum DEI & gloriam intendas & quæras!

*Refle-*

*Refleſte* iterum te; quomodô DEUM reverearis! An timorem DEI, præ oculis habeas? percurre breviter ſive legis Naturæ, ſive legis Divinæ ſcriptæ præcepta, ac etiam præcepta Evangelica, & præcepta Eccleſiæ, & cogita, quâ curâ & ſanctitate, illa obſerves?

*Refleſte* te ulteriùs An Anima tua vivat DEO per gratiam? An hanc vitam abundantius habes? quâ ſolitudine ſtudes, hanc vitam conſervare, ac etiam augere? An Sanctiſſimum, Euchariſtiæ Sacramentum ad vitam, an certè ad iudicium manduces? quàm frequenter ſive ad hoc cæleſte epulum; ſive etiam ad Sacramentum Pœnitentiæ accedas? cum quâ diſpoſitione, quô fructû & cum quantô vitæ ſpiritalis & gratiæ augmentô hæc Sacramenta ſuſcipias? Quantum abundes in opera miſericordiæ, & charitatis, & utrum in omne opus bonum? An juſtitia tua abundet, plûs quàm ſcribarum & Pharifæorum, ſeu plus, quàm multorum hæreticorum & infidelium? an in iudicio DEI non confundent te multi Ethnici & infideles, virtutum naturalium exercitio & frequentatione, ac etiam vitæ conformis rationi rectæ honeſtate? an non confundent te illæ in tribunalibus, comitijs comitiolis, variorum iudiciorum ſubſellijs, hæreticorum & diſſidentium ſententiæ, vota & deciſiones? certè confunder non unum Catholicum, illa quædam conſcientiæ in hæreticis teneritudo, in reddendô unicuique quod ſuum eſt, in perſolvendis punctualiter, famulitio promeritis ſtipendijs, in dandâ condictâ mercede, artificibus & operarijs. Confundent non unum, acatholicorum opera miſericordiæ, liberales in pauperes eleemoſynæ, data indigentibus ſubſidia, paternus ſubditorum amor, proximi dilectio, opere ipſo comprobata, obſervatio accurata feſtorum, aliaque bona opera.

Ex his factis reflexionibus habebis copioſam  
mate-

materiam tuæ coram Deo confusionis & humiliationis, ac opportunam occasionem faciendorum propositorum, circa vitæ tuæ emendationem & reformationem.

PUNCTUM II. Audi illa verba Deuter. 32. quibus sacra Scriptura describit modum, quò DEUS populum Israël ex Ægypto eductum in terram promissionis induxit: *Invenit eum in terrâ desertâ in locò horroris & vastæ solitudinis. circumduxit eum & docuit, & custodivit quasi pubillam oculi sui. Dominus solus Dux ejus fuit.* Et considera in his verbis intelligi posse, plura expressa media perveniendi, ad finem homini Christiano præfixum.

Imum medium est, provida & sollicita Divinæ Bonitatis de salute nostra, cura, quæ non expectat, ut prius ad DEUM veniamus, sed ipsamet nos quærit, non tantum per Incarnationem, Nativitatem, Conversationem Filij DEI in carne assumptâ cum hominibus, passionem & mortem ejusdem, sed etiam nunc, perfectio redemptionis nostræ opere, quærit unumquemq; nostrum adducendo ad gratiam Baptismi, ante cujus susceptionem fuimus in terrâ desertâ, in locò horroris & vastæ solitudinis, quia tunc, cum essemus gratiâ sanctificante spoliati, ac in statû peccati originalis, quærit nos, media salutis, quæ intra solam Ecclesiam Catholicam habentur, & haberi possunt, providendo & ordinando. Quærit per gratias prævenientes, liberaliter nobis, sinè nostris meritis collatas.

Quò consideratò, agnosce in hóc mediò magnum tibi præstitum esse beneficium, profitere cum S. Augustinò: *Antequam ego nascerer, filius Ancilla tuæ, Domine spes mea ab uberibus Matris meæ, tu me prævenisti, preparans mihi semitas, quibus intraderem, & venirem ad gloriam Domus tuæ, priusquam formares me, in uterò, novisti me, & quidquid tibi placuit ordinasti de me.*

2dum

2<sup>um</sup> medium consequendi, finis hominis Christiani, est Divina Bonitas, non solum nos præveniens, & ad Catholicam vocans Ecclesiam, mediaque salutis pro nobis ab æternò disponens, sed insuper in Ecclesiâ jam constitutos, & gratiâ DEI præventos, instruens nos & custodiens. Considera, quò descendat Bonitas Divina, ut non solum quærat hominem, in terrâ desertâ, in locò horroris & vastæ solitudinis, cumq; inveniat; sed etiam, ut inventum ducat, gressus ejus formet, dirigat in viam salutis, & ne aberret, custodiat, ut pupillam oculi sui, hoc est, ut non solum ad gratiam justificationis perducatur; sed in hac præterea constitutum, ducat viâ mandatorum suorum, & ne ab hac aliquando declinet, instruat, tum per externam Ecclesiæ, & ministrorum ejus prædicationem, tum per interiores illustrationes, quomodo in viâ salutis progredi debeat, tandemq; illum custodiat, ut pupillam oculi, ne deinde, suâ pravitate, vel fraudibus hostium, generis humani, à gratiâ ipsius consequenter à salute æternâ excidat.

*Hoc considerato* Erumpe in affectum; Scio Domine, quia non est, hominis via ejus, nec ejus est, ut dirigat gressus suos. Quod ergo non valet perficere homo, hoc supplet Divina Bonitas, formans gressus ejus, instruens cum tanto amore, quia ut pupillam oculi sui custodiens. Gratias age pro his medijs salutis tuæ. Confide de obtinendâ à te felicitate æternâ. Confundere, si DEO ducente, dirigente, ut pupillam oculi sui te custodiente, ex viâ mandatorum ipsius deflexisti.

3<sup>ium</sup> Medium homini Christiano, pervenendi ad vitam immortalem, & æternam felicitatem est, quò Dominus solus Dux ejus factus sit, ut Christiani sine errore, & cum omni facilitate, ac sine aberrandi periculò, incederemus, non Prophetis, non Angelis commisit nos deducendos, sed ipse-



ipfemet DEUS Dux noster esse voluit. Filius unigenitus Patris, a Regalibus sedibus venit ut nos deducat in terrā promissionis, hoc est in Patriam cæleste, nobis appromissam.

Ducit autem nos triplici modo 1<sup>mo</sup> Cælestibus doctrinis, à se ad nostram institutionem, in Evangelio & Ecclesiâ relictis. 2<sup>do</sup> suo proprio exemplo, quod dedit in exercitio omnis generis virtutum.

3<sup>tio</sup> Comparatō nobis infinito meritorum suorum thesaurō, ex quō non solum habemus pretium redemptionis nostræ, de servitute peccati, sed etiam habemus, & habere possumus, in p<sup>ro</sup>pensas longissimi ad felicem æternitatem itineris, scilicet tam gratias actuales, quàm gratias habituales, & dona habitualia, quorum ipsorum providendorum, alia rursus providit nobis media, scilicet instituta à se Sacramenta.

Reflecte te, quāliter usus sis hōc salutis tuæ, tam præstanti & efficaci mediō? fuit ne tibi Christus Dux ad salutem, & in resurrectionem, ex inveteratis peccatis tuis?

Quomodo te juvit suā doctrinā, ut vitam haberes & abundantius haberes? Quomodo usus es Sacramentis? Esne secutus ductum præceptorum & consiliorum Christi? An institeris vestigijs virtutum illius? Quantum te juverint gratiæ Divinæ, ex meritis Christi tibi collatæ? An quidquid tibi defuit, usurpaveris in tuum commodum, ex vulneribus Domini tui JESU Christi?

Felice affectus 1<sup>mo</sup> gratiarum actionis pro tam efficaci salutis tuæ mediō, dicens cum S. Augustinō: *Querebam ego viam ad fruendum te & non inveniebam, donec amplecterer Mediatorem DEI & hominum JESUM Christum DEI Filium, vocantem me, & dicentem: ego sum via, veritas & vita.*

2<sup>do</sup> Confusionis & humiliationis tuæ coram DEO, quod alium, quæsieris vel secutus fueris Ducem, quod secutus fueris aliquando mundum,

car-

carnem, sensualitatem, amorem tuum proprium, inordinatum aliquem affectum, qui tibi fuerunt Duces in præceptis. 3<sup>to</sup> Firmiter propositi & protestationis, quod abhinc solum hunc Ducem sequi velis, vivendo juxta doctrinam, præcepta, ac etiam juxta aliqua saltem ejusdem tui Ducis Christi consilia, imitando ipsius virtutum exempla, charitatis, misericordiæ in pauperes, patientiæ, humilitatis, resignationis in Divinam voluntatem, amoris inimicorum, & aliarum virtutum similibus, utendo infinitò thesaurò meritorum Christi, obediendo inspirationibus Divinis, cooperando gratijs excitantibus, frequentando & dignè suscipiendo Sacramenta.

Protestare dicens: valete Duces alij, quos hactenus sequebar, & sequens in viâ salutis errabam. Abhinc solus Dominus Dux meus erit. 4<sup>to</sup> tandem postula à Christo ut tuus ille Dux semper esse velit, & ut te in Patriam cælestem feliciter inducat.

PUNCTUM III. Audi illa verba Psal: 104. de ipsâ Iisrahelitis ad terram promissionis euntibus dicta: *Expandit nubem in protectionem eorum & ignem, ut luceret eis, per noctem.* Et considera, homini Christiano, ut finem suum consequi possit, etiam hoc provisum esse medium, quod DEUS expandit nubem in protectionem ipsius.

Per hanc nubem intelligi potest ipsa singularis DEI providentia, quæ suis gratijs, contra insultus & tentationes inimici nos protegit, non permittens nos tentari supra, quàm possumus, sed faciens cum tentatione, gratiæ suæ adjuvantis proventum.

Tu intellige per hanc nubem, maternum Sanctissimæ DEI Parentis affectum, quò illa omnes fideles prosequitur. Hæc est illa nubes, quæ pluit nobis Justum, cujus desiderio illi tenebantur, qui dicebant: *Rorate cali desuper & nubes pluant justum.* Hæc est nubecula illa quasi vesti-

gium hominis, quòd in illa expressit DEUS homo, ex utero illius in mundum procedens. Hanc nubem expandit DEUS, super omnes Christianos, ut hæc illos protegeret contra æstus vindictæ & furoris Divini, ut ex hac nube decidat pluvia, quam segregavit DEUS hæreditati suæ, scilicet : ut per manus Mariæ omnes gratias, omnia dona & beneficia accipiant. Sub hac protectionis nube si quis peregrinari velit, & ad cælum contendere, magnum adjumentum habet perveniendi ad terminum vitæ & felicitatis æternæ.

*Considera* deinde medium insuper aliud esse, quò in consequendo fine suo Christiani singulariter juvari possunt, custodiam Sanctorum Angelorum, Patrocinium Sanctorum Patronorum. Hi sunt ignis ille nobis datus, ut luceat per noctem. Sunt ignis ratione amoris DEI & zeli salutis animarum nostrarum, quò æstuant. Sunt ignis illuminans : illuminant enim nos Sancti Angeli Custodes nostri, suis instinctibus & illustrationibus, in viam salutis nos dirigendo. Illuminant alij sancti, virtutum suarum exemplis, dum in vita hac mortali viverent, à se relictis, ut ea imitemur. Ignes hi Sanctissimi, semper quidem nobis lucent, sed maximè lucent in nocte, in nocte inquam tentationis, tribulationis, tristitiæ, desolationum, impetrando nobis gratiæ Divinæ, hanc noctem dissipantis; splendorem, impetrando lumina cælestia, consolationes spirituales, serenitatem animi, & potestates tenebrarum cum suis tenebris dispellendo, sed maximè lucent in nocte, quam nobis facit vitæ nostræ occasus, faciuntque ut ipsorum præcipuè intercessione, ingrediamur viam æternitatis, eoq; perveniamus, ubi nobis lux gloriæ cælestis illucescet & lucebit in æternum.

Fac reflexiones supra te ipsum; & cogita quantas tuas fœditates protexerit Mater Sanctissima.

Expende: quòd DEI irati vindictam, iustitiæ Divinæ fulmina non effugisses, nisi hæc nubes te protexisset. Reflecte te: quòd ætus tuarum cupiditatum, desideriorum, tentationum, tantopere tibi non noceat, cui hoc debeas? An non nubi huic sanctissimæ, te à tali æstu protegenti? quòd illa pluvia gratiarum illustrantium, excitantium, sanctorum propositorum copiosè in te decidat, nubi huic expansæ debes, ei-dem debes tot alias gratias, nimirum conversionem tuam, pænitentiam, extirpationem pravorum habituum, amotionem occasionum peccandi, aliq; innumera DEI beneficia.

Reflecte te rursus: quòd illumineris in nocte tribulationis, tentationis; in nocte quam in anima faciunt peccata tua, habere te beneficio ignis illius, qui tibi lucet in nocte: nimirum beneficio S. Angeli Custodis tui, de'besq; id instinctibus & monitionibus ipsius. Habes item ex beneficio Sanctorum Patronorum tuorum, quorum non solum exemplò ad virtutem provocaris, sed etiam ex eorum intercessione & patrocinio lumen & splendorem excipis.

Reflecte te tandem, quàm gratus tanti affectus exstiteris, sive Sanctissimæ DEI Parenti, sive S. Angelo Custodi, sive alijs Sanctis tutelaribus tuis?

Elice actus gratiarum actionis pro singulari protectione & illuminatione, quam experiris: Confusionis propter ingratitudinem tuam. Fac. proposita circa cultum Matris Beatissimæ, Sanctorum Tutelarium tuorum, circa reverentiam exhibendam Sancto Angelo Custodi tuo.

*Colloquium* ad Beatissimam, S. Angelum, & Sanctos Tutelares tuos, quibus supplica, ut semper quidem, sed vel maximè in nocte illa, in quam, te moriente, corporis tui claudentur lumina, suo tepatrocinio protegant, omnesq; dissipent animæ tenebras; illudq; efficiant, ut Anima tua, lumine gratiæ

ficantis, & plurium meritorum, illustrata, è corpore prodeat, & in splendoribus ac consortio eorundem ipsorum Sanctorum, locum inveniat.

*In fine sub tuum Præsidium.*

### Meditatio III.

## De Imitatione Vitæ, Doctrinæ & Virtutum Christi.

*Preludium* 1. Imaginare, quòd præ oculis habeas Christum Dominum, ejus Doctrinam & prædicationem audias, & in eo spectes quascunq; perfectiones & omnis generis virtutes.

*Preludium* 2. Pete à Patre æterno gratiam, ut possis te conformare imagini Filij ejus.

PUNCTUM I. Audi illa verba Isaiaë 6. *Parvulus natus est nobis, & filius datus est nobis.* Et considera, quòd inter alios fines adventus Christi in mundum, hic non postremus fuerit, ut tanquam sapientissimus mundi Magister nos erudiret, quæ ratione DEUM laudare, eum revereri, ipsi servire, ac demum ad ipsum pervenire debeamus, ut tanquam supremus Dux & Dominus, milites castra sua sequentes, partim suâ Doctrinâ, partim exemplo instrueret; quomodo eum imitari, sub ejus signis militare, hostesq; suos mundum, carnem, & diabolum debellare debeant.

*Considera ulterius* Christum hanc Discipulorum suorum & militum institutionem, à sua statim nativitate inchoasse; ut meritò, dum adhuc parvulus esset, nobis datus, nobis natus esse diceretur. Percurre multas circumstantias nativitatis & tenebræ ætatis Christi; et ex ipsis discas, qualis discipulus, qualis miles Christi esse debeas. Et imò qui dem Considera Paupertatem Christi nati, & ejus  
in



in paupertatem amorem. Christus infans tantò amore ferebatur in paupertatem, ut eam pro matre habuisse videatur.

Ex paupertate tanquam matre nascitur, quia ex pauperrima Virgine: Paupertas Christum deponit in præsepio, paupertas villibus involvit pannis, paupertas pascit, paupertas salurat, in pastoribus invisit & complectitur. quomodo igitur illi non Mater paupertas? Nulla re Christus tanquam propriâ disponit. Accipit munera à Magis, ea nec digito quidem tangit, sed his disponebant MARIA & JOSEPH. Illa tunc non nisi penes ipsum dispositio fuit: dabat potestatem filios DEI fieri, dabat gratiam, lumen cæleste, dabat Spiritum Sanctum.

Ex hóc Ducis & magistri tui exemplò discce, non debere te affectu immoderato affici opibus & divitijs, nec illas inexplibili quærere appetitu. Discce non debere te abhorrere à paupertate Christi, nec eam vilifacere, quam Christus tanti æstimavit, quinimò desiderare, ut pauper pauperem, nudus nudum Christum sequaris, si DEI hæc voluntas fuerit, vel Divina vocatio, aut ratio salutis tuæ id postulaverit.

*Considera 2dò.* Puritatem hujus infantis plusquam Angelicam, quia Divinam. Nascitur sine peccato, nascitur ex Matre ab omni labe immuni, ex Matre ante partum, in partu, post partum Purissima Virgine. Et hoc exemplò excitare, ut ad puritatē quam maximā animæ & corporis enitaris.

*Considera 3tò.* Obedientiam parvuli JESU, quomodo sit subjectus Matri suæ, quomodo in omnibus permittit se tractari secundum ejus placitum, ad omnia paratus, sive ut manibus sustentetur, sive ut præsepio deponatur, sive ut Mater illi super genua sua blandiatur, sive ut pannis confringatur; et discce debere te tuis Præpositis, Magistratibus, & cuicumq; jurisdictioni, habenti supra

te potestatem, ita subiectum & ita tractabilem esse, tanquam si infantulus esles.

*Considera 4to* Alias virtutes Christi nascentis. Temperantiam & abstinenciam ipsius, modo lacte passus es, omnium incommodorum tolerantiam, in frigore nascitur, lecti ejus asperitatem, tua Mater reclinavit eum in praesepio, & ipse in feno jacere pertulit. Considera humilitatem DEI nascentis, descendit ad stabulum, inter animalia collocatur, Pastores suscipit, eorumq; munera non dedignatur. Considera zelum Christi, hunc ille statim ab infantia exercuit, quo die Christus natus est, ab hoc die Salvator mundi exstitit, *Natus est hodie Salvator mundi* Non verbis, sed vi quadam interna traxit ad se Pastores, & Magos suae sanctitatis radijs illuminavit. Disce has virtutes à Duce & Magistro tuo, easq; imitari stude.

Similem tui institutionē per exempla Christi habere potes in Circumcisione ipsius. Ex qua, Christi patientiam, & carnis mortificationem ulque ad sanguinis effusionem intelliges, tolerantiam item omnium confusionū, despectuum, contumeliarum. Christus peccatum non contraxit, peccatum non fecit, nulli peccato obnoxius fuit, pro peccatore tamen haberi voluit, poenam peccati sustinuit, castigare in se peccatum, cujus non fuit reus, permisit. Ut discas, quomodo & tu carnē tuam tractare debeas, ut discas castigare in te peccata tua propria, ut discas confusiones, poenitentias, reprehensiones, etiā sine culpa tua, patientissimē prompto animo tolerare.

Ex fuga Christi in Ægyptum, disce pati persecutiones, disce indifferentiam ad omnem locum, sisq; paratus ibi commorari, ubi spes erit major Divinae gloriae per te promovendae, & DEO majus praestandi obsequium. Disce resignationem in DEI voluntatē, ejusq; omnē circa te dispositionem.

Ex remanescētia Christi in templo, disce affectum

fectum ad res spirituales, in ijsq; gustum habere stude. Disce, relictis tuis Parentibus, consanguineis, amicis, relictô etiam mundô, si DEUS ad id te elegerit, exire de terra tua, de cognatione tua, & de domo Patris tui. Disce obsequio Divino te addicere, & occupari in his, quæ sunt Patris æterni. Disce, posthabitis quibuscunq; rationibus, & respectibus humanis, gloriam Divinam quærere. Disce libenter tractare res Divinas, cum doctis & Sanctis conversari, cum ijsq; spiritualia miscere colloquia.

Ex vita Christi abscondita, disce tuam etiam vitam debere esse in Christo absconditam. non debere te quærere vanitates, honores, apparentias, magnâ hominû æstimationê. Per multos vitæ suæ annos Christus latere voluit, ut & tu latere velis, nec in publicum prodeas, nisi quando DEI gloria, vel proximi obsequium, aut boni communis amor id à te postulabit; Ut ignorari, teq; pro minimo reputari velis.

Christus antequam mundo innotesceret, antequam prædicationem sui Evangelij inchoaret, crescebat ætate, sapientiâ, & gratiâ coram DEO & omni populo, ut scias, à tua ad DEUM conversione, ab infantia vitæ perfectioris, continuò te in virtute proficere, & in perfectione Christiana crescere oportere, idq; non solum coram DEO, sed etiam in oculis hominum, ut videant opera tua bona & glorificent Patrem Cælestem, hoc est, ut tuò exemplò ædificentur, & accendantur ad DEUM glorificandum, illique serviendum.

Fac reflexiones, præsentis materiæ servientes, supra vitam tuam antea actam, reflexiones item supra vitam tuam sequentem, qua ratione eam instituere debeas. Elice affectus accommodatos, Proposita etc: Pete à Christo, ut suis exemplis addat gratiam fortem, & victtricem, quæ te

excitet ad eadem quàm perfectissimè imitanda. Advolvere infantilibus Christi pedibus, eosq; arctissimè complectere, lacrymis ob malè tractatam vitam tuam profusis ablue, benedictionemq; posuila ad vitam aliter instituendam dicens. Non dimittam te ô benignissime JESU, nisi benedixeris mihi.

PUNCTUM II. Audi verba Christi Joan: 10. *Si sermone non creditis, propter opera quæ ego facio credite.* Atq; pro materia hujus & sequentis puncti, assume doctrinam Christi & vitam ejusdem, ab inchoata prædicatione Evangelij, ad tempus Passionis. Doctrinam hóc Puncto considera. Hæc quatenus ad mores & vitam rectè instituendam ordinatur, continet præcepta Evangelica, & sanctissima Christi Consilia. Præcepta obligant sub peccato ut servantur, Consilia ex se non obligant, promoveant tamen perfectionem hominis.

Præcepta Christi Evangelica sunt: de facienda poenitentia, de dando bono exemplo alijs, de reconciliatione proximò ante muneris oblationem, de amovendis proximis occasionibus peccandi, de diligendis inimicis, de non irascendo, de fugienda vana gloria, de curanda attentione in orando, de moderando affectu ad res temporales, de moderanda nimia solitudine circa necessitates corporales, de cavendo judicio temerario, de cura ad animam pertinentium, de rerum spiritualium & sacrarum reverenti tractatione, de tenenda via salutis, de curanda simplicitate, de adhibenda correctione fraterna, & si quæ sunt similia.

Consilia Evangelica sunt, de servanda paupertate spiritûs, de esurienda & sitienda justitia, de patienter ferendis persecutionibus, de curanda perfectione, de sequendo Christo, de exuendo seculi affectu, de exercenda humilitate, de relinquendis omnibus, & distribuendis pauperibus, de servanda  
virginitate

virginitate & ducenda vitâ continenti. de po-  
nenda anima pro proximis eorumq; salute, de be-  
nefaciendo inimicis, & alia his similia.

Reflecte te supra singula sive præcepta sive  
Consilia Evangelica, & expende quid singula velint.  
Reflecte item te, an & quomodo præcepta Evan-  
gelica hæcenus observaveris? & quomodo in po-  
sterum ea sis observaturus? Reflecte etiam te, quid  
animi habeas ad sequenda Christi consilia? In  
quocunq; demum statu vitæ vivis, vel victurus es,  
aliqua saltem Consilia Christi à te observari con-  
venit, non est securum negligere omnia, timenda  
est illa Divina comminatio Prover. 1. *Depexisti  
omne Consilium meum. ego quoq; in interitu tuo ri-  
debo.*

*Fac proposita, convenientes elice affectus.*

PUNCTUM III. Audi illa S. Gregorii Ma-  
gni verba: *Omnis Christi actio, nostra est institutio.* Et  
verba hæc applica exemplis & actionibus Christi  
quas fecit ab initio prædicationis Evangelii, ad tu-  
am usq; Passionem. Percurre aliquas &, ex illis  
disces plurima.

Et imprimis Considera Baptismum Christi,  
Per hujus susceptionem docet nos, humilitate, con-  
ciliandos esse hominum affectus, quò facilius ad  
DEUM trahi & converti possint, siquidem ipse  
Christus, humilitate, quia humili susceptione Bap-  
tismi Joannis, conciliavit sibi animos Discipulorum  
ejusdem, ut eum sequerentur. Docet item, quan-  
tum alijs etiam, ijs qui te inferiores sunt, de-  
ferre debeas, neminemq; contemnere, cum ipse  
Joanni, se inferiori, tantum detulerit, ut voluerit ab  
eo baptizari. Docet præterea, quod aliorum acta,  
labores, pro gloria DEI susceptos, laudare; appro-  
bare, & pretium ipsorum apud alios facere con-  
veniat, cum ipse Christus, Baptismum Joannis, sua  
illius susceptione approbaverit. Docet tandem  
debere

debere te frequentare baptismum pœnitentiæ, quem Christus non est dedignatus suscipere. Per baptismum hunc, tu intellige Sacramentum pœnitentiæ, actusq; & statum pœnitentiæ.

*Considera 2dò* Victoriâ ex superatis tentationibus à Christo reportatâ. Tentavit Christum dæmon triplici tentatione in deserto. Inprimis tentavit illum gulâ. *Dic ut lapides isti panes fiant*, Deinde tentavit eum elatione, & præsumptione, volendo ut Christus DEUM tentaret, ex pinnaculo templi se deorsum mittendo, tandem tentavit illum idololatriâ & quadam aiosia à DEO. Omnia regna mundi & eorum gloriam Christo ostendendo & offerendo. *Hæc omnia dabo tibi si cadens adoraveris me*. Omnes has tentationes Christus fortissimè superavit, superavit verò per actus oppositos. Gulam vincendo gustu in rebus spiritualibus, & in verbo DEI, Præsumptionem in DEO tentando, vicit per illa verba: *non tentabis Dominum DEUM tuum*. Avaritiam & idololatriam superavit adoratione veri DEI. *Dominum DEUM tuum adorabis*. Idq; hæc superavit, tela tentatoris retundendo armis ex Scriptura desumptis, dæmonem contemnendo, à se abigendo, nullasq; disceptationes cum eo habere volendo. Ex quo exemplo discēs fortitudinem in superandis tentationibus, constantiam in resistendo eisdem, quantumvis frequentes, continuæ, & molestæ fuerint, discēs modum, quo superare debeas.

*Considera 3tò* Orationem Christi, quantum gustum Christus in ea habuerit, ad eam sæpius se subtrahebat, & in ea pernoctabat. Qualiter item Christus in ea se gesserit, procidebat in faciem suam. Patri æterno ad omnia se offerebat, tædia si quæ patiebatur, invictò animò tolerabat, & orandi assiduitate vincebat. In otatione conformitati  
cuius



cum divina voluntate fludebat. Disce à Christo hunc orandi modum & has orationis virtutes ac perfectiones.

*Considera 4to* Conversationem, & modum agendi Christi cum Discipulis suis. fuit omnibus amabilis, fuit suavissimus, exhilarabat omnes suo conspectu tanti suos aestimabat, ut eos non diceret servos, sed amicos. Tanta inter illos vivebat humilitate, ut inter eos esset, quasi qui ministrat. Ita fovebat eorum ad se fiduciam & amorem, ut Joannes supra pectus ejus recubuerit; sua Doctrinâ ita animos Discipulorum devicerat, ut ab eo avelli non possent.

*Considera 5to* Labores Apostolicos Christi, & modum agendi cum his, quorum salutem quaerebat. Et disce indefatigabilitatem in laboribus, disce Misericordiam & commiserationem supra pauperes, quandoquidem Christus miseretur super turbas. Disce occasione tuorum laborum non exigere propria comoda, non exigere respectus, favores aliorum, singularitates, cum Christus in suis maximis laboribus tanta incommoda passus sit, ut non haberet ubi caput reclinaret. Disce contemptum honorum, plausuum; siquidem Christus fugit, cum eum vellent facere Regem, siquidem tot & tanta patrando miracula, prohibuit hæc propalari, in Patrem æternum omnia hæc referre solitus. Disce unicam in omnibus sectari Gloriam DEI, ut DEUS clarificetur, cum Christus id semper intenderit & à Patre petierit; clarifica nomen tuum. Disce æquô animô tolerare invidias, contumelias, sinistras operum tuorum interpretationes, extenuationem eorum, quæ bene agis pro gloria DEI. Disce libertatem spiritûs nullis respectibus superabilem.

Reflecte te quàm procul sis ab exemplis Ducis tui, Corrige in posterum quæ corrigenda adverteris

teris, fac proposita, elice affectus.

In Colloquio pete à Christo, ut te in locum Judæ suscipiat, & suā doctrinā, ac exemplis efformet ex te vas electionis portans nomen suum coram gentibus.

*In fine. Anima Christi, Pater noster.*

## DIEI VII.

### Meditatio I.

### De Imitatione Christi Patientis.

*Preludium I.* Imaginare Christum patientem, & in sua passione non solum Patientiæ, sed etiam & aliarum virtutum exempla dantem, ad eaque sequendā te invitantem.

*Preludium II.* Pete à Christo gratiam, ut hæc exempla quā perfectissimè imitari possis.

PUNCTUM I. Audi illa verba Christi Joan: 13. *Exemplum dedi vobis, ut quemadmodum ego feci ita & vos faciatis.* Et considera in Passione Christi plurima virtutum ejus elucere exempla, secundum quæ efformari debent discipuli & milites ejus. Iterum decurre præcipua Passionis hujus mysteria, ac in ijs vide multiplicia virtutum Christi exempla, quæ imiteris.

Et imprimis considera orationem Christi in horto. Ante orationem Christus patitur tædia, pavores, tristitias, ut te doceat contra tædia, tristitas &c: Orationem esse præsentissimum remedium, ut scias in oratione non debere te promittere tibi consolationes, cælestisq; suavitatis abundantiam, sed potius te experturum ariditates & desolationes, neq; tamen ob hanc causam ab oratione de

sistendum esse. Orat Christus ante passionem suam, ut scias, nullum negotium, præcipue arduum, & difficile, sensibus & sensualitati repugnans, debere te aggredi, absq; prævia oratione. Maxima & optima præparatio ad omnes labores, ad quævis ardua pro DEI gloriâ agenda & patienda, est oratio. In hac vires & robur est quærendum, ut quascunque difficultates & molestias superare valeas. Orat Christus, & Pater æternus calicem passionis ipsi propinat, ut discas hunc maximum fructum orationis tuæ esse debere, si DEUS tibi suum calicem propinet, hoc est si te faciat: aliquid pro nomine suo pati. Ut discas non alias in oratione quærendas tibi esse consolationes, nisi gustum calicis Christi, eò omnes tuæ debent collimare intentiones, ut calicem salutaris de manu Domini suscipias, hoc est, ut æquò animò feras quascunque cruces, flagella, amaritudines, confusiones, contemptus, persecutiones, quas immittet manus Domini. Orat Christus, & ab Angelo de cælo confortatur, ut dicas non esse tibi sperandum, quòd sis ab Angelo de cælo confortandus, ut tædia, mærores, tristitias & tentationes quascunq; forti animò ferre & superare possis, nisi prius ad orationem recurreris, Angelus etiam Christum non confortat nisi orantem. Orat, & prolixiùs orat, ut tibi longior oratio & meditatio sapiat. Prolixius orans Christus factus est in agonia; oratio enim constans fortem te facit, facit luctatorem in agone decertantem, facit ut mundo & carnì moriâris, soli autem DEO vivas. Hinc etiam discas, orandum tibi esse ad defectionem virium, ad deliquia, ad agonem. Orans Christus sudore sanguineo perfunditur, ut dicas orationis beneficio te obtinere, ut tentationibus tuis usq; ad sanguinem resistas, ut in laborando pro gloria DEI nullis sudoribus parcas.

*Confidera 2dò* Proditionem Chrifli à Juda. Proditur Chriflus orbis Magifter, à Juda difcipulo. O quanta ingratitude ? proditur ofculò, ad quò imò ad arctiffimum amplexum Chriflus Judam admittit, ejus fecleris confcius. O quantus in Chrifto inimicorum amor ? Proditur poft abjectionem Chrifli ad pe les proditoris in cœnaculo factam. O quanta Judæ obftinatio ? Proditur a Juda, qui in hoc impio propofito, fanctiffimum Corpus Chrifli, in Sacramento Euchariftiæ tunc primùm inftituito, fufceperat. O facrilegium ? proditur, poft Chriflum leviffimò pretiò venditum. O depretiatio ? proditur in fenfiffimis Chrifli hoftibus, nimirum, Sacerdotum Principibus, eorum miniftris, & immaniffimis liكتورibus. O crudelitas ? Ex hac Judæ proditione difce, debere te præparare ad omnes ingrattitudines, laborum tuorum circa proximos non aliam tibi pollicearis mercedẽ, nifi ingrattitudinem. Difce inimicos tuos affectu & amore fpeciali complecti, nec aliter injuriam vindicare, nifi amoris contellatione, & obsequiorum ac etiam beneficiorum exhibitione. Difce humilitate devinciendos effe peccatores, ut eos DEO lucreris, etiam tunc dum nulla cujufquam fructus fpec af fulget. Difce quo deducant facrilegia : facrilega illa in cœnaculo fufceptio facratiffimi Chrifli Corporis, Judam ad tantam deduxit malitiam, ut Chriflum in mortem proderet ac deinde, ex defperatione, laqueò vitam finiret. Difce ulterius, ut Chrifli pretium quam maximum habeas, ne Chriflum pro re levi, pro parvo emolumento, pro momentanea voluptate, & fenfualitate vendas. Tandem ex eadem proditione difce, non debere te Chrifto effe meliorem, Chriflus maximis fuis hoftibus tradi voluit, & tu ubiq; hoftes habiturum te noveris, fi Chrifli volueris effe miles & Difcipulus.

Fac reflexiones, affectus, & propofita materiæ accomodata.

PUN

**PUNCTUM II.** In alijs adhuc myſterijs Chriſti Paſſionis, exempla virtutum, à tuo Duce & Magiſtro tibi, data intueri.

Et imprimis conſidera flagellationem Chriſti. Flagellatur Chriſtus, virgis, ſpinis, catenis, unguibus, ut memineris te ad multa flagella præparari debere, multa ſiquidem ſunt flagella peccatoris. Flagellatur Chriſtus immaniſſimè, ut tu patienter feras flagella paternæ manus. Flagellatur filius DEI, ne tibi grave videatur, ſi tu flagelleris filius iræ & ſervus peccati: Flagellatur ad columnam alligatus, ut & te tua columna, hoc eſt voluntas & beneplacitum DEI, cui te alligare debes, teneat, dum te DEUS permittet graviffima pati & ſuſtinere flagella. Ante flagella denudatur, ut & tu tuorum defectuum denudationes æquò animò feras, imò ipſe vulnera tua medico ſpiritali, hoc eſt Confeſſario & conſcientiæ tuæ directori, forti & gnoſcò animò detegas. Flagellatur Chriſtus innocens, nè tu tot criminu reus, ſine flagellis eſſe velis, ne tibi in ulteriori vita, poenitentiae tuorumq; peccatorum poenae, in hac vita perferendae, ſint graves, flagellatur toto corpore, ut & tu mortificatione ejus toto corpore circūferas.

*Conſidera 2dò.* Coronationem Chriſti coronâ ſpineâ. Chriſtus poſtquam contempſit coronam regalem, coronatur coronâ ſpineâ. ut cum S. Catharina Senenſi diſcas coronæ aureæ in hac vita præeligere ſpineam. Coronatur ſpinis caput tuum Chriſtus, ne tu ſub ſpiñoſo capite, ſis membrum delicatum. Caput ſapientiæ æternæ ſpinas recipit in coronam, ne tu laurus appetas, & tuorum talentorum, ingenij, eruditionis, doct.inæ, eloquentiæ, activitatis pretia & æſtimationem, ne cum licentioſis juvenibus corones caput tuum roſis. Chriſtus ſepit aures ſuas ſpinis, ut & tu ſepias aures tuas adverſus omnes mundi, carnis & dæmonis ſuggeſtiones, & ad omnes tentationes obſurdeſcas.

Pro-

Profundè penetrent caput Christi spinæ, ut ex tuo capite expungant omnes vanitates, cogitationes terrenas, sensuales, mundanas. Coronatur Christus in Regem dolorum, ne tu sis voluptatum, sensualitatum, tuorumq; commodorum mancipium.

*Considera 3tio.* Crucis bajulationem, fert crucem Christus, ut scias te, nisi crucem tuleris, Christi militem & discipulum esse non posse. Hæc sunt arma, quibus DEI & tuos hostes debellare te oportet. Timet crucem diabolus, sed maximè illam, quam Christum sequentes deferimus. Fert crucem Christus gravissimam, ut discas nulli cruci, etiamsi ei ferendæ te imparem judicares, si tibi à Divina manu & voluntate imponatur, humeros tuos te subducere debere. Faciet DEUS cum tentatione proventum, addet robur & vires, ut quantumvis crux gravis fuerit, illam ferre & sustinere valeas. Fert crucem Christus, ad quam secum ferendam angariari debuit Cyrenæus de villa. Tu tecum dispice, an & tu ad crucem Christi ferendam, hoc est : ad ferendas confusiones, contemptus, afflictiones, & persecutiones angariari & compelli non debeas. Si tibi crux Christi, si labores pro Christo, tua incommoda, mortificationes, & poenitentiae ad vindicanda peccata susceptæ, graves sunt, si ab his abhorres, tanquam à furca & ligno maledictò, si ad hæc compelli debeas, si hæc ex necessitate quadam, quòd hæc evitare non possis, non verò ex amore crucis Christi, & ex gultu in ipsa cruce, sustinere consuevisti, Cyrenæus es, idque Cyrenæus de villa, hoc est, villani, abjecti, & vilis animi. Vilis enim & abjecti animi est crucem Christi fugere, & ad eam ferendā necessitate cōpelli.

Reflecte te supra vitam tuam, supra flagella, spinas, & bajulationem crucis tibi impositæ, quò animò hæc pertuleris hactenus ? & cogita quomodo tibi hæc deinceps exemplò Christi perferenda ?

Fac



Fac proposita elice affectus gratitudinis, compassionis, confusionis, doloris, aliosque similes.

PUNCTUM III. Audi illa verba Exodi. 25. *Inspice, & fac secundum exemplar, quod tibi in monte monstratum est.* Et considera in monte Calvariae propositum tibi esse exemplar, cui præcipuò studiò te cõnformare debes. Tale exemplar est ipse Christus cruci pro tuâ salute affixus.

Ex Cruce tanquam ex Cathedra (Cruce siquidem secundum S. Augustinum, facta est Cathedra Magistri docentis) docet te Christus, docet suos milites & discipulos, quid agere, quid in Duce suò imitari debeant, idque ita docet exemplò, ut doceat simul & verbò, imò non unò verbò, sed septem verbis, de Cruce prolatis docet, magnamque nobis conatur persvadere perfectionem.

Orando pro crucifixoribus: *Domine dimitte illis, quia nesciunt, quid faciunt*, docet nos amorem inimicorum nostrorum, docet orandum esse pro persecutoribus nostris, ostendit quales imprecationes nostræ esse debeant.

Per Verbum: *DEUS DEUS meus ut quid dereliquisti me.* docet in afflictionibus doloribus, morbis ad Orationem confugiendum esse, postulanda tunc vel maximè Divinæ gratiæ auxilia, ne nos tunc DEUS derelinquat, ne auxiliante suâ gratiâ destituat.

Per verbum: *sitio* docet, ut sitiamus Justitiam, ut sitiamus majora & majora semper pro gloria DEI pati, ut desideremus saturari opprobrijs, confusionibus, ut sitiamus perfectionem & salutem sive nostram, sive proximorum nostrorum.

Per Verba ad Latronem dicta: *Hodie mecum eris in Paradiso*, docet nos, de salute nostra, post quantacunque peccata à nobis commissa, non desperandum esse, si in toto corde ad DEUM convertamur, docet in nostris afflictionibus & doloribus,

spe æternæ retributionis & gloriæ animum erigendum esse, illudque quàm maximè à nobis curari debere, ut in supremo vitæ nostræ momento audiamus à Christo *Hodie mecum eris in Paradiso*:

Per Verba: *Ecce Mater tua, Ecce Filius tuus* securos nos reddit, de materno Sanctissimæ Dei Parentis in nos affectu, docet etiam, quanto amore debeamus in eandem ferri? non alio scilicet, nisi affectu filiali tanquam in Matrem nostram. Docet, in maximis nostris afflictionibus, angustijs tribulationibus, dum videmur à Deo derelinqui, ad hanc Matrem recurrendum esse, docet curandum nobis esse, ut tantæ Matris filij esse mereamur, ut filialem ipsi tellemur affectum, fiduciam, & reverentiam.

Per illa verba: *In manus tuas commendo Spiritum meum*, docet enitendum nobis esse, ut per hanc vitam, quâ in corpore mortali vivimus, spiritus noster sit semper in manibus Dei, sit inquam per gratiam ejus sanctificantem, ne quando per peccatum ex his manibus infelicitè elabamur; magis tamen curandum esse, & spiritum nostrum manibus Divinis ferventiùs commendandum, in afflictionibus, doloribus & tentationibus nostris, atque in cruce, dum hanc patimur. Maximo autem studiò allaborandum esse, ut dum spiritus noster per mortem à corpore dividetur, non in alias manus deveniat, sed à manibus Divinis suscipiatur, & in eis tota æternitate quiescat.

Tandem per verbum, *Consummatum est*, docet Christus, consummanda esse omnia, consummanda esse ea, quæ propter Deum, Justitiam, patimur, suumque finem acceptura. Docet, sicut passionis Christi consummatio præcessisse debuit, ut redimeremur, ita ut salvemur, nostrorum bonorum operum consummationem necessariam esse, nec opera nostra bona aliter nobis profutura, nisi in  
quantum

quantum consummata fuerint, hoc est, si in ipsis ad mortem perseveraverimus.

Ex eadem Crucis cathedra docet Christus exemplum milites & discipulos suos, & eosdem in præcipuis virtutibus instituit, ita ut verè dicatur, exemplar in monte nobis monstratum esse, quod nos inspicere & imitari oportet. Affigitur Cruci Christus, ut discas etiam te Cruci Christi configi debere. Vita Christiana secundum præcepta & consilia Christi instituta, è mente S. Augustini *Crux est & Martyrium*, huic Cruci si Christianus es, affigi debes. Tribus clavis Christus suæ Cruci affixus est. Tu quoque affigi debes tribus clavis, affigi debes Fide, Spe, & Charitate, affigi debes taliter, ut unò clavò tecum simul affigatur Cruci Christi concupiscentia carnis, seu tua caro, præcipuus animæ tuæ hostis, alterò clavò ut affigatur concupiscentia oculorum, seu mundus, alter animæ hostis, tertiò clavò ut cruci affigatur superbia vitæ, seu diabolus. Porro Christi & tuæ Cruci affiges concupiscentiam carnis, si renuntiaveris carnis voluptatibus, saltem illicitis, sensualitatibus immoderatis, nimio commodorum appetitui, affiges Cruci concupiscentiam oculorum seu mundum, si inordinatum affectum ad divitias & rerum omnium affluentiam exueris, affiges Cruci superbiam vitæ, contemnendo propter Christum honores, æstimationem, apud homines, favores & respectus, omnesque vanitates. Tres clavi affigentes Cruci carnem mundum & diabolum, debent esse, mortificatio carnis, Paupertas Spiritus, humilitas.

CHRISTUS in sua Cruce ita constanter persistit, in eaque mortuus est, ut nullis irrisionibus, contumelijs opprobrijs, nullis promissionibus induci potuerit, ut de Cruce descenderet. Disce exemplum Magistri tui & tibi in cruce fortiter permanendum esse, nec unquam de cruce descendendum. Proponi

fitæ tuæ, quæ statuisti, ita tibi exequenda sunt, ita in eorum executione persistendum, & perseverandum est, ut nullis virtutis tuæ irrisoribus, nullis persuasionibus, à benè cæptis retraharis, ut in vita Christiana, præceptis & consilijs conformi tanquam in Cruce, cui te affixisti, superatis quibuscumque tentationibus, ad mortem usque perseveres.

In Colloquio statue ante oculos tuos Christum durissimæ Crucis, amore tui affixum, sanguinè ex sacris vulneribus ac toto corpore copiosissimè profluentem: Intuere invictâ patientiâ sustinentem crudelissimæ mortis suppliciū & inclinato capite morientem. Audi etiam de cruce clamantem & te alloquentem. Vide homo quæ pro te patior, ad te clamo qui pro te morior. Eique supplica humillimè ut tali & tam dolentî spectaculo movearis ad detestanda & deslenda peccata tua, ad illum ipsum propter te cruci affixum, toto cordis affectu amandum; ut etiam Doctrina sapientissimi hujus Magistri, ex Crucis cathedra tibi tradita, cordi tuo altè infixæ hæreat. eamque exequi studeas, tandem ut patientiæ, aliarumque virtutum Christi, patientis & morientis exempla, quàm perfectissime imiteris & cum ipso in Cruce ad mortem usque perseveres.

*In fine, Anima Christi.*

## Meditatio II.

### De Resurrectione & Ascensione Christi ac de Spiritû S. missionem.

*Praludium* ¶ Imaginare quod spectes gloriam Christi resurgentis, in cælum ascendentis atque in dextera Patris sedentis, & Spiritum S. imittentis in discipulos

*Praludi-*

*Praludium 2.* Postula gratiam ut ex hac Christi gloria & Spiritus S. missione, derives aliquid in bonum animæ tuæ.

PUNCTUM I. Audi illa verba Pauli Apostoli ad Roman. 6. *Quomodo Christus surrexit à mortuis per gloriam Patris, ita & nos in novitate vitæ ambulemus.* Et considera Resurrectionem Christi, ejusque modum debere esse exemplar & ideam novitatis vitæ, in qua omnes quidē Christiani, sed maxime illi qui exercitia S. Patris Ignatii peragunt, & ex ipsis sunt prodituri, ambulare debent. Quod ut melius assequaris, expende proprietates & circumstantias Resurrectionis Christi, ex his enim cognitis, intelliges, qualis vitæ tuæ novitas esse debeat, & quomodo in hac tibi sit ambulandum?

Et *Inprimis* Noveris Resurrectionem Christi fuisse veram, juxta illud: *Surrexit Dominus verè*, non fuisse verò resurrectionem phantasticam, simulatam, & apparentem, non fuisse talem, qualis existimatur fuisse resurrectio Samuelis, dum hic in gratiam Regis Saul à Pythonissa fuit suscitatus.

Unde colliges etiam novitatem vitæ tuæ non debere esse fictam, apparentem, & simulatam, sed debere te ambulare in novitate vera, hoc est conjuncta cum vera mutatione morum & actionum tuarum.

2.<sup>da</sup> Resurrectio Christi à mortuis fuit perfecta & stabilis, hoc est talis, ut Christus post illam amplius non moreretur, qualis futura est resurrectio omnium Beatorum pro die Judicii, qui tunc ita resurgent, ut amplius non sint morituri. Non fuisse verò Resurrectionem Christi similem resurrectioni Lazari, aut alicujus alterius à Christo vel quopiam Sancto resuscitati, siquidem hi iterum mortui sunt, de Christo autem canit Ecclesia. *Christus resurgens à mortuis, jam non moritur, mors illi ultra non dominabitur.* In tali & tu ambula novi-

tate scilicet in novitate perfecta, in novitate stabili & immutabili, ut stabiliter Christo adhæreas, præcepta & consilia ejus sequaris, ejus vestibus & insignibus induaris, ut ea, quæ tibi in his exercitijs **DEUS** inspiravit, sanctè exequaris, & constanter in ijs exequendis perseveres, ut gratiæ tibi datæ & dandæ fortitudo in vincendis tentationibus, & debellandis animæ tuæ hostibus sit perpetua, indefectibilis, & nullâ unquam vetustate corrumpenda.

3<sup>ti</sup>o Christus surrexit cum quatuor dotibus gloriosi sui corporis, scilicet cum claritate, subtilitate, seu penetrabilitate, agilitate & impassibilitate. Si miles dotes requirit vitæ tuæ novitas, in qua ambulare debes, requirit claritatem exclusivam profunditatis & obscuritatis animi, hoc est talem claritatem, ex vi cujus tua conscientia & interior animæ tuæ status confessario, Conscientiæ tuæ directori, ac etiam Superiori si quem nactus es, vel nactus fueris, clarissimè pateat. Requirit item eadem novitas vitæ tuæ subtilitatem & penetrabilitatem. Ratione talis dotis, Christus habuit, ut nullum corpus illi obsisteret, nihilque impediret, quominus de loco quocunque in alium quò vellet, se transferret, omniaque ipsi pervia essent. Et tu ex his exercitijs subtilitatem & penetrabilitatem efferre debes, ut caro spiritui rebellis, sensualitas tua, affectus terreni, in **DEI** servitio & continuò in virtute progressu, te non impediant, ut nullæ difficultates obsistant, nihilque sit quod te in via salutis & perfectionis retardet, sed omnia tuæ fortitudini & magnanimitati sint pervia. Ulterius resurrectio Christi habuit dotem agilitatis ex vi cujus, Christus velocissimè ex uno loco in alium quantumcunque distantem transire potuit. Similem agilitatem debet habere novitas vitæ tuæ, ut in te nullus reperiatur torpor, ut tepiditas & acedia locum non habeat, sed ut ambules in fervore spiritus ut sis promptus



ptus ad omnia, ad quæ te **DEUS** suis inspirationibus & motionibus vocat, & Spiritûs Sancti impellit gratia. Tandem Christi resurgentis Corpus Sanctissimum, habuit dotem impassibilitatis, quod nullis vulneribus, doloribus, injurijs, nulli corruptioni esset obnoxium. Similem impassibilitatem novitas vitæ tuæ habere debet, ut virtus & perfectio tua, nullâ re lædi, & ne in minimo quidem offendi imminui aut corrumpi possit, ut illi nihil prorsus noceat non noceant prava aliorû exēpla, non occasiones non conversationes nocumentum quodpiâ afferant non linguæ malevolorum, non crises, & censurationes, non ulli respectus humani.

4<sup>to</sup> Christus postquam surrexit à mortuis Materis suæ Sanctissimæ inprimis apparuit, visendum etiam se præbuit Petro & Magdalenæ pœnitentibus, Discipulos ad sepulchrum currentes de resurrectione suâ edocuit, laborantibus adfuit, spiritualia colloquentibus, comitem se adjunxit.

In tali novitate & tibi est ambulandum, ut sæpius ante Beatissimam Virginem compareas, affectum ad eam filialem induas, vitæque tuæ emendatione eam solari & ipsi placere velis. Ut laxiorum & dissolutorum familiaritatem & conversationem fugias, illis verò te communices quos verè emendatos & pœnitentes, atque cum **DEO** conjunctos conspicias. Ut laboriosis, in via virtutis currentibus, & charitatem atque animorum unionem amantibus, te familiarem reddas. Tandem ut ijs qui spiritualia tractant, & colloquuntur de rebus Divinis, socium te libenter adjungas, ac eorum conversatione delecteris.

5<sup>to</sup> denique Christus resurgit à mortuis, cum 5. vulnere suorum sacris stigmatibus seu clavorum & lanceæ signis, ac vestigijs in corpore suo glorioso relictis. Per quod docemur, novitatem vitæ nostræ non futuram similem & conformem resurrectioni

rectioni Christi, nisi stigmata Domini nostri Iesu Christi in corpore nostro portaverimus. Stigmata Christi in nobis expressa, hoc est continua & in rebus omnibus quæsita corporis mortificatio, probat quod in vitæ novitate ambulemus.

Ille in novitate vitæ conformi resurrectioni Christi ambulat, cujus manus, dura & aspera, ac labores pro gloria DEI graviores non refugiunt, & per hoc ipsum ostendunt se esse perforatas, ac signatas cicatricibus. Cujus pedes vulnerati declarant, quod via virtutis, spinis ac vepribus horrente incedant. Cujus latus apertum, clamat se esse crucentam amoris sedem.

His consideratis reflecte te, qualis vitæ tuæ novitas sit futura abhinc, & cum qua novitate ex his collectionibus es prodirurus; certè cum novitate vitæ est tibi hinc prodeundum. Christus surrexit, ut suam virtutem Divinam ostenderet juxta promissionem illam; *Solvite templum hoc & in triduo rædificabo illud*, pariter vitæ tuæ novitas ostendet, an virtute Divinâ gratiæ ipsius in te sit reædificatum templum Spiritûs S? quod per tuam licentiosam legibusque Divinis difformem vitam destructum fuerat.

De Christo dicit Apostolus Paulus: Si Christus non surrexit, inanis est prædicatio. Nisi & tu in novitate vitæ ex his collectionibus prodieris, vana est S. Patris mei Ignatij per hæc exertia prædicatio, inanis labor gratiæ Divinæ. Ut Christus resurgeret, inter alia, etiam hoc incentivum & motivum fuit, ut expleret vota & satisfaceret expectationi Matris suæ Sanctissimæ, & sua resurrectione afferret eidem solatium, ut item satisfaceret expectationi Apostolorum, aliorumque Discipulorum, & omnium Credentium. Pariter & tuam Resurrectionem & vitæ novitatem expectat MATER DEI Beatissima, expectat S. Angelus Custos, SS. Patroni tui, expectat tota Curia cœlestis,

stis, ex seria & constanti tua ad DEUM conversione  
& vitæ in melius reformatione, gaudium & solatium acceptura.

Excita te ad hanc vitæ novitatem, in eaque te abhinc ambulaturū, forti & invictō animo statue, atque à Christo Resurgente postula, ut virtute suæ Resurrectionis faciat te in novitate vitæ ambulare.

PUNCTUM II. Audi Verba Deuterōn. 32.  
*sicut aquila provocans ad volandum pullos suos & super eos volitans, expandit alas suas.* Et cogita Christum in gloriosa sua Ascensione. esse veluti aquilam magnarum alarum. Aquila hæc expandit alas, quatenus ascendit in Cælum elevatis manibus. Volitat autem super pullos suos, quia spectantibus, Apostolis & discipulis levatur in Cælum. Eadem aquila provocat ad volandum, dum corda nostra secum in cælum trahit, & tuo exemplo docet, ut ascendamus, & quomodo ascendere debeamus. Immorare paulisper contemplationi Ascensionis Christi &.

Considera ulterius imò Christum in cælum ascendere corpore, ut tu ascendas corde, prout Christianos omnes adhortatur. Augustinus. *Ascendamus cum Christo interim corde: cum dies ejus promissus advenerit, sequemur & corpore.* Porro ascendes corde in cælum, si ascensiones disposueris in corde tuo, quas ipsas dispones, continuo in virtute & perfectione crescendo, eundo de virtute in virtutem. Dispones, ascensiones in corde, si per Meditationem æternorum & Cœlestium, cor tuum illuc ascendit, quod in cor hominis non ascendit. Disponimus ascensiones in corde si ibi nostra fixa sunt corda, ubi vera sunt gaudia. Ascendis corde in cælum per frequentes mentis ad DEUM elevationes. Quas ipsas ascensiones etiam nunc dispone, statuendo frequentem talium elevationum usum.

per usurpatas orationes ejaculatorias, frequentes intentionis renovationes, & per sæpius elicitos breves actus amoris DEI, Fidei, Spei, contritionis, desiderij videndi DEUM aliosque similes. Ascendis corde; si ex occurſu cujuscunque creaturæ accipis occasionem, DEUM Creatorē laudandi, glorificandi, & super omnia amandi. Tandem accendis corde, dum non adhæres affectu ad res terrenas & sensuales, sed hunc à terra omnino avellis & abstrahis ut liberius amore tuo & mente in DEUM ferri possis.

*Confidera 2dò* Quòd Christus ascenderit in cælū, impressis & relictis in monte, ex quo ascendit, velligijs pedum suorum, ut scias velligijs Ducis tui, per illius perfectam imitationem insistendum esse. Vestigia hæc ostendunt viam, qua ad astra eundum est, quā nisi iveris, cum Christo nunquam ascendes. Porro vestigia à Christo relicta, sunt via Crucis, via Mortificationis, hanc enim Christus in cælū ivit, hanc tibi Christus reliquit, ut sequaris vestigia ejus.

*Confidera 3rò* Christum in cælos ascendisse elevatis manibus, unde discas ascendere cum Christo non posse eos, quorum manus sunt remissæ, & languentes, verum manus ejus, qui vult cum Christo ascendere, elevatas esse debere, hoc est ferventes in opere, & omnia instanter agentes. Manus ascendentis in cælum non debent ad terram demitti, non debent extendi ad iniquitatem, sed debent elevari per sublimes intentiones, per actus meritorios intensos, heroicos, ea operando quæ Angelorum ministerio ante DEI conspectum deferri, Deoque præsentari possunt. Ascendit Christus elevatis manibus, quia in illis cicatrices ferebat, quas Patri æterno præsentaret. Quia in manibus ferebat thesaurum meritorum suorum. Tu etiam si cælum ascendere desideras, vacuis manibus ne compareas, debes multa aggregare, quæ in tuis manibus & manipulis feras. Ad Cælum ascendentes veniunt

unt cum exultatione portantes manipulos suos.

*Considera 4to* Christus ascendit, nube illum suscipiente ab oculis Discipulorum, per quod docet, ut & tu ascendas, necessarium esse, ut nubes illa Sanctissima, quæ nobis in carne humana, velatum DEUM depluit, hoc est Beatisima DEI Parens, te fulcipiat, & materno complectatur affectu, suæque intercessionem in cælum attollat. Docet etiam tunc te cum Christo ascensurum, si latueris, & latere volueris, si gloriam mundi contempneris, si multa tua bona opera & mortificationes latere volueris.

*Considera 5to.* Christus ascendit videntibus Discipulis & in cælum euntibus intuentibus, ne tu tibi frustra blandiaris, de tuo in cælum & ad magnam perfectionem ascensu, si non ascendas videntibus alijs, hoc est si tua virtus non emicat exterius, si bono exemplò non præluces alijs. Necessarium quidem est, ut multa tua bona opera sint nube tecta, ut sint in abscondito, qualiter tectæ esse debent mortificationes, & plura opera tua bona, tuæ libertati plenè relicta, cæterum simul est necessarium, ut illa opera, quæ sunt præcepta, & ad quæ, aliquâ ratione multis communi, obligaris, videantur ab alijs, fiantque illis videntibus. Ascendit Christus in cælum videntibus discipulis, non est enim difficile ascendere in cælum, inter homines spirituales cælestia meditantibus, DEUM & cælum intuentes. At inter eos, quorum oculi sunt in finibus terræ, inter homines vanitatem, commoda sensuاليا spectantes & sectantes, inter eos qui terrena sapiunt, qui terræ & carni immersi sunt, ascensus in cælum est difficilis, & vix non impossibilis juxta illud *Cum Sancto Sanctus eris, cum perverso perverteris.*

*Considera 6to* Ascendit Christus loquens de Regno DEI. Loquentes enim vana, secularia, terrena &c. non ascendent. Hoc est indicium, quod quis cum Christo ascendat in cælum per communiones

niones Sacras, usum Sacramentorum, pia opera, Examina conscientiae, meditationes rerum caelestium, si in confessionibus libenter audiat & loquatur de Regno DEI, de rebus Divinis, de rebus ad salutem spectantibus.

*Considera 7mò* Christus ascendens captivam duxit captivitatem. Etiam tu, ut cum Christo ascendas, per frequentes actus fidei, captiva intellectum tuum in obsequium fidei, ut ascendas per actus aliarum virtutum, per observationem praeceptorum DEI, & quarumcunq; legum, captiva voluntatem, intellectum, potentias, & sensus omnes, in obsequium legis & voluntatis Divinae. Si voluntas tua, sensus, passiones, & quaecunq; potentiae aliae gemunt in captivitate daemonis, educ eas ex hac captivitate. Educ hos captivos è domo carceris, ita enim fiet ut ascendens captivam ducas captivitatem.

*Considera 8vò*, Christus ascendens ita ascendit, ut ipse sit qui & descendit in inferiores partes terrae, ut loquitur Apostolus. Et tunc maxime te ascensurum noveris, si te humiliaveris, si per demissionem & vilem tui aestimationem descenderis infra omnes. Tunc ascendes in caelum; dum descendes in inferiores partes terrae, hoc est in sepulchrum, & infernum, per fructuosam mortis & poenarum inferni considerationem.

Tandem eodem Apostolo attestante : *Christus ascendit, ut impleat omnia*: Ad ascensum enim requiritur, ut quis impleat omnia, quae in lege sunt, ut nullus apex de lege praetereat, ut impleat omnem Justitiam, qui haec non implet, is descendit, non ascendit.

Reflece te supra ascensus tuos, reflece te supra vitam tuam praeteritam, ut desleas errata tua, & supra vitam futuram, ut scias quam ratione tibi cum Christo sit ascendendum.



Elice affectus materiæ servientes, tandem à Christo ascendente postula ut jubeat te suis vestigijs ad se ascendere, ut te in hoc ascensu potenti suâ gratiâ juvet, & cor tuum secum in cælum trahat.

PUNCTUM III. Audi Christum per Prophetam dicentem Ezech: 36. *Dabo vobis cor novum, & spiritum novum ponam in medio vestri.* Atq; hæc verba missioni Spiritûs S. in Apostolos accommoda, eaq; de tali missione intellige. Circa quam

Considera 1<sup>mo</sup> Spiritum S. etiam si sit coæternus Patri & Filio, ab ipsisq; ab æterno procedat, dici tamen Spiritum novum, tum ex eo quod venerit, cum tanta gratiæ, aliorumq; donorum plenitudine, cum qua nunquam ante venerit in veteri lege, tum ex eo quod Spiritus S. venerit in Apostolos cum nova lege Christi, cum lege gratiæ, per quam abolita est lex vetus, tum ex eo; quod Spiritu sancto adveniente, nova facta sint omnia, quod tunc maximè Spiritus S. orbi innotuerit. Quia item venit in forma insolita, venit in igne corda purificante, venit in lingvis igneis & dispersitis.

Considera 2<sup>do</sup> Cum descensu Spiritûs S. in Apostolos, datū esse iisdem cor novum. Ante adventum Spiritûs S. Apostoli propter metum erant in unum congregati, unius domus angustijs continebantur, pedem inde efferre non audebant: excordes erant & sine corde. Adveniente Spiritu Sancto datum est illis cor novum, quia datum est animi robur ad superandas quascunque difficultates, ad tolerandas persecutiones, ad respectus contemnendos, tormenta quævis sustinenda, & mortem pro Christo fortiter subeundam. Datum est illis cor novum, quia cor docile, Spiritus Sanctus docuit eos omnem veritatem, docuit omnia. Datum est illis cor novum, quia cor sanctum, virtuosum

cor amore DEI æstuans, ardens & flagrans zelo animarum, studio propagandi gloriam DEI, desiderio fundendi sanguinem pro Christo.

His consideratis reflecte te supra Exercitia spiritualia S. P. IGNATII quæ agis, & ex parte majore egisti. Tempus hoc, tempus illud fuit quod Christus daturus tibi erat spiritum novum. An hic spiritus in te descenderit, tecum dispice. Accepisti plenitudinem gratiarum, si merita cumulasti, si gratiam sanctificantem & alia dona habitualia auxisti, si gratias illustrantes & excitantes plures tibi contulit DEUS, si inspiravit proposita practica & efficacia, si ad hæc exequenda contulit robur & animum. Accepisti spiritum novum, si deinceps vives & animaberis spiritu novo, juxta legem gratiæ, juxta legem Christi, juxta legem quam Digitus Paternæ dexteræ Spiritus Sanctus, per inspirationem sanctorum luminum, propositorum, per electionem statûs, vel certè sanctioris vitæ, intra tuum statum, in tabulis cordis tui descripsit. Accepisti spiritum novum, si in igne, hoc est in fervore, in magnis ardoribus & Divini amoris incendijs descendit in te Spiritus Sanctus, si igne hoc, & lingua & cor tuum fuerint purgata.

Reflecte te deinde an acceperis cor novum, hoc est contra omnia adversa obduratum, nullis cedens difficultatibus, in viâ virtutis & perfectionis occurrentibus, an acceperis tantum animi robur, ut omnes pusillanimitates, vanos metus; humanos respectus superare valeas; An acceperis cor docile, an practicè cognoveris, quis finis sit tuæ creationis? quæ obligatio serviendi DEO, ipsum amandi, imitandi Christum, quis finis, quæ obligatio hominis Christiani? quæ necessitas vivendi Christianè?

An acceperis cor virtuosum? esse indutus virtute

tute ex alto ? An flagras amore DEI ? zelo propriæ perfectionis ? zelo salutis animarum ? desiderio promovendæ gloriæ DEI ? fundendi pro Christo sanguinis ?

*Fac* proposita & defectus toto hoc tempore commissos per ferventem exercitiorum decursum corrigere stude.

In colloquio invita ad cor tuum Spiritum Sanctum, & postula, ut cum gratis copiosissimis in te descendat, atq; cor novum in te creet, cor illius ipsius igne ardens & æstuans.

*In fine Veni Sancte Spiritus.*

### Meditatio III.

## De gloria Cælesti, & æterna Beatitudine.

*Praludium* 1. Imaginare S. Stephanum Protomartyrem, dum lapidaretur, contemplantem gloriam cælestem & in cælis apertis intuentem Dominum J E S U M stantem à dextris virtutis DEI, taliq; contemplatione animatum, mortem fortiter subijisse.

*Praludium* 2. dum Pete à DEO ut exemplò S. Protomartyris, ita contempleris gloriam Sanctorum, ut accendaris ad perferenda quævis adversa, & ad fortiter ac strenuè cum hoste animæ tuæ decertandum.

*PUNCTUM I.* Audi illa verba Psal: 86. *Gloriosa dicta sunt de te civitas DEI*, Audi item illam definitionem communem Beatitudinis: Beatitudo est status omnium bonorum agregatione perfectus. Et considera gloriam illam Beatorum, quam DEUS præparavit diligentibus se, tantam esse, ut quamvis non possit pro merito magni-  
tudo

tudo ejus explicari, juxta illud Apostoli : *Nec oculus vidit, nec auris audivit, nec in cor hominis ascendit, quae preparavit DEUS diligentibus se.* De illa nihilominus quidquid gloriosi est dicibile, non im merito dici debeat. Quodcumq; bonum verè ac propriè tale, nulli inhonestati, turpitudini, aut malitiæ permistum cogitari potest, illud in illa sanctorum beatitudine & gloria reperiri censendam est, si non in se formaliter, saltem in aliquo eminentiore & perfectiore. Quod ut melius assequaris,

Expende 1<sup>mo</sup> In illa beatitudine & gloria Sanctorum, nihil aliud futurum, nisi solum & purum bonum, hoc est nullam habens admistionem miseriae. Hic dum vivimus, versamur in valle lacrymarum. Ipsa gaudia & solatia, lacrymas ex oculis nostris eliciunt. In illa gloria, *Absterget DEUS omnem lacrymam ab oculis sanctorum.* In hac vita sumus inter continuas mortes, inter multa pericula, inter insidias, latrocinia. Continuo nobis luctandum est cum hostibus animae, ipsorum insultus ita nobis molesti sunt, ut tædeat nos pierumq; vivere; morbis continuo affligimur, egestatem patimur, in siti, famè; frigore, nuditate, totq; alijs miserijs vitam praesentem ducimus, gravibus obruimur laboribus, patimur pane in sudore vultus nostri, tot & tantis ærumnis incessanter concutimur. In patria illa caelesti neq; mors neq; luctus, neq; clamor neq; dolor erit ultra. Summa ibi securitas, pax perpetua, magna tranquillitas. Ibi thesauri indeficientes, ad quos fur non appropriat, & quos nec tinea nec rubigo corrumpit. Ibi ver perpetuum, requies opulenta. Ibi sancti requiescent à laboribus suis, ibi exultabunt, sicut qui exultant in messe, nullus ibi contemptus sed summus honor.

Expende 2<sup>do</sup> Magnitudinem illorum prae-  
miorum

miorum, in hoc etiam futuram: Quod status ille Beatorum complectetur omnes non quidem brutales, seu homini cum brutis cōmunes, ad quas, ex corruptione naturæ per peccatum vitiatæ, inclinamur, sed complectetur alias voluptates ordinis altioris, exuperantes omnem sensum. Quidquid te honestè oblectare potest, totum id eminenter continebit status ille beatitudinis. Imaginare hortorum, pratorum, fontium amœnitatem. Patria illa cœlestis erit paradisus amœnissimus, consitus pulcherrimis floribus, arboribus semper virentibus, maturos eosq; suavissimos fructus spargentibus; ibi pascetur agnus inter lilia, reperietur illic fons saliens in vitam æternam. Imaginare urbium, palatiorum, splendores. Illam cœlestem Jerusalem bene descriptam habes in Apocalipsi S. Joannis. *Ipsa Civitas aurum mundum simile vitro mundo, & fundamenta muri civitatis omni pretioso lapide ornata, & duodecim porte duodecim margarite sunt. & platea civitatis erit aurum mundum tanquam vitrum pellucidum.* Mansiones ibi amplissimæ & plurimæ, singuli Beati splendissima palatia, imò amplissima & opulentissima regna possidebunt. Imaginare ulterius laeta & splendida convivia. In illa cœlesti Patria celebrabuntur nuptiæ agni. Homo DEUS faciet cœnam magnam, assidebunt beati mensæ exquisitissimis instructæ dapibus. Ipse tunc Christus præcinget se & ministrabit, epulabuntur omnes in conspectu DEI, propinabitur illis vinum germinans virgines, bibent sancti de illo genimine vitis, de quo se bibiturum, in regno Patris sui, ipse Christus appromisit. *Torrente voluptatis potabit DEUS electos suos, & illi inebriabuntur ab ubertate domus DEI.* Imaginare concentus suavissimos, aures & animum demulcentes, In cœlo concentus Angelici audientur, ibi omnis generis musica personabunt instrumenta, ibi can-

ticum audietur, quod solae virgines cantare poterunt. Imaginare conversationes doctas, gratas, amenas, honestas. In caelo conversationes erunt nobilissimae, quia cum solis Regibus & principibus, cum haeredibus caeli, regni ac etiam DEI filijs, imò cum ipso Christo, beatissima DEI Matre, & quod maximum est, cum ipsa sanctissima Trinitate. conversationes illae sunt futurae doctissimae, quia cum sapientissimis, quorum unusquisque erit plusquam Salomon, intuitivè enim DEUM videndo quisque Sanctorum cognoscet clarissimè omnia, quaecumque; ad ejus perfectam beatitudinem scitu erunt digna & necessaria. Conversationes illae erunt amoenissimae, quia cum personis gratissimis; quisque; Beatorum erit conformis imagini filij DEI, qui est speciosus formam praefilijs hominum. Quia cum personis summè felicibus, quia erunt inter Sanctos summo amore mutuo se prosequentes, & arctissimam conjunctos amicitiam; erunt conversationes honestissimae, quia inter Beatos DEO ipsi immerfos, DEUM mente continuo versantes, & ejus voluntati, quae est suprema omnis honestatis regula, maximè conformes. Tandem imaginare quaecumque; cogitabilia bona, status ille beatitudinis omnium horum bonorum aggregatione erit perfectus.

*Expende 3rò* Magnitudinem illam beatitudinis, derivandam in omnes Beatorum sensus. Visus fruetur conspectu sanctissimae Christi Humanitatis jam glorificatae, conspectu Matris DEI Beatissimae exaltatae supra omnes Angelorum choros, conspectu corporum glorificatorum Sanctorum. Videbimus gloriosa Martyrum vulnera pro Christo tolerata. Videbimus corpora illorum Sanctorum, eorumque; gloriam, quibus in terris specialius afficiebamur, quibus conviximus. Fruetur insuper Visus ineffabili illa claritate, splendore, Ma-

jestate



jestate, opulentiâ cœlestis illius Jerusalem.

Auditus suavissimis concentibus recreabitur concentu illius trisagij: Sanctus, Sanctus, Sanctus, Dominus; illius cantici quod canent Virgines Agnum sequentes. Recreabitur auditus, dum percipiet continuas jubilationes, exultationes, glorificationes DEI, mutuas inter Sanctos tantæ felicitatis gratulationes.

Gustus fruetur nectare illocœlesti, illa ineffabili suavitate convivii, nuptiarum Agni & cænæ magnæ.

Odoratus satiabitur suavissimo odore omnis generis florum, aromatum, lignorum, satiabitur odore gratissimo, quem glorificata Sanctorum afflabunt corpora; odore illo Incensorum, quæ incessanter DEO offerentur. Tactus demum suam voluptatem habebit tum ex tactibus glorificati corporis, tum ex pietissimis vestibibus, quibus tegentur corpora Sanctorum, tum ex reclinatorijs moliter stratis, in quibus corpora Sanctorum requiescent,

*Expende 4to & considera felicitatem illam etiam in potentias animæ derivandam, etiam hæc suis disfluent delicijs. memoria recordatione tot DEI beneficiorum sibi in vitâ concessorum tot medicorum salutis à DEO benignissimè provisorum, bonique sui eorundem usus; recordatione illorum periculorum, ex quibus misericordiâ DEI erepti sunt. Dicentq; exultantes Beati: laqueus contritus est & nos liberati sumus* Recordatione præterea brevium vitæ hujus ærumnarum, quæ tantæ felicitatis causa ipsis existere, eritq; tunc dulce meminisse quod hic dulce fuit pati.

Intellectus summam habebit felicitatem & beatitudinem ex DEO viso, seu clarè & intuitivè cognito, ex cognita intuitivè essentia DEI, attributis & perfectionibus Divinis ex visis omnibus & singulis Sanctissimæ Trinitatis Personis. Ex cognitione altissimorum circa se consiliorum DEI. Ex cognitione seriei

prædestinationis, & gratiarum, per quas DEUS te salutem consequi voluit. Percipiet præterea intellectus felicitatem ex cognitione clara & perfecta tot & tam variarum creaturarum, naturæ & proprietatum earundem, ex cognitione meritorum Christi, omnium actuum elicitorum ab ejusdem humanitate, ex cognitione gratiæ sanctificantis, & aliorum donorum collatorum Beatissimæ, totq; alijs Sanctis. Fruetur intellectus magna voluptate ex apprehensione suæ aliorumq; Beatorum felicitatis. Ex illis judicijs, quibus approbabit quæcunq; ante recta judicabat, quibus judicabit quàm vana & vilia fuerint, propter quæ multi exciderunt ab æterna felicitate, quàm item modica illa fuerint? quàm leves & exigui labores? pro quibus illi tam copiosa retribuitur merces. Fruetur adhuc intellectus singulari voluptate ex discursibus & illationibus, quas tunc circa salutem suam formabit, quomodo à fine suo excidisset, si certis occasionibus se non subduxisset, si alium vitæ statum elegisset, si non vixisset juxta statum ad quem vocatus est, si certos defectus non præcavisset, non correxisset. Tandem voluntas perfruetur ineffabili gaudio, & sui appetitus summè expletivo, ex amore summi Boni, scilicet DEI per intuitivam visionem cogniti, & gaudio quò superabundabit de tanto possessio bono, perfruetur item singulari voluptate ex amore sanctissimæ Christi Humanitatis, pretiosissimæ DEI Parentis, Sanctorumq; aliorum ejusdem secum beatitudinis consortium; ex variarum virtutum actibus statui illi beatitudinis non repugnantibus, quos voluntas Beati tunc eliciet; ex summa sua conformitate cum Divina voluntate, ex implacabili adversus peccata & reprobos odio.

*Expende 5to* et postremò quòd Beatitudo illa Sanctorum, duplicem complectetur partialem beatitudinem. unam quâ beatificabuntur ipsæ animæ

nimæ Sanctorum, alteram quâ post resurrectionem  
 corporum ipsa etiam Sanctorum corpora glorifica-  
 buntur. *1ma* Consistit in visione clara & intuiti-  
 va DEI, quâ DEUM videbimus facie ad faciem,  
 & in amore fructivo DEI. Visione hac DEI &  
 amore reddentur Beati summè felices, his plenissimè  
 explebitur ipsorum appetitus, contemplatione sum-  
 mæ illius pulchritudinis increatæ ita abripiuntur, ut  
 nihil aliud possit illos oblectare, quod non sit con-  
 junctum & compossibile cum tali visione. Vi ta-  
 lis beatitudinis Sancti efficiuntur similes DEO, in  
 seipso felicissimo, *cum apparuerit, similes ei erimus*  
*quoniam videbimus eum sicuti est.* Per illam DEI,  
 visionem & amorem, introibimus in potentias  
 Domini, DEO perfectè uniemur, imò in DEUM  
 quodammodò transformabimur. Altera par-  
 tialis beatitudo consistit in glorificatione ipsa cor-  
 porum, hoc est in quatuor dotibus gloriosi corpo-  
 ris, & in felicitate in ipsos sensus & potentias ex-  
 teriores derivanda.

*His consideratis, cogita & conclude apud te*  
*1mò* quòd non sint condignæ passionēs hujus tem-  
 poris ad futuram illam gloriam, quòd quævis ad-  
 versa magno animò sint tibi perpetienda, ut illam  
 gloriam cœlestem assequaris, quòd omnî studiò  
 curare debeas, ne ab illa Beatitudine excludaris.  
 Conclude *2dò* Cœlum tibi contemplanti, & magni-  
 tudinem præmij illius cœlestis consideranti, quan-  
 tum omnia terrena, transitoria, sensualia vilescere  
 & sordere debeant, sicut sordebant meo sancto Pa-  
 tri JGNATIO, cujus frequens ille actus erat; *sordet*  
*mihî terra, dum cœlum aspicio.* Quòd item infeli-  
 cem te existimare debeas, quamdiu felicitate illa  
 non potiris, *infelix ego homo, quis me liberabit de*  
*corpore mortis hujus?*

Conclude *3dò.* Quàm meritò conversatio  
 tua in cœlis continua esse debeat, quòd ibi oporteat

teat corda fixa esse, ubi vera sunt gaudia. conclude *postremò* quantum tibi aspirandum, quò desiderio anhelandum ad supernam illam Patriam, quantum tibi mors sit exoptanda, ut quam primum DEO frui possis, quam familiaris ille actus Apostoli esse debeat: *Cupio dissolvi & esse cum Christo.*

Fac proposita materiæ præsentis servientia, et pete, ut DEUS, amore Patriæ illius cœlestis, te plenè ad se trahat, ut spe illius gloriæ te roboret, & accendat ad fortiter contemnendas transitorias, sensuales voluptates, & ad strenuè pro illa gloria decertandum.

PUNCTUM II. Audi illa verba *imà* ad corinth. 15. *Alia est claritas solis, & alia lunæ, & alia claritas stellarum, stella enim à stella differt, sit & resurrectio mortuorum.* Quæ intellige de inæqualitate Beatitudinis, qua Beati in cœlo præmiabuntur, nimirum quanta est differentia inter claritatem solis, claritatem lunæ, claritatem stellarum, idq; sive hæ secum invicem, sive cum sole, aut luna comparentur, tanta erit differentia inter beatitudinem & felicitatem Sanctorum. Sicut enim Sancti in hac vita in æqualia habuerunt merita; ita in cœlo inæqualia recipient præmia, DEO retribuyente unicuiq; secundum opera ejus.

Inæqualitas hæc erit *imprimis* secundum beatitudinem essentialem; quamvis enim omnes Beati in hoc futuro sunt pares, quia omnes videbunt DEUM facie ad faciem, & sicut est in se, seu intuitivè, omnes etiam eundem amore fructivo amabunt, qui amor necessariò visionem ipsam consequetur; tamen illi beati qui DEUM in terris perfectius amabant, perfectius ejus præcepta & consilia observaverunt, perfectius virtutum Christi exempla imitati sunt, majori fortitudine & resistentiâ tentationes superârunt: hi, inquam, in cœlo perfectius

festius & clarius DEUM videbunt, perfectiusq; eundem amabunt, ita ut tanta differentia claritatis visionis Beatæ in diversorum meritorum Sanctis sit futura, quanta differentia est inter claritatem solis, claritatem lunæ, & claritatem stellarum.

*Erit deinde inæqualitas hæc quo ad beatitudinem accidentalem, siquidem specialem habebunt gloriam, qui amore Christi reliquerunt omnia, eum nudum nudi secuti sunt, quales sunt religiosi hi enim sedebunt super sedes. 12. judicantes duodecim tribus Israël. Aliam gloriam habebunt viri Apostolici, laborantes circa salutem proximorum (qui enim erudiunt multos ad justitiam, fulgebunt sicut stelle, (stellas intellige primæ magnitudinis, aliam gloriam habebunt qui corpora sua tradiderunt ad supplicia, sanguinemq; pro Christo fuderunt, hi enim accipient laureolam martyrij; aliam gloriam, qui intaminatum virginitatis florem conservârunt, hi accipient laureolam virginitatis, sequentur etiam Agnum, & cantabunt canticum, quod nemo alius cantare poterit. Propter suam humilitatem, S. Franciscus Seraphicus, sedem superbi luciperi occupabit; aliam & aliam in sua perfectione inæqualem accipient gloriam: qui jam in hac, jam in illa virtute, specialius excelluerunt.*

*His Consideratis reflecte te, quantum tibi accumulanda sint merita, qua intentione, teneritudine, appretiatione amandus DEUS. quam felix es futurus, si propter Christum, non reipsa tantum, sed etiam affectu, reliqueris omnia, si Christum per imitationem perfectam secutus fueris? cogita quò zelò debeas curare salutem proximorum tuorum. Quàm cautè custodiendus sit thesaurus virginitatis & castitatis? quantum debeas appetere, ut quam plurima pro Christo patiaris, ac etiam sanguinem pro DEO fundas? quantum curare de-*

beas ut excellas in humilitate, tui ipsius abnegatione, cæterisque virtutibus, quarum singulae specialia sua habebunt præmia.

*Fac proposita elice affectus.*

PUNCTUM III. Audi illa verba Daniel. 12. *Pulgebunt sicut stella in perpetuas aeternitates.* Et considera hanc præcipuam Beatitudinis Sanctorum futuram proprietatem, quod sit futura æterna, sitque duratura in æternum, in perpetuas æternitates. Non modicum felicitatis hinc accedet Beatis, quod scient suam beatitudinem non terminandam unquam. felices putamus eos Principes, qui plures annos regni sui; gloriæ & terrenæ hujus felicitatis numerant, quam felices sunt futuri, qui cum Christo sint regnaturi perpetuò. Quæ nunc major est Regum sollicitudo, quæ illos inquietare solet? an non illa, ne illis aliquando regnum & vita eripiator? Hæc sollicitudo homines in summis honoribus constitutos reddit infelices. In Beatis nulla talis sollicitudo erit, sed summa securitas, quod Regni ipsorum & regnandi cū Christo non erit finis.

Cozita iterum quid sit æternitas? non solum infelix illa, sed etiam beata æternitas, duobus illis adverbijis sufficienter exprimitur *Semper, nunquā.*

Exardeſce amore perennis illius & æternæ felicitatis, sint tibi omnia quæcunq; pro Christo temporaliter pateris levia, & dulcia, propter spem æternæ illius retributionis, sæpiusque mente & animò revolve illud Apostoli: *Momentaneum & leve tribulationis, æternum in nobis gloria pondus operatur.*

In colloquio Pete à Christo, ut amore cœlestis illius Patriæ cor tuum inflammet & accendat, ut hoc igne succensus, ipsi quàm ferventiſſimè ſervias, ut ea omnia quæ pateris & sustines, præ magnitudine amoris & desiderij gloriæ illius, appareant tibi levia & momentanea.

*In fine: Pater Noster*



## DIEI VIII.

## Meditatio I.

## De amore DEI &amp; proximi.

*Praludium I.* Imaginare non solum propter identitatem Naturæ, sed etiam propter perfectissimum amorem, quò Divinæ Personæ se amant, & secum sunt conjunctissimæ, earundem Divinarum Personarum perfectissimam unitatem.

*Praludium 2.* Pete à DEO, ut sicut Pater æternus, & filius ejus Unigenitus, ac Spiritus Sanctus, unum sunt, ita & tu, per amorem DEI, sis cum DEO quid unum.

*PUNCTUM I.* Audi illa verba Proverb. 23. *Fili mi prabe cor tuum mihi.* Et considera, quod DEUS, dum cor à te petit, petat à te amorem & dilectionem, ut ipsum ames. Quod ut obtineat petit cor à te tanquam Pater, petit tanquam à filio, & quodammodo per filialem obtestatur affectum, Patri nihil magis debetur à filio, quam amor & dilectio.

Petitionem hanc ut melius & penitiùs intelligas,

*Considera* ulterius imò. Quòd DEUS tuum amorem exigit à te suo amore. Ut tu illum ames tanquam filius, ille te amat tanquam Pater. Ille dicit: *In Charitate perpetua dilexi te.* Ille te dilexit ab æterno. Ille ex sua dilectione quâ te diligit, creavit te, redemit, vult te salvare. Ille te amat totò se, totâ suâ essentiâ, omnibus suis perfectionibus & attributis. Amat te suâ omnipotentiâ, creando te, conservando, & in momenta, alia & alia beneficia conferendo. Amat te DEUS sua immensitate, est tibi præsens, ut in ipso sis, vivas, & movearis. Amat te suâ æternitate, dum facit, ut

ipsi còexistas, idq; etiam tunc, dum illum offendis; amat te suâ misericordiâ, tuâ succurrendo miseriâ, ad pœnitentiam te provocando, pœnitenti peccata benignissimè condonando : Amat suâ justitiâ, quando propositis præmijs te in vitat, ut ipsi servias, dum comminatione pœnarum deterret, nè illum offendas, dum te castigat temporaliter, ut in æternum parcat. Amat te suâ felicitate, ejus te participem facere volendo, ut cum ipso felix sis & regnes in æternum.

Amant te omnes Personæ Sanctissimæ Trinitatis. Amat Pater, Unigenitum suum Filium dando pro tua salute. Filius æternus amat te carnem humanam assumendo, in ea se humiliando ad exinanitionem, & mortem acerbissimam subeundo, ut pro peccatis tuis condignâ exhibeat satisfactionem. Amat Spiritus S. cum tot donis supernaturalibus in te descendendo, animam tuam inhabitando, & suis gratijs te incessanter ad bonum excitando.

*Considera 2dò.* Quòd DEUS exigit à te, ut cor tuum illi non alteri præbeas, ipsumq; ex toto corde ames, ut nihil ames contra DEUM, seu ejus bonitati & amorì repugnans, ut nihil ames magis, quàm DEUM, ut nihil ita ames sicut DEUM, ut nihil ames præter DEUM, propter se, aut propter aliud quod non est DEUS, ut omnia ames propter DEUM & in DEO, ac in tantum, in quantum hæc DEUS vult propter se amari; etiam te ipsum amare non debes, amore repugnante bonitati DEI ejusq; amorì, vel amore amorem DEI imminuente, imò ut ames DEUM, debes te ipsum odisse & abnegare. Etiam æternam animæ salutem debes amare, non quia hæc tibi bona est, non quia te felicem æternaliter reddet, sed quia per ipsam assequeris, ut DEUM dilectione æterna, immutabili, & perfectissimâ ames.

*Considera 3tò.* Quòd DEUS à te exigit a-

morem

morem operativum, exigit ut sermones ejus hoc est præcepta & consilia serves, ut non mente tantum, non verbô, sed re ipsa & opere DEUM ames. De amore DEI dicit Gregorius magnus. *Amor DEI otiosus non est, operatur enim magna, si est, si verò operari renuit, amor non est.* Ex ipsa Veritas incarnata Christus, pro amoris indicio constituit observationem suorum sermonum. *si quis diligit me, sermones meos servabit.*

*His consideratis, reflecte te supra amorem & dilectionem qua DEUM diligis. Et imprimis Reflecte te, an amorem Divinum, quo te DEUS amat, amore reddis, certè si amare piget, redamare non pigeat. Amat te DEUS ab æterno, & tu amasne DEUM à primò rationis tuæ usu? an cum primo evigilas, amorem DEI in te excitas? amat te DEUS charitate perpetua, constante, & indefectibili, et tua erga DEUM charitas esne perpetua, constans, & immutabilis? ô quoties hanc per peccata tua ex corde exclusisti. Amat te DEUS totò se, omnibus suis perfectionibus, amant te omnes Personæ Divinæ; quidquid DEUS est, amor est. Et tu amasne DEUM totò te, ex toto corde, ex totâ animâ, ex omnibus viribus tuis? amantne DEUM omnes Potentiæ tuæ?*

*Reflecte te 2dò. An cor tuum totum creatori tuo DEO exhibeas? cor nullam divisionem pati potest. Si illud divides vivere desinis, te ipsum & cor tuum perdis. si etiam affectum & amorem tuum, in DEUM & in creaturas dividis, nec DEO vivis, nec DEUM amas, & vitâ & amore DEI te spolias. Vide etiam, an non ames aliquid amoris DEI repugnans? An non magis aliquid ames, quàm DEUM & non propter DEUM & in DEO? An ames DEUM supra te ipsum, supra commoda tua sensualia, supra vitam tuam*

imò supra salutem animæ tuæ?

Reflecte te 3<sup>tiò</sup>. An amor tuus quò DEUM amas, sit operativus? Quid & quantum in totâ vitâ tuâ feceris amore DEI? quam magnum illud est quòd in te operatus est amor hic Divinus. Ex magnitudine operum, quæ aliquando amore DEI fecisti, metire tuum erga DEUM amorem. Amor enim DEI operatur magna, si est. Quod si nihil hætenus vel exiguum quid propter DEUM egisti, confundere, fateare, quòd ne inceperis quidem amare DEUM. Tecum ipse dispice quid adhuc facere possis ex amore DEI, ad illudq; faciendum quantumcunq; id fuerit, te resolve. Propone quòd DEUM amare velis amore summæ appretiativo DEI, contemptivo rerum omnium creatarum propter DEUM, amore efficaci, amore operativo.

Elice actum amoris DEI tibi; fac deinceps familiarem: *Serò te cognovi, serò te amavi pulchritudo tam antiqua tam nova. Va tempori illi quo te non amavi. Diligam te Domine fortitudo mea. tu scis Domine quia amo te propter te, & quidquid amo propter te, amo in te propter te, ac te in omnib. s. Diligo te Domine plusquam me, imò me ipsum odi & aversor ut te, amem. Diligo te ex toto corde, ex tota anima ex tota mente mea, ex omnibus viribus meis. Offero tibi cor meum in holocaustum ut ignis aoris tui integrè illud absumat, ita te totò corde amo, ut si mille corda haberem, mille te cordibus amare vellem. Da ut amem te constanter, immutabiliter, ut amem super omnia. Amorem hunc cum gratia tua mihi dones.*

PUNCTUM II. Audi illa verba Joan: 15. *Maiorem hanc dilectionem nemo habet, ut animam suam ponat quis pro amicis suis & c.*

Considera imò. Dilectionem illam quæ circa DEUM immediatè verisatur, de qua puncto præcedenti, magnam esse; cæterum hac dilectio-

ne major est illa, quæ ita porrigitur in DEUM, ut etiam extendatur ad proximum, ex vi cujus ita DEUS amatur propter se, ut etiam et proximus ametur propter DEUM.

Magna Charitas est DEUM amare, & ex ejus amore ipsum laudare, revereri, eiq; servire; sed major charitas est quæ efficit, ut non solum ipse DEUM laudes, reverearis, eiq; servias, sed etiam, ut proximi, tuâ operâ & labore ad DEUM conversi, DEUM ament, laudent, reverèantur, eiq; in sanctitate serviant. Magna Charitas est ita DEUM amare in hac vitâ, ut & post mortem, obtenta animæ salute, DEUM ames per totam æternitatem. Sed major charitas est, quæ etiam alios quàm plurimos perducit ad cælum, ut & ipsi DEUM perpetuò ament. Magna Charitas est sermones DEI servare, nullum mandatum Patris cœlestis transgredi, consilia Christi implere, exempla ejus imitari, vellibus & insignibus ejus indui; sed major est charitas, quòd hæc ipsa ita præstas, ut etiam eadem alijs persuadeas.

Magna in DEUM Charitas est: ex amore ipsius relinquere mundum, relinquere omnia, abnegare seipsum; sed major charitas est, relicto Mundo & relictis omnibus, ex amore DEI, lucrari DEO tot parvos mundos, quot homines, animas quàm plurimas à mundi amore abstrahe-  
re, DEOq; subijcere, & facere, ut totus mundus, in animabus conversis, post Christum abeat.

Magna Charitas est offerre DEO te ipsum, offerre illi munera præstantissima, offerre illi quidquid præstantissimum, & amabilissimum habes; sed major Charitas est, præter teipsum offerre munera illa pretiosissima, scilicet Animas, de quibus Climacus Cap. 18. ad Pastorem, *Nullum DEO munus à nobis gratius offerri potest, atq; cum animas ad Penitentiam deductas illi consecramus.* Non est

*tantum totus mundus atque pretium unius animæ. Unius animæ pretium omnibus præstat, quia pretium Divini sanguinis est*

Tandem magna Charitas est, liberales facere eleemosynas, esurientes reficere, operire nudos, sed major Charitas est animas ad DEUM adducere, vitam per peccatum amissam animæ dare, eamque à mortuis resuscitare, primâ stolâ, id est gratiâ sanctificante, exatos, & nudatos iterum vestire, Animas ab inferni prædone spoliatas, donis & thesauris cælestibus locupletare, famelicos fame pereuntes, & filiquis porcorum se pascentes, pane verbi Divini, pane Cælesti, pane Eucharistico reficere. Omnibus Eleemosynis præfert S. Chrysostomus supra Epist. 2 ad Corinth. cap. 3. Conversionem animarum, dum dicit: *Si immensa pauperibus eroges, plus tamen effeceris, si unam converteris animam.*

PUNCTUM III. Circa eadem verba Joan. 15 Considera 2do quid sit ponere Animam pro amicis. Ponere animam pro amicis, seu proximis, est totum se impendere spiritualibus proximorum obsequijs, nullos abhorreere labores, nullis parcere sudoribus, incommoda perferre, adversa perpeti, difficultatibus, imò periculis se objicere, ut proximos tuos DEO & cælo lucreris; laboribus circa salutem animarum immori, velle item vitam ac sanguinem profunderè, ut animas è faucibus inferni eripias, idque reipsa præstare, si talis se offerat obsequij occasio, in qua propter lucrandas DEO animas, vitæ jacturam subire oporteat.

Ponere animam pro amicis, est adhuc non solum vitam corporalem pro æterna proximorum salute exponere, sed etiam non aliam laborum circa proximos mercedem velle, nisi salutem animarum. Et optare cum S. IGNATIO Societatis JESU Fundatore, ut laborum tuorum præmia disse-

rantur



rantur, etiam cum periculo amissionis eorundem, & salutis æternæ, ut interim animas DEO lucrari, & spiritualia obsequia proximis impendere possis. Ponere animam pro amicis, est non aliter velle consequi salutem animæ propriæ, nisi tot alijs ad salutem æternam perductis, & taliter, ut tuæ etiam saluti renunties, si non sint salvandi illi, circa quorū salutem desudas, quem aliquando eliciuisse fertur S. Maria Magdalena de Pacis, cum diceret : *Domine si non facis mihi hanc gratiam dandi animas, quas peto, dicam ex ego nolle me ad possidendam gloriam pervenire, quam mihi preparasti.*

Considera 3<sup>io</sup> Ponere taliter animam pro amicis, esse dilectionem quā major haberi non potest. Talis enim dilectio non solum operatur magna, sed operatur opus, quō præstantius esse non potest, operatur opus Divinum, imò omnium Divinorum Divinissimum, laborem enim circa salutem animarum ita appellat S. Dionysius Areopagita, dum dicit : *Omnium operum opus Divinissimum est cooperari DEO ad salutem.* Ut quis pro DEO, cui se totum debet, pro Christo, qui pro se mortuus est, moriatur, dilectio tanta sperari potest. Pro Bono enim ( dicam ego pro summo Bono ) forsitan quis andeat mori; si tamen quis ponat animam pro Creatura, pro hominis salute, pro peccatore, res hæc charitatem maximè commendat, sicut charitatem Christi commendat, quod mortuus sit pro peccatoribus. ponere animam pro DEO à quo pro tali dilectione salutem æternam es consecuturus, est charitas cui faciliè admisceri potest amor bonus ille quidem & honestus, talis tamen, quo perfectior dari potest, nimirum potest admisceri amor ille, quem docti appellant amorem concupiscentiæ, fieri enim faciliè potest, ut ames DEUM & animam pro illo ponas, quia ab ipso salutem animæ tuæ es consecuturus, quia tibi DEUS bonus est

est, cum respectu ad te ipsum & tuum bonum, at ponere animam pro amicis ex amore DEI, ita ut etiam salutem animæ tuæ postponas saluti Proximorum, est sublimis benevolentiae amor, est amor ab omni respectu boni proprii depuratus, in solo DEO ejusq; bonitate unicè conquiescens, adeoq; est dilectio, quâ major haberi non potest.

*His consideratis, tecum dispice, quam in te animi dispositionem & præparationem sentias ad hanc reipsa & opere exercendam excelsam in DEUM charitatem, Divinissimum hoc opus cooperationis DEO & Christo circa salutem proximorum. Resolve te ad illud, excita in te desiderium tam sublimis dilectionis, protestare, velle te non uno tantum corde, sed millenis, imò omnibus omnium mortalium cordibus ad DEUM, si fieri posset, per te adductis, eundem quàm perfectissimè amare. Proteſtare te paratum esse, amore DEI, pro æterna proximorum salute, animam tuam ponere, & sanguinem profundere. Postula, ut tantæ charitatis victima esse possis.*

*In colloquio pete à SSmo Spiritu, qui charitas & amor increatus est, ut cor tuum quàm maximè ampliet, ut te accendat illo dilectionis igne, ex vi cuius, animam tuam ponas pro amicis tuis, pro salute proximorum tuorum, pro quibus dominus noster JESUS Christus non dubitavit tradi manibus nocentium.*

*In fine: Veni Sancte Spiritus.*

## Meditatio II.

### De conformitate voluntatis nostræ cum voluntate Divina.

*Praludium I. Imaginare summam conformitatem*

mitatem voluntatis humanæ, Christi cum voluntate Divina Patris æterni.

*Praludium 2dum.* Pete à DEO, ut per conformitatem voluntatis tuæ cum Divina, Christum imitari possis.

PUNCTUM I. Audi illa verba Psal. 29. *Domine in voluntate tua præstitisti decori meo virtutem.* Et considera, quòd sicut omnes aliæ creaturæ, à voluntate DEI, omnem decorem, omnem virtutem & perfectionem suam habent; quia ab hac voluntate habent non solum suum esse, sed etiam omnia illa, quæ te perficiunt in suo esse; ita & homo omnis quidem, sed maximè Christianus habens curam salutis animæ suæ, à voluntate Divina accipit, & accipere debet decori suo virtutem, quod ut melius cognoscas.

*Considera* ulterius 1mò Decora & ornamenta hominis Christiani in cælum tendentis esse observationem præceptorum, & consiliorum Evangelicorum, executionem inspirationum Divinarum, Sanctorum item propositorum, & omnigenæ virtutis exercitia. Hæc ergo decora omnem virtutem, omnem æstimabilitatem habent à voluntate DEI, sicut moneta pretium suum habet à voluntate Principis & ejus sibi impressa effigie, ita ut nisi DEUS voluisset, nisi aliqua præcepisset, aliqua consulisset, nisi inspirasset sancta desideria & proposita, nisi cohortatus fuisset ad exercendas virtutes, nunquam hæc habuissent eam gratiam, eam æstimabilitatem & virtutem, quam defacto habent.

*Considera* 2do Non ab omni voluntate Divina nostris operibus præstari virtutem. Actiones enim peccaminosæ, quæ fiunt ex voluntate DEI permissiva, suntq; maxima dedecora, nullam æstimabilitatem habent vel habere possunt, sed potiùs à contraria DEI voluntate, quæ tales actiones prohibet, & cui sunt diffformes, habent, quod sint ma-

læ, quòd sint vitiosæ. Ab illa etiam voluntate Divina, quâ DEUS miseretur impio, ut non discat Iustitiam, ex quâ item DEUS iratus dat quod petis, cum tamen propitius neget quod petis, actiones, & opera nostra non desumunt eam, quæ secundum DEUM est, laudabilitatem. Sed nec illa voluntas Divina, quâ DEUS accommodat se nostræ voluntati, dum DEUM trahimus ad vota nostra, ut ipse velit ea quæ volumus. hæc inquam voluntas non magnam virtutem refundit in actiones nostras.

Voluntas igitur DEI à quâ præstatur operibus nostris gratia, pretium, virtus, & æstimabilitas, est potius illa, quâ DEUS castigat filios, corrigit errantes, ad poenitentiam perducit, per quam DEUS præcipit quod sibi placet, consulit bonum, ad illudq; propositis præmijs varijsq; motivis invivat, & cor hominis internâ suâ gratiâ trahit & inclinât. Talis item voluntas est qua DEUS malum prohibet, ab eoq; poenarû comminatione deterret. Verbo, virtus, pretium, & æstimabilitas præstatur nostris operibus à voluntate Divina beneplaciti, seu approbativæ boni, & displicente sibi in malò.

PUNCTUM II. Occasione eorundem Psalmi verborum considera ulterius 3tiò. Quòd à voluntate Divinâ non æqualem virtutem & laudabilitatem accipiant bonâ nostra opera; siquidem nec voluntas Divina æqualiter sibi complacet in omnibus, nec æqualiter vult omnia. Quia nec omnia sunt æqualiter appetibilia, nec æqualiter conducunt ad DEI gloriam. Unde etiam Apostolus vult, ut probemus, quæ sit voluntas DEI bona, perfectâ, & beneplacens, quibus verbis videtur insinuare voluntatem DEI aliam esse perfectam, aliam non æquè perfectam, quod ipsum ita intelligi debet: omnem quidem voluntatem DEI secundum se & suum esse, quòd esse est esse ipsius DEI fons om-

nis perfectionis, esse perfectissimam, sed ex parte objecti & termini voliti non omnem esse perfectā, sed alia est perfecta, alia perfectior, alia minùs perfecta, quòd nihil aliud est, nisi unius actus divini objectum esse perfectius, alterius verò actus objectum esse minùs perfectum. Et sic in sensu explicato plures actus voluntatis Divinæ suasivæ putantur esse perfectiores, quàm sint actus voluntatis præceptivæ, plerumq; enim ea objecta, quæ consuluntur, sunt perfectiora, quàm quæ præcipiuntur. Inter actus suasivæ voluntatis, voluntas illa quæ nos movet & excitat, ut præeligamus Paupertatem, contemptum, insipientiæ titulum, viam crucis & tribulationis, præeligamus inquam divitiis, honoribus, bonæ famæ, hominum æstimationi, est perfectior, quàm illa voluntas, quæ nonnisi vellet nos indifferentes esse ad Paupertatem vel divitias, ad honorem vel ignominiam. Perfectior voluntas illa est, quæ nos movet ad ea, quæ in nobis fiunt cum majore nostri victoriâ, cum majore repugnantia sensualitati, & amoris proprio, per quæ magis gloria DEI promovetur, & quæ ad nostram perfectionem & animæ salutem magis conducunt.

*Considera 4to.* In tantum a voluntate Divina nostris actionibus præstari virtutem & æstimabilitatem; in quantum hæ fiunt conformes voluntati Divinæ; conformitas enim illarum cum voluntate DEI bona, perfecta, beneplacente, facit tales actiones sanctas, virtuosas, præmiò dignas, siquidem omnis honestatis, adeoq; & sanctitatis in actionibus nostris principium & Regula est voluntas Divina, ipsis per conformitatem seu conformationē earundē actionum dictæ voluntati applicata.

*Considera tandem 5to.* Eò perfectiorem esse actionem quamcumq; nostram, quò magis & perfectius hanc conformitatem participat, quæ item conformatur voluntati perfectiori, hoc est perfectiora

etiora à nobis requirenti. Idq; perfectior & magis laudabilis est actio, quæ non solum secundum se, independenter ab explicita & expressa intentione operantis est conformis voluntati Divinæ, sed etiã quæ eidẽ est conformis ex intentione expressa operantis, ex studio & conatu, quò quis studet cognoscere voluntatem DEI bonam, perfectam, beneplacentẽ, eiq; cognitæ, tanquàm regulæ, studet conformare suas actiones, hoc singulariter intendendo, ut expleat gustum & beneplacitum Divinum, ita ut nihil velit, nihil amet nisi quod vult & amat DEUS, idq; ideo quia amat, quia vult DEUS.

PUNCTUM III. Post considerationem eorum, quæ duplici puncto priore proposita habes, converte te ad te ipsum, & fac reflexiones sequentes.

1<sup>mo</sup> An omnes actiones tuæ sint decora à voluntate Divina suam pulchritudinem & virtutem habentia an non potiùs aliquæ? fuerint maxima tuã dedecora? quòd in ijs voluntati beneplacenti Divinæ te non conformaveris, sed potiùs contravereris eidem, contra legem agendo eamq; transgrediendo?

2<sup>do</sup>. Reflecte te quantũ studeas conformare, voluntatem tuam voluntati Divinæ beneplacenti & perfectæ? Esne sollicitus, ut cognoscas voluntatem DEI perfectam, ut cognoscas quod DEO magis placet, ut præeligas, quod est magis perfecti, quod magis promovet gloriam DEI, in qua DEUS magis sibi complacet.

3<sup>to</sup> Reflecte te an non subinde volueris, ut DEUS sequeretur voluntatis tuæ nutum, ut id DEUS faceret, quòd tibi placet, non verò ut tu faceres, quòd à te vult DEUS.

4<sup>to</sup>. An conformitatem cum voluntate Divina, tanquàm tuæ voluntatis Regulã, unicè intenderis, & ad eam respexeris in tuis actionibus, an non potiùs aliquam vanitatem? Hæc ipsa exercitia an feceris



feceris ex intentione explendi gustū & beneplacitum Divinam, & cum eo studio, ut illud quā perfectissimè expleres? an non potius ex vano aliquō respectu, idq; cum multis imperfectionibus, Divinæ voluntati repugnantibus? An quidquid agis, ideo agis quia vult DEUS id à te fieri, quia in hoc sibi complacet, quia per talem actionem magis conformaris voluntati Divinæ?

5to. Tandem te reslècte an hoc optes & desideres, ut in te, per te, & circa te, fiat voluntas Divina perfectā beneplacens, hoc est talis voluntas, quæ sit magis promotiva tuæ perfectionis? An non soli voluntari præceptivæ te conformare studeas, non sollicitus de conformitate cū voluntate Divinā svasivā, hoc est de implendis consilijs & sanctis inspirationibus Divinis. Esne paratus, ut voluntas Divina in ulteriori vita tua ducat te viā asperā, per cruces, per adveria, per afflictiones, confusiones, tuiq; humiliationes & depressiones, per morbos item & infirmitates, aliaq; his similia? fortè tibi magis placet alia Divina voluntas? illam voluntatem & Providentiam circa te exerceri fortè desideras, quæ te ducat per prospera, per comoda, per favores, honores, pretia tui, promotiones, aliaq; his similia.

Statue quæsiturum te abhinc in omnibus gustum voluntatis Divinæ, perfectæ, beneplacens, hanc te unicè intenturum, supra id deinceps potissimam adversionem & reflexionem habiturum, quid DEO placeat & quid magis placeat? resolve te ad omnem DEI voluntatem; propone non solum voluntati præceptivæ, sed etiam voluntati svasivæ Divinæ, omnibusque motionibus, quibus tuam voluntatem movebit, & excitabit, te conformaturum. Protestare paratum te esse ad omnia, sive te DEUS velit ducere per adversa, sive per prospera, sive per infami-

am, five per bonam famam, five per valetudinem, five per infirmitatem, five per afflictiones & cruces, five per solatia. Imò humiliter à DEO postula, ut in te fiat voluntas DEI bona, beneplacens, & perfecta. illa scilicet, quæ magis repugnat inclinationibus tuis, amoris tuo proprio, ut DEUS te affligat, conterat, humiliet tuâ virtutem infirmitatibus, adversitatibus, contemptu, abiectione tui, ac multiplici cruce exerceat. Utq; in his omnibus hoc unicum & maximum sit tuum solatium, quia id DEO placet, quia DEUS vult.

In colloquio elice sequentem resignationis in DEI voluntatē affectum.

O supreme rerum omnium Domine, En quā possum perfectissimè voluntatem meam in tuum transfundo beneplacitum. Hoc unice amplecti & velle in totâ vitâ mea desidero, quod placitum fuerit tuæ Sanctissimæ voluntati. Statue igitur de me benignissime DEUS, quidquid tibi placet cui placere non potest nisi gloria tua & salus mea. Utere me tanquam re tuâ, tanquam mancipio. En Domine ut jumentum factus sum ante te, ad omnem nutum tuum, paratum cor meum DEUS, paratum cor meum; doce me facere voluntatem tuam, non quod ego volo, sed quod tu de me statuisti ab æterno, hoc de me fiat. Affligens me Domine afflige, omnes in me congere cruces, afflictiones, persecutiones. Auge Dolores, auge & patientiam.

*In fine: Suscipe Domine universam libertatē.*

### Meditatio III.

## Concludens Exercitia Spiritu- alia S. P. JGNATII.

*Praludium I. Occasione illorum verborum*  
I. Co-

1. Corinth. 4. *Spectaculum facti sumus mundo, & Angelis, & hominibus*, Imaginare quod in te proditutum, seu prodeuntem ex hac sacra solitudine, oculi omnium sint convertendi. Fies spectaculum mundo; observabit ille an sis adhuc de hoc mundo? quâ ratione deinceps mundo uti voles? an quæres ea quæ mundi sunt? Fies spectaculum Angelis bonis & malis. Boni gaudebunt super tuâ conversione & pœnitentia, mali invigilabunt, ut abstractum te à castis Luciperi, ad eadem rursus te reducant. Fies s; cœlaculum hominibus, quorum pleriq; considerabunt, quem fructum ex hac sacra solitudine referes, quæ vitæ & morum in te sequetur mutatio.

*Preludium 2dum.* Postula à DEO gratiam, quâ confirmet id, quod per hæc exercitia in tua anima est operatus.

PUNCTUM I. Audi illa verba S. Pauli Apostoli ad Galat: 5. *State, & nolite iterum iugo servitutis contineri.* Et imaginare, quod S. Angelus Custos tuus, aut etiam S. Pater JGNATIUS, cujus Exercitia Spiritualia hoc ocliduo egisti, te alloquatur. Stetisti tandem post tot errores & deviationes tuas, stetisti in viâ rectâ, in viâ Justitiæ. In viam virtutis & perfectionis Christianæ directus es à Spiritu Sancto, per tot Sancta lumina, ejusq; inspirationes, per tot salutaria proposita, quæ formasti, per tot agnitas veritates, quas ante vel ignorasti, vel nunquam ita atq; nunc expendisti. In viam salutis deductus es, per tuam in toto corde ad DEUM conversionem, per seriam de peccatis tuis à te actam pœnitentiam. Vide ergo ut stes in gradu tuo, ne ab hac viâ, in quam deductus es, devies & deslectas aliquando. In beneceptis persiste; in exequenda Divinâ voluntate, in inspirationibus Spiritus Sancti, bonisq; tuis propositis adimplendis progredi stude, nullæ te difficultates, nulli

Q4

vani

vani respectus, nullæ humanæ rationes à recto dimoveant. Sis fortis & constans, in quibuscunq; tentationibus superandis. Exclusisti jugum servitutis peccati, per deplorata vitæ antecipiæ peccata, per ejuratam mundi, carnis, & dæmonis servitutem, à castris improbißimi Ducis Luciperi, ad castra Christi transisti. Vide ergo ne iterum collum tuum iugo durissimæ servitutis peccati & diaboli subicias, potiùsq; svave Christi jugum suscipe, ad illud ferendum forti animò te resolve, illiq; portando assvesce.

Hæc audiens, alacrem & paratum te ad exequenda Sanctissima hæc monita sive Sancti Angeli custodis tui, sive S. Patris JONATHAN, tui in his exercitijs directoris, ostende. Statue firmiter, quòd in his quæ bene cæpisti, sis perseveraturus, imò ulteriorem in virtutibus in exequenda Divinâ voluntate, & bonis tuis propositis, progressum curaturus. Renova proposita totò hóc Collectionum tempore formata, ea deinceps sæpiùs in memoriam revocare, & ipsorum executioni invigilare stude. Existima inchoasse te primum curam salutis tuæ, per hæc exercitia bonum semen in anima tuâ tantummodò seminatum esse, post illa finita ad te pertinebit facere, ut semen hoc in herbam, & culmum excrescat, multiplicemq; ac centuplum ferat fructum. Fovendum erit frequenti Sacramentorum Pænitentiae, & Sanctissimæ Eucharistiæ usu, per non intermissam faciendi singulis diebus examinis conscientiae consuetudinem, quotidiana rerum cœlestium, per aliquòd tempus, saltem per mediam horam meditatione, item pij alicujus & Spiritualis libri lectione, sedulò virtutum exercendarum studiò. Custodiri etiam bonum hoc semen debet, ne volucres, hoc est animæ tuæ hostes, ex corde tuò illud auferant. Custodiendæ erunt sensu corporis portæ, vitandæ conversationes periculosæ,

Iosæ, amovendæ peccandi occasiones &c: Attendendum quoq; erit, ne a spinis cogitationum mendaciarum, terrenarum cupiditatum, & vanitatum, hoc ipsum semen sæctarû inspirationu & propositorum suffocetur. Ad hæc omnia te excita, propositis obfirma, & dein ejs sanctè exequi stude.

PUNCTUM II. Audi illa verba 2dæ Petri 2.

*Melius erat ijs non agnoscere viam iustitiæ, quam post agnitionem retrorsum converti ab eo, quod illis traditum est, Sancto mandato.* Hæc audiens mente revolve & cogita. Quantum tibi DEUS beneficium contulerit? quod conversionis tuæ ad DEUM vitæq; melioris, & sanctioris, per DEI gratiam in his exercitijs primum jeceris fundamentum, quod viam Iustitiæ agnoveris? Ex fructibus, hoc tempore collectis, ex perceptis tot Divinis luminibus, motionibus & excitationibus tuis ad bonum, metiri potes. Non poteris deinceps conqueri non cognovisse te viam Iustitiæ, viam salutis, non habuisse illustrationes sanctas, gratias Divinas excitantes; abundantissimè DEUS tibi contulit hæc omnia, ostendit viam per quam ambules, ostendit, qua ratione, & per quæ media, finem tuum, æternam scilicet animæ salutem & felicitatem consequi debeas, non fecit taliter òni nationi, nec iudicia sua, consilia sua, voluntatè, & beneplacitum suum, æquè alijs, atq; tibi manifestavit. Age gratias, cum profundissima humiliatione tui, liberalissimæ bonitati Divinæ, promunifica tot, tantorumq; suorum donorum, per hoc tempus tibi collatorum, profusione. *Misericordias Domini in æternum cantabo. Fecit mihi magna qui potens est.*

Quoddum facis, considera: hæc Divina beneficia, attento amore in te Divinò, ex quò collata sunt, attentà item ipsorum præstantiâ, efficacîâ, & magnitudine, attentis præterea commodis & utilitatibus, quæ afferre nata sunt, si ijs convenienter uti

volueris, hoc est: si Divinis inspirationibus obediens fueris, & agnitâ viâ Justitiæ & salutis ambulaveris. Hæc inquam Divina beneficia, quò magis, attentis illis omnibus, convenit æstimari, cò etiam magis hæc ipsa timenda esse, si post agnitionem viæ Justitiæ, post tot lumina & excitationes, ac motiones voluntatis tuæ, non responderis gratiæ Divinæ, sed converteris te retrorsum, ad tua vitia antiqua, si redieris ad inveteratos habitus, si post tuas concupiscentias abieris, si iterum ad castra Diaboli pestilentissimi ducis, quæ ejurarâsti, te transuleris, carni & mundo adhæseris, eaq; via ire volueris, quæ retrorsum, hoc est ducit ad infernum & interitum; deniq; si à mandato sancto, quod tibi traditum est, de vita in melius reformanda ac sanctè deinceps instituenda recesseris, voluntatem DEI, præcepta & Consilia Evangelica neglexeris & contempseris; melius tibi erat non agnoscere viam justitiæ, quàm post agnitionem retrorsum converti.

Ex quo enim tot & tanta beneficia DEI accepisti, de illis ipsis rigidior tibi ratio reddenda erit. cui enim plùs datum est, plùs requiretur ab eo. Gravius & severius judicium te manet; scienti enim & non facienti bonum, majus judicium est ipsi. Minus excusabilis eris coram DEO, attestante Veritate æterna, *Si non venissem, & locutus non fuisset, peccatum non haberent, nunc autem excusationem non habent de peccato suo. Surgent in Judicio DEI viri Niniuite, & condemnabunt te*, quòd illi ad prædicationem Jonæ egerint pœnitentiam, tu verò post tot Spiritûs Sancti locutiones ad cor tuum, impœnitens in tuis peccatis permanseris, vel post modici temporis pœnitentiam ad eadem peccata facilè redieris; surgent illi omnes, qui ex his ipsis Sancti JGNATII exercitijs peractis, magnos perceperunt & retulerunt fructus, & in alios mutati, vitam deinceps sanctam instituerunt, & hi omnes.



omnes condemnabunt te, nisi & tu in alium mutatus fueris, & in posterum sanctius vixeris.

Hæc exhorrescens, firmissimè statue, à viâ Justitiæ, quam agnovisti, nunquam te recessurum, nec conversurum unquam retrorsum. Electiones etiam tuas bonas, inspirationes Divinas, pia desideria, Sancta proposita, omnesq; tuas resolutiones, ad executionem te omnino deducturum. Protestare dicens cum S. Job. *Justificationem, quam capere tenere, non deseram.* Confitere inconstantiam & mutabilitatem tuam, supplica supremo Numini, ut te fortem, & immobilem efficiat, tibi det non solum faciem, sed etiam cor, & voluntatem tuam, tanquam silicem & adamantem, qui nullis tentationum ictibus, etiam validissimis, concuti, nullis artibus dæmonis emolliri, & ad vitium flecti possit.

PUNCTUM III. Audi Apostolum Paulum ad Hebr. 6. dicentem. *Impossibile est eos, qui semel illuminati sunt, gustaverunt etiam donum caeleste, & participes facti sunt Spiritus Sancti, & gustaverunt bonum DEI verbum, virtutesq; venturi sæculi, & prolapsi sunt rursus, renovari ad Penitentiam*

Et considera horrendam hanc Apostoli sententiam verificari de prolapsu illorum, qui postquã peregerunt S. Patris JONATHAN exercitia, per illa non redduntur meliores, sed rursus post illa, ad antiqua sua redeunt vitia. De agentibus hujusmodi exercitia.

Verificatur primò quòd sint illuminati; ubi enim magis illuminari poterant? certè qui ad tanta lumina, quanta in his exercitijs habuerunt, cæcutiunt, cæci sunt & Duces cæcorum.

2dò. Verificatur de iisdem, quòd gustaverint donum caeleste; consolationes sæpius acceptæ, lacrymæ ipsæ, quas expressit pœnitentia, pax, & tranquillitas conscientie, fervor spiritus, heroicæ

resolutiones, sancta proposita, omnesq; gratiæ Divinæ, sunt donum cæleste. Hoc donum quis est qui hoc tempore, hoc loco non gustaverit?

3<sup>to</sup> Verificatur de illis, quod participes facti sunt Spiritûs Sancti, quia participes facti sunt tot instinctuum & inspirationum sanctarum. Hoc tempore in hoc sacrô secessu expectavimus promissionem Patris cælestis, nec dubium est quod eam acceperimus, descendente in unumquemque nostrum cum suis donis Spiritû Sancto.

4<sup>to</sup>. Adhuc verificatur de iisdem, quod gustaverint bonum verbum DEI, quia gustaverunt verbum salutis, verbum vitæ æternæ, verbum legis & perfectionis, quando tale verbum cum gustu susceperunt, loquente illud ad cor ipsorum Spiritû Sancto, juxta promissionem factam animæ ad hanc sacram solitudinem descendenti: *Ducam eam in solitudinem, & loquar ad cor ejus.*

5<sup>to</sup> tandem verificatur & illud, quod gustaverint virtutes venturi sæculi. Has enim gustaverunt per contemplationem gloriæ Christi resurgentis, in cælum ascendentis, & ad dexteram Patris sedentis. Per contemplationem item gloriæ cælestis, quam DEUS Justis & electis præparavit, & aliquando retribuet pro meritis ipsorum.

Hi ergo si prolapsi fuerint, & ad suæ vitæ præteritæ iuveterata vitia, ad scandalosas laxitates, tepiditates, pravos habitus, ad incautas & periculosas conversationes, si redierint, si neglexerint Divinas inspirationes, à suis propositis recesserint, & leges Divinas, aut etiam humanas in conscientia obligantes, transgressi fuerint. De talibus pronuntiat Apostolus, quod impossibile sit eos renovari rursus ad pœnitentiam. scilicet non est sperabile, ut hi aliquando verè corrigantur ut seriam, sinceram, cumq; constantem agant pœnitentiam, ut in viam salutis, à qua volentes deflexerunt, reduci,  
&

& ad faciendam vitæ emendationem fructuosam flecti possint. consequenter valde metuendum est, ne tales æternam animæ damnationem incurrant.

Neg; hi vani sunt terrores; constans siquidem est Theologorum doctrina: seriem gratiarum Divinarum, dependenter à quibus aliqui salvandi erant, seu filum prædestinationis, etiam levi defectu, imò & neglectu gratiæ excitantis ad id, quod nonnisi consilij est, quantò magis gravioribus delictis, interrumpi posse. Quod si hoc filum interrumpatur, miser ille incidit in aliam seriem providentiæ Divinæ, in quâ habiturus est auxilia & gratias, quas culpâ suâ reddet inefficaces, & quibus habitis, tentationi succumbet, in grave ac etiam in plura gravia peccata incidet, & in finali impœnitentia è vitâ decedens, æternum damnabitur. Hæc interruptio fili prædestinationis. & fortè gratiarum, dependenter à quibus aliquis salvandus erat, si alicui defectui vel peccato alligatur, maximè illi vel illis, quæ post tot lumina, post tot proposita, & promissiones, quot in exercitijs S. Patris JGNATII concipi solent, committuntur. Et hinc puto natum esse illud quorundam Ascetarum effatum: quem exercitia S. JGNATII non corrigunt, nec ipse corrigit infernus.

Iterum hæc exhorresce omnes defectus & relapsus tuos, & vide, quàm cautus esse debeas. Quomodo, post hæc exercitia, sit tibi timenda etiam minima cujusvis defectus umbra. Rursus propositis te obfirma, & propone sæpius te usurum horrendâ hâc consideratione adductorum Apostoli Pauli verborum, quâ facilius te ipsum in virtute, voluntatis Divinæ & propositorum tuorum sanctorum executione, continere possis.

*Colloquium* instituendum ad pretiosissimam DEI Parentem, à quâ humiliter postula, ut ipsa, quæcunq; in his recollectionibus bene egisti, cogitasti,

199 *Concludens Exercitia Spiritualia*

tâlli, statuisti, imò integra exercitia à te peracta, in manus suas Sanctissimas suscipiat; & Sanctissimæ Trinitati, suoq; amabilissimo Filio præsentet, & ad majorem DEI Gloriam, explendumq; gustum & beneplacitum voluntatis ejus, tuæq; animæ salutem & perfectionem, offerat, defectus omnes & imperfectiones contegat, excuset, ac pro ipsis deprecetur, copiosamq; à Sanctissima Trinitate benedictionem, ad vitam meliorem ab hinc inchoandam, & sanctè deinceps instituendam, juxta exemplar tibi à Christo monstratum, & juxta lumina à S. Spiritu immissa, impetret.

*In fine: Te DEUM laudamus.*



in  
næ  
ad  
&  
lu-  
m-  
re-  
ce-  
n-  
ex-  
na

C  
t  
e  
8  
n  
I



## P A R S II.

### *In Qua*

Continentur Medita-  
tiones, quæ particulari  
exigentia, devotioni,  
& usui diversæ conditio-  
nis & statûs hominum,  
In octiduo Exercitio-  
rum spiritualium ser-  
vire possunt.



## Meditatio I.

### De peccatorum gravitate.

*Praludium I.* Imaginare Christum à listoribus in horto Getsemani comprehensum, conculcatum, catenis & funibus constrictum, indignè tractatum, & ad ulteriora Passionis suæ tormenta, ac etiam ad mortem ipsam ductum.

*Praludium 2.* Postula à Deo gratiā, ut fructuosè cognoscas, quas & quantas injurias peccatum irrogat Christo, imò omnibus etiam creaturis, & ut à peccato, hac ejus gravitate deterrearis.

*PUNCTUM I.* Audi Christum per Prophetam dicentem Psal. 29. *Qua utilitas in sanguine meo, dum in corruptionem descendo?* Et considera per peccatum Christo, Passioni, infiniti valoris meritis, & pretiosissimo Sanguini ejus, gravissimam irrogari injuriam.

Gravissima Christi injuria est, quòd frustratur fine adventus sui. Finis adventus Christi fuit, ut homines vitam haberent, & abundantius haberent; peccatum homines vitā spoliatur, vitam eripit, & inducit mortem. Gravis injuria Christi, quòd impediatur fructus adventus illius. Fructus adventus Christi esse debuit, attestante Propheta, ut auferretur peccatum, consummaretur iniquitas, finem acciperet prævaricatio; quæ tamen finem non accipit, nec aufertur peccatum, dum de novo committitur imò plura & plura accumulantur. Meritorum & Sanguinis Christi idem omnino finis, idem fructus, esse debuerat. Hòc enim pre-  
tio

ut & vita animæ nostræ constitit, & á servitute peccati redempti sumus. Quanta igitur injuria Christi est, dum Christus nostrâ culpa non consequitur finem & fructum meritorum suorum, & copiosè effusi sanguinis, Sentit gravissimè Christus hanc suam injuriam, dum apud Prophetam conqueritur Isaïæ 49. *In vanum laboravi, sine causa, & vane consumpsi fortitudinem meam.*

Ulterius gravissima injuria Christi est, quòd iterum flagelletur, crucifigatur, ostentui habeatur; hoc etiam nunc præstat peccatum, secundum Apostolum dicentem *Rursus crucifigentes Christum in cordibus vestris.* Gravissima injuria DEI hominis seu Christi est, quod in conculcationem veniat, irrogatur hæc injuria Christo per peccatum juxta illud: *Tota die conculcavit me homo.* Gravissima adhuc injuria ejusdem Christi est inde, quòd is qui venit propter salutem omnium, sit in ruinam multorum, quòd ipsius adventus sit occasio damnationis plurium, sit occasio tot offensarum DEI. Si non venissem, peccatum non haberent, nunc autem excusationem non habent in peccatis suis; quòd in opprobrium Sanguinis Christi, tot animabus, pretioso hoc Sanguine redemptis, repleatur infernus, maximè verò quod repleatur infernus illis, qui aliquando dealbaverunt stolae in sanguine Agni, quales sunt homines Christiani, Sanguine Christi aliquando abluti, tum in Baptismo, tum per aliorum Sacramentorum susceptionem. Has injurias Christus patiens, merito dolet & conqueritur. *Qua utilitas in sanguine meo, dum in corruptionem descendo.*

Hæc considerans fac reflexionem supra te ipsum. Quòd & tu sæpius impediveris in te ipso finem & fructum adventus Christi, meritorum & sanguinis ab eo fusi. Hoc certè sanguine pastus, poteris abundantissimè vitam habere, ipso irriga-

tus, poteras fructum centesimum ferre, & omne auferre peccatum.

Fac reflexionem quàm crudelis Christi crucifixor fueris? quanta is in corde tuo tormenta, ignominias, opprobria, cruces suslinuerit? quoties à te conculcatus, sub tuis pedibus ingemuerit? cogita an Christus sæpius non fuerit tibi in ruinam? quam excusationem habebis in peccatis tuis, à Christo redemptus, illiusq; præceptis, consilijs, exemplis, tanto labore instructus? Cogita an per peccatum actuale, quod post Baptismum, primum commisti, & per quod te evacuaſti à Christo, illiusq; meritis, an Sanguis Christi non descenderit in corruptionem? Cogita iterum an post deplorata à te peccata tua, & in Sacramento pœnitentiæ abluta & deleta, per sæpius commissos relapsus, rursus Sanguis Christi non venerit in corruptionem. Omnino venit per omnes & singulos lapsus, tunc verò vel maximè venit Sanguis Christi in corruptionem, quando indignè Sacramenta pœnitentiæ & Corporis Christi, aliaq; suscepisti, quando ad sacram Eucharistiam in peccato mortali non expiatio accessisti. Ita tunc Sanguis Christi descendit in animam tuam in suo stercore computrescentem, atq; si in fœtentem & fœdissimam sentinam missus fuisset, imò gravior longè illa est Sanguinis Christi cunctumelia, quàm hæc eſſet.

Exhorresce immanem hanc tyrannidem & crudelitatem. Totus contremisce considerans: an Sanguis Christi, qui tuâ culpâ toties in corruptionem descendit, non est tibi futurus in æternam animæ tuæ perditionem & damnationem? Serio cogita an tuâ animâ, in opprobrium Sanguinis Christi, quo tam sæpè abluitur, non sit aliquando replendus infernus? execrare nefanda crimina tua, concipe odium quàm maximum, odium implacabile adversus quodvis peccatū lethale.

Hæc

Hæc cogitatio sit tibi adversus omnes tentationes remedium: ergone ego finem & fructum adventus Christi sceleribus meis impediam? ergone vim & virtutē meritō Salvatoris mei ipsiusque pretiosissimi Sanguinis evacuabo? ergo iterū Christum amore mei in cruce mortuū, in corde meo crucifigam, rursum crucē ei ignominiosissimam erigā? num fortē Filium DEI conculcabo? O JESU qui salvis animæ meæ desiderio, in crucem es actus, nunquid ideo in cruce extensus es, ut mihi esses in ruinā? Nunquid in mundum idēo venisti ut ego peccatū haberē, & non potius, ut ab ejus servitute liberarer? O anima mea ideo ne Sanguis Christi pretiosissimus tam copiosē in te defluit, ut descendat in corruptionem? ut sit tibi in perditionē? ut in opprobrium Sanguinis hujus, te ō anima aliquando repleatur infernus? ō misera voluptas ō perversa voluntas mea, tu ne tantorum malorum causa existes? ergone in Christicidā, in Christi crucifixorem me transformabis? tunc Filium DEI pedibus meis conculcandum objicies? ergone per te stabit ut Christus sit mihi in ruinam, ut Sanguis, ejus in corruptionem veniat ut sit mihi in perditionem æternam? Tunc in opprobrium Sanguinis Christi me præcipitabis in infernum: Absit Domine, non fiet tibi hoc, ut à me talia sustineas. O anima mea excute peccati jugum & servitutem, ō detestanda voluptas, quid est quod aliquando in te consenserim? moriar prius, quàm ut in te deinceps consentiam.

PUNCTUM II. Audi illa verba Tobiae 12.

*Qui faciunt peccatum & iniquitatem, hostes sunt animæ suæ.* Et cogita per peccatum quodvis maxime lethale, ipsi animæ peccatoris gravem irrogari injuriam. Hostem magis insensum & capitalem peccator habere non potest, quàm seipsum si peccet; nullus hostis animæ magis nocere & plura ac majora damna inferre valet, quàm ipse peccator eidem inferat. Alij hostes quamvis nocendi stu-

diosissimi, nocere animæ non possunt, nisi voluntas peccatoris accedat, & per hanc, si in peccatum, in quod inducunt, consentiat, unice nocent.

Ac inprimis peccator vitam animæ suæ eripit, eâq; privat, peccato nimirum quovis mortali animam conficit, ut DEO amplius non vivat sed sit cadaver exosum ac detestabile.

2do. Peccatum animam spoliât ingentibus bonis, ut ait S. Laurentius Iustinianus *Unius peccati consensu immensas amittit divitias*, nimirum amittit gratiam sanctificantem, dona supernaturalia infusa, omnia merita, merendi potentiam, aptitudinem & condignitatem, aliaq; his similia.

3to. Peccatum tollit in anima imaginem DEI, ad quam formata est, & turpissimi monstri speciem inducit.

4to. Peccatum facit DEUM hostem animæ, est causa, ut anima à DEO relinquatur, odio habeatur, DEUSq;ne illam persequatur.

5to. Peccatum animam omnibus Sanctis exosam & abominabilem facit, facit illam gravissimè fœtere, ut hunc fœtorem non ferens S. Angelus Custos, longissimè à tali anima abscedere debeat.

6to. Omnes creaturas armat contra animam peccato inquinatam

7mo. In anima producit molestissimum conscientie vermem, qui eandem affligit gravissimè.

8vo tandem animam constituit in præsentissimo damnationis æternæ periculo, aufertq; omnem salutis securitatem.

Omnia hæc sunt gravissima animæ mala per peccatum causata, ut meritò peccator hostis isq; perniciosissimus sit animæ suæ,

Etiam hæc consideratio moveat te ad concipiendum odium & horrorem peccati, moveat amor animæ tuæ, cujus jacturæ & damno, ne totius quidem mundi lucrum comparari potest.  
juxta



Juxta illud: *Quid prodest homini si mundum universum lucretur anima vero sua detrimentum, patiatur?* Hortare te ipsum, ut non sis deinceps crudelis in animam tuam, utens illis Ecclesiastici verbis: *Miserere anima tua placens DEO.*

PUNCTUM III. Audi Apostolum ad Rom: 8. dicentem. *Omnis creatura ingemiscit.* Et considera per peccatum non solum Christo, non solum animæ ipsius peccatoris, sed etiam cuivis alteri creaturæ, gravem inferri injuriam.

Inferitur inprimis injuria Sanctissimæ DEI Parenti Virgini Mariæ. Eò ipsò quòd inferatur injuria Filio Mariæ, DEO homini, inferitur injuria & Matri. Mater Sanctissima injuriam Filij sui non potest sentire, nisi tanquam injuriam propriam. Cruci affigis Christum, lanceâ cor JESU petis, gladium infigis pectori Mariæ, animam ejus pertransit gladius. Si etiam nunc dum Christus impassibilis est, peccator per peccatum rursus crucifigit in corde suo Christum, etiam nunc idem in eodem corde suo, gladiò transfigit animam Mariæ.

2dò. Inferitur injuria S. Angelo Custe di, cujus gravis injuria est, quòd ejus instinctibus à peccato retrahentibus non obediatur, quod ei præsentì non exhibeatur reverentia, sed in ejus conspectu & præsentia tanta patrentur, quæ homine præsentè & spectante non committerentur, quòd Custos hic Sanctissimus contemnatur, procul ablegetur, in locum ipsius, hostis animæ Diabolus advocetur, ei; cedere cogatur.

3tò. Inferitur & irrogatur injuria alijs Sanctis Cælitibus. Si enim aulici magni alicujus terreni Principis in aula ejus commorantes, conspectu ejus frucentes, favores, gratias, honores, & suam omnem felicitatem ab eodem Principe accipientes, injuriam ipsi irrogatam, pro injuria propria habent, eamq; gravissimè sentiunt; à fortiori cæli cives & incolæ,

læ, DEI ipsius aulici & intimi cubicularij, in summis honoribus & felicitate suprema ex viso illo & possessio summo bono consecutâ constituti, injuriam ejusdem ipsius DEI & Chrilli, sentiunt, ut propriam.

4<sup>to</sup>. Quævis etiam aliæ Creaturæ injuriam DEI ut suam ferunt amarissimè. Quævis creatura dicitur & est essentialiter serva DEI. Cùm ergo injuria Domini sit simul injuria servi, injuria Creatoris est injuria creaturæ. Deinde injuria vel violentia quædam est cujusq; rei, si impediatur in consecutione finis sui. Finis aliarum creaturarum est, ut juvent in eo hominem, ut Dominum DEUM suum laudet, revecreatur, eiq; serviat, ac tandem salvus fiat. Hunc finem non consequuntur creaturæ, si homo peccet, quin potius peccato hominis impediuntur, nè obtineatur idem finis, quantâ igitur afficiuntur injuriâ, quanta illis infertur violentia ? Ulteriùs creaturæ omnes clamant, ut homo DEUM amet, suum Creatorem agnoscat, laudet, illiq; serviat, si nihil efficiant, potiùsq; homo, tentatione victus, si DEUM contempnat, odio habeat, ipsamq; oppugnet, dolore hinc afficiuntur & ingemiscunt.

Sed vel maximè ingemiscunt, si peccator aliquibus illarum abutitur ad offensam DEI, vel talem affectet abusû. Expostulavit aliquando asina cum Balaam, quòd illam cæderet nolentem progredi, contra voluntatem DEI, illis verbis miraculose prolatis *cur me cadis ?* si loqui possent plures creaturæ, expostularent sæpius cum peccatoribus quòd illis ad ea quæ legè DEI sunt prohibita, uti velint.

Hæc considerans etiam exinde agnosce gravitatem cujusvis peccati, illiusq; odium & horrorem concipe.

Conclude hoc vel simili affectu : Gemit Christus

stus se à peccatore conculcari, dolet sanguinem suum in corruptionem descendere, ergone ludam & deludam lacrymas ejus? Deslet miserabilem sortem suam anima, nunquid non miserebor illius, placens DEO? ingemiscit omnis creatura ad offensam sui Creatoris, & ego solus exultabo in rebus pessimis? Quis dabit capiti meo aquam? & oculis meis fontem lacrymarum & plorabo die ac nocte.

*In fine : Pater noster.*

## Meditatio II.

De peccatorum gravitate.

Præludia eadem quæ meditationis præcedentis

PUNCTUM I. Audi Apostolum dicentem ad Roman. 5. *Non sicut delictum ita & donum.* Et applica hæc Apostoli verba ad excessum, quo peccatum mortale suâ malitia excedit bonitatem cujusvis operis boni puræ creaturæ, atq; considera: Delictum & peccatum grave seu mortale, tantæ esse malitiæ, ut nullû donû, quod à nobis DEO offerri, potest nullû nostrum meritum, nullus actus bonus puræ creaturæ, malitiæ peccati comparari possit. Unde si in una lance poneretur injuria, quam DEO irrogas per unum aliquod peccatum mortale, in altera autem lance reponerentur actus intensissimi à te elicitî charitatis DEI, humilitatis, obedientiæ, mortificationes rigidissimæ, orationes, zelosissimæ prædicationes, profusio sanguinis propter DEUM, nondum sicut delictum, ita esset donum, omnibus his præponderaret peccatum, omnia tua merita, minùs placerent DEO, quàm ei-

dem displiceret peccatum, minorem per hæc omnia deferres DEO honorem, quàm intuleris contemptum per peccatum.

Demus adhuc, quòd illi tui actus charitatis, humilitatis, & alij quam plurimi, illæ mortificationes, jejunia, orationes, labores Apostolici continentur centum aut pluribus annis, peccatum autem, quod in uno oculi ictu perpetratum sit. Non sicut delictum ita & donum, omnia hæc tua merita nondum ad bonitatem, parem gravitati & malitiæ peccati pervenerunt. Addantur ulterius lanci illi, in qua reposita sunt tua bona opera, addantur inquam merita Beatissimæ Virginis, merita Sanctorum, Angelorum, Apostolorum, Martyrum, Confessorum, Virginum, omnium Sanctorum, merita totius Ecclesiæ, imò creet DEUS plures mundos, & quantumcunq; illos multiplicet, multiplicentur etiam & crescant in imensum merita hominum & Angelorum, qui in pluribus illis diversis mundis sunt existari, adhuc erit verum dicere, non sicut delictum ita & donum, bonitate suâ hæc non adæquabunt malitiam, & gravitatem unius peccati mortalis, per hæc omnia non refarcitur injuria personalis DEO per peccatum irrogata, magis DEO displicebit peccatum, quàm universa illa placebunt.

Sicut enim quantumcunq; multiplicentur creature rationales, tamen omnium illarum etiam collectim & simul acceptarum dignitas & excellentia nunquam pertingit, aut pertingere potest ad mensuram dignitatis & infinitæ excellentiæ DEI, ita quantumcunq; multiplicentur merita, & obsequia talium creaturarum, hæc tamen etiam collectim accepta, non pertingent ad tantam excellentiam & æstimabilitatem, quanta gravitas & malitia est offensæ, quâ offenditur Persona Divina infinite digna. Siquidem merita & obsequia quæ-

cunq;

cunq; purarum creaturarum æstimabilitatem suam habent à dignitate & excellentia personarum merentium, quæ puræ creaturæ esse supponuntur. Offensa vero Divina, gravitatem & æstimabilitatem suam habet a Persona Divina, summæ, infinitæ, nec adæquabilis unquam excellentiæ, quæ offenditur.

*His consideratis expende ulterius 1<sup>mo</sup> Quàm extrema sit hominis resolventis se in lethale peccatum amentia, velle contrahere debitum, cui exsolvendo nullâ ratione par esse potest, velle tantum malum perpetrare, cui nullum obsequium, tam ipsius offensoris, quàm omnium creaturarum simul sumptarum æquale inveniri potest. Rei hujus adeo vivam apprehensionem habuit S. Maria Magdalena de Pazis, ut morti vicina cum magna animi sui sensu exclamaverit : *Ego ex hoc mundo decedo, antequam possim, vel potuerim comprehendere quomodo una creatura valit offendere Creatorem & patrare peccatum mortale,**

2<sup>do</sup>. Expende quantum debeas DEO tuo si velis pro peccatis tuis, aliquatenus etiam, non condignè satisfacere. Notum ex historijs, quæ fecerit, quantum in se ipsam sævierit S. Christina Virgo, occasione tormentorum & pænarum purgatorij, quæ ipsi aliquando in mentis excessu præsentatæ fuerunt, ut ex his pænis animas liberaret. Magis tu in teipsum sævire debes, plura propter DEUM facere, & majora exhibere obsequia, ut aliquomodo Justitiæ Divinæ satisfacias pro lethali offensa, à te vel alijs perpetratâ, cum inter tormenta vitæ hujus & pænas purgatorij possibilis sit, dari aliquam æqualitatem, quam inter quæcunq; obsequia, seu quamcunq; puræ creaturæ satisfactionem & inter gravitatem offensæ mortalis, quâ offenditur DEUS,

3<sup>tiò</sup> Expende non debere te unquam resol-

vere in peccatum mortale ex quocunq; sine, quantumcunq; honesto & laudabili, & propter ullum bonum. Cum enim nullius peccati mortalis gravitatem adæquare possit sua bonitate ullum bonum creatū, nullum meretur, ut propter illud offendatur DEUS & tantum malum perpetretur.

Elice deinde affectus detestationis & odij peccati, deplora tuam cæcitatem & stultitiam in offendendo DEO, quod tam parvi penderis, DEUM graviter offendere, quod tam facilis fueris ad perpetrandum tantum malum. Fac firma proposita amplius non offendendi DEUM peccatō maximè gravi & mortali, dicens cum Psalmista : *Juravi & statui custodire legem tuam.* Fac item propositum de vita deinceps ducenda, in austera, & rigida pœnitentia, in vigilijs, in abstinentijs in jejunijs, afflictionibus corporis, ferventissimis actibus amoris DEI, contritionis, humilitatis, obedientiæ, aliarumq; virtutum, ut hac ratione aliquomodo satisfacias Justitiæ Divinæ pro peccatis, quibus summam ejus excellentiam offendisti, cum certus sis, gravitati & malitiæ peccati mortalis, nullum obsequium in sua bonitate æquale te exhibere posse. Fac tandem propositum propter nullum bonum, nullum tuum commodum & emolumentum etiam spirituale, quantumvis sperares, hac ratione quàm maximè promovendam gloriam Divinam, te aliquando commissurum quodpiam peccatum. Postula à DEO supplex gratiam, quā adjutus, nunquam deinceps DEUM offendas. Postula item gratias quibuscunq; mortalibus, ut hi pariter nunquam DEUM offendant, ut peccata præsertim mortalia non committantur ab hominibus, vel certè quàm maximè minuantur.

PUNCTUM II. Audi verba ejusdem Apostoli Pauli ad Rom : 5, *Reconciliati sumus DEO, per mortem Filij ejus.* Et considera etiam ex eō gravitate in



tatem peccati mortalis. Quòd ut reconciliaremur DEO per peccatum offenso, necesse fuerit Filium DEI, hominem fieri, & pro peccatis nostris in carne humanâ, condignam exhibere satisfactionem, talemq; satisfactionem exhibitam, & reconciliationem hominum cum DEO factam esse per mortem Filij DEI crudelissimam. Duo specialiter apprehende & ex utroq; gravitatem peccati cognosce, nimirum, quòd ad reconciliandum DEO, hominem, opus fuerit satisfactione Filij DEI. Deinde quòd hæc satisfactio à Filio DEI Incarnato, non aliter exhibita sit, nisi per acerbissimam & crudelissimam mortem ejusdem.

Et imò quidem tanta gravitas est peccati mortalis, ut ad reconciliandos homines DEO, per tale peccatum offenso, & ad satisfaciendum ad æqualitatem justitiæ Divinæ pro eodem, necesse fuerit Filium DEI, hominem fieri, & satisfactionem hujusmodi exhibere. Cum enim nulla pura creatura imò nec omnes etiam, quantumcunque multiplicatæ, collectivè sumptæ, potuerint exhibere obsequia, sive intensione, sive numero & multititudine, quantumvis crescentia, quæ tantæ excellentiæ & bonitatis essent, ut peccati etiam unius mortalis gravitatem adæquarent, ut visum est puncto præcedente; clarum est nullam puram creaturam quantumcunq; gratiâ Divinâ alijsq; donis Divinis exornatam, ac ne omnes quidem puras creaturas simul sumptas, potuisse exhibere DEO condignam satisfactionem pro peccato mortali. Hæc enim condigna esse non potest, si non adæquet suâ excellentiâ & æstimabilitate gravitatem offensæ mortalis. Cum verò unigenitus DEI Filius in carne humana assumpta, potuerit exhibere DEO & Justitiæ Divinæ obsequia tanti valoris, excellentiæ, & æstimabilitatis, imò longè majoris, quàm sit gravitas peccati mortalis, quævis enim

nim obsequia DEI hominis æstimabilitatem & valorem suum non solum accipiunt a Persona Filij DEI à qua exhibentur; quemadmodum offensa mortalis suam gravitatem & æstimabilitatem desumit à Persona Divina quæ offenditur; sed insuper merita Christi æstimabilitatem suam à Persona Filij DEI habent, longè perfectiori modò, quàm sit modus, quò suam gravitatem desumit offensa DEI mortalis, à Persona Divina offensa. Habetur exinde, necesse fuisse, ut una ex Personis Divinis, v: g: Filius DEI homo fieret, & in carne assumpta Justitiæ Divinæ satisfaceret, ad peccatores DEO reconciliandos, eosq; viâ condignæ satisfactionis liberandos à peccato.

2do. gravitas peccati mortalis hinc æstimanda est, quòd Christus satisfactionem pro peccatis nostris exhibuerit per tot obsequia, labores, sudores, per tot & tam sublimes virtutum actus, per tot ærumnas, dolores, tantorum cruciatuum perpeffionem, tantam sanguinis effusionem, ac etiam ignominiosissimā & crudelissimā in cruce mortē. Potuit Christus quocunq; suò minimò obsequiò satisfacere condignè pro quibuscunq; etiam infinitis peccatis mortalibus, omnium hominum & Angelorum, etiamsi plures mundi creati fuissent, idq; pro peccatis quantumcunq; enormibus, tamen ut ostenderet gravitatem peccati mortalis, hujusq; gravitatis apprehensionem faceret hominibus, & quò melius odibilitatem tanti mali detegeret, non nisi tot laboribus, tot sudoribus, tot impensis, tot & tantis obsequijs satisfacere voluit. Unico actu humilitatis suæ, subijciendo se ex. gr. Matri suæ Sanctissimæ, potuit Christus satisfacere pro peccatis omnibus etiam gravissimis, Et tamen ut satisfaceret pro peccatis nostri, humiliavit se usq; ad abjectionem sui ad pedes Judæ, humiliavit se usq; ad exinanitionem, usq; ad ignominiosissimam mortem.

Potuit;

Potuit Christus satisfacere condignè unicò obedientiæ actu, idq; in rebus facilibus, ad quæ sentiret inclinationem, & tamem obediens fuit totâ vitâ suâ, obediens fuit non solum Patri æterno, non solum Matri suæ Sanctissimæ, & suo Patri putativo S. JOSEPHO, sed etiam obediens fuit hominibus sceleratis, obediens fuit Cæsari, Regibus, Principibus Sacerdotum, Præsidibus, Satellitibus imò etiam ipsis licetoribus, idq; obediens fuit in rebus difficillimis, quia in suscipiendo & acceptando præcepto mortis, in exhibendo suo sanctissimo corpore ad durissima tormenta. Potuit Christus satisfacere, pro totius mundi peccatis, in primo suo in mundum adventu, in conceptione vel nativitate sua, satisfecit verò per tanti temporis annorum nimirum 33 & amplius labores, per tot sudores, operatus est salutem nostram in medio terræ, in conspectu universæ Hierosolymæ illum ad mortem postulantis, & deridentis. Potuit adhuc Christus satisfacere sine ullo corporis sui vulnere, vel certè per modicum aliquod sibi inflictum vulnus. Voluit tamen satisfacere per tot sibi inflicta vulnera, ut à planta pedis usq; ad verticem capitis non esset in eo sanitas. Potuit satisfacere per effusionē unius guttæ pretiosi sui sanguinis, vel certè per sanguinem in circumcisione effusum, voluit verò satisfacere totius sui purissimi sanguinis, usq; ad ultimam guttam effusione, sanguine ex toto corpore, etiam ex ipso corde Christi Sanctissimo, profluente. Deniq; Christus potuit satisfacere morte aliqua leviori, & pœnis mitioribus, mortem tamen appetiit crudelissimam & maximè infamem, sustinuit tormenta acerbissima. Voluit autem hoc modo ( ut aliàs dictum est ) satisfacere, ut homines agnoscerent gravitatem & fæditatem suorum peccatorum, quam certè non facilè æstimarent & apprehenderent, si Christus leve aliquod obsequi-

um

um & facilè, in satisfactionem pro peccatis nostris, Justitiæ Divinæ exhibuisset.

His consideratis, agnosce ô Anima mea gravitatem & sædientem peccatorum tuorum. Admirare Filij DEI charitatem, ex qua se in mortem crudelissimâ tradidit, ut te Patri tuo æterno reconciliaret. Reflecte etiam te & cogita; Non satis fuit amoris Christi erga te, ut unô obsequiô, unâ aliquâ humiliatione, illô suô suspiriô: *Pater dimitte illis* satisfaceret pro peccatis tuis Justitiæ Divinæ, quavis unum etiam obsequium, una humiliatio, unum suspirium haberet omnem condignitatem & sufficientiam ad extinguendum omne jus in DEO ad iracundi homini propter peccatum, ad satisfaciendum plenè & adæquatè Justitiæ Divinæ pro peccatis totius Mundi, ad reconciliandos peccatores Patri suo æterno. Tot obsequia tam ardua posuit, tam copiosa redemptione te redemit, ut agnoscas gravitatem tuorum delictorum, neque ultra ad hæc revertaris, iterumque te in servitutem peccati conjicias. Ut item intelligas te etiam satisfacere debere pro peccatis tuis. Non dubitavit Christus post effusionem sacratissimi sui Sangvinis in Circumcisione, post abjectionem sui humilem ad pedes Judæ, tot alia tormenta, & mortem subire acerbissimam, & tu dubitabis, post tui à Christo redemptionem, an aliquid in satisfactionem pro peccatis tuis facere & ex parte tua conferre debeas? Pater æternus propter tua scelera ita non pepercit Filio suo, ut etiam morte funestissimâ eum percussisset, tu voles, ut nihil tibi mali accadat, ut nihil pro tuis delictis patiaris, ut nihil DEO offeras. Existimas non debere te adimplere, quæ Christus & Justitia Divina deesse Passionibus, Christi & à te adimpleri voluit. Ut denique intelligas non debere te parvâ satisfactione pro peccatis tuis esse contentum, sed debere te rigidam. agere poenitentiam,

tiam, cōfigi te debere cruci Christi, & mortificationem ejus ferre, debere te, castigatione tui corporis, jejunijs, fame, siti, nuditate, humiliationibus tui, alijsq; operibus satisfactorijs, ad mortem usq; exsolvere peccata tua, & de propitiato peccato quoad vivis, non debere te esse sine metu. Quæ deinceps exsoluturus es, nunc deslere incipe peccata tua, quæ tantorum cruciatuum & mortis Christi causa extiterunt.

O amabilissime DEUS ! tantane peccatorum meorum est gravitas, ut Unigenitus Filius tuus carnem nostram assumere, in eaq; immanissimè excruciarī, & mortem ignominiosam subire debuerit? Tantane peccati mei gravitas, ut Christum ad pedes Judæ deprefferit, sub pedibus conculcantium prostraverit, ut Christū humiliari & exinaniri oportuerit? Tantumne est peccati mei pondus, ut ex purissimo Filij DEI corpore, omnem ipsius sanguinem cum vita & anima expresserit? potius ego hoc pondere ad ipsum infernum deprimi debueram. Lapis hic molaris duræ meæ cervici alligari debuerat, ut me in stagno illo ardente demergeret. O Amor cordis mei, exosculor vulnera tua, quæ tibi amor mei infixit; ad pedes tuos cruci affixos desleo peccata mea, pro quibus ut satisfaceres crucem ascendisti.

PUNCTUM III. Audi verba illa Jerem : 2. *Scito & vide : quia malum & amarum est, reliquisse te Dominum DEUM tuum.* Et considera nullum tantum esse malum, nihil tam amarum esse debere, atq; est dereliquisse Dominum DEUM; atq; malum & amarum est quodvis peccatum, præcipuè grave, contra DEUM commissum. Nimis amaræ afflictiones nobis videntur, quibus frequenter à DEI manu concutimur & flagellamur, amara est vita, ut etiam vivere tædeat, si continuis premamur ærumnis, & adversitatibus, mors etiā, imò

& ipsa mortis memoria plurimis amara est. Juxta illud: *O mors quam amara est memoria tui?* Dies magna Judicii Divini, & vox illius, amara est futura, in eaq; tribulabitur fortis, juxta Sophoniam Prophetam; malus deniq; & amarus infernus est; quia etiam animas cruciabit, quæ amaritudine potissimum cruciantur. quia ibi amaritudo erit, ibi fletus & stridor dentium.

Nihilominus comparatione peccati, dulcia hæc sunt & sva via. Peccatum est virus & venenum amarissimum, est fel draconum, & venenum aspidum in'anabile, illud morsu amarissimo mordet, & necat peccatorem. Inter omnia mala, dereliquisse Dominum DEUM, ita malum & amarum est, ut hoc nonnisi malum & amarum censi debeat. Quod ipsum ex eo ulterius est, quia solum peccatum est malum culpæ, afflictiones verò quæcunq; ærumnæ item, mors, infernus, aliaq; hujusmodi, sunt pœnæ. Porro sola culpa est malum, cum nullatenus DEUS cuiquam velit, nec eam velle & in ea complacere sibi possit, velit autem DEUS & possit velle pœnam, quia vult illam ex suppositione peccati, in eaq; sibi complacet, tanquam in re Justitiæ Divinæ debita, & ab ea exigita.

Deinde, malum culpæ est tantum malum, ut propter nullum bonum consequendum, etiam propter supremam felicitatem eligi & appeti prudenter possit, ut item non sit eligibile ad declinanda quæcunq; alia mala, juxta illud: non sunt facienda mala, ut eveniant bona. Jam verò mala illa, quæ in pœnam infligi solent, nec habent rationem culpæ, bene & prudenter eligi possunt, sive ad consequendum aliquod bonum singulare, sive ad evitanda alia mala ejusdem generis & rationis, tantò magis ad evitandum malum culpæ, ad quod etiam evitandum, non solum possunt, sed etiam debent præeligi & exoptari.



Ex hac consideratione deduces: omnes vitæ hujus ærumnas, cruces, afflictiones, mortem etiam ipsam, imò & infernum præoptare te debere, quàm ut DEUM offendas; & ut declines malum illud & amarum, quod est dereliquisse Dominum DEUM tuum, seu, ut declines quamcunq; culpam, quodcunq; peccatum.

Deduces iterum: omnes amaritudines hujus vitæ, omnes ærumnas, debere tibi dulcescere, ut per illas possis te liberare à malo culpæ, quod unicè mali & amarū est. Frequenter ad graviores amaritudines avertendas & depellendas, adhibes amaritudines, sed leviores. Ut interiora depellamus tormina, morborū item mala, & amaritudines, utimur amara potione & medicinā. Amaritudo peccati, quæ & gravissima & maximè periculosa est, depelli potest amaritudine pœnitentiæ. si amarè desleveris peccata tua, si in amaritudine fuerit oculus tuus, absterges gravissimam amaritudinem culparum tuarum. Desse itaq; amaris lacrymis peccata tua, pœnitentijs, afflictionibus, mortificationibus & quibusvis asperitatibus hoc malum depelle, dulcescant tibi hæc omnia, ut non te cruciet & conficiat illud malum, & amarum, quod est dereliquisse Dominum DEUM Creatorem tuum. Fac proposita, elice protestationes & varios affectus.

In colloquio à Christo cruci affixo postula, ut amarissima sua morte & passione liberet te ab amaritudinibus quarumvis culparum & peccatorum, & ut dulcoret tibi amaritudinem statūs pœnitentiæ, quam agere debes, ut item dulces tibi reddat lacrymas, quibus deplorabis peccata antea vitæ tuæ, omnesq; mortificationes, quas rigidas & asperas convenit te assumere, ut ad impleas ea, quæ desunt Passionibus Christi.

*In fine: Anima Christi.*

Medi-

## Meditatio III.

## De effectibus peccati mortalis

*Praludium* 1. Imaginare prælium instrui à peccatore contra DEUM, vicissimque à DEO contra peccatorem. Pro parte peccatoris, simul cum ipso, decertant Draco & Angeli ejus, & totus infernus. Pro parte DEI contra peccatorem armatur omnis Creatura.

*Praludium* 2. Postula à DEO gratiam, quâ illuminatus cognoscas in bello hoc injusto, certò succubiturum peccatorem, & in maxima conjiciendū mala & pericula.

PUNCTUM I. Audi illa verba Prov. 15. *Longè est ab impijs DEUS.* Et considera: quòd DEUS quemadmodum justis adest, & adeste censetur, specialiiori quodam modo, adest enim illis per gratiam sanctificantem, per charitatem in cordibus ipsorum diffusam, per quam etiam se habitare in iisdem profitetur. Adest item justis per gratias actuales speciales, & specialem circa eos suam benevolentiam & providentiam exercet, adest adhuc ipsis singulariori protectione & auxilio, illos contra hostes eorum defendendo; Ita è contrario DEUS ab impijs longè abest; abest per privationem gratiæ sanctificantis & donorum supernaturalium infusorum, abest per subtractionem gratiarum specialium actualium, suæq; specialis benevolentiae, abest denique per denegationē protectionis, auxilij & defensionis contra hostes animæ ipsorum, tentationesq; & insultus dæmonum.

O quàm miser ille est, à quo DEUS ita elongatur. Infelices tales DEUS appellat Osee 9. *Vae illis, cum recessero ab eis.* Non est ita miser infans, à quo, inter urticas & vepres positò, sua recessit

cessit mater, Cæcus item absq; viæ duce in præcipitio constitutus, aut grex ovium in solitudine, in medio luporum à pastore derelictus: atq; est misera & infelix anima peccatoris, à qua DEUS recessit. Quid superest animæ taliter a DEO derelictæ? an non illud, quod /achar. 1. dicitur. *Non pascam vos, quod moritur, moriatur, quod succiditur, succidatur.* An non hoc, ut lupi inermes & insensibilissimi animæ hostes dæmones, in talem animam irruant, ad perdendam eam, certatimq; exclament. *DEUS dereliquit illum, persequimini & comprehendite eum, quia non est, qui eripiat.*

Hoc consideratò, exhorresce talem à DEO derelictionem, time, ne à te DEUS aliquando recedat, & se elonget. Quia vero DEUS neminem derelinquit, nisi à quo derelinquitur, & ab ijs tantum recedit, qui prius ab eo recesserunt, time & præcave, ne per peccatum à DEO aliquando elongeris, & Creatorem tuum prius derelinquas. Protestare coram DEO, quòd ipsi adhærere velis, dicens: *Mihi autem adharere DEO bonum est.* Postula etiam à DEO, ne te permittat à se elongari, nec ille te à te elonget, usus illis Psalmistæ verbis. *DEUS, ne elongeris à me, DEUS meus in auxilium meum respice.*

PUNCTUM II. Audi illa verba Psal. 5. *Odisti omnes qui operantur iniquitatem, & Sapient. 24. Odio sunt DEO impius & impietas ejus.* Et considera, quòd DEUS propter peccatum non solum derelinquat peccatorem, sed etiam, quòd gravius est, odio ave. setur & peccatum ipsum, & ratione peccati, peccatorem. Circa hoc odium Divinum peccati & peccatoris, tria considera.

1<sup>mo</sup> Quòd DEUS verò & propriò odiò prosequatur peccatum. Peccatum enim è diametro oppositum DEO, peccatum est offensà supremæ majestatis, est læsio summæ excellentiæ Divinæ, pec-

catum est oppositum essentiae, omnibusq; perfecti-  
onibus DEI, est oppositum omnibus & singulis Per-  
sonis Divinis, est oppositum actibus DEI liberis.  
Cum ergo DEUS necessario seipsum amet, idq;  
summè amet, necessario sibi in seipso suisq; perfe-  
ctionibus complacet, consequens est, ut necessario  
aversetur & odio habeat omne id, quidquid sibi  
suisq; perfectionibus adversatur; Ex duobus enim  
oppositis, sibi; maximè repugnantibus, quò ma-  
gis prosequimur unum, eiq; affi imur, eo magis al-  
liud oppositum aversamur & detestamur.

Confidera 2dò DEUM ita averiari peccatum,  
& ratione peccati, peccatorem, ut hæc sola nonnisi  
aversetur & odio habeat, nihilq; præterea ultra  
hæc; quod ex eo est, quia DEUS diligit omnia  
quæ fecit, & nihil odit eorum quæ fecit. Solum  
autem peccatum est, quod DEUS non fecit. Is  
enim solus peccatum, ut tale, facit, qui ad illud  
concurrit cum inclinatione, complacentiâ, & ex  
propria electione ac determinatione. DEUS au-  
tem, etiam si concurrat ad peccatum ex ratione  
causæ primæ seu universalissimæ, non concurrit  
tamen ad illud cum inclinatione & complacentiâ,  
nec ex determinatione & electione voluntatis suæ  
Divinæ, sed potius concurrat cum summa abhor-  
rentia & renitentia, ac nonnisi ut determinatus à  
voluntate creata. Si autem DEUS odit pecca-  
tum, odit & ipsum peccatorem, tanquam Autho-  
rem peccati, tanquam præcipuam & principalem  
causam rei tam sibi exosæ & abominabilis, tanquã  
illum, qui servire sibi facit DEUM in iniquitati-  
bus suis.

Confidera 3tîò odium peccati à Natura &  
essentiâ DEI ita inseparabile, & tam arctè Divini-  
tatis fundo annexum esse, ut, si DEUS peccatum  
odiò non insequeretur, eò ipsò desineret esse DE-  
US: sicut enim DEO essentialis est amor sui, ita  
debet

debet eidem essentialē esse odium peccati, tanquam rei DEO, utq; perfectionibus maxime repugnantis; Odium vero peccatoris ejusmodi est, ut licet DEUS peccatorem ut talem, hoc est stante & permanente ipsius peccato, non possit non odisse, sicut non potest non odisse peccatum; nihilominus odium peccatoris secundum se spectati, non est essentialē DEO, quia non est essentialē peccatori ut peccatū ipsius semper maneat, sed hæc felicitas ipsius in hac vita est, quod peccatum ipsius tolli ac remitti possit. Sublatō vero ac remissō peccatō, non solum DEUS non odit peccatorem, sed etiam ipsum in gratiam recipit, recipit in filium, ac singulari prosequitur amore.

Hoc Divinum odium peccati, sufficiens motivum esse deberet ad hominem à peccato retrahendum. Dignus certē DEUS est, ne hoc odium ipsius adversus peccatum provocetur, ne a te materia & objectum odij Divini ac perpetuæ displicentiæ ponatur. Odium etiam ipsius peccatoris, quo DEUS fertur in peccatorem propter peccatum, si penitus inspicitur, tantæ efficacis est, ut vivax illius apprehensio à peccato retrahere valeat. Certē filius cavet offensam amantissimi sui Patris, subditus cavet offensam clementissimi Principis, servus optimi sui Domini, ne iram & indignationem ejusdem incurrat. Quidni pariter creatura retrahetur timore à peccato, ne odium Creatoris sui provocet, ipsumq; concitet ad indignationem.

Hæc considerans, reflecte te, an odium Divinum, quō DEUS odit peccatum, ita vivaciter apprehenderis, & apprehendere soleas, ut te illud retrahere soleat à peccato? si te non retrahit aliquando, an saltem post patratum peccatum serio recogites, quā grave sit, odium incurrisse Divinum? Plures subditos, apprehensio iræ Principis terreni, & promeritæ à se illius indignationis, tantum per-

culit, ut intra breve tempus, ac etiam sæpius morte repentinâ illos enecaverit. Apprehensio indignationis Divinæ per peccata tua promeritæ, nolim ut mortem tuam corporalem causet, sed potius ut ad vitam & vitam meliorem te adducat. Age, & felicitate tua utere, quam habes, quod possis à peccato liberari, Deoq; reconciliari offenso, ne te propter tuum peccatum odio habeat, Adhibe media, ut peccatum, quod cōmisisti, in anima tua non maneat; nec perseveret, per seriam pænitentiam illud delere stude; ita enim fiet, ut DEUS non solum te odio non habeat, sed etiam, ut te in gratiam & filium recipiat.

Reflecte iterum te, quantô odiô tu oderis peccatum, an odiô summô? an odiô perpetuô? & totâ æternitate duraturô? an aliquatenus simili illi odiô, quô illud ipsum DEUS odit? An solum oderis peccatum, & teipsum propter peccatum, quamdiu eidem es obnoxius? Cura ut odiô verô & propriô, odiô implacabili prosequaris peccatum, ut nihil præterea oderis ultra peccatum. Peccatorem si odiisti propter peccatum, ita illum odi, ut velis illum à peccato liberari, ut illum velis ex peccato consurgere, ut simul illum ames secundum se, ut optes & desideres conversionem & salutem ipsius, eumq; quàm maximè juves, ut cum DEO in amicitiam redeat, Deoq; serviât in sanctitate. Nam etiam Divino odio, quo DEUS odit peccatorem propter peccatum, est in DEO conjunctum desiderium conversionis ipsius, & amor salutis ejusdē. Ita DEUS odit peccatorem, propter peccatum, ut ipsum benignissimè juvet, auxilia gratiæ suæ illi conferat, ut ad ipsum redeat & convertatur.

Elice affectus, fac proposita accommodata. In omnibus peccandî occasionibus sit tibi deinceps præ oculis odium Divinum, quô DEUS peccatum & peccatorem odit. Urgente tentatione ita te ipsum alloque



alloquere. Ergone anima mea DEUM tuum ad iram & indignationem concitabis? nunquid non ipse Pater tuus est? nunquid non supremus Princeps, nunquid non ille Dominus & Creator tuus.

PUNCTUM III. Auct. DEUM dicentem Psalm.

17. *Persequar inimicos meos & comprehendam, & non conviciar donec desiciant. Confringam illos, nec poterunt stare, cadent subtus pedes meos.* Et considera, quod DEUS non oīem derelinquat peccatores illis gratia habitualē, pluresq; gratias suas actuales & protectionem suam subtrahendo, non solum odio prosequatur & aversetur, sed etiam eosdem gravissimē persequitur, suasq; injurias vindicat. Porro in persequendis peccatoribus, DEUS aliquatenus eum modum & rationē tenet, quā tenet Rex aliquis vel Princeps terrenus in persequendo suo hoste.

Curat ille 1<sup>mo</sup> ut hostem, hostilemq; exercitum in arcto teneat, illumq; cingat, & quasi comprehendat, nec permittit ipsum pedem efferre extra castra, ut comitatum conquirāt, & commoda sua, & vitæ conservandæ subsidia habere possit.

2<sup>do</sup> Curat hostem attenuare, vires illius minuire, ut semper magis ac magis deficiat.

3<sup>io</sup>. Attenuatum hostem confringit, ac ita potentiam ejus frangere nititur, ut ultra non assurgat, nec possit stare subtus pedes ejus.

Simili modō persequitur DEUS inimicos suos, nimirum peccatores. 1<sup>mo</sup>. persequitur illos comprehendendo, hoc est, tenet eos in arcto, per varias tribulationes, aerumnas, afflictiones, morbos, multaq; alia flagella, ut peccator queri debeat; *Circumdederunt me mala, quorum non est numerus.* Talibus adversitatibus arctat & cingit DEUS peccatores, ut se tandem dedant, & DEO subijciant, ut veniam rebellionis & perduellionis suæ postulent, suumq; legitimum deprecentur Dominum.

2<sup>do</sup>

2<sup>da</sup> DEUS, peccatoris quem persequitur, imminuat vires, non solum corporales, sed etiam spirituales & supernaturales, subtrahit illi multa auxilia gratiæ suæ, permittit ut illis quæ ipsi offert, non utatur, nec iidem cooperetur in tentationibus & peccandi occasionibus, ut deficiat & succumbat.

3<sup>ia</sup> DEUS confringit peccatorem, permittendo frequentiores & graviores ipsius lapsus, ut de peccato in peccatum proruat, ut plures contrahat peccaminolos habitus, ut continuo cada, nec possit stare subtus pedes ejus, consequenter DEUS illum calcet in furore suo, & suis pedibus conterit, dat ipsum in reprobum sensum, tandemque morte illum mali & supplicij perdit æternis.

His consideratis, exclamabis cum Apostolo: *Horrendum est incidere in manus DEI viventis. Dānabis deinde multos ausus tuos, quod contra Deum assurrexeris per peccatum, ipsumque provocaveris, ut te tanquam suum inimicum persequatur. Deprecaberis postea humiliter offensum a te Numen, & dices: Contra solum, quod vento rapitur, ostendis potentiam tuam, & stipulam siccam persequeris? scribis contra me amaritudines, & consumere me vis peccatis adolescentie mea.*

In colloquio ad vulnera Christi Crucifixi confugies à facie furoris Domini, petens suppliciter, ut Christus intra sua vulnera te recipiat, ibique abscondat.

*In fine: Anima Christi.*

## Meditatio IV.

### De effectibus peccati mortalis.

*Praludia eadem quæ meditationis præcedentis.*

PUN-

PUNCTUM I. Audi Psalmistam dicentem  
 Psal. 140. *Exaltationes DEI in gutture eorum, &  
 gladij ancipites in manibus eorum, ad faciendam vin-  
 dictam in nationibus.* Et considera his psalmi ver-  
 bis exprimi edium, quò Sancti DEI feruntur in  
 peccata & peccatores. Hi, ita DEUM, quò æ-  
 ternaliter fruuntur, laudant, exaltant, & benedi-  
 cunt, ut simul iusto quodam zelò abripiantur con-  
 tra peccatores, eorumque peccatum tanto odio  
 habent, ut nisi status beatitudinis & felicitatis ipso-  
 rum eos redderet immortales, meritori essent præ  
 dolore & tristitia, quando vel unicum intelligunt  
 patrari peccatum. Offendis DEUM graviter? Ma-  
 ter Beatissima & Sancti DEI morerentur præ displic-  
 entia & indignatione ac odiò adversus peccatum, si  
 mori possent.

Rationem hujus reddit S. Gregorius, Quia  
 Sancti DEO jam fruentes, cum per visionem Bea-  
 tificam sint uniti DEO, & absorpti ab essentia ejus,  
 nihil aliud possunt velle, quàm velit DEUS, nihil  
 amare, in nullo alio delectari, nisi quod amat &  
 quò delectatur DEUS, nihil etiam possunt aliud o-  
 disse, quàm quod DEUS odio prosequitur. Cum er-  
 go DEUS summè oderit peccatum, in eo sibi ma-  
 ximè displiceat, dolore cordis sui Divini tangatur  
 intrinsecus, quoties videt patrari scelera, etiam San-  
 cti summè oderunt peccatum, summè sibi in illo dis-  
 plicent, de illo, quòd fiat, maximè dolent, & quo-  
 dammodo tristantur, Certè amor, quò in DEUM  
 adhuc in hac vita mortali ferebatur vir secundum  
 cor DEI, tantò Zelò eundem accenderat adversus  
 peccatores, ut præ indignatione & odiò peccati,  
 tabesceret & deficeret, sicut ipse de se ipso testatur,  
*vidi prevaricantes & tabescebam.* Quidni pariter  
 aliquomodo Beatificus ille amor, quò Beati DEUM  
 in cælis amant, non simili zelo accendat corda e-  
 orundem?

Accen

Accendit certè, idque non solum ut odio habeant peccata, sed etià ut odio habeant ipsos peccatores, ut eos persequantur, ut contra eos armentur, ut gladios ancipites arripiant ad ulciscendam injuriam DEI, & faciendam vindictam. Hic zelus aliquando ipsius Christi armavit manum, à Cruce avulsam, cruore ejus proprio, ut hunc in faciem cujuspiam obstinati peccatoris projiceret. Idem zelus armavit manus Sanctorum Mercutialis & Arthemij Martyrum contra Julianum Apostatam Imperatorem, idem armavit manum item S. Francisci Seraphici, contra aliquem Prælatum, Religiosos Ordinis à se instituti persequentem.

Contingit quidem aliquando, quod Beatissima & Sancti DEI opponant se iræ & justitiæ Divinæ, suisque precibus vindictam DEI cohibeant. Hoc tamen contingit ex eo, quod DEUS illis specialiter inspiret, voluntatemque eorum moveat, ut pro nobis intercedant, quod nunquam alias fieret, si sequerentur instinctum, quò zelant honorem DEI

Fac reflexiones supra teipsum, & considera, an & tu non contristaveris gravi peccato mortali Matrem Beatissimam? an ex oculis S. Angeli Custodis tui non expresseris lacrymas? An quempiam Sanctorum non armaverit zelus gloriæ Divinæ ad faciendam de te vindictam?

Exhorresce peccatum, detestare illud quàm maximè, adolvere pedibus Matris Sanctissimæ, & desceas cæcitatem tuam, quod tu degener filius, gravissimo dolore, ob patratam à te Verbi Divini Incarnati offensam, tanquam gladiò transfixeris pectus, cor, & animam Sanctissimam Divinissimæ hujus Matris. Postula veniam à S. Angelo Custode tuo, Sanctisque Patronis & omnibus Cælitibus, quòd eos contristaveris, & ad justam indignationem & ulciscendam DEI injuriam provocaveris. Fac proposita, & protestare curaturum te, ut sicut San-

Sanctis illis spiritibus & cæli civibus mæroris causa exstitisti peccando, ita iisdem facias gaudium in cælo super te maximo peccatore pœnitentiam agente.

PUNCTUM II. Audi Job dicentem cap. 17. *Dies mei transierunt, cogitationes meae dissipatae sunt, torquentes cor meum. Noctem verterunt in diem. Et* Considera his verbis exprimi, quod conscientia peccati commissi sit carnifex crudelissimus, sit sævissima ultrix, vindictam sumens ex peccatore. Non solus DEUS, non tantum Sancti DEI, sed & ipse peccator est vindex suorum scelerum. Conscientia mala est vermis nunquam moriens, semper rodens & torquens cor peccatoris. *Hæc est prima & maxima peccantium pena,* ( ut ait Ethnicus Philosophus Seneca, ) *peccasse*; hæc facit, ut fugias nemine persequente, ut omnia timeas, omnia suspecta habeas. De peccatore verificatur illud, quod idem Job cap. 15 dicit: *sonitus terreus in auribus illius semper, & cum pax sit, ille semper insidias suspiratur.*

Talem carnificem expertus est Saul, ut interfici voluerit, non ferens angustias animæ suæ, dū diceret ad quempiam: *Sta super me & interfice me, quoniam tenent me angustiae,* angustiae inquam conscientiae eundem redarguentis, propter crudeliter à se jugulatos Sacerdotes Nobæ, cum Hebraica versio habeat: *interfice me, quia tenent me ora vestimentum Sacerdotalis.* Talem carnificem ex propria conscientia nactus fuerat Antiochus Rex, cum diceret: *Nunc reminiscor malorum, quae feci in Ierusalem, recessit somnus ab oculis meis, & concidi & corruui corde pro sollicitudine, & dixi in corde meo, in quantam tribulationem deveni, & in quos fluctus tristitia?* Ab hoc carnifice cruciabatur Tiberius Cæsar, de quo sic habet Tacitus: *Tiberium non fortuna, non solitudines protegebant, quin tormenta pectoris sui, suasque*  
ipse

*ipse pœnas fiteretur.* Hic lictor Apollodoro, de quo reſe t Plutarchus, per ſomnium pellem detrahebat, & ferventi ac bullienti Ahenò immergebat, cum illa exprobratione. *Ego tibi horum Causa ſum, & ego Conſcientia te torqueo.* Conſcientia Theodorico R. g. Italix, caput ymmachi iniquè occiſi inceſſanter obijciebat, eumque tandem confeſcit. Hujus tormenta non ferentes tot alij, de rupibus ſe præcipitaverunt, alij ſuffocaverunt ſe aquis, alij laqueo vitam finiverunt, pugionibus ſe confo-derunt, alij præ triſtitia contabuerunt.

His conſideratis, refleſcte te ſupra teipſum, an & tu non es aliquando traditus immani huic Carniſſi, ab eo extruciandus? Et propriâ experientiâ ſcies, quantum vermis hic ſœviat & cruciet? Item refleſcte te, an etiam nunc non torqueat te conſcientia tua, & noveris contra has conſcientiæ torturas, unicum remedium eſſe, ſi virus quod viſcera tua rodit, per ſinceram pœnitentiam, integrâ peccatorum tuorum Confeſſionem, & per veram vitæ emendationem evemas & ejcias. Exhorreſce hunc tortorem, time peccatum, ne Deus per conſcientiam tuam te arguat, & ſtatuat contra faciem tuam. Deſe peccata tua, quæ hunc in te vermem generant. Iroicide cum lacrymis ad pedes ſupremi Numinis, dicens cum Job: *Peccavi, quid faciam tibi o Custos hominum? quare poſuiſti me contrarium tibi, & facius ſum mihi met ipſi graviſ? cur non tollis peccatum meum? & quare non auſers iniquitatem meam.*

PUNCTUM III. Audi illa verba Sapien. 16  
*Creatura enim tibi factori deſerviens, xardeſcit in tormento adverſus injuſtos.* Et iterum Cap. 5 *Accipiet armaturam zelus illius, & armabit Creaturam ad ultionem inimicorum.* Et conſidera non ſolum Sanctos armari contra peccatorem, non ſolum i-plum peccatorem eſſe ſibi tortorem & ultorem  
 ſceleris



sceleris sui, sed insuper omnes alias Creaturas adversum eundem exardescere & concitari, ut eum persequantur, ut ulciscantur in illo injuriam sui Creatoris, ipsi noceant, eumque perdant.

Et sic ignis, sicut quondam descendit in Sodomam & Gomorrhā, hasque Civitates cum suis habitatoribus in favillam redegit, ita & nunc, nisi prohiberetur a Deo, descenderet ad urendos & cruciandos quosvis peccatores. Aqua, sicut temporibus Noë, ruptis cataractis cæli, omnem carnem delevit & demersit, paucis animabus servatis, sicut fluctibus suis & tempestate consurrexit contra Jonam non obsequentem mandato Dei, ita etiam nunc peccatores obrueret & in profundum demergeret. Terra, sicut absorpsit rebelles & seditiosos Core, Dathan & Abiron, ita inclinatione sibi innata, vellet quodammodo quemvis absorbere peccatorem, videturque aliquam pati violentiam, quod illos sustineat. Non sunt invitandi montes & colles, ut cadant super peccatores, ipsosque obruant, proprio impulsu caderent & obruerent eosdem, si Deus permetteret. Aër quoque, sicut olim in vindictam peccati David sustulit pestilentiam septuaginta millia virorum, ita & nunc sæviret in transgressores legum Divinarum.

Aliæ quoque Creaturæ, simili (ut sic loquar) feruntur zelo contra peccatores; quantā reverentiā ursi, Leones, tigrides lambebant aliquando pedes Sanctorum Martyrum, tantā ē contrārio ferocia discerperent peccatores & hostes Dei; ita Leones nunc arriperent & ossa peccatorum comminuerent, sicut comminuerunt ossa Assyriorum, ad quorum iniquam accusationem Daniel in locum Leonum missus fuerat. Ursi etiam lacerarent discolos & protervos, quemadmodum ad maledictiōem Elisæi laceraverunt quadraginta duos pueros; serpentes morfu suo necarent impios, sicut necabant

Israelitas

Israelitas in deserto igniti serpentes. Aliæ etiam Creaturæ, maximè illæ, quibus peccator ad Dei offensam abusus est, si tot vires haberent, sævissimè cum peccatore agerent, Deusque & suam injuriam atrocissimè ulciscerentur. Quare meritò peccator post peccatum ab omnibus Creaturistimere debet, meritòque illud dicere potest cum Caim *Omnis qui invenerit me, occidet me.*

Postremo ipsi Dæmones, qui peccatorem suis tentationibus in peccatum inducunt, sunt acerrimi hostes ejusdem. Illi vellent quàm maximè nocere peccatori, vellent ipsum perdere & in suam trahere damnationem, continuo se Deo offerunt ad colligenda hæc zizania: *Vis? imus, & colligimus ea ad comburendum.* Illorum voces sunt quibus se animant contra peccatorem: *DEVS dereliquit eum, persequimini & comprehendite eum, quia non est qui eripiat.* Hanc suam hostilitatem frequenter exercent, aliquando immanibus spectris terrefaciendo peccatores, aliquando in præcipitia, in loca palustrosa eos deducendo, occasionibus obijciendo, in quibus lethalia referunt vulnera, nocendo ipsi per veneficas & præstigia, quod non tam faciliè julis facere permittuntur.

Ratio tantæ hostilitatis Dæmonum in peccatores est. Quia dæmones gravissimè indignantur, quòd homo, habendo tot auxilia gratiæ ad superandas ipsorum tentationes, illis non utatur, sed succumbat tentationibus, quòd habendo tot salutis media, illa negligat, quòd melior non fiat longâ patientiâ Dei, conversionem ipsius expectantis, quia præterea, dum peccata hominum multiplicantur, dæmones vident, suam augeri & crescere damnationem.

His consideratis, reflecte te, quoties & tu meruisti, ut ignis te absumeret, Cælum te fulmine feriret, aqua suis fluctibus involveret, àër pestilentia inficeret

ficeret. Admirare quomodo post patratum à te hoc & illud peccatum, non discerpserint te urfi, lupi non dilaniaverint, viperæ, serpentes, aspidēs suis moribus non enecaverint. Admirare quomodo Dæmonum rabiem evaseris? Admirare in his omnibus Dei patientiam, & longaminitatem, Creaturas omnes ne tibi noceant, cohibentem. Admirare tuā, et aliorum peccatorum in Deo offendendo audaciam, simulque in differenda pœnitentia procrastinationem & tarditatem.

Per modum Colloquij conclude hoc affectu. O quanta Misericordissime Deus, tua bonitas & Clementia! Manus tua potentissima detinuit fulmina, ne me ferirent. Tu orbem terrarum firmasti, ut me sustineret, Tu posuisti terminos aquæ, ne me demergeret, àërem ad respirandum mihi concessisti, ut viverem, Tu conclusisti ora Leonum, tu feroces urfos & lupos in sylvis, serpentes in terræ cavernis, detinuisti, ne mihi nocerent. Tu infernalem Draconem alligasti, ne in miserum peccatorem sæviret. Tu me ex tot casibus, ex tot moribus eripuisti. Et ego tantā clementiā malè usus sum, ut peccatis peccata cumularem. Nunquid ergo ampliùs offendam te? an divitias Bonitatis Tuæ contemnā? Si vides Domine me adhuc peccaturum, fulmine tuo priùs me ferias, igne absumar, absorbeat me puteus, obruat procella, Aer inficiat, Terra os suum aperiāt, atque devoret. Percutiat Leo, discerpat urfus, lupus laceret me, serpentes & viperæ venenoso morfu interficiant, Dæmon obsideat, omnes Creaturæ in me sæviant, antequam peccem, ut offensam Divinæ Majestatis tuæ impediāt, Absit verò ut offendam te, ut Creaturæ Tuæ patratum à me ulciscantur scelus & justas de me meorum, criminum, postquam commissæ fuerint, sumant pœnas.

*In fine Pater noster*

R.

Medi-

## Meditatio V.

## De malis quæ per peccatum incurruntur.

*Preludium 1.* Imaginare Peccatorem in prælio adversus DEUM suscepto infeliciter succubuisse, multaque mala & vulnera lethalia ex conflictu retulisse.

*Preludium 2.* Postula gratiam ut hanc infelicitatem peccatoris fructuosè agnoscas, & ut tam peccatum, quam illa mala, quæ peccatum consequuntur declinare possis.

PUNCTUM I. Audi illa verba Psalm 10 *Pluat super peccatores laqueos* Et Ezech. 3 *Si conversus fuerit iustus à justitia sua, & fecerit iniquitatem ponam offendiculum coram eo.* Et considera inter alias pœnas hanc etiam peccati pœnam esse, quòd DEUS pluatur in peccatores, laqueos, quòd coram illis ponat offendicula, ad quæ dum impingunt, labitur pes eorum, & de peccato in peccatum, cadunt.

Tales laquei & offendicula sunt imò occasiones proximæ peccandi in quas ex Divina permissione peccatores se conijcunt, & quas cum teneantur & possint, à se amovere non student.

2<sup>do</sup> Laquei & offendicula sunt prava aliorum exempla, conversationes cum laxis, dissolutis, liberæ Conscientiæ, imò perversis hominibus.

3<sup>io</sup> Laquei & offendicula sunt, tentationes graves, continuæ, molestæ, quibus tandem ex perversa sua voluntate cedit & succumbit peccator.

4<sup>to</sup> Laquei sunt, Principia perversa, Resolutiones conscientiæ nimium laxæ, tum ab alijs tum à Conscientiæ directoribus & Confessarijs subinde datæ. Si peccator incidat in Confessarium laxum,

adulato-

adulatorem, qui pœnitentem laxè resolvat, vel dissimulet & taceat, nec monstret gravitatem peccatorum, Resolutio vel etiam silentium, talis confessarij est lequeus peccatoris, quo ita capitur, ut audentius deinde in prillina relabatur peccata.

3<sup>o</sup> tandem laqueus & offendiculum peccatoris est levitas & dissimulatio, nimia indulgentia & omissio justæ animadversionis ob peccatoris delicta, sive propriorum Parentum, sive Magistratum, sive quorumcunque Superiorum, quibus subjectus est. Dum enim delicta peccatoris ab his dissimulantur, nec pro merito puniuntur, peccator redditur audacior ad alias transgressionis, dicitque: *Ecce peccavi & quid mihi triste accidit.*

Hæc considerans perpende ulterius laqueos & offendicula hujusmodi poni ante peccatores, in pœnam peccati originalis, sed vel maximè in pœnam peccatorum personalium, cuique homini propriorum. Perpende item laqueis hujusmodi plena esse omnia, ita ut nullum sit vitæ genus, quod aliquibus saltem laqueis & offendiculis non sit obnoxium, ut nullus mortalium sit, qui inter tales laqueos non versetur, qui in aliquem subinde non incurrat, quamvis non æquè sint multiplices in quovis vitæ genere, nec æquè periculosi. Aliqui enim hominum versantur inter frequentiores, alij inter minus frequentes, vel certè versantur extra occasiones peccandi saltem graviter, aliqui licet versantur inter occasiones peccandi, hæ tamen respectivè ad ipsos non sunt proximæ. Alij vivunt in medio nationis pravæ, inter homines discolors, & in omnem licentiam effusos, alij vivunt in gente sancta, populo acquisitionis, in Collegio Apostolorum licet etiam in hoc subinde inveniatur Judas filius perditionis. Aliqui graviore, alij leviores experiuntur tentationes.

Quibusdam, etiam tales tenduntur laquei, ut si in illos incidant

statim strangulentur, suffocentur, & vitam animæ miserè perdant, talia ponantur, offendicula, ut ad ea gravissimè & lethaliter concutiantur, & ad ea allisi illico in præceps ruant, alijs ponuntur offendicula, quæ pedes & vestigia cruentant, sed vitam non eripiunt, tales tenentur laquei, ut eos evitare, & se ex illis faciliè extricare valeant.

Nostra interest, ut continuâ vigilantia & circumspeditione utentes, hos; quantum fieri potest laqueos declinemus. Certe providè & sapienter agit, qui sciens plures esse vias vel semitas ad aliquem terminum, quarum una laqueis & offendiculis ita plena est, ut pedem etiam movere non possis, quin in aliquem laqueum incidas, vel in offendiculum impingas, idque plena est laqueis & offendiculis periculosissimis, in quæ non incidis, nisi cum gravissima concussione, vitæque & salutis tuæ dispendio. Alia via habet quidem & ipsa laqueos in deceptionem transeuntium positos, sed non ita frequentes, habet offendicula, sed non tam multa, nec tam periculosa, Alia rursus via longè adhuc paucioribus laqueis & offendiculis nec multum periculosus est obnoxia & impedita. Hanc postremam minimè periculosam, minimè difficilem viam & semitam qui ingreditur & præeligit, is certè agit providentissimè & sapientissimè.

Reflecte te an & tu non verferis inter huiusmodi laqueos & offendicula, & an inter hæc? inoffenso pede hactenus in via salutis processeris. Recollige te, quos laqueos hostis animæ tuæ tibi obijciat, & quibus magis te illaqueat? quomodo te geras in occasionibus peccandi? an proximas dimittas? quâ fortitudine superes tentationes potissimum graviore? an pravis aliorum exemplis & conversatione non corrumparis? An gravioribus tuis peccatis non promerearis, ut Deus super te pluat laqueos periculosos, & saluti animæ tuæ nocentes



*De malis quæ incurruntur per peccatum.* 236

centes aut nocituros. Reficte te, quâ deinceps tibi viâ procedendum sit, ut non incidas in laqueum Diaboli, ut non aberres nec deflectas à termino felicitis æternitatis, sed potius cum majori spe & securitate salutem tuam consequaris. Postula Divinam gratiam quâ illuminatus, possis effugere omnes laqueos, & insidias inimicorum superare, ut deinde in felici æternitate possis Deo laudem decantare. *Laqueus contritus est, & nos liberati sumus.*

PUNCTUM II. Audi Ecclesiasticum dicentem Cap. 3 *Peccator adijciat ad peccandum & Psal. 68 Appone iniquitatem super iniquitatem eorum.* Et considera, inter ingentia damna & mala quæ causat peccatum, esse etiam illud, quod unum peccatum impellat in aliud. Peccata ordinariè solitariè non incedunt, commisti unum, in unum te resolvisti, facilius iues in aliud. Peccatum, est ignis ad perditionem devorans, ignis inquam, non solum quia omnia bona, omnia merita tua perit & devorat, sed quod sit fecundissimus in tot alijs similibus ignibus, scilicet in alijs pluribus peccatis producendis. Peccatum est simile ferro magnete affricto, sicut enim hoc trahit ferrum aliud, ita & peccatum unum trahit post se aliud. Peccatum est circulus, cum alijs circulis unum longam catenam efficientibus connexus. Est Abyssus, sed ille de qua Prophetia dicit: *Abyssus abyssum invocat.* Hanc concatenationem peccatorum videtur expressisse S. Jacobus Apostolus dum dicit: *Qui in uno deliquit factus est omnium reus,* hoc est: reus est, seu meretur, ut in alia omnia peccata prolabatur.

Expende quanta hæc sit pæna peccatoris? quantum malum? magnum malum est vel semel Deum graviter offendisse. Per unum etiâ peccatū gravissima Deo irrogatur injuria, impugnatur Essentia Divina, Attributa Dei, omnes Personæ Sanctissimæ Trinitatis, & actus Dei liberi. Per unū peccatum gravis irrogatur injuria Deo homini seu Christo, ipsi peccatori?

tori, & omnibus creaturis. Unum peccatum provocat iram & indignationem Beatissimæ, Sanctorum Angelorum, & Sanctorum Omnium, facit, ut ipse peccator sit acerrimus sibi ipsi hostis, omnesque Creaturas contra ipsum armat. Unum denique peccatum spoliat animam peccatoris, omnibus meritis, spoliat gratiâ Sanctificante & donis infusis spoliat vitâ spirituali, & inhabilem reddit ad merendum. Si igitur tantum malum est, semel graviter peccasse, quantum malum est, iniquitatem super iniquitatem apposuisse. Hoc est malorum omnium maximum, quo malo majus, ne Divinæ quidem Justitiæ brachium potentissimum, peccatori inligere potest, dum culpæ culpis cumulantur. Hæc pœna est, quam Deus permittere quidem potest, velle autem voluntate beneplaciti, & complacere sibi in ea, etiam ex peccati commissi suppositione non potest, quomodo Deus potest velle multas alias pœnas. Hanc pœnam in tantum Deus infligit, in quantum peccatori, quem ab æterno prævidit peccaturum, certa que sua auxilia oblata ad superandam tentationem, inefficacia redditurum, confert talia auxilia, nec succurrit per gratias efficaces, quibus ille gratijs destitutus ex sua pravitæ & malitia, labitur, atque tentationi succumbit.

His expensis exhorresce gravissimam hanc pœnam. Exhorresce quodvis peccatum, quod ad tantam indignationem Deum provocat, ut tam gravimò omnium pœnarum gravissimâ pœnâ peccatorem puniat. Detestare præteritæ vitæ tuæ scelera, supplica supremo Numini, ut te, quibuscunque alijs pœnis puniat, & aliter in te vindicet tua crimina, non puniat autem te pœnâ hac gravissima, ut apponat iniquitatem super iniquitatem tuam.

PUNCTUM III Audi Ecclesiasticum dicentem Cap. 5 *De propitiato peccato noli esse sine metu.* Et considera, inter mala, quæ affert peccatum mortale

tale, esse & illud, quod in tota vita hominis omnem tollat salutis securitatem. Qui aliquando Deum graviter offendit, in eam incidit mueriam, ut licet pœnitentiam agat, semper timere debeat, an sibi remissum sit suum peccatum.

Potest quidem scire peccator, Catholicâ edoctus fide, quod Sacramentum Pœnitentiæ ad tollenda peccata post susceptum commissâ baptismum, sit singularissimum remedium, sit inexpugnabile scutum, quo protegere nos possumus contra fulmina & ictus Iustitiæ Divinæ, quod sit secunda tabula, quæ post peccati naufragium potest nos salvare, & in qua nobis enatandum est, potest scire, quod idem Sacramentum sit Civitas refugij, ad quam confluxiones rei mortis, à morte liberantur, quod sit pœlona probatica, in quam descendentes infirmi possunt curari à quacunque animæ infirmitate, non Angelo, sed Spiritu Sancto movente & educente aquam lacrymarum, ex corde contrito peccatoris, & sacerdote in Sangvinis Christi bulneo, peccati-cem abluciente animam. Hæc, inquam, peccator pro certis & indubitatis veritatibus habere potest & debet.

Cæterum non potest esse certus, an Sacramentum Pœnitentiæ ad delenda peccata institutum, debite ab ipso sit susceptum, eique ritè & valide collatum. Non potest scire, an illo, impervio vindictæ Divinæ, scuto se muniverit, an certè loco hujusmodi scuti, telam aranearum facile dirumpendam, in suam defensionem & protectionem non adhibuerit. Nescit an tabulam illam secundam, per quam ex naufragio salvari debuit apprehenderit, an non potius lignum aliquod putridum, quo demergendus est, nescit an portæ Civitatis refugij, sibi ad eam confugiendi patuerint, an ad Civitatem refugij confugerit, an non potius erraverit, & aliò diverterit, ubi non poterit salvari.

Nescit an motus ille, quo excitatus fuit ut descenderet in piscinam probaticam, in qua sanandus erat & per quem motum,eductæ sunt lacrymæ ex corde ipsius, an fuerit motus Spiritus Sancti, fueritne motus gratiæ Divinæ supernaturalis, an certè motus aliquis merè naturalis. Nescit, ille dolor, illæ lacrymæ quibus deslevit sua peccata unde sunt ortæ, ex quali motivo, an ex motivo supernaturali, an certè ex affectione aliqua & voluntatis inflexione merè naturali.

Quod ipsum ut melius penetres, rem propositam sic intellige. Potest peccator Fide Divinâ edoctus credere, Sacramentum pœnitentiæ esse à Christo institutum, ad tollenda peccata, post Baptismum commissa, habereque vim & virtutem delendi quæcunque peccata, ex Meritis infinitis Christi, in eodem Sacramento inclusis & contentis. Penes Sacerdotes atiam legitimè ordinatos & approbatos esse potestatem remittendi peccata, & hoc Sacramentum, fidelibus verè pœnitentibus ministrandi. Potest etiam ac debet scire peccator, partes essentielles hujus Sacramenti esse 1<sup>mò</sup> Confessionem omnium peccatorum formaliter integram, factam coram Sacerdote legitimè ordinato & requisitam jurisdictionem habente. 2<sup>dò</sup> Dolorem supernaturalem, universalem de peccatis commissis, ex motivo, quale requirit Concilium Tridentinum, qui dolor excludat voluntatem peccandi, sitque conjunctus cum firmo proposito de non peccando deinceps. 3<sup>tiò</sup> absolutionem à Sacerdote legitimè ordinato & habente jurisdictionem, verbis ad id constitutis, peccatori pœnitenti collatam, ex intentione faciendi quod facit Ecclesia. Insuper peccator pœnitens potest scire, quod fecerit confessionem & absolutus sit. Nihilominus scire & certitudinem habere non potest, an sua confessio fuerit integra, integra inquam non tam materialiter  
aliter

aliter, quàm potius formaliter, an verò ratione aliqujus defectûs non fuerit mutilata, non potest scire, Sacerdos apud quem sua peccata est confessus, fueritne legitimè & validè ordinatus, an habuerit jurisdictionem requisitam. Non potest item scire, dolor suus quem elicit, fueritne supernaturalis & ex quali motivo, potest dubitare an suum propositum fuerit firmum & excludens voluntatem peccandi, tandemque neque hoc potest scire, an forma absolutionis fuerit valida, an non vitiata aliquâ ratione, ob defectus supra insinuos potestatis, ordinis, vel jurisdictionis in Ministro, vel ob defectum intentionis in eodem talis, qualis ad valorem requiritur.

His consideratis admiraberis stultitiam illorum, qui liberius peccant in spem veniæ & deletionis suorum peccatorum obtinendæ per Sacramentum Pœnitentiæ. Reflectes te deinde supra tuas Sacramentales confessiones, an illis meritò fidere possis, quid de illarum integritate, quid de dolore de & firmitate tui propositi sentire debeas, Et facile agnosces de propitiato (ut existimas) peccato non debere te esse sine metu. Quodsi adverteris aliquos defectus commissos esse circa tuas confessiones, dolorem, & similia, defectus hos corrigere stude, per frequentes contritionis perfectæ actus, per confessionem generalem, per subjectionem totius vitæ tuæ peccatorum sub terminis saltem generalibus, subjectionem inquam clavibus Ecclesiæ in quovis Sacramento Pœnitentiæ quod aliquando susce-  
pturus es.

*Fac circa hac proposita.*



*Medit*

# Meditatio VI.

## De quibusdam peccatorum pœnis.

*Præcludia eadem quæ meditationis præcedentis.*

PUNCTUM I. Audi Spiritum Sanctum, Sapientem dicentem: *Excacavit illos malitia eorum.* Et iterum Sophon. 1. *Ambulabant ut cæci quia Domina peccaverunt.* Et considera inter alia damna, quæ infert peccatum, & inter alias pœnas peccati, esse excacationem peccatoris, quod misera anima in tenebris exultat, quam excacationem ut melius penetres

*Considera ulterius, per peccatum triplicimodo excacari peccatorem.*

Imò per hoc, quod peccator post suos lapsus & in peccatum resolutiones, lumen negligit, nec curet proficere, ex privilegijs & gratijs Christianæ & Catholicæ Religionis, dumque ei fax accensa præ oculis ponitur ab ea se avertat, vel oculos claudat. Porro fax accensa ab Ecclesia, ad illuminandum peccatorem, est Lex Divina, quæ per Ministros Ecclesiæ omnibus fidelibus intimatur & proponitur, talis fax, sunt Præcepta & Censura Christi, Evangelium illius, & verbum Dei scriptum & traditum juxta illud Psal. 118 *Lucerna pedibus meis Verbum Tuum est lumen semitis meis* Faciem hanc præferunt Concionatores, Confessarii, alijque homines Spirituales & Apostolici, unicuique suam obligationem præ oculis ponentes, demonstrantes gravitatem peccati, horrorem judicij Divini, acerbitatem pœnarum, ostendentes quam periculosus sit status peccatoris, prædicantes magnitudinem Bonitatis & Misericordiæ Divinæ expectantis peccatores ut convertantur, eosdemque si convertantur misericorditer



ricorditer fuscipientis, docentes tandem modum quo jugum peccati excuti, & peccator Deo reconciliari possit. Accenditur præterea fax per exempla Sanctorum, per quæ peccatores ad meliorem frugem, ad virtutem & Sanctitatem & ad pœnitentiam faciendam incitantur ac provocantur. Peccatores autem avertunt oculos, ab hac Ecclesiæ face, eosdemque claudunt, quando omnes illas occasiones fugiunt, in quibus, à tali face illuminari possent, vel si hæc fax ob oculos illorū ponatur, illi tamen media salutis ipsis proposita negligunt, contēnunt, videre & apprehendere nolunt, nec unquā salubria aliorū consilia in seriā considerationē venire permittunt.

2dò Per peccatum peccatores excæcantur eâ ratione, quod peccatores destruant & debilitent mentis suæ oculos, memoriam, & intellectum, vel inquirendo resolutiones nimium laxas & liberas, quæ licentiæ ipsorum habenas laxant, vel non frænando suas passiones, sed his omnia permittendo. Passiones hujusmodi sibi ipsis relictæ, nec per rectam rationem frænatæ, ita quandoque mentis aciem hebetant & obtusam reddunt, ac omnem ejus vigorem tollunt, ut Intellectus ad fundum rerum, quæ ad salutem spectant, per cognitionem debitam non perveniat, nec substantiam sperandarum, rerum penetret ac perspiciat, proindeque non possit, aut veriùs nolit rectum de rebus Divinis formare judicium, quandoque ita perturbant rationis tranquillitatem, ut opposito modo de rebus judicet quam mereantur. Quandoque etiam eadem passiones si illis liberè indulgeatur, vehementiâ suâ intellectum ita sopiunt, ac in eû statū redigunt, ut non nisi terrena sensibilia & carnalia percipiat, Spiritualia verò & æterna non apprehendat, nec assequatur, nec percipere velit juxta illud Apostoli *Animalis homo non percipit ea que sunt spiritus* & juxta assertum Augustini. *In homine carnalis tota ratio intelligendi est consuetudo cernendi.*

3<sup>ti</sup>o Peccatum excæcat peccatorem irritando & provocando Patrem luminum, ut ab eo peccator cæcitate percutiatur. Percutiatur autem à DEO peccator cæcitate, in pœnam sui peccati, tum per denegationem vivacium illustrationum & luminum efficacium, quando DEUS confert quidem peccatori illustrationes, sed tales, ut videndo, per suam malitiam non videat, negat autem eas illustrationes, quibus illustratus videndo videat, hoc est ita videat, ut operetur salutariter, & cooperetur gratiæ Divinæ. Tum permissione occasionum, in quibus peccator seipsum excæcaturus est, abijciendo & rejiciendo lumina sancta, & principia ac dictamina æternæ veritatis ac Sapientiæ, & conquirendo dogmata falsa, politica, Mundo ejusque sapientiæ, non DEO conformia. Tandem DEUS percutit cæcitate peccatorem non impediendo sed permittendo, ut Dæmones peccatoribus oculos eruant, ipsosque cæcos reddant. Qui ipsi in tantum excæcant animam peccatricem, in quantum ex memoria ipsius eradunt omnium rerum sacrarum imagines & species, nimirum DEI præsentis recordationem, vivam impressionem cruciatuum, tormentorum, ac diræ mortis amore nostri à Christo susceptorum, in quantum tollunt cogitationes sanctas de Cælo, de Matris Beatissimæ in homines amore & patrocinio, de æternitate, alijsque rebus, his similibus. In locum verò talium cogitationum depingunt in memoria, sensualium, fædorum & infamium phantasmatum repræsentationes. Deinde, in quantum in intellectu obliterant, & tollunt dictamina & principia sancta, judicia vera & spiritualia, imbuunt verò eundem Intellectum principijs falsis, sæcularibus & pseudopoliticis. Postremo Dæmones peccatori oculos eruant, in quantum voluntatem inclinant, suisque tentationibus pertrahunt, ut recedat à propositis bonis & salutaribus, formet verò destinatio-

nes & resolutiones malas ac perversas.

His consideratis, reflecte te supra teipsum, singula percurrento. An & te non excæcaverit malitia tua, & desse cæcitatem tuam. Quod si nullas in anima tua tenebras inveneris, humiles Deo redde gratias, quod te de tenebris, vocaverit in admirabile lumen suum. Quod si in anima tua deprehenderis aliqua saltem cæcitatis initia, surge & illumina, quia venit lumen tuum. Omnes dispelle tenebras, noli esse rebellis lumini, quod tibi Deus immittit. Dum lucem habes, ambula in luce. Fac proposita &c. In faciem tuam deinde pronus procide, à supremoque Numine supplex lumen postula, illis Psal. 66. verbis: *DEUS misereatur nostri, & benedicat nobis, Illuminet vultum suum super nos, & misereatur nostri.*

PUNCTUM II. Audi Job dicentem Cap. 41. *Cor ejus indurabitur tanquam lapis & stringetur tanquam incus malleatoris.* Et considera etiam hanc gravissimam pœnam peccatoris plerumque esse, quod cor illius obduretur tanquam lapis. Obduratio hæc pertinet ad voluntatem, sicut excæcatio principaliter pertinet ad intellectum. Sequitur tamen obduratio excæcationem.

Porro obduratio consistit in eo, quod cor peccatoris ita durum, intractabile, & inflexibile reddatur, ut neque monitis, concionibus, & pijs exhortationibus, neque pœnis inflictis emolliatur, neque bonis aliorum exemplis, corrigatur, neque inspirationibus gratijsque Divinis flectatur, ut à malo averti possit.

Taliter induratum fuit cor Pharaonis, quem neque prodigia per Moysen monstrata, neque tot plagæ, ipsi, ejusque populo à Deo inflictæ, neque exhortatio Moysis & monitiones nomine Dei factæ avertere poterant à persequendis Hebræis, eique persuadere, ut dimitteret populum Israel.

Taliter

liter item fuit induratū cor Judæ proditoris, qui pariter neque Christi humilitate, ad suos pedes se demittentis, neque nimiam ipsius charitate, suo corpore & sanguine Judam pascentis, & ad osculum oris sui Divini admittentis, neque comminativam illam adhortationem: *va homini illi, per quem Filius hominis tradetur, melius, si natus non fuisset homo ille*, neque tot alijs beneficijs, optimi sui Magistri, ejusque sanctitate & innocentia, deterreri potuit ac dimovere, ab impio suo proposito tradendi Christum.

Obduratio hæc oritur communiter ex triplici capite *1mo* ex frigida & valde remissa, aut nulla simpliciter applicatione intellectus ad consideranda & expendenda motiva spiritualia, vivida verò & forti apprehensione ac consideratione motivorum inclinantium ad sensualia. *2do* ex habitu peccandi bene radicato, & ortam hinc vehementissimam inclinationem appetitus sensitivi ad oblectamenta sensuum. *3tio* ex validissimis & frequentibus suggestionibus Dæmonis, quibus peccator invitatur ad peccandum, Dæmone id unice intendente, ne sibi, bene possessa præda, aliquando effugiat. Cum interim idem peccator juvetur à Deo auxilijs aut remissis, aut talibus, quæ ipse contemnit, & inefficacia reddit.

Eadem obduratio iudacitur tali viâ, ut docet D. Bernardus lib. 1 de Consideratione. *Primum peccatum importabile tibi videtur, processu temporis, si assuescas, non judicabis adeo grave, paulò post nec senties, paulo post etiam delectaberis*; ita paulatim in cordis duritiam itur.

Hæc considerans, expende, an cor tuum non incipiat indurescere? quàm flexibilem te ad bonum experiaris? quem in te fructum faciant Exhortationes, Conciones, & monitiones sanctæ? an illustrationes & gratiæ Divinæ flectant voluntatem tuam? Utrum beneficia Dei moveant te ad ipsum  
aman

amandum, & ferventer eidem serviendum. Expende item, si fortè in aliquam sentis duritiem in corde tuo, ex quo fonte illa promanavit. Tandem reflectete, quâ viâ, an non viâ à S. Bernardo insinuatâ processeris, ad duritiâ cordis tui, & insensibilitatem in transgrediendis liberè præceptis Divinis.

Fac proposita de duritiâ hac tollendâ, vel certe eâdem impediendâ, ne in te locum aliquando habeat. Recurre tandem ad Christum Crucifixum, ab eo postulans, ut ille cor tuum lapideum, cor adamantinum, pretiosissimo Cordis sui Sangvine emolliat, ab eoque omnem auferat duritiâ.

PUNCTUM III. Audi illam Christi comminationem Pharisæis factam Joan. 8 *In peccato vestro moriemini* Et considera horrendam multorum peccatorum pœnam esse, impœnitentiam finalem. Quod aliqui peccatores, non solum per sua peccata excæcentur, non solum cor illorum obduretur, sed quod tandem finaliter impœnitentes in peccato moriantur. Non omne quidem peccatum, nec in omnibus peccatoribus tali pœnâ hoc est impœnitentiâ finali punitur, cuivis tamen peccatori hæc pœna maximè est formidanda. Quod ut melius intelligas.

Considera ulterius juxta Sanctorum Patrum & Theologorum communem doctrinam & unanimem consensum, fundatum in sacra Scriptura. Unicuique hominum, imò & Angelis, præfixam & constitutam fuisse, & esse certam mensuram & certum numerum peccatorum, quo expleto, ille, qui talem mensuram implevit, facere pœnitentiam negligit, omniaque auxilia, quæ DEUS illi confert ad pœnitendum, abijcit, & inefficacia reddit. Interim verò DEUS, vel filium vitæ talis hominis abrumpit, vel certè usum rationis ita eripit, ut ipsū nunquam deinde restituat, vel licet restituat, peccator

cator tamen non utitur unquam hac commoditate, ad salutariter poenitendum. Quo fit, ut miser ille peccator, impoenitens in suis peccatis, vel peccato moriatur, æternamque incurrat damnationem.

Et inprimis Quòd DEUS certā mensurā & numerū peccatorum cuiusvis homini præfixerit clarè colligitur ex illis Sapientiae 11 verbis: *Omnia in mensura, numero, & pondere posuisti* Certe si DEUS omnium animalium in mundo sibi succedentium, omniumque rerum, quæ aliquando existituræ sunt, numerū constituit, si omnes capillos, capitis, si omnes cogitationes & motus voluntatis nostræ in numero habet, consequens est, quòd etiam certum numerum ac mensuram peccatorum cuiusvis hominis statuerit, certosque terminos suæ malitiæ præfixerit, quos ille transgressurus non est. Colligitur eadem veritas ex verbis Christi Matth. 33 *Implete mensuram Patrum vestrorum & ex illo Genesis 15. Nondum completa sunt iniquitates Amorrhæorum.*

Quòd verò completā tali mensurā peccatores impoenitentiā finali puniantur, & in peccatis suis moriantur, docet id expressè S. Augustinus de vita Christiana Cap. 3 *Illud sentire nos convenit, tamdiu unumquemq; à patientia DEI sustineri, quamdiu nondum suorum peccatorum terminum finemque compleverit, quo consummato, eum illicò percuti, nec ullam illi veniam jam reservari.* Id ipsum repetit expendens illud Genesis: *Nondum completa sunt iniquitates Amorrhæorum.* dum ait: *Quo exemplo manifestissime instruimur & docemur. singulos secundum peccatorum suorum plenitudinem consummari, & tamdiu, ut convertantur, sustineri, quamdiu cumulum suorum non habuerint peccatorum consummatum.*

Circa quam mensuram, hæc adhuc duo considera. 1<sup>mo</sup>. Mensuram hanc non esse eandem & æqualem omnibus præfixam. Angeli uno tantum patrato



patrato peccato, mensuram sibi præfixam compleverunt. Regi sauli mensura constituta fuit duplex inobedientia, quam utramq; postquam cōmisit, reprobatus est, & à DEO abjectus. Damasco, Tyro, Gazæ, & Edom mensura designata fuerunt 7. Peccata, ut habetur *Amos* 1mò Israelitis in deserto talis fuit præfixa mensura, ut si decies rebellarent contra Dominum, non essent ingressuri terram promissionis, & quia mensuram hanc impleverunt, post decimam rebellionem DEUS prohibuit eos ab ingressu terræ promissionis.

2dò. Quanta determinatè mensura peccatorum sit unicuiq; præfixa, id nemini innotescere. Sicut ultimum Judicij diem voluit DEUS nobis esse occultum, ut timeretur omnis dies, sic DEUS voluit occultam esse mensuram peccatorum pro unoquoq; constitutam, ut quævis mensura, & quodvis peccatum, atq;vè si illud ultimum foret, timeretur.

His consideratis, expende diligenter, si timenda tibi est impœnitentia finalis, quam certè maximè timere debes, cum illam infallibiliter consequatur damnatio æterna, timendum tibi quoq; esse, ne impleas mensuram peccatorū tibi præfixam, quia hanc consequitur impœnitentia finalis. Quod si exhorrescis completionem mensuræ, & numerū peccatorum, exhorresce quàm maximè quodvis peccatum mortale, cum ignores an per illud non sis completurus mensuram tibi præfixam. Post tot tantaq; scelera patrata, fortè non multum superest addendum, ut mensuram tuam compleas.

Propone firmissimè vitaturum te, studio quā maximo, quodvis peccatum.

In colloquio petes à Domino DEO tuo, ut non permittat te implere mensuram peccatorum tuorum, sed gratiam tibi talem conferat, quā adjutus, crescas in virtute, perfectione, & sanctitate,

juxta mensuram plenitudinis Christi. Procides etiam ad pedes Christi crucifixi, & obnixè postulabis, ne subjaceas illi ipsius sententiæ: *in peccato vestro moriemini* Sed potius, ut ex thesauro suorum meritorum, det tibi gratiam finalem, in eaq; felicem mortem.

*In fine: Anima Christi.*

## Meditatio VII.

### De damnis quæ infert peccatum mortale.

*Præludia* eadem quæ duarum meditationum præcedentium.

PUNCTUM I. Audi Ezechielem dicentem cap. 18. *Si averterit se justus à justitia sua, & fecerit iniquitatem, omnes justitiæ quas fecerat, non recordabuntur.* Et considera: inter gravissima damna quæ infert peccatum mortale, etiam hoc esse, quod spoliet hominem omnibus justitijs quas fecit, & omni merito vitæ æternæ; quod totum id, quidquid meritorum collegit per totam suam vitam in gratia DEI transactam, quidquid laudabile & cælo dignum fecit, id totum per peccatum mortale deperdat ita, ut si post peccatum mortale, nullâ penitentiâ deletum, quis moreretur, ipsius opera bona & meritoria in gratia DEI aliquando facta, ad nihil ipsi prorsus prodescent, nec ullo præmio præmiarentur.

Et sic, si aliquis instar Dominici loricati in corpus suum annis plurimis atrocissimè sævisset, si jejunijs se attenuasset, vexasset cilicij, flagris concidisset, catenis aculeatis cruentasset, & postea lethalis criminis reus moreretur, hæc omnia non essent in recordatione apud DEUM. si plures ad Christum  
gentes

gentes convertisset, quàm Indiarum Apostolus S. FRANCISCUS Xaverius, plura quàm S. Augustinus, vel D. Thomas, in Ecclesiæ emolumentum elucubrasset volumina; plures Thomâ Canthuariensi Archiepiscopo persecutiones & odia ob Ecclesiæ defensionem tulisset; si ex amore DEI, propter fidei confessionem, plura sustinisset tormenta, quàm Clemens Ancyranus, si in contemptu mundi Alexium, in paupertatis rigore Franciscum Assisinatem, in clauistro monachorum Lirinensium sanctitatem, in deserto Anachoretas Thebaidis, in columnis prodigiosos Orientis Stylitas imitatus esset, & post hæc omnia, mortali peccato inquinaretur, & in hac iniquitate moretur, omnis ille meritorum thesaurus, omnis sanctitas & virtus periret, essetq; in perpetua oblivio ne apud DEUM.

Exclama hîc: ô jacturam, ô infelicitatē, ô miseriam cruentis lacrymis deplorandam! admirare cæcitatem hominum, qui hanc jacturam non agnoscunt nec apprehendunt, quinimò arbitantes per peccatum se plurimum lucrari, post tam funestum detrimentum, audent exultare, sicut exultant victores captâ prædâ, dum dividunt spolia. Detestare odiô insensissimo peccatum, latronem hunc inmanissimum, hostem capitalem, qui inhiat omnibus meritis, omnibus virtutibus tuis, qui his omnibus te spoliât, manumq; suam mittit ad omnia desiderabilia tua.

PUNCTUM II: Audi DEUM apud eundem Prophetam dicentem: *Si averterit se Justus, & fecerit iniquitatem, nunquid vivet? non vivet; in pravaricatione sua, qua pravaricatus est, & in peccato suo quod peccavit, in ipsis morietur.* Et cogita: quòd peccatum mortale non solum meritis, virtutibus, omnibusq; bonis operibus, hominem spoliât, sed etiam spoliât eundem ipsâ vitâ, vitamq; ei eripiat. Si spoliaret hominem alijs nonnisi illius bonis, to-

lerabile hoc damnum, reparabilis jactura esset manente vitâ, sed cum vitâ etiam spoliatur, jactura hæc non est facile reparabilis, quæ enim consequuntur ad vitam, reparari possunt si vita maneat; si auferantur simul cum vitâ, irreparabilia sunt, quia non est Principium talis jacturæ reparativum.

Spoliatur autem peccatum vitâ, non vitâ corporali, qua corpus vivit & animatur, scilicet spoliatur gratiâ sanctificante, quæ est vitâ animæ nostræ, per quam DEO vivimus, idq; vivimus participes & consortes naturæ Divinæ, dependenter à qua, exercemus omnes operationes vitæ. Hac vitâ ita nos spoliatur peccatum mortale, ut per illud homo fiat sædissimum cadaver, DEO & Angelis abominabile. Idq; peccatum spoliatur peccatorem vitâ animæ indispensabiliter, ut non sit possibile hominem in peccatum mortale labi, & tamen vivere in anima, spoliatur autem illum hac vitâ in ipso actu peccati mortalis; peccatum enim ita est impossibile cum gratia sanctificante, ut multi opinantur Theologi, sicut tenebræ sunt impossibiles cum luce.

Jacturam hanc utinam sentirent homines. Mors corporis ita est amara, ut vel ipsa memoria ejusdem sit amara. Mors animæ ita non apprehenditur, ut non sit qui recogitet. De juvene à Christo resuscitato in porta civitatis Naim, dicit S. Augustinus. *Illius mors visibilis visibiliter plangebatur, illorum qui in anima quotidie moriuntur mors nec queritur nec videtur.* Compatere cordialissimè omnibus his in anima mortuis. mortem illorum sanguineis desle lacrymis.

Reflecte te deinde num & tu DEO vivas? an non possit tibi dici. *Nomen habes quod vivas, & mortuus es.* An non sis Lazarus quatrIduanus jam factens? Si vivis vitâ spirituali, supernaturali, vitâ animæ tuæ, agnosce gratiam, agnosce misericordiam

cordiā DEI, dicens cum Psalmista: *Secundū misericordiā tuam vivificāsti me.* Time, ne peccatum hanc tibi aliquando vitam eripiat quod si in anima mortuus es, recurre ad fontem vitæ, humili & contrito corde ab Authore vitæ pete vitam, & tribuet tibi. convertere ad Dominum DEUM tuum quem dereliquisti, & ipse conversus vivificabit te. Funde lacrymas deplorans mortem tuam, & Christus moriens spirabit in te spiritum suum, ut ipsi vivas, imò ipse in te vivat.

PUNCTUM III. Audi DEUM per Oseam dicentem cap. 9. *Radix eorum exsiccata est, fructum nequaquam facient.* Et cogita, inter alia mala, quæ causat peccatum mortale, etiam hoc esse, quod omnia bona opera, quæ homo in statu peccati mortalis facit, sint omnino infructuosa, non sunt meritoria, nec unquam à DEO præmianda.

Cujus ratio est. Quia tunc homo non est in gratia DEI, non est in charitate, sed ab illa per peccatum est evacuatus, eandem simul cum gratia sanctificante multiq; alijs habitibus supernaturalibus amittit. Jam autem, quod sit ab homine gratia habituali & charitate destituito, nihil prorsus valet nulliusq; est meriti, ut dicit Apostolus. *Si linguis hominum loquar & Angelorum, charitatem autem non habuero, nihil sum, & si distribuero in cibos pauperum, omnes facultates meas, & si tradidero corpus meum ita ut ardeam, charitatem autem non habeam, nihil mihi prodest.* A gratia sanctificante habetur omnis condignitas & valor operum supernaturalium hominis iusti, ratione cujus sunt meritoria vitæ æternæ. Obsequia quæ exhibentur à filio DEI adoptivo, æstimantur: quæ ponuntur à servo & mancipio peccati, contemnuntur, nullumq; pretium habent. Gratia sanctificans est radix, à qua fructus boni operis suum vigorem, succum, & maturitatem habere debet. Si radix exsiccata fuerit, nullus

fructus haberi potest. Si gratia sanctificans per peccatum est deperdita, nullum opus peccatoris potest esse fructuosum, & vitæ æternæ de condigno meritum, sed sicut peccator mortuus est DEO, ita & omnia opera ejus in peccato facta, mortua sunt.

Et sic, sive peccator oret, oratio ipsius non exaudietur, sicut non est exaudita oratio Antiochi, de quo scriptura dicit; *Orabat scelestus DEUM à quo non erat misericordiam consecuturus.* Imò oratio peccatoris est DEO execrabilis, juxta illud Prov. 28: *Qui declinat aures suas ne audiat legem, oratio ejus erit execrabilis.* Sive laudet DEUM peccator, eumq; honoret, quocunq; Religionis vel alterius virtutis actu, laus hæc non est grata & accepta coram DEO, ut dicitur Eccles. 25 *non est speciosa laus in ore peccatoris.* Sive ulterius peccator sacrificia offerat, sive corpus suum affligat, se ipsum mortificet, Eleemolynas faciat, sive quæcunq; alia pia opera exerceat, nulla ex ipsis meritoria erunt. Reflecte te, an & quot tua opera bona perdidideris? an etiam omnes tuæ mortificationes, jejunia, abstinentiæ, aliq; actus virtutum & opera misericordiæ in æternitate præmiabuntur? non præmiabuntur certè quæ in statu peccati mortalis egisti.

Deplora jacturam talium operum tuorum. Propone curaturum te, ut omnia quæcunq; à te bene & laudabiliter agentur, fiant in gratia DEI, ut verò certior esse possis. Statûs gratiæ, præmissa debita conscientiæ tuæ discussione, cum vero dolore de peccatis tuis, & firmo proposito de non peccando, accede ad Sacramentum pœnitentiæ, emunda conscientiam tuam, & restitutam gratiam sanctificantem conservare, imò semper augere stude.

Fac etiam tibi familiarem actum contritionis perfectæ, cumq; sæpius de die, sed præcipuè, dum aggressurus es aliquod opus bonum, aliquam  
actio-



actionem, quæ quantum ex se est, postulat esse meritoria, elice, ne tale tibi opus pereat.

*In colloquio* elice actum contritionis. O bonitas infinita DEUS meus, agnosco & confiteor, per peccata, quibus Majestatem tuam Divinam mihi ego & inelix offendi, multa me multa & damna incurrisse, plurimum penarum, à te mihi iuste intelligendum, reum me exilitis, multa quæ habere potui impedivisse bona. Interim hoc maximè, imò hoc unicè doleo, quod te DEUM summum & omne bonum meum offenderim, quod malum coram te, & contra te, qui es summè bonus, omni amore dignus, & summè amabilis, feci. Damno stultitiam & malitiam meam; amorem tuum, & propter solam tuam amabilissimam bonitatem, cui quodvis peccatum meum repugnat, omnia & singula, ex toto corde detestor; ad omnes penas, quas merui, me tuæ Justitiæ Divinæ offero; vindica Domine in scelesto peccatore illatas tibi omnes injurias. Hoc unicum, non propter me, qui omni tua gratia & favore indignissimus sum, nec ullum meum quæro bonum, sed propter temetipsum benignissimè effice, ne te ultra offendam in æternum, quem non offensurum unquam firmissimè statuo.

*In fine: O DEUS ego amo te etc.*

## Meditatio VIII.

### De pœnis & damnis ex peccato provenientes.

*Praludia* eadem quæ meditationum immediate præcedentium.

PUNCTUM I. Audi illa verba Sapientis Prov.  
24. *Cogitatio stulti peccatum est.* Et considera effectum

Cum peccati etiam hunc esse, quòd hominem reddat stultum & amentem. sis licet versatissimus in omnibus humanis scientijs, sis ingenij peripicacissimi, limatissimi Judicij, prudentiæ non vulgaris; si peccas; per hoc ipsum stultus factus es. sapientissimus fuit Salomon, qui tamen Senex factus, propter suas libidines, ad eam devenit dementiam, ut mens ejus averteretur à DEO. Sapientes fuerunt Ethnici illi Philosophi, de quibus Apostolus ad Rom. *1 Qui tamen, cum sapientes essent stulti facti sunt, quia cum cognovissent DEUM, non sicut Dominum glorificaverunt, sed evanuerunt in cogitationibus suis.* Epulonem illum Evangelicum sua avaritia nonne stultum reddidit, etià ipsius sapientiæ Incarnatæ iudicio; *stulte, hac nocte animam tuam à te repetent.* Talem suam stultitiam agnoscunt, & tota æternitate deplorabunt licentiosi illi juvenes apud Sapientem. *Non insensati vitam illorum aestimabamus insaniam & finem illorum sine honore etc.* Et iterum: *ergo erravimus.*

Et sanè extrema dementia est, velle DEUM infinitæ majestatis, ejusq; summam & infinitam bonitatem offendere. Grandis stultitia est, si creatura, vermis, pulvis, atomus, bellum inferat Creatori, Enti perfectissimo essentiæ nobilissimæ. Si formica leonem superare velit. Summa stultitia est propter momentaneam voluptatem, privare se veris æternis gaudijs, & voluptatibus, addicere verò æternis pœnis & cruciatibus. Si magna stultitia fuit Esau quòd pro lentis edulio vendiderit suam primogenitam. Major stultitia est uniuscujusq; peccatoris, quòd jus hæreditatis æternæ, vendat pro vili brevis voluptatis dulcedine, quæ gustata mortem ipsi generat æternam.

Hæc considerans, reflecte te supra præterita peccata tua, & recogita an hæc non fuerint verè & propriè tales stultitiæ? confundere quòd ita aliquando

quando desipueris. Trade te plenè & integrè sub institutionem Sapientiae Incarnatae, & propone curaturum te, ut in te, existente in schola veritatis aeternae, cogitatio stulti, hoc est peccatum, locum non inveniat.

PUNCTUM II. Audi verba illa Psalm. 48. *Homo, cum in honore esset, non intellexit, comparatus est jumentis insipientibus, & similis factus est illis.* Et considera, quod peccatum non solum hominem insipientem faciat, sed etiam eundem transformet in bestias, jumenta, & bruta animantia.

Idq; peccatum aliquando homines ita transformavit in bestias, ut exterius Jumenta esse apparent, speciemq; exteriorem brutorum haberent, ex speciali & extraordinaria poena & vindicta DEI. Et sic aliquando superbia Nabuchodonosor regem transformavit in bovem, ut habetur Daniel. 4. Luxuria & libido transformavit Tiridatem regem Armeniae in porcum, ut refert Metaphrastes apud Surium. Alium quempiam Blasphemia transformavit in canem. Hæ tamen transformationes sunt rariores.

Cæterum transformationes internæ, & in anima, frequentiores & quotidianæ sunt: semperq; quodlibet peccatum transformat hominem in aliquam belluam & brutum, non quidem quoad externam speciem, sed quoad internam animi constitutionem, DEO & Cælitum oculis patentem. Et ita superbia transformat hominem in leonem aut in pavonem; Ira transformat in tigrides, urlos, & genimina viperarum; gula transformat in rapaces & voracissimos lupos; lascivia transformat in mulos & equos, in porcos & sues in volutabroluti lotas; avaritia transformat in struthiones non ferrum sed aurum vorantes, in corvos, quæ possunt, rapientes, & asservantes; Invidia transformat in canes, acedia in testudines hypocrisis in dolo-

fas vulpes. Morum pestilentia, quâ fortè corruptis alijs, transformat te in draconem.

Imò peccata non solum faciunt peccatores similes bestijs, sed etiam peiores ijsdem. Certe peccatores sunt ipsis quoad hoc similes, quòd, sicut bestiae solo sensu & appetitu sensitivo ducuntur, suasque sensuales sequuntur inclinationes, ita & peccator non ratione, sed sensu, & appetitu, ac inclinationibus sensualibus ducitur & regitur. Simul tamen peccatores sunt peiores bestijs.

Imò ex eo, quia belluæ per suas inclinationes ad sensualia, per suas concupiscentias, non avertunt se à suo fine, ad quem à suo Creatore ordinatæ sunt. Homo verò per quodvis peccatum avertitur à suo fine.

2dò Quia, ut ait S. Chrysostomus Hom. 3. in Joan. si aliquæ belluæ sunt crudeles, carnivoræ, gulosæ, effrænes in suis concupiscentijs, hoc in illis non potest esse vitiosum, cum ratione & libertate destituantur, quâ refrænent suas inclinationes & concupiscentias. Crudelitas autem, gula, luxuria, ira, & his similia, in homine semper sunt vitiosa, quia homini sunt voluntaria, & libera, imò sunt adinventiones ejusdem. Ex qua ratione etiam Ethnicus Philosophus Aristoteles putavit homines brutis peiores 1. Politic. cap. 2. Dum dicit: *Homo separatus à lege & justitia, est pessimum omnium animalium, quia habet arma rationis ad explendas concupiscentias & savitias, quæ non habent alia animalia.*

3 sio Quia belluæ habent à natura sua præfixos terminos suorum appetituum, quos non transgrediuntur. Et sic nulla bellua etiam voracissima plus cibi sumit quàm indigeat, nullæ vel rarissimæ, quæ prolem suam interficiant & tollant, nulla quæ seipsam enecet. E contra nulli sunt termini

mini concupiscenciæ, & licentiæ in homine, quos idem peccando non transgrediatur.

4<sup>to</sup> Tandem, quia inclinationes pravæ variorum animantium etiam si illis sint naturales & in fundo essentiæ illorum radicatæ & infixæ, tamen hæ inclinationes curatione, pœnilq; vel beneficijs, in pluribus animalibus corriguntur. Homo autem ratione præditus, sub potestate, & dominio habens suos appetitus & inclinationes, nullis beneficijs à DEO acceptis, aut pœnis sibi inflictis corrigitur, & à peccando revocari potest.

His consideratis, reflecte te super teipsum, & fode parietem domus tuæ, atq; ingredi interiora hujus domus, scilicet animæ tuæ &, vide abominationes pessimas quas fecisti. Et ecce similitudo reptilium, animalium, & universa abominatio. Reflecte te an fastus tuus, & superbia non te transformavit in leonem, aut certe in ipsum dæmonem propter superbiam de cælo præcipitatum? An propter iracundiam tuam, non sis sævus ursus, tigris, aut vipera morfu suo lethali vulnerans? an voracitate & ingluvie lupum non referas? an per incontinentiam non sis factus sicut equus & mulus, aut tanquam sus in volutabro luti? Reflecte te an avaritia in corvum, invidia in canem, accidia & tepiditas non transformaverit te in testudinem, an non sis vulpes dolosa ob hypocrisim & fraudes atq; in sincerum agendi modum tuum. An non sis draco pestilens alios pestilentibus tuis moribus vel colloqijs, corrumpens & inficiens.

Erubescere tantas abominationes, confundere brutis te pejorem exstitisse propter aversiones tuas, ab ultimo fine tuo, propter abusum rationis, tuæ, quæ libertatis. quod tua ratio non frænaverit concupiscencias & inclinationes tuas ad malum, sed etiam arma tibi ministraverit ad easdem explendas. Confundere quod tuus appetitus sensua-

lis, tuæ passiones, licentiæ, sensualitates nullis terminis contineri potuerint, non terminis honestatis, non timoris DEI, non amore virtutis, non legibus, & præceptis Divinis ac humanis, non sanctis aliorum exemplis, sed potius quod omnes hos terminos toties sis transgressus. Confundere tandem, quod cicurari, & ad nutum DEI reformari non potueris tot & tantis DEI beneficijs copiosè in te profusis, tot & tantis pœnis, quibus DEUS à sua offensa conatur te detertere. Fac proposita, omnibus vitijs, quæ in te deprehendes, contraria. Ad extremum postula gratiam, quâ adjutus, omnes in anima tua abominationes atq; similitudines reptilium & animalium, corde tuo ejicias & tollas, illiq; altè imprimas, ac in eo efformes imaginem Christi Crucifixi, per crucifixionem carnis tuæ cum suis concupiscentijs, & perfectam imitationē & expressionem Christi Crucifixi in vita & moribus tuis.

PUNCTUM III. Audi illa verba S. Petri dicentis 2. Petri 2do. *à quo quis superatus est, ejus servus est.* Verba item Eliæ Prophetæ ad Achab. 2. Reg. 21. *Venundatus es, ut faceres malum in conspectu Domini.* Et considera hominem etiam hoc malum incurrere per peccatū, quod sit dæmonis, & peccati servus ac mancipium.

Servus imprimis & mancipium dæmonis est peccator ex eo. Quia per peccatum homo vincitur, debellatur, & superatur à dæmone, porro jure gentium, Victus, seu ille qui in bello superatur, est servus victoris. Resistis tentationi? vincis suggestiones dæmonis? vincis & superas dæmonē, ducis in triumpho victum draconem infernalem, estq; tunc dæmon servus tuus, & mancipiū. Consentis ei? liberè ejus tentationi cedis peccatum committis: à dæmone superatus es, ille te expugnavit & vicit, suoque subjecit jugo, adeoq; factus es servus & mancipi-



um dæmonis. Servus insuper dæmonis peccator est, quia in servum eidem est venundatus. *Unus quisq; enim* ( ut ait S. Augustinus ) *animam suam Diabolo vendit, accepto tanquam pretio, dulcedine temporalis voluptatis*, qui secundus modus est incurrendæ servitutis. Non existimandum est, quòd dæmon gratis nobis offerat vetitas voluptates. Quisquè peccator hunc tacitum contractum, hoc illicitum pactum quasi universale inquit cum dæmone. Da mihi illam voluptatem, fas mihi sit indulgere sensualitati, vanitati, &c. Fruar hac oblectatione, & ego dabo tibi animam meam, tuum ero mancipium. adeoq; hoc cotractus posito, peccator si peccat, si potiatur voluptate prohibita, si contra legē indulgeat sensualitati &c. Fit servus & mancipium Diaboli.

Idem peccator, peccando fit etiam servus peccati, juxta effatum æternæ veritatis; *Qui facit peccatum, servus est peccati*. Quod si plura committat vitia, non unius tantum domini, sed multorum servus est, ut monet S. Ambrosius. *Qui pluribus subjectus est vitijs, multis se Dominis addixit*.

servitus hæc dæmonis & peccati gravissima debet esse cuivis peccatori. *1mò* Ex eo quia homini libero, in libertatem vocato, quævis servitus gravissima esse debet; homo verò ante peccatum est liber, & in libertatem Filiorum DEI vocatus. *2dò* Quia peccator hanc servitutem patitur apud infensissimum suum hostem, talis enim peccatoris hostis est Dæmon & peccatum. *3tò* Ex eo, quia Dæmon & peccatum crudelissimè tractant hoc suum mancipium scilicet peccatorem; tenent ipsum vinctum gravissimis compedibus, vinctum non ferro sed ferrea voluntate, vinctum consuetudine peccandi, gravissimisq; tentationibus. Continuo miser peccator, propter importunitatem suggestionum, & vehementiam tentationum, exequitur voluntatem

luntatem hujus Tyranni. 4to Tandem ex eo hæc servitus gravissima est, quia dæmon & peccatum peccatorem trahunt & præcipitant in ipsius perniciem, atq; perpetua in inferno tormenta, absq; ulla spe redemptionis & liberationis ex illa æterna servitute.

His consideratis, fac reflexiones supra te ipsum, quoties & tu jugo servitutis hujus collum tuum submisisti! quoties victus & superatus es à dæmone & peccato? quàm frequenter animam tuam dæmoni vendideris pro vili pretio? quot illicitos contractus cum dæmone feceris! si etiam nunc sentis te in hac servitute esse, ingemisce & excute gravissimum hoc jugum. Præelinge jugum Christi suave, præelinge libertatem filiorum DEI, noveris te à Christo emptum esse pretio magno, statue in posterum Christo te famulaturum, ipsiusq; servum & mancipium fore.

*In colloquio*, pete à Christo, ut merito Passionis suæ à servitute dæmonis & peccati te liberet, dicatq; tibi: *Servus meus es tu, in te gloriabor.* pete etiam à pretiosissima DEI Parente, ut & illa te à potestate dæmonis & peccati ereptum, in servum suum & mancipium recipiat, nec' permittat amplius venire in servitutem Diaboli.

*In fine: Pater, noster. Ave MARIA.*

## Meditatio IX.

### De pœnis peccati.

*Praludia* Eadem quæ præcedentium meditationum.

PUNCTUM I. Audi sapientem Proverb. 14. *Justitia elevat gentem. Miseros autem populos facit peccatum.* Et Psal. 13. *Multa flagella peccatoris.* Et

COR-

confidera, quòd peccatum faciat peccatorem etiam corporaliter miserum. Eundemq; subijciat etiam in hac vita plurimis flagellis. DEUS enim ulciscendo suam offensam, etiam hîc plerumq; punit temporaliter & flagellat peccatores, Idq; non illos tantum ipsos flagellat qui peccârunt, sed propter unius quandoq; Personæ peccata, flagellat tota Regna, totas Provincias, totas communitates. Ita propter peccatum Pharaonis, DEUS flagellavit totam Ægyptum, propter peccatum David, totum Regnum Domus Jacob. Propter peccatum Achan, punivit totum exercitum Israëliticum.

Flagella hæc aliquando sunt damna in bonis fortunæ, aliquando damna in bonis famæ, aliquando damna in bonis vitæ vel corporis.

Flagella in bonis fortunæ sunt: egestas & fames, quam egestatem DEUS permittit vel per bella & variationes factas ab hostibus & militibus, vel per exundationes & eluviones, vel per furta & latrocinia, per maleficia, sterilitates, murium, locustarum grassationes, aliaq; his similia. Flagella in bonis famæ & honoris sunt: contemptus, vilipensiones, humiliationes, infamiæ, famosi libelli, aliaq; hujusmodi. Flagella in bonis vitæ & corporis sunt mortes, morbi varij acuti, molesti, diuturni, sunt pestilentia, vulnera, mutilationes &c.

Hæc omnia flagella DEUS permittit in penam peccati. Permittit egestatem & famem secundum illud Deuteronomii. 28. *Si audire nolueris vocem Domini DEI tui, mittet DEUS super te famem & esuriem, & percutiet te Dominus egestate.* Permittit etiam contemptum, vilipensionem & similia, juxta illud 1. Reg. 2. *Quicumq; honorificaverit me, glorificabo eum, qui autem contempnent me, erunt ignobiles.* Et iterum Deuter. Eodem cap. 28. *Si audire nolueris vocem Domini DEI tui, eris perditus, in proverbium & fabulam omnibus populis, &*  
*omni-*

*iniqui tempore calumniam sustinens. Permittit denique DEUS, in poenam peccatorum, morbos, pestilentias, mortes, juxta maledictiones & imprecationes positas in citato capite Deuteronomij. Percutiat te Dominus febris & frigore, ardore & aestu & aëre corrupto ac rubigine. Tradat te Dominus corrumpentem ante hostes tuos, percutiat te Dominus ulcere Ægypti, ulcere pessimo, sanarique non possis à planta pedis ad verticem capitis.*

His consideratis, reflecte te, an aliqua ex his flagellis Christianitas, & Ecclesia, totum Regnum, Palatinatus, cōmunitas in qua vivis, universa familia & domus non patiatur propter peccata tua? An belli contra Christianitatem, belli in Regno tuo & Patria, vastationis urbium, oppidorum, pagorum, per incursiones hostium, militum licentias, non sint causa peccata tua? An vilipensiones, contemptus, humiliationes sive tui sive aliorū, non permittantur in poenam culparum tuarum! An hæc non provocaverint iram DEI, ut per pestilentiam tanta hominum fieret strages, ut etiam nunc pecora peste absumentur. Alias præterea poenas & flagella DEI expavesce.

Humilia te sub potenti manu DEI, confitereicens: *Quaecunq; fecisti Domine, in recto judicio fecisti, quia peccavimus tibi.* Offer te ad omnia flagella Justitiæ Divinæ, postulans humiliter, ut hæc DEUS avertat à tota Christianitate, Regno Poloniæ, Palatinatibus tuis, communitate in qua vivis &c. Sed ut tu ipse totam poenam, quam peccatis tuis meruisti, sustineas.

PUNCTUM II. Audi Ecclesiasten dicentem cap. 7. *Ne in pie agas multum, ne moriaris in tempore non tuo.* Job item cap. 15. dicentem: *Impius, antequam dies ejus impleantur, peribit.* Et iterum cap. 22. *Viri iniqui sublati sunt ante tempus suum.* Et considera etiam per hoc puniri peccata,

quod

quod anni & dies impiorum brevientur, quod peccator moriatur ante tempus illud, quod DEUS constituerat & præfixerat, si peccatis suis non accelerasset mortem.

Mors insidet quidem equo pallido & macilentò, ut vidit S. Joannes in sua Apocalypsi; cæterum concitato veniet passu, si stimuli & calcaria admoveantur. Porro stimulus mortis peccatum est. Hòc admotò stimulo insecuta & affecuta est Absalonem & in quercu suspendit, eòdem stimulo ad diò, affecuta est Athanasium Orientis Imperatorem, celeri passu per palatium fugientem, cum aliquot ante mortem diebus apparuisset ei in somno persona terribilis calami dextra, librum sinistrâ præferens ac dicens: En ob perversitatem fidei tuæ, quatuordecim tibi vitæ annos deleo.

Hòc stimulo & calcari adhibitò assequitur & præmaturè rapit, omnibus sæculis, tot juvenes, in vitia & omnem licentiam effusos, ut moriantur in tempore non suo. Idq; rapit illos, in tempore non suo, hoc est antequam perveniant ad annos quos victuri erant, si vitam Christianè, & juxta præceptorum DEI præscriptum instituissent, rapit illos in tempore non suo, hoc est, dum minimè sunt ad mortem præparati. In tempore non suo, hoc est in ipsis vitijs, in tempore non bene collocato, imò in tempore miserè perduto, dum nihil computant temporis sui, DEI ac suæ salutis curæ impensæ.

Hæc considerans fac reflexionem supra teipsum, & cogita, quid etiam DEUS de te statuerit, post tua prævisa crimina, post tot tam liberas legum Divinarum & humanarum transgressionem? An non illud constituerit, ut moriaris in tempore non tuo? Paratus DEUS fuerat longum tempus vitæ tuæ præfigere. Si Christum ut Patrem, Ecclesiam ut Matrem, accurata præceptorum & consiliorum

ab ipsis datorum observatione honorasses. si in honorem Matris DEI Beatissimæ, & ex amore ipsius à pluribus delictis abstinuisses: item S. Angelo Custodi, tanquam Patri Tuo reverentiam in gravioribus offensis Divinis illo præsentem vitandis exhibuisses, juxta illam promissionem Divinam *Honora Patrem tuum & Matrem tuam, ut sis longævus super terram.* Patrus fuerat DEUS vitam tibi adijcere, casu quo continens esses, corpusq; tuum diversis mortificationibus, abstinentiis & jeuniis castigares. Prorogasset vitam tuam & annos tuos multiplicasset, si tu fidem tuam in tot Confessionibus per varia proposita, promissiones ac etiam forte per aliqua vota vel Juramenta ei obligatam, integram & illæsam servasses. Sed quia prævidit te, in Christum, Pretiosissimam DEI Parentem, S. Angelum Custodem, & Ecclesiam, impium, immorigerum, & degenerem futurum filium, ex quo prævidit fore te gulosum, sensualem, incontinentem, immortificatum, corpori tuo nimium indulgentem, illudq; in escam vermium saginantem: ex quo prævidit te legum suarum, propositorum, promissionum, & votorum tuorum sacrilegum transgressorem, & violatorem: format DEUS decretum ut moriaris in tempore non tuo, pluresq; annos vitæ tuæ delet. Et forte decernit DEUS, ut rapiaris in tempore non tuo, hoc est, non præmissa ulla dispositione & præparatione ad mortem, non bene collocato transactæ vitæ tuæ tempore, imò etiam ultimo vitæ & mortis tuæ tempore simul cum anima tua infeliciter perduto.

Exhorresce justam hanc in te ultionem DEI. mortem tuam semper præ oculis habe, ne moriaris in tempore non tuo. Honora DEUM Patrem tuum, honora Christum, Ecclesiam Matrem accuratam legum suarum observatione, honora Matrem Beatissimam S. Angelum Custodem, ut sis longævus  
super



super terram. sis abstinens, mortificatus, & adijcies vitam. Serva in omnibus fidem semel DEO datam, & anni vitæ tuæ non delebuntur. Supplica supremo vitæ & necis Arbitro ut moriaris in tempore tuo, hoc est, quod in felici æternitate pro tuo haberi & computari possit.

PUNCTUM III. Audi S. Joannem in sua Apocalypsi cap. 21. dicentem: *Pars illorum* (idest, peccatorum) *erit in stagno ardenti, igne & sulphure, quod est mors secunda.* Et considera post omnes peccatoris pœnas hanc supremam & totâ æternitate luendam esse, quod pars peccatoris futura sit in stagno ardenti. Seu ultima peccatoris pœna est infernus, ejusq; tormenta & mors secunda. Circa gravitatem & atrocitatem pœnarum inferni habetur meditatio de inferno. Nunc circa mortem secundâ, quæ prædicitur esse futura pœna peccatoris.

Considera 1<sup>mo</sup> Quid sit mors secunda? Per mortē secundâ non intelligitur mors secunda corporis, cum enim hominibus statutum sit semel mori, etiam peccatores non moriuntur duplici morte corporis, adeoq; non moriuntur morte corporis, secundâ, intelligitur potius mors secunda animæ, sicut enim animæ duplex est vita, una, per quam anima, dum adhuc conjuncta est corpori, vivit DEO per gratiam sanctificantem, altera vita, quâ anima soluta corpore, vivit DEO in gloria & felicitate cælesti per visionem DEI & amorem ejus fructivum, ita duplex est mors animæ, una quæ privat animam vitâ illâ, quâ, dum est in corpore, vivit DEO, per gratiam sanctificantem. Altera mors animæ est, quæ privat animam vitâ, quam haberet in gloria & felicitate cælesti, & quâ viveret DEO per visionem ipsius & amorem fructivum: mors siquidem nihil aliud est, nisi privatio vitæ. Hæc ergo mors altera animæ, est & dicitur mors secunda, quia illam priorē consequitur

tur, nec mors hæc dari potest, nisi illa mors animæ, ex vi cuius anima, non vivit DEO per gratiam, præcesserit.

Eadem mors, quâ post mortem corporis peccatores & damnati, DEO moriuntur, est mors æterna, qui enim tali morte moriuntur, per totam æternitatem non sunt unquam victuri, non sicut illi, qui moriuntur in anima per privationem gratiæ, in pœnam peccati mortalis, inductam. Hi enim ita moriuntur, ut adhuc vivere possint & frequenter vivant, si stante vitâ corporis, ad misericordiam DEI confugiunt, pro suisq; peccatis, pœnitentiam, qualis ad salutem est necessaria, agunt. Hanc mortem secundam dicit S. Joannes fore partem peccatoris in stagno ardente, quia cum supplicij æternis ignis infernalis, mors illa secunda est conjungenda, nec ab illis unquam dividenda. Damnati ad mortem secundam illi ipsi erunt, qui damnabuntur ad rogam infernalẽ, seu ad ignem æternum.

Considera 2da Quod licet peccator per quodvis peccatum mortale mortem primam, quæ consistit in privatione gratiæ sanctificantis incurrat, tamen post quodvis peccatum mortale immediate moriatur; tamen non post quodvis peccatum moritur morte secundâ, hæc enim mors non necat animas nisi corpore solutas, seu post mortem corporis, cum ergo peccator post peccatum non moriatur statim morte corporis, sed frequenter, à longanimitate Divina sustineatur, ut resipiscat & pœnitentiam agat, anima peccatoris non moritur morte secunda statim post peccatum, potestq; hanc mortem evitare, si ad DEUM convertatur, eiq; per pœnitentiam reconcilietur.

Considera 3tia Quod mors secunda quamvis non infligatur statim post peccatum peccatori, sicut infligitur mors prima, tamen mortis ejusdem reatus

reatus, non minùs atq; reatus inferni & damnationis æternæ, per quodvis peccatum mortale, incurritur, & cuius tali peccato ac etiam privationi gratiæ, quam peccatum demeritoriè causat & infert, est dispensabiliter annexus, ita ut peccator per hoc ipsum, quòd DEUM graviter offenderit, jam sit reus mortis secundæ & æternæ, jam sit damnatus ad talem mortem, habeatq; contra se latam mortis ejusdèm sententiam.

Considera 4<sup>to</sup>. Et recogita quantum reatus hujus apprehensio peccatorem quemvis deberet percellere? si quis propter sua crimina ad mortem corporalem damnatus, in carcere detineretur, ad tempus pro executione sententiæ destinatum, quantis ille lacrymis infelicitatem deploraret, quantis tristitiæ flucibus absorberetur, nullaq; humana admitteret solatia, quoscunq; ad se accedentes, mortis nuntios esse existimaret, aut certè eos, qui ipsum ad locum supplicij deducerent. Si modus aliquis & spes affulgeret suæ liberationis, quantà solitudine & studiò modum illum arriperet, adhiberet media, clem & gratiam aliorum posceret, nihilq; non ageret, ut mortis suæ mutaretur sententia, illeq; mortem effugeret.

Peccator post quodvis peccatum mortale, quamdiu adhuc in corpore vivit, detinetur corporis sui carcere, damnatus ad mortem æternam, educendus aliquando ex hoc carcere ad audiendam talis mortis sententiam, & hac morte tota æternitate plectendus. Et sentitne tantum malum suum? minimè. Dolendum sanè quod pleriq; peccatores non agnoscant hanc miseriam & infelicitatem, gaudent in tantis suis malis, & exultant in rebus pessimis. ludunt, & ducunt in bonis dies suos, immemores, quod sint brevè educendi è carcere, & coram DEI Judicis tribunali statuendi, ad audiendam suæ damnationis sententiam, quodve

in puncto ad inferna sint descensuri.

O utinam recogitarent ! utinam sibi providerent, & dum adhuc possunt placare Judicem, quamdiu possunt à mortis absolvi sententia, modos & media arriperent, illis uterentur ad evadendam mortem & supplicia æterna!

His consideratis tecum ipse dispice, & tuam consule conscientiam, an in pœnam peccatorum tuorum, non debeatur tibi pars in stagno ardente, an non sis reus mortis secundæ, mortis æternæ? reatum hunc mortis, quantum & quo fructu apprehendas? an ejus apprehensione deterearis à peccato? an movearis ad deploranda commissa peccata? quantum sollicitus es, ut DEUM Judicem, placatum & propitium tibi reddas? omnino stude, maturè causam hanc componere, quia nescis, quâ horâ ad Divinum rapiendus es Judicium. Novit Dominus mutare sententiam, si tu mutaveris vitam tuam. Age seriam pœnitentiam, peccata tua desce, vitamq; in melius mutare stude.

*Colloquium* institui potest per sequentem affectum. Benignissime DEUS, agnosco bonitatem & longanimitatem tuam, quâ me sustines misericordissimè, mortis æternæ reum, & expectas, ut supplex pro obtinenda venia ad te revertar. Fateor nolle te mortem meam, sed magis ut ad te fontem vitæ recurram & vivam. En ad te in toto corde meo quod in lacrymas solvi & colliquescere vellem, redeo, & ex toto corde detestor omnia & singula peccata mea, propter tuam immensam bonitatem. Non mea terrent me pericula, sed tua bonitas attrahit, ut detester peccata mea, ut te amplius non offendam. Nolo Domine, nolo unquam te offendere, tuâ potenti gratia, inconstantem me & ad omne malum proclivem adjuva & effice, ut te non offendam unquam in æternam.

*In fine: suscipe Domine.*

Me

## Meditatio I. De purgatorio.

*Praludium I.* Imaginare fornacem ardentissimam taliter vel magis succensam, atq; fuit succensa fornax Babilonica, ex qua flamma erumpebat cubitis quadraginta novem. Imaginare item in hanc fornacem mitti animas leviorum culparum & pœnæ temporalis exsolvendæ reas.

*Praludium II.* Postula à DEO, ut atrocitatem pœnarum purgatorij, intimè agnoscas, illarumq; fructuosâ consideratione movearis, sive ad evitandas eadē pœnas, sive ad juvandas animas, quæ in his pœnis detinentur.

*PUNCTUM I.* Audi illa verba Malachiæ. 3. *Purgabit filios Levi, & colat eos quasi aurum & argentum.* Quæ ipsa intellige de illis animabus, quæ flammis purgatorij expiantur.

Et considera 1<sup>m</sup> Animas purgatorij non incongruè intelligi per filios Levi. Hæ sanctæ animæ constitutæ & destinatæ sunt ad ministerium Tabernacul. testimonij : unde etiam inter flammis ardenti suspirant desiderio cum Regio Vate, *Quàm dilecta Tabernacula tua Domine, concupiscit & deficit anima mea in atria Domini.* Illæ præparantur, ut intrent Sancta Sanctorum, ut compareant & ministrant coram Domino & in templo sancto ejus, ut offerant sacrificia Justitiæ, sacrificia cordis contriti & humiliati, manipulos primitiarum seu honorum suorum operum & meritum, ut offerant victimas & holocausta ex immolata DEO sua voluntate, ex immolatis terrenis affectibus, inclinationibus, passionibus, amore proprio, & seipsis.

Considera 2<sup>d</sup> Easdem animas etiam cum auro & argento comparari, & per hæc significari

posse. Aurum sunt & argentum animæ, quæ inflammis purgantur: quia mors per quam à corpore divisæ sunt, pretiosa existit in conspectu Domini. Aurum sunt, propter auream suam charitatem, quam viverent in terris, coruscabant, & in qua ad mortem permanserunt. Sunt argentum propter candorem & nitorem conscientiæ, a culpis lethali- bus liberæ. sunt aurum & argentum destinata ad ædificium cælestis Hierusalem, quæ ædificatur ut civitas, estq; tota aurum mundum. Sunt tandem aurum & argentum, ex quibus efformantur electio- nis vasa præstantissima, in cælesti mensa appo- nenda, & ori Divino admovenda.

Confidera 3: id. Quod DEUS animas homi- num in gratia ejus decedentium ex hac vita, levi- um tamen culparum & pœnæ temporalis exsolven- dæ reas, purgatus sit tanquam aurum & argen- tum. Aurum & argentum non purgantur perfecte nisi dissolvantur & colentur, porro non dissolvun- tur nisi igne validissimo: Pariter & sanctæ purgato- rij animæ, purgabuntur igne vehementissimo & ardentibus flammis, DEUS colabit filios Levi tan- quam aurum & argentum. Purgationem hanc describit DEUS per Ezechielem cap. 2. *Congrega- bo vos congregatione argenti, æris etc. In medio for- nacis & succendam in ea ignem ad conflandum.* Quare imaginare à Justitia Divina succensam for- nacem talibus flammis, quæ vim habeant ad con- flanda metalla, in hanc ergo fornacem taliter suc- censam congregabuntur purgandæ animæ, congre- gatione argenti, ut conflentur, purgentur, & depu- rentur. Non ita argentum dum liquatur, ignescit, & totum in ignem quodammodo transmutatur, quomodo sanctæ illæ animæ, vehementiâ ignis purgatorij ignescent, ac totæ ab illo igne penetra- buntur. O quam miseranda hæc fors ipsarum!

PUNCTUM H. Ex occasione eorundem ver- borum



borum Malachiæ Prophetæ considera 4<sup>to</sup>. Quid in hoc auro & argento, hoc est in sanctis purgatorii animabus, flammis, succensæ illius fornacis purgabitur? purgabitur & hac ipsa purgatione depelletur rubigo, excoquetur scoria, separabitur pretiosum à vili. Aurum & argentum separabitur à metallis vilioribus & terrenis, ab ære, ferro, stanno, plumbo, & similibus, auferetur quidquid vitiosum & tædum est, & aliquam inspergit maculam: hoc est, opera charitatis & actus virtutum excellentium & heroicarum, depurabuntur à scorijs & rubigine imperfectionum, separabuntur, à defectibus vanitatis, tepiditatis, à mundano pulvere, quò religiosa etiam corda subinde sordescunt. Omnia hæc excoquentur. Culpæ etiam aliæ veniales, in vita non expiatae, tunc expiabuntur. Reatus item poenæ temporalis manens post sublatas culpas lethales non exolutus plenè in vita, in poenis illis atrocissimis exsolvetur.

Considera 5<sup>to</sup>. quousq; purgabuntur sanctæ illæ animæ? In tantis illis miserijs, hæc futura est ipsarum felicitas, quod poenæ illæ quantumvis atroces, non sint futuræ perpetuæ & æternæ. Sed quarumdam animarum, protrahentur ad diem supremi Iudicii, ultra quem nullius animæ, poena purgatorii producet; aliarum purgatio citius expeditur. Uniuscujusq; verò tantidiu poenæ & purgatio sunt duraturæ, quousq; aurum illud & argentum, hoc est anima, plenè & perfectè non depurabitur, quousq; non auferetur tota rubigo, quâdiu non excoquetur ad purâ scoria, quâdiu ab illo auro & argento non separabitur omne æs, ferrum, stannum, plumbum, & quidquid vile, terrenum, & maculosum est, ita ut non maneat nisi aurum præstantissimum, aurum pellucidum & sine macula, aurum totum mundum, tanquam vitrum mundum, hoc est, eousq; durabunt poenæ illæ unicuiq;

debitæ, quousq; non expiabuntur omnes culpe veniales, quousq; non tolletur totus reatus poenæ temporalis.

Confidera 6<sup>to</sup>. Poenas illas, quemamodum quoad durationem; ita & quoad intentionem & gravitatem suam, non futuras æquales, comparatè ad ònes animas: sicut auri & argenti cuiusq; purgatio non æquali igne nec æquali tempore absoluitur. Majore igne & tempore opus est ad excoquendam multam scoriam, & nimiam rubiginem, ad separanda item diversà metalla æris, ferri stanni, plumbi, atq; ad hæc ipsa absumenda, quàm opus sit ad depellendas leviores maculas & sceditates. Pariter & animarum sanctarum purgatio, non æqualibus poenis, nec æquali tempore absolvetur, majoribus & gravioribus poenis, ac longiori tempore purgari debebunt animæ, quæ plurimum & graviorum culparum invenientur reæ, & quæ majora habebunt exsolvenda debita. Minoribus & brevioribus poenis purgabuntur, quæ ad minus exsolvendum tenebuntur. Unicuiq; illud dicitur: *Non exibis hinc, donec solveris ad novissimum quadrantem.*

**PUNCTUM III.** Ad te ipsum mentem converte & cogita atq; in bonitate DEI confide, quòd & tu sis de filiis Levi, spectes ad populum electum, quòd sis assumendus, ut in Cælesti templo & tabernaculo ministres coram Domino. Existima quòd per gratiam Divinam, sis aurum & argentum, quatenus ( ut fortè potes opinari ) manes in charitate & gratia DEI sanctificante, quatenus nullus peccati mortalis, quòd ritè non expiaveris, est tibi conscius. Confide in Misericordia DEI, quòd non sis damnandus ad poenas inferni & ignem æternum.

Si tamen auro huic & argento admista sunt res, ferrum, stannum, plumbum, scoria, rubigo, pulveres

veres, sceditates, pluresq; maculæ, purganda hæc omnino erunt. Purgaberis tanquam aurum & argentum, proijceris in fornacem, in qua DEUS ejusq; Justitia succendet ignem ad conflandum aurum & argentum, scias atroces tibi pœnas in purgatorio sustinendas esse. Aurum & argentum non infertur in cælestes thesauros, nisi plenè mundum & depuratum! nihil enim coinquinatum intrabit in Regnum Cælorum.

Tales tibi sustinendæ erunt pœnæ in purgatorio, nisi hic aurum tuum, hoc est conscientiam & animam tuam ab omnibus maculis & immunditijs mundaveris, nisi pœnas, quas in altera vita exsolviturus esses, hic potius exsolveris, per sacrificia, elemosynas, mortificationes, Jejunia, usum Sacramentorum, usum indulgentiarum, per opera misericordiæ, charitatis, aliarumq; virtutum actus.

Si sapiens es, existima in hac vita potius satisfaciendum tibi esse Justitiæ Divinæ, hic satius exsolvendas pœnas: Facile hic DEUM placare potes, parvo hîc contentus erit, parùm licet de tuo contuleris, si ex vulneribus Domini tui JESU Christi usurpaveris, quod tibi deest, totum exsolves quod debes. Tempus vitæ præsentis est tempus illud, quo miseretur Deus, humiliter ergo ad ejus misericordiam recurras, & si quod dare potes, conferas in exsolutionem tui debiti, remittet tibi universum debitum tuum.

Age ergo quod potes. Post mortem quando mitteris in illum purgatorij carcerem, rigidissimè à te exigetur omne debitum & minimus ac novissimus quicunq; quadrans. Non poteris tunc in exsolutionem dare de tuo, non poteris quidquàm mereri. Merita etiam & satisfactionem Christi non poteris tibi usurpare, ad exsolvenda tua debita, frustra quoq; ad misericordiam Divinam recurre quia transibit tempus miserendi. Unicum re-

stabit, ut luas pœnas, & harum satisfatione ex solvas debita tua. Elige proinde: quod tuo bono consultius est, decerne & statue in hac vita exsolviturum te tua debita & non in altera. Constatue, quid pro expiandis peccatis tuis nunc agere debeas.

In Colloquio supplica humilimè misericordiæ Divinæ ut in exsolutionem delictorum tuorum acceptare velit pretium Sanguinis Unigeniti Filij DEI Domini nostri, tuamq; pœnitentiam & modica opera tua bona in gratia Divina & ex gratiæ ejusdem auxilio facta, nec post mortem tuam exigat aliam exsolutionem in purgatorii flammis.

*In fine: Pater noster.*

## Meditatio II. De purgatorio

*Preludia eadem, quæ meditationis præcedentis.*

PUNCTUM I. Audi illa verba 2. Machab. 12 Sancta & salubris cogitatio est, pro defunctis exorare, ut à peccatis solvantur. Circa quæ.

Considera 1<sup>mo</sup>. Defunctos, qui in Domino moriuntur hoc est, qui in gratia DEI ex hac vita decedunt, communiter manere ligatos, ligatos inquam culpis levioribus, quas in vita non expiarunt, & obligatione luendi temporales pœnas.

Quemadmodum Lazarus in morte sua ligatus fuit institis; ita & animæ iustorum dum per mortem educuntur è corpore, ligantur & constringuntur vinculis, quibus se in vita implicarunt. Hisq; vinculis hoc est peccatis suis vinctæ & ligatæ mittuntur in fornacem purgatorii, sicut jussu Regis in fornacem Babilonicam missi fuerant ligati tres pueri Hebræi.

Considera 2<sup>do</sup>. Solutionem vinculorum quibus

bus animæ purgatorij vinciuntur duplici modo fieri posse, vel per pœnas ipsas, earumq; perpeffionem, quam satisfaffionem vocant ita ut ad solutionem à vinculis animæ cuiuspiam opus sit ut ipsa purgatorij flamma, vincula, & funes peccatorum absumat & exurat, quibus absumptis tunc primum anima soluta, est expedita, ut in cælum feliciter evolet. Alter. modus, quo vincula animarum sanctarum solvi possunt, est per satisfaffionem. Nimirum si Filio DEI similis, descendat in fornacem; dirumpat illa ipsa vincula, faciatq; medium fornacis tanquam ventum roris flantem, & solutas animas educat ex fornace. Hoc est si à quopiam exhibeatur obsequium æquivalens pœnis, ad quas luendas tenetur anima. Tale enim obsequium vim habet dirumpendi vincula, & solvendi à peccatis, ita ut amplius Iustitia Divina pœnas, per quas solvatur anima, exigere non possit.

PUNCTUM II. Circa eadem verba 2. Machab. considera 3<sup>id.</sup> quod animæ purgatorij non possint se ipsas solvere à peccatis, nisi luendo pœnas, & per satisfaffionem, quæ gravissima ipsis & molestissima est. Per satisfaffionem verò nullatenus possunt se ab his vinculis liberare, sunt enim ligatæ & vinctæ, sunt viribus omnibus destitutæ, non habent talia gratiæ Divinæ auxilia, ut quidquam salutariter & meritoriè agere possint, per quod sibi indulgentiam & pœnarum remissionem promereantur. Quodsi aliquid operantur bene, & laudabiliter, id non cedit in ipsarum commodum, ita ut per hoc pro suis peccatis & pœnis satisfacciant: siquidem sunt extra statum viæ & meriti. Quare ut per satisfaffionem, à peccatis & pœnis solvantur, satisfaffio pro ipsis, ab alijs poni debet. Quod officij relictum est potissimum hominibus in hac vita adhuc degentibus. Hi in eo statu sunt constituti, ut & sua peccata expiare, pro  
 ijsq;

ijſq; ſatisfacere poſſint, & ſatisfactionē exhibere pro animabus purgatorij. Iſſis conceſſum eſt, ut ſint Angeli DEI, ut ſint ſimiles Filio DEI, & per ſuam charitatem atq; applicationem operum ſatisfactoriorum, aliorumq; mediorum deſcendant in fornacem purgatorij, ut ſolvant & diſrumpant vincula peccatorum, quibus animæ illæ contriunguntur & detinentur, ut ignem quo cruciantur extinguant, & ipſas animas inde educant.

Conſidera 4<sup>to</sup>. ſatisfactionem illam, quā ab hominibus in hac vita degentibus ſolvuntur deſuncti, ſeu animæ purgatorij à peccatis ſuis, fieri per orationem. *Sancta & ſalubris cogitatio eſt, pro deſunctis exorare, ut à peccatis ſolvantur.* Orationis nomine venit, quidquid habet vel habere poteſt rationem operis ſatisfactorij, ſi per intentionem ſanctam applicetur animabus purgatorij & offeratur DEO, atq; exhibeatur in ſolutionem pro peccatis earum. Talia opera ſunt ſacroſancta Miſſæ ſacrificia pro deſunctis oblata, eleemoſynæ & opera miſericordiæ, mortificationes corporis & jejunia, orationes, precationes & ſancta ad DEUM ſuſpitia, Indulgentiæ, quæ per modum ſuffragij animabus applicari poſſunt, & quæcunq; bona opera atq; virtutum maximè heroicarum exercitia. Per hæc omnia animæ à peccatis ſolvi, & à pœnis liberari poſſunt. Offers Miſſæ ſacrificium vel curas offerri pro deſunctis, efficis ut Filius DEI Chriſtus deſcendat in fornacem purgatorij, & diſrumpat vincula peccatorum, quibus animæ vinctæ tenebantur, ut ſanguinis ſui rore refrigeret ardores flammarum piacularium, ut animas inde liberet & educat. Facis eleemoſynas & opera miſericordiæ, cogita, quòd non ſic aqua exſtinguit ignem, ſicut eleemoſyna exſtinguit peccata animarum purgatorij, & ignem ad earum expiationem ſuccenſum. Caſtigas corpus tuum, mortificationibus, jejunijs affligis



affligis, partem poenarum in te suscipis & cum atrocioribus permittas, ne illæ animæ rigidius à Justitia Divina puniantur. Orationes etiam tuæ & preces frequentes ac etiam assiduæ, si in gratia DEI constitutus, eas ad DEUM fundis, multum juvant animas purgatorij. *Multum enim valet deprecatio justæ assiduæ.* Angeli Sancti, qui ante DEI conspectum deferent orationes & obsecrationes tuas, mittentur ut in fornacem purgatorij descendant, solvantq; animas à peccatis, & educant in refrigerium.

Per Indulgentias etiam quas animabus applicas ex Thesauris meritorum Christi & Ecclesiæ, solvis quadrantes novissimos, quos exsolvere tenentur animæ, & quos ut exsolvant detinentur in carcere.

PUNCTUM III. His consideratis reflecte te, quòt & quàm faciles modos habueris & habeas in potestate tua, per quos juvare potuisti & potes animas in purgatorij flaminis detentas. Cogita felicem te esse, si aliquam illarum à peccatis solvisti, & ex purgatorij ignibus liberasti. Noveris talem animam hujus beneficii totà æternitate gratam tibi futuram. Si nihil egisti, & agis, duri cordis & pectoris es, qui tantà calamitate non flecteris, cum facile succurrere possis.

Cogita plures fortè animas esse, quas DEUS per te liberari voluit, quas si liberare neglexeris, infelices illæ cogentur totum suum debitum luendo, promeritas poenas exsolvere. expectant illæ à tanto tempore, à tot annis, inter continuos gemitus & suspiria, ut illis succurras. Ergone pro illis liberandis nihil ages? excitare ad illis succurrendum, ipsarum calamitate, poenarum, quas sustinent gravitate, & acerbitate, ac etiam Sanctorum, talibus animabus succurrentium exemplis, S. Christi, quæ durissima quæq; patiebatur & exquisitis mortifi-

mortificationibus se cruciabat, ut animabus purgatorij opem ferret. S. Gerrudis, & tot aliorum Sanctorum, qui omnem fructum satisfactorum quorumvis suorum bonorum operum, animabus his donabant, in easq; transfundebant. Sancti Nicolai Tolentini, qui suis quotidianis sacrificijs & orationibus animas studiosissimè juvare conabatur. Tot Regum & Principum, qui plura sacrificiorum millia pro animabus suorum amicorum fieri curarunt, fundationes amplas fecerunt, confraternitates pro liberandis animabus instituerunt.

Vide quid te etiam facere conveniat? fac proposita. Deprecare sanctas illas animas, quòd nihil vel parum, pro illis liberandis egeris. Corrige, stude, animabus hujusmodi, quàm maxima suffragia & subsidia etiam ab alijs afferenda, à Divina verò misericordia requiem æternam ipsis donandam precare.

*In Colloquio supplica humiliter Patri Misericordiarum, ut cor tuum & aliorum corda flectat ad misericordiam & commiserationem super animabus purgatorij, quatenus eas juvare vestris suffragijs velitis, & ut eas educat benignissimè ad requiem opulentam, & felicitatem æternam.*

*In fine: Pater noster*

## Meditatio III. De purgatorio.

*Preludia eadem quæ meditationis primæ de purgatorio.*

PUNCTUM I. Audi illa verba Christi Matth. 5. *Beati misericordes, quoniam ipsi misericordiam consequentur.* Item illa Psal. 40. *Beatus vir qui intelligit super egenum et pauperem in die mala liberabis*

*berabit eum Dominus.* Et considera omnem, quidem misericordiam quam præstamus pauperibus & egenis laudabilem & salutarem esse, Divinamq; nobis promereri misericordiam, sed maximè illam quæ exhibetur animabus, post mortem pœnam purgatorij luentibus. Quod ut melius assequaris.

Considera ulteriùs imò. Misericordiam illà, si cætera sint paria æstimabiliorem & magis meritariam esse 1. quæ exhibetur ijs, qui non solum pauperes sunt, sed simul maximè miserabiles & calamitosi. 2. quæ exhibetur egenis & pauperibus ita viribus & quibuscunq; alijs medijs destitutis, ut non possint quidquam operari, ex labore manuum suarum vivere, & vitæ sustentandæ ac miseriæ sublevandæ necessaria sibi providere. 3. Quæ præstatur pauperibus sanctis, & DEO singulariter gratis & acceptis, de quibus quòd tales sint certò tibi constat. 4. quæ exhibetur egenis & pauperibus, quorum egestas & calamitas licet vera sit, non est tamen patens, oculis illam non intueris, gemitus & lamenta non audis, sed tantùm ex relatione aliorum, & per fidem cognoscis dari pauperes valde indigentes, ab omnibus derelictos, non potentes prodire, ut suam miseriam & calamitatem spectandam exhibeant, & stipem emendicent.

Animæ purgatorij sunt hujusmodi pauperes, & egeni, non solum enim sunt indigentissimi, ita ut indigentia major, quàm sit eorum, cogitari non possit, sed etiam sunt maximè calamitosi & afflictissimi. Sunt pauperes visu destituti, ipsorum vox illa frequentissima est. *Quale mihi gaudium, qui in tenebris sedeo, & lumen calì non video*, qui non video Lumen Increatum, Lumen oculorum meorum, cujus visione summè felix & Beatus aliquando tandem efficiar, qui non video Christum, qui est lux vera illuminans omnem hominem, non video Sanctissimam MARIAM pulchram ut Luna, c-

electam ut sol, qui non video astra Cæli, nimirum Beatos jam cum Christo regnantes. Animæ illæ sanctæ, sunt pauperes in carcerem dati, propter aliquam debitam, quæ contraxerunt in vita, nec exolverunt, nunc verò non habent unde solvant, sunt pauperes qui gravissimis cruciantur tormentis, poenitq; & satispensione, contracta exsolvunt debita. 2do. Animæ purgatorij sunt pauperes viribus ita collapsi & destituti, ut non possint operari, non possint ex labore manuum suarum exsolvere debita sua. Manus ipsarum confictæ & ligatæ sunt, ut nullos modos adhibere, nullas industrias exercere possint, quibus pretium solutionis acquirant. O quam felices essent, si ipsis concederetur ad vitam regredi! ô quam instanter agerent? quantâ curâ & sollicitudine laborarent, ut universum debitum reddere possent! 3. Animæ purgatorij sunt pauperes omni commiseratione digni, sunt pauperes sancti, DEO grati & amabiles, sunt Filij DEI, sunt sponsæ Cælestis Sponsi. Misericordia illis exhibita non potest non esse nisi DEO acceptissima. Quia maximè grata est Patri, misericordia, quæ exhibetur charissimo ejus filio in calamitate constituto, grata est sponso misericordia, quæ exhibetur amabilissimæ suæ sponsæ. : deniq; grata est amico misericordia, quæ exhibetur intimo suo amico & cui eam exhiberi maximè desiderat. 4. Tandem animæ purgatorij sunt pauperes, quarum homines mortales non intuemur miseriam & calamitatem. Præstat quidem DEUS gratiam quibusdam animabus, ut in flammis appareant, ut opem visibiliter ab hominibus viventibus implorent: sed hæc rarissimè fiunt, aliæ animæ communiter in carcere detinentur, nec ex illo prodire permittuntur. Ex tunc tantam habemus, purgatorium dari, in eoq; animas. Quod ipsum utinam vivâ fide crederemus, utinam hac fide excitaremur ad succurrendum miseris illis animabus

animabus. Multæ ex illis sunt omni destitutæ suffragio, sunt in oblivione apud homines, tanquam mortui à corde, sunt in terra oblivionis, multæ expectant, certæ alicujus ac determinatæ personæ suffragia, aliquæ expectant suffragia tua, ut tu illis succurras & fortè inter hos pauperes sunt Parentes tui, fratres, sorores, amici, Benefactores tui, quibus specialiter obligaris ex pietate, charitate, ex promissione & assecuratione tua, ipsis in morte facta, fortè etiam quibusdam animabus obligatus es ex Justitia, propter detenta à te ipsorum pia legata, suppressa testamenta, accepta ea, quæ in subsidium animæ cedere debuerant, non persolutos census, per varias inscriptiones constitutos. Misericordia in has animas ipsis quidem maximè desiderabilis, tibi verò multum salutaris est futura. Sicut è contra immisericordia valde tibi est eritò; perniciofa. Judicium tibi est sine misericordia, si ut teneris non facis misericordiam, aut verius Justitiam.

PUNCTUM II. Considera 2dò. Quod misericordiæ, quæ exercetur in animas purgatorij, præmium futurum sit misericordia exhibenda illis ipsis, qui faciunt misericordiam, qui misereantur pauperum illarum animarum, etiam ipsi misericordiam consequentur. Quamdiu in corpore vivimus, replemur multis miserijs, multis malis & calamitatibus obnoxij sumus, adeoq; & ipsi egemus, egrebimusq; semper misericordiâ, idq; non solum in hac vita, sed vel maximè in morte, ac etiam post mortem ad flammam purgatorij etiam ipsi deputati. Dum vivis dies vitæ tuæ, pauci & mali sunt, adeoq; miser es omnibus diebus vitæ tuæ, miser es propter continuas tentationes, quibus ab hostibus animæ tuæ continuo impugnaris, miser es propter tot animæ pericula, propter ærumnas & infirmitates, propter damna & multiplices cruces, quas

sustinere debes. In his omnibus eges misericordiâ, quæ tibi subveniat. Moreris, dies mortis est dies calamitatis & miseriæ, in maximis tunc versaris doloribus & angustijs, tunc descendet diabolus, habens iram magnam, & sciens quod modicum tempus habet, gravissimis te aggredietur tentationibus, & validissimos faciet insultus, ut anima tua, si succubueris illi, in prædam cedat. O in quantis tunc versaberis periculis, quantis timoris & tristitiæ jactaberis fluctibus ! O momentum à quo tota pendet æternitas, quàm terribile homini morienti es futurum ! in morte manet te adhuc Judicium DEI, auditurus es sententiam vel vitæ vel mortis æternæ.

Post mortem, si miseris ad pœnas purgatorij, illæ ipsæ pœnæ & cruciatus te manent, in quibus existunt animæ, quæ nunc tua ope & misericordiâ egent. Illæ nunc tuâ, tu brevî aliorum, vel etiam illarum ipsarum animarum ope & auxilio indigebis. In his omnibus miserijs & calamitatibus vitæ præsentis, mortis, & vitæ alterius, ut misericordiam experiaris & coniequaris, sis ipse misericors in omnes quidem pauperes sed maximè in pauperes purgatorij animas.

Sed scire voles, à quonam es misericordiam consecuturus, in omnibus tuis miserijs & angustijs ? consequeris inprimis misericordiam illarum ipsarum animarum, quas tuis suffragijs adjuvisti, quas à pœnis purgatorij liberaasti. Illæ animæ ad DEI conspectum admittæ miserebuntur tui, suò patrociniò & intercessione pro te ad DEUM facta succurrent tibi, in tuis angustijs, instabunt obsecrationibus, postulabunt gratias uberes, singulares, victrices, ad superandas tentationes, quibus intellaberis. Quodsi in peccatum labi te contigerit, instabunt apud DEUM, ut per veram & salutarem pœnitentiam conturgas, nec amplius ad peccata redeas. Defendent te in periculis animæ

tux



tuae, sed neq; in periculis corporis, vitæ, famæ, & fortunæ absq; suo præsidio te relinquent, etiam in temporalibus Divinas tibi exposcent benedictiones. In morte etiam tua, ô quanta circa te sanctarum illarum animarum futura est cura & sollicitudo? ô quæ non agent, ne tentationi succumbas, ut victor evadas & ex hoste triumphes, ne universum mundum amissurus, etiam animæ tuæ detrimentum patiaris, ut morbos & dolores patienter sustineas, ut cælestes tunc accipias consolationes, ut moriaris pretiosâ morte sanctorum. Post mortem etiam eadem animæ te in purgatorio constitutum solgebunt, ut ad te juvandum animi mortaliuin excitentur, Divinas exposcent gratias, ut suffragia animabus indeterminatè applicata, vel etiam pro quopiam determinatè oblata, non illi tamen, sed alijs, ex rationibus DEO cognitis, applicanda, tibi cedant, ipsæ orabunt & supplicabunt.

Deinde qui in animas quæ in igne purgatorii expiantur, misericors fuerit, ille ipsius Christi misericordiam consequetur. Pro tuis suffragijs, pro applicato fructu satisfactorio aliquorû vel quorumvis tuorum bonorum operum, in & ex gratia DEI factorum, Christus tuam remunerando charitatem, applicabit tibi satisfactionem & merita mortis ac passionis suæ. Condonabit tibi culpas tuas, remittet pœnas, tuam cumulabit gloriam, prout fecit S. Gertrudi, cui morienti & in morte sua anxîæ, quòd post translata sua omnia merita in animas purgatorii, ipsa non haberet, unde pro suis peccatis temporaliter satisfaceret, Christus apparens declaravit charitatem ejus in animas, se tanti æstimare, ut propter hanc, illi remittat omnes pœnas, quæ ei essent subeundæ, & gloriam suâ liberalitate sit cumulaturus.

Tandem qui misericors fuerit in animas purgatorii,

gatorij, DEI ipsius misericordiam consequetur. Misericordia, quam exhibuit animabus purgatorij. ad Divinam pro ipso perorabit misericordiam, perorabunt & ipsæ animæ, multiplicatisq; intercessoribus, DEUS illi suæ propitiationis abundantiam largietur. Misericordem, qui intelligit super egenū & pauperē, in die mala liberabit Dominus, liberabit in die tribulationis, & tentationis, in die mortis, in die sui Judicij, in die & tempore purgationis ipsius. Liberabunt eum animæ, per sua suffragia & patrocinia. Christus per applicationem suæ satisfactionis, DEUS ipse per suam Clementiam, exaudiendo preces animarum, acceptando Christi satisfactionem, illiq; applicando, qui in animas purgatorij misericors exstitit, in vita, in morte eundem, suis illi succurrendo gratijs, & ex pœnis purgatorij, ad cœlestem gloriam evocando, liberabit.

PUNCTUM III. His consideratis, Re flecte te & cogita 1<sup>mo</sup>. quæ & quanta sit tua erga animas in purgatorio detentas misericordia? an tanta ut propter illam, tu quoq; misericordiæ obtinendæ spem habere possis? Cogita si misericors es, quod in hac vel illa peccandi occasione & gravi tentatione non succubueris, sed ipsam fortiter viceris, an hæc victoria non sit tibi data in præmium tuæ in animas misericordiæ, quod si tentationi succubuisti, vide an non ideo DEUS lapsum tuum permiserit, quod sis in animas immisericors.

Cogita 2<sup>do</sup>. Mortem tuam jam forte adesse vicinam & proximam. De dispositione ad illam, expediret te maturè cogitare, expediret modos & media providere, per quæ obtineas, ut in illo articulo DEUM in te misericordem experiaris, quatenus tunc de hoste tuo feliciter triumphes. Et quid rogo in hunc finem agis? quæ adhibes media? efficacius medium esse non potest, quam ut ipse misericordiam exhibeas, (*Misericordia*) testis

S. Augustino ) *Stat ante fores gehenna, & neminem permittit in carcerem mitti.* Hæc in Judicio DEI, Patronam causæ tuæ aget. Hæc non permittet ut malâ morte moriaris. Siquidem S. Hieronymus non meminit se legisse malâ morte mortuum, qui libenter opera charitatis exercuit. Quod si quæcunq; misericordia tantum in morte juvat, juvabit maximè illa, quæ animabus defunctorum exhibetur.

Cogita 3<sup>ti</sup>o pro tot tantisq; tuis peccatis, si pœnas inferni evaseris, ut in Divina confidis misericordia, luendas tamen tibi esse purgatorij pœnas. Difficile tibi persuadere poteris, in hac vita plenè exsolviturum te omne debitum & statim à morte rectâ evolaturum in cælum, attento languore & remissione tuæ pœnitentiæ quam agis, fugâ & horrore asperitatum & mortificationum, neglectu Indulgentiarum, aliorumq; operum satisfactoriorum, maximè cùm non quadrantes, sed talenta, & millia talentorum sint tibi exsolvenda. Ex his ergo pœnis, quas certò certius lues, quis oro te eripiet? quis pro te tantum tuum exsolvet debitum? Confidis fortè amicis tuis, eorumq; in te affectui, spem habes in pijs tuis legatis, in testamento, & per illud facta fortunæ tuæ dispositione. Confidis fidei & conscientiae executorum testamenti, quia illi ultimam tuam exequentur voluntatem, sacrificia pro te fieri curabunt, suffragijs varijs, & eleemosynis animam tuam juvare volent. Cæterum quod his fidere non debeas, millena quotidiana te doceant & præmonent exempla. Alios, de quorum affectu securior esse possis, quære amicos. Ad cælum quàm plurimos tuâ ope adjutos trans mitte, qui, cum defeceris in via, recipiant te in æterna tabernacula. Hi te non fallent, procul ab his omnis ingratitude, procul benefactorum suorum oblivio: quando detineberis carcere, in quo exi-

getur à te, ut solvas quod debes, amici illi tui, cum illis bene fuerit, facient tecum misericordiam, Regi sæculorum & Supremo Cæli & terræ Dominatori, suggerent, ut educat te de carcere, ac per solutâ, Justitiæ suæ & Christi meritis & suffragijs viventium tibi applicatis, satisfatione adæquata, ad sui conspectum & cælestem te admittat Beatitudeinem.

Fac proposita convenientia. Fac item contractum cum illis sanctis animabus, quod velis in illas esse misericors, quod firmum fixumq; habeas, illas juvare & ex flammis, quibus expiantur, liberare per sacrificia, eleemosynas, jejunia, mortificationes, Indulgentiarum usum, & animabus applicationem, per opera charitatis, misericordiæ, aliarumq; virtutum actus, ac tandem per applicationem fructûs satisfactorij, quorumcunq; bonorum operum tuorum, ut illæ vicissim, & suam tibi exhibeant & Divinam impetrent misericordiam.

Contractui huic, si tu ex parte tua steteris, illas quoq; ex parte sua impleturas, pro certo & indubitato habe.

*In Colloquio*, Christo pro redemptione mundi suum sanguinem fundenti, supplica humilimè, ut eodem sanctissimo sanguine ardores ignis purgatorij restinguat, ut ex infinito meritorum suorum thesauro pretium adæquatum pro animabus amicorum tuorum vitâ sanctorum (quos in particulari designabis) Justitiæ Divinæ, exsolvat, tuumq; cor ad misericordiam ipsdem pro tuo posse exhibendam, flectat & emolliat.

Supplica item Matri misericordiæ, ut illa quoq; suâ intercessione & patrocinio easdem adjuvet, piissimam suam manum porrigat, maternum montret affectum, atq; ad DEI, suumq; ac Sanctorum transferat consortium.

*In fine : Anima Christi. Ave MARIA*  
Me.

## Meditatio I.

## De Pretiosissima DEI Parente.

*Praludium 1.* Imaginare quod species Beatissimam DEI Parentem, continentem sub suo Pallio Ecclesiam Christi militantem, omnesq; ipsius status, sed vel maximè fideles, in sua protectione & patrocínio confidentes, atq; ad se devotione & affectu singulariore recurrentes.

*Praludium 2.* Postula gratiam, ut tenerri-  
mo filiali affectu in sanctissimam hanc Matrem  
ferri possis, vicissimq; Maternum ejus experiaris af-  
fectum, atq; sub pallium & protectionem ejus re-  
cipiaris.

PUNCTUM I. Audi illa verba Proverb. 8.  
*Qui me invenerit, inveniet vitam & hauriet sa-  
lutem à Domino.* Et considera quemadmodū plu-  
ra alia, quæ in sacris Scripturis de Sapientia incre-  
ata dicuntur ab Ecclesia pretiosissimæ Divinæ Pa-  
renti applicari & accomodari solent, ita & addu-  
cta Sapientis verba optimè de eadem Sanctissima  
DEI Matre intelligi posse eo sensu, quod qui in-  
venit Mariam inveniat vitam animæ, & hauriat  
salutem à Domino hoc est salutem æternam con-  
sequatur. Circa quam veritatem.

Considera ulterius *primo*. Quid sit invenire  
Mariam? Invenire Mariam non est quid aliud ni-  
si invenire gratiam, affectum, & patrociniū san-  
ctissimæ Virginis Mariæ. si hæc lucreris, præstò ti-  
bi est Maria, adest tibi præsens per opem & præ-  
sidium suum, opitulatur & succurrit tibi, protegit  
te & defendit, suo filio te reconciliat, impetrat ti-  
bi gratias & beneficia Divina. Invenis & lucra-  
ris affectum Mariæ, invenis Mariam, vicissimque  
ipsa te invenit, tanquam ovem perditam, in suas

manus te suscipit, illudq; habes, quod non possis perire, præ pietate Mariæ. Quàm felix es, si invenis Mariam, si te invenit Maria.

Confidera 2dò. Quomodo inveniatur Maria ! Invenitur Maria a quærentibus illam, qui quærit invenit. Quærenda verò est per recursum & refugium ad ipsam factum. In periculis, in necessitatibus, in rebus dubijs, Mariam invoca, & invenies Mariam. Quære Mariam per filialem erga ipsam affectum & amorem. si quæsieris ut Filius, Mariam Matrem invenies. Quære per exhibitam ipsi reverentiam, cultum, honorem & obsequia, sic quærendo invenies Mariam, in suos servos beneficentissimam & clementissimam Dominam. Quære per zelum, studium, & desiderium promovendi honorem ipsius, invenies Mariam boni tui studiosissimam. Quære Mariam per vitam sanctam & sanctè actam, conformem imagini Filij DEI, conformem exemplis Christi, invenies Mariam, Matrem Filij DEI & tuam, hoc est Mariam experieris Matrem. Ipsa enim est Mater Filij DEI, si proinde tu per gratiam sanctificantem fueris filius DEI, Maria mater tua erit. Ipsa est Mater Christi, si in Christum transformaberis per imitationem ejusdem, agnoscet te pro filio suo, amabit ut filium, matremq; tuam se esse monstrabit. Quære tandem Mariam per imitationem virtutum ipsius. imitare modestiâ Mariæ humilitatem, castimoniam, puritatem, cæterasq; virtutes Mariæ, has omnes in te exprimere stude, ea ratione invenies Mariam, hoc illicio ipsam attrahes, affectumq; ejus conciliabis tibi.

PUNCTUM II. Confidera 3tò. Ubinam inveniri possit Maria ! Ubiq; illa inveniri potest. Ubiq; te exaudiet. Sed maximè inquirenda est Maria in templo, per orationes ante aram, ante imaginem sanctissimæ hujus Virginis, fufas, ubi illa quæ-

sivit



sivit amabilissimum suum Filium DEUM, ibi tu quære Matrem. Inquire Mariam in Nazareth, ibi invenies gratia plenam. Nazareth interpretatur sanctificata, custodita, separata, si Nazareus & sanctificatus DEO fueris, si gratiam sanctificantem custodieris, si te separaveris & abstraxeris à tumultu curarum terrenarum & sensualium, invenies Mariam. Invenies adhuc Mariam in Bethleem, hoc est in domo panis, si fueris affectus singulariter Santissimo sacramento Eucharistiæ, ubi sub speciebus panis residet Panis verus, qui de cœlo descendit. Inquire Mariam in Cana Galilææ, hoc est, in desponsatione, quâ anima tua desponsetur DEO & gratiæ ejus, in transmutatione aquæ in vinum, per quam efficiaris vinum ori Divino gratum & acceptum. Quære Mariam sub cruce, quære in afflictionibus, in tribulationibus, configendo te cruci Christi & invenies Mariam, ejusq; in his omnibus singulare experieris auxilium & patrocinium.

Considera 4<sup>to</sup>. Quâ ratione fiat, ut qui inveniat Mariam, inveniat vitam & exhaustam salutem à Domino. Modus inveniendi vitam & salutem per Mariam ejusq; affectum, certissimus est, & ita secundum præsentem providentiam necessarius, ut in hac providentia non obtineatur vita & salus absq; Maria. Maria est Mater misericordiæ, & Mater vitæ, ipsa nobis vitam genuit & semper gignit. Ad hanc misericordiæ Matrem recurre, etiamsi DEO mortuus fueris, vives, & vitam per Mariam accipies. Quod gratiam Baptismi, per quam cæpisti DEO vivere, acceperis, Mariæ debes, quod hanc vitam in Baptismo acceptam, per peccatum deinde amissam, in Sacramento poenitentiae receperis, etiam id per Mariam habes, si etiam nunc vivis per gratiam, vitamq; hanc conservas & auges, affectum Mariæ agnosce, per ipsam datur vita mundo, quot

quot in anima vivunt, post DEUM & Christum, vitam hanc Mariæ debent, ipsa enim Mater est viventium.

PUNCTUM III. Considera 5<sup>to</sup>. Quid qui Mariam invenit, hoc est qui invenit affectum, patrocinium, & protectionem Mariæ, ille inveniat & hauriat salutem à Domino, quia secundum præsentem ordinationem Divinam, non est possibile salvari quenkumque, absq; Maria, non solum eo sensu, quia nemo potest salvari sine Christo, sine Salvatore, cujus Mater meruit esse Sanctissima Maria, sed etiam, quia per manus Mariæ DEUS nos habere voluit omnia salutis media, omnes gratias, omnia opera bona & merita nostra, dependenter à quibus salus obtinetur. Ipsa est thesauraria, quæ dispensat nobis thesauros cœlestes, ipsa est mare gratiarum, ex quo gratias accipiendo, haurimus salutem à Domino, in quo feliciter piscamur margaritam pretiosam, nimirum regnum cœlorum & nostram in cœlo beatitudinem. Per hoc, Pater Cœlestis suam Filiam, Filius Unigenitus Patris, suam Matrem, Spiritus Sanctus suam honoravit Sponsam, quod tres hæ Sanctissimæ Personæ, totum nos habere voluerint per MARIAM.

Ex his consideratis conclude vitam animæ tuæ non posse te habere, nec etiam salutem posse consequi, secundum præsentem ordinationem Divinam sine ope, patrocinio, & affectu Mariæ. Ejus proinde gratiam quærendam & promerendam esse, ut invenias vitam & consequaris salutem. Reflecte te deinde, quid hactenus egeris, ut affectum & amorem Sanctissimæ Mariæ invenires ! quæ tua devotio & pietas erga hanc Sanctam Matrem ? quis honor ? quis cultus à te illi exhibetur ? recurrisne ad illam in tuis tentationibus, periculis, afflictionibus, recurrisne ut Filius ad Matrem ? quis zelus, quod studium pro-

moven-

movendi cultum, defendendi honorem Mariæ ? utrum per vitam sanctam conformem exemplis DEI, & Mariæ Filij, Domini nostri JESU Christi, per imitationem virtutum Matris hujus Sanctissimæ, ipsi placere ejusq; affectum promereri studeas ? an quæris Mariam in templo, in frequenti Sacramentorum & digno utu, ac etiam sub cruce Christi ? vide quid te deinceps agere oporteat ? fac proposita. Deprecare Matrem Sanctissimam, desse negligentias tuas in cultu ipsius & quascunq; ejus irreverentias ?

*In Colloquio* Postula à Matre Sanctissima, ut illam, quæ invenitur etiam à non quærentibus, tu quærere velis, & quærendo invenias, inventam teneas nec unquam dimittas.

*In fine: Ave MARIA.*

## Meditatio

### De Pretiosissima DEI Parente.

*Praludia* eadem quæ meditationis præcedentis

PUNCTUM I. Audi illa verba Psal. 115. O

*Domine ego servus tuus & Filius Ancilla tua.* Eaq; ipsa hoc sensu intellige : illum tantum servum DEI esse & talem se profiteri posse, qui verè est Filius Mariæ quæ se Ancillam Domini appellat. Connexa hæc & indivisa sunt, esse servum DEI & esse Filium Mariæ. servus DEI esse non potes, si non fueris Filius Mariæ. Circa quod ipsum.

Considera ulterius *Imò* Quid sit esse servum Domini. Servus Domini est, qui sciens voluntatem Domini, eam facit & exequitur, semperq; paratus & promptus est ad omne imperium, & quemcunq; nutum Domini sui. Servus DEI es, si servas præcepta ejus, ab his enim servandis, servus dictus esse

esse existimatur, imò si non solum præcepta & imperia, sed etiam quosvis nutus, hoc est consilia & inspirationes ad bonum te excitantes, exequeris.

Præterea servus Domini est, qui omnes suas actiones, omnia obsequia ac vitam ipsam Domino debet. Quidquid agit, non in suum vel cuiuspiam alterius, sed in Domini sui commodum agit. Totus est Domini, ejus subjacet dispositioni, & ab hac dependet in omnibus. Et tu servus DEI es, si omnes motus, actus, & respiria tua, DEO consecras, in DEI commodum, hoc est in laudem & gloriam ejus refers. Si Divinæ voluntati & dispositioni, te tuaq, omnia, & vitam ipsam tuam cum omni indifferentia, & animi præparatione, ad id quod DEO placet, relinquis.

Servus adhuc Domini est qui Domino adhæret, Dominum suum amat, honorat, reveretur, Dominum sequitur, honorem ejus zelat, pro Domino se opponit, nullumq; vult alium Dominum agnoscere. Etiam tu servus DEI es, si DEO adhæres, si per peccatum ab eo non recedis unquam, si Dominum tuum JESUM, à quo redemptus es, sequeris, imitaris, ejus vestibus & insignibus indueris, nec te à DEO, à Christo, & ejus servitio, abstrahi permittis, si non es servus peccati, si excutis servitutem mundi, carnis & diaboli, siquidem qui his servit, servus DEI esse non potest.

PUNCTUM II. Considera 2dò. Quid est esse Filium Ancillæ Domini? Filius debet ducere originem à suo Patre & Matre, debet ab illis accipere suum esse, substantiam & vitam suam, eaq; omnia, quæ spectant ad perfectionem ejus esse. Debet præterea habere similitudinem cum Patre & Matre, debetq; esse imago suorum Parentum. Ut sis Filius Ancillæ Domini, ab ea te originem ducere oportet, ab ipsa debes habere tuum esse, tuam substantiam, tuam vitam & quidquid te perficit.

facit in tuo esse, imò quidquid boni habes, ab illa & per illam habere debes. Et hæc quidem à Materno Ancillæ Domini affectu habes, pluraq; ex his uberiùs & fructuosius habere potes, si in his ad Mariam recurras. Portat te illa in suis visceribus, affectu complectitur, suaq; intercessione vitam animæ, & omnia bona tua obtinet, & tibi confert. Spiritus Sanctus ita supervenit in Mariam, ut non solum ipso cooperante, ex purissimo suo sanguine, tanquam vera Mater carnem Filio DEI ministraverit, sed etiam ut tanquam Ancilla Domini, ministraret tibi omne quidem tuum esse, sed vel maximè vitam animæ, & esse tuum supernaturale, quò Filius DEI es, ut ita sis Filius DEI per adoptionem, ut simul etiam sis Filius Ancillæ Domini.

Cæterum ad rationem perfectam Filij Mariæ restat adhuc, & ex parte tua necessarium est, ut cum ipsa hac Matre habeas similitudinem, ut sis imago ipsius. Vide quæ in Ancilla Domini relucet dotes, virtutes, & perfectiones, atq; lineamenta, hæc enim in te inveniri debent, ut sis filius Ancillæ. Illa tota pulchra est, & macula non est in ea, & tu enitere ad eam conscientiae puritatem, ut nullam in ipsa patiaris etiam levem maculam. Illa terribilis est ut castrorum acies ordinata, & te oportet esse terribilem inferno, hostibusq; DEI, & animæ tuæ. Illa contrivit caput serpentis antiqui, contere & tu caput serpentis infernalis, hoc est primitias suggestionum, & temptationum ipsius; illa DEI hominis seu Christi Mater exsistit, efficiaris & tu Mater Christi, faciendo voluntatem Patris æterni. Has aliasq; innumeras virtutes & perfectiones Mariæ in te exprimere stude, ut sis imago & similitudo, adeoq; filius Ancillæ Domini, sed maximè imitare humilitatem Virginis. Multa sunt quæ in hac Sanctissima Matre conspiciuntur, quæ tu non vales imitari. Hu-

mili.

militatem tamen illius, potes & debes imitari. Illa cum esset futura DEI Mater, Regina mundi, Domina universorum non dubitavit se humiliter Ancillā profiteri. Tu pariter quanto majores, quò plura & majora dona de manibus Divinis accepti, tanto magis te humilia, vilemque te & inutilem servum existima. Tali expressione humilitatis Sanctissimæ DEI Parentis, eris vera imago & filius Ancillæ Domini.

Filium Ancillæ Domini prodit adhuc & manifestat amor, & affectus mutuus, sive Matris erga filium, sive filij erga Matrem. Amat te Ancilla Domini, non erubescit, non dedignatur, quamvis degenerē, foedum, deformem, suisque moribus dissimilem filium, ita te amat, ut velit te facere DEO amabilem, gratum, suoque Filio Christo & sibi quam maximè conformem. Ama & tu Ancillam Domini, non erubescere humilitatem, ancillaris servitutis ejus, siquidem illa tali humilitate placuit. Ancilla Domini est, ut non deterrearis Majestate ipsius, ut accedas fiducialiter, ut cum ipse sis naturā servus, recurras tanquam filius ad Ancillam Domini.

PUNCTUM III. Considera 3<sup>id</sup>. An & quomodo hæc se inferant, esse Filium Ancillæ Domini, & esse servum Domini? omnino ista se inferunt etiam in humanis: ex Ancilla Matre, non nascitur filius, nisi servus. Ancilla Mater in servitutem generat filios. Sed & Ancilla Domini generat in servitutem ejusdem Domini. Generat te, & statim ex utero format servum DEI, instruit & instituit, te ut DEO quam perfectissimè servias. Impetiat gratias, quibus à DEO excitaris, ut servias illi omnibus diebus vitæ tuæ, ut servias in sanctitate & Justitia, ut præcepta ejus serves, consilia impleas, ut totum te DEO consecres, ut ad laudem ipsius omnes actiones tuas referas, majoremque ipsius gloriam in omnibus quæras, ut DEUM reverea-



verearis, eiquè serviendo tandem salvus fias:

Voluit aliquando & petijt à Christo Mater Filiorum Zebedei, ut in Regno Christi sederent filij ejus, unus à dextris, alter à sinistris. Ancilla Domini pro filijs suis rogat, ut recipiantur in servos perpetuos, ut sint servi Domini, illiq; quàm perfectissimè famulentur. Quarè Sanctissima ipsa DEI Parens, vult hæc indivisa & conjuncta esse, ut filij Ancillæ sint simul servi Domini, sed & tu, & quicunq; alius, si vis esse filius Ancillæ Domini, age, ut sis servus DEI, age ut sis filius Ancillæ.

Existimabat S. Paulus Apostolus se servum DEI non esse, si hominibus placeret, tu ut sis servus DEI, placere debes Ancillæ Domini tanquam filius, & si placere volueris Ancillæ Domini, ejusq; esse filius, servum DEI te esse oportet.

Quemadmodum verò hæc se inferunt esse servum DEI, & esse filium Ancillæ Domini, ita rursus non esse servi DEI infertur ex non esse filij Ancillæ Domini. Spectamus frequenter infelices mutationes & ruinas multorum, ut, qui DEO serviunt & servire tenentur, sint instabiles, ut ex servis DEI fiant mancipia peccati & diaboli. Si veras hujus causas investigare velimus, cur hic & ille DEUM abjecerit, jugum servitutis ejus excusserit, mundo, carni, diabolo se mancipaverit, hanc plerumq; causam inveniemus, quia in eo refrixit filialis affectus erga Beatissimam Mariam, quia refrixit devotio erga Ancillam Domini, studiū imitandi virtutes Mariæ, & promovendi honorem ejusdem. Hic & ille desit esse filius Ancillæ Domini, proinde desit quoq; servus esse DEI.

His consideratis, vide quo affectu ferri te oporteat erga Matrem DEI Sanctissimam, quanto studio curare debeas, ut sis filius Ancillæ Domini, si vis, ut teneris, velle servus DEI esse; siquidem servus DEI non es, si non es filius Ancillæ Domini.

W

Fac

Fac reflexiones convenientes, proposita, elice affectus. Protestare quod velis esse filius imò servus Ancillæ Domini, ut sis servus DEI; dicens: ut sim servus Filij, servitutem appeto Genitricis.

*In colloquio* Postula a Matre Sanctissima, ut te in filium recipiat, atq; in DEI servitio & obsequio constantem & perseverantem teneat.

*In fine: Ave Maris stella.*

### Meditatio III.

## De Pretiosissima DEI Parente.

*Praludia* eadem quæ duarum meditationum præcedentium.

**PUNCTUM I.** Audi illa verba Joan. 19. *Dixit Matri suæ: Mulier ecce Filius tuus, deinde discipulo: Ecce Mater tua. & ex illa hora accepit illam discipulus in suam.* Et cogita ex cruce à Christo datum te esse in filium Matri Beatissimæ, Mater etiam Beatissima data tibi est in Matrem. Si tu fueris filius, Filiumq; te monstraveris Sanctissimæ DEI Parentis, ipsa vicissim erit Mater tua, & Matrem se esse monstrabit: priùs tu nomineris filius hujus Matris, tum deinde illa nominabitur Mater tua, ut intelligas, curare & agere te debere, ut Maternum Mariæ merearis affectum, opus esse, ut filium te esse ostendas, si vis experiri Mariæ patrocinium, ut illa tuam se esse monstraret Matrem. Additur ulterius. Et ex illa hora accepit illam discipulus in suam. Circa quæ verba expende diligentius, quid sit Sanctissimam DEI Parentem accipere in tuam.

Et imprimis accipere Sanctissimam Mariam in suam, non est quid aliud, quam Mariam habere pro re maximè sua, tibi singulariter appropriata. Rerum nostrarum majorem curam habere

conferre

conſuevimus maiorem, circa illas adhibemus vigilantiam, ut res noſtra illæſa & integra maneat, ne nobis pereat, ut illam conſeruemus. Res noſtræ ſingulariter nobis charæ & amabiles ſunt, ſunt in maiore reſpectu & æſtimatione. Qui Sanctiſſimam DEI Parentem accipit in ſua, debet illi ſingulariùs affici, illā amare, illam æſtimare debet eſſe, ſollicitus tanquam de re omnino ſua, tanquam de Matre ſibi chariſſima, de Matre Pretioſiſſima, ne ſua Mater aliquando eſſe deſinat.

2dò. Accipere Sanctiſſimam Mariam in ſua, non eſt unum aliquod particulare bonum in Maria accepiſſe, ſed eſt accepiſſe plura bona, bona multiplicia. In Maria accipies Matrem, accipis Reginam, Dominam, Advocatam, Patronam, Protec-tricem tuam. Cum Maria accipis innumera quæ habiturus aliquando es bona, idq; bona maximè propria, ex quibus plura emolumenta, imò felicitatem tuam percipies, ut dicere poſſis : *Omnia mihi pariter bona venerunt cum ipſa.*

PUNCTUM II. 3tio. Accipere Mariam in ſua, eſt Mariam accipere in omne id, quidquid eſt homo, eſt accipere Mariam in id totum, quidquid homo maximè ſuum & proprium habet, adeoque eſt illam accipere pro objecto & termino, inter objecta purè creata ſpecialiter licèt non permodum ultimi finis, quietativo omnis ſui appetitùs, omnium potentiarum & facultatum ſuarum. Eſt accipere illam pro objecto expletivo, & ſatiativo imprimis omnium corporis ſenſuum, ut viſus & oculus tuus ſingulariter oblectetur Mariæ in ſacris ſuis imaginibus, aſpectu, has libenter cum magno animi ſenſu & cordialiſſimo affectu intueatur, ut non oblectetur viſus tuus niſi ijs quæ oblectare poterant viſum Mariæ, qualia ſunt Chriſtus infans in præſepio, in materno ſuo gremio, diſputans in templo, ſubditus JOSEPH & MARIE; Chriſtus prædicans E-

vangelium. Christus patiens, cruci affixus, gloriosus in sua resurrectione, cœlum ascendens &c. Ut vilius in nullum tentat objectum, nullum conspiciat, quod displiceret Mariæ, quod Maria nollet à te videri.

Accipere item Mariam in sua, est accipere Mariam pro objecto auditus, hoc est: appetere, ut in auribus tuis quæ frequentissimè sonet Dulcissimū nomen Mariæ; ut cum singulari gustu & animi tui quietatione audias laudes Mariæ; ut audire velis, quæ audiens Maria conservabat in corde suo; ut obliuiscas ad omnia, quæ DEO & Mariæ adversantur.

Accipere Mariam in sua, est appetere, ut Maria sit objectum gustus tui; cuius illa erit objectum, quando cum Bernardo; hinc à Christi latere & vulnere, inde pascaris ab ubere Mariæ. Sapiet tibi sacra Eucharistia, purissima Christi caro de Virgine accepta; sapiet gustui tuo Maria. Illa sint tua obsonia, quæ fuerunt obsonia Mariæ, nimirum jejunium, inedia, fames fitis, summa in cibo & potu moderatio, condimenta tua sint lacrymæ, amaritudines, aliaquæ quæ fuerunt condimenta ciborum Mariæ.

Accipere Mariam in sua, est præterea accipere Mariam pro objecto odoratus. Maria est lilium inter spinas, est sicut acervus tritici vallatus lilijs. Labia ejus, distillant lilia. Ubra ejus Sanctissima frangrantia unguentis optimis. Maria est sicut cinamomum & balsamum aromatisans, est quasi myrrha electa, dans suavitatem odoris. Hoc suavissimo odore replearis, ipseque efficiaris bonus odor Christi. Hac suavitate pascere odoratum tuum nec alia ei oblectamenta quære.

Tandem accipere Mariam in sua, est Mariam accipere pro objecto sensus tactus. Ut sit illa tale objectum, maternis ejus advolvere pedibus

tene

tene illam, nec dimitte. Per corporis tui mortificationem induere Christum Filium Mariæ, in Christum te transforma, id obtinere stude, ut Mariæ palliō contegaris, sensum hunc tuum custodi, ne illum oblectet quod abhorret Maria.

4<sup>to</sup>. Accipere Mariam in tua, est accipere illam in objectum trium animæ potentiarum: memoriæ, intellectûs, & voluntatis. Illa sit objectum memoriæ tuæ, sæpè huic obversetur. Habere studes memoriâ DEI præsentis, ponis ante oculos mentis tuæ Christum Redemptorem & Salvatorem tuum, pone ante eisdem oculos & Mariam. Illam tibi memoria repræsentet tanquam Matrem, tanquam Dominam, Patronam, Auxiliatricem, & Refugium tuum.

Accipe item Mariam in objectum intellectûs tui; intellectûs tuus circa illam occupetur, de illa libenter cogitet, Mariæ excellentiam, privilegia, virtutes, gratias, & beneficia sæpè meditetur, circa cultum & honorem ipsius speculetur, qua ratione honor, & cultus Mariæ promoveri, affectus conciliari, Patrocinium obtineri possit.

Accipe deniq; Mariam in objectum voluntatis, hæc post DEUM & Christum sit præcipuum voluntatis tuæ objectum, in quod singulariter feratur, & quô contentetur affectus tuus, ut nihil velis quod sit dissonum Mariæ, quod diminuat amorem, honorem Mariæ, quod non promoveat honorem & cultum Mariæ, quod non augeat eundem, quod non referatur ad Mariam.

PUNCTUM III. 5<sup>to</sup>. Accipere Mariam in sua, est accipere Mariam pro objecto actuum, quorum homo potissimum censetur habere Dominium, per quos illud exercet, & per quos, res & objecta censetur possidere. Tales actus sunt præcipui affectus, quibus voluntas prosequitur bonum. horum enim homo habet Dominium ratione libertatis ipsorum.

per illos exercet Dominium, resquē possidere censetur. Actus hujusmodi sunt: amor, ut post DEUM & Christum nihil ames ante & supra Mariam, nihil majore affectu quam Mariam, nihil æquē atq; Mariam; sed Mariam ames post DEUM & Christum supra omnia alia creata. Nullius puræ creaturæ tantum exsatiens amore, atq; amore Mariæ. Tales item actus sunt: actus appreciationis, venerationis, honoris, cultus, & laudis Mariæ, fiduciæ & spei in ejus patrocinio, zeli promovendi honorem Mariæ, studij in adinventione modi & mediorum, per quæ Mariam colas, venereris, ejus honorem & devotionem erga ipsam promoveas, desiderij, quō desideres frui in cœlis conspectu Mariæ. Hos affectus frequentissimos & usitatissimos habe, & possidebis Mariam, illamq; in tua accipies.

6<sup>to</sup>. Accipere Mariam in sua, est illam accipere in possessionem perpetuam, ut semper sit tua, ut nunquam illam amittas, nunquam eam tibi eripi patiaris, ut Mariam in tua accipias, ita illam accipe, ut nunquam te deserat, ut tua sit in vita, tua sit in morte, tua sit in æterna felicitate, ut sit tibi Mater in vita, Mater in morte æternæ felicitati te generans, dum vivis in corpore, sit tibi Mater pulchræ dilectionis, & sanctæ spei, in felicitate sit tibi Mater plenæ & perfectæ dilectionis, & gaudij satiati.

7<sup>mo</sup>. Tandem accipere Mariam in sua, est ita accipere Mariam, ut in te, in corde tuo, in affectu tuo, sua omnia inveniat Maria. ut nihil in te sit, quod non sit totum Mariæ, quod non sit ejus honori dicatum & consecratum, quod non sit dignum Mariæ, quod ei offerri non possit, aut non offeratur, ut nihil neget Mariæ, ut nihil sit terrenum, quod non contemnas amore Mariæ, nihil quantumvis durum & asperum, quod amore Ma-  
riæ



riæ non libenter suscipias, & offeras Mariæ, ac etiam ipsi DEO, per manus Mariæ.

His consideratis reflecte te supra singula. Reflecte te an sis verus filius Matris hujus Sanctissimæ, utrùm? & qua ratione illam acceperis in tua & sua. An illam acceperis in rem tibi præ omnibus pure creatis maximè grâtam & amabilem, in Matrem, Reginam, Dominam, Patronam, & Advocatam tuam. In refugium tuum, in mediatricem inter te & suum Filium? In consolatricem in tuis crucibus & afflictionibus? An acceperis illam ita in sua, ut in illa, plurima imò omnia bona tua invenias, ut per ipsam habeas & habere velis omnia, an acceperis Mariam in objectum singulariter satiativum sensuum tuorum, in objectum potentiarum animæ tuæ, memoriæ, intellectus & voluntatis? An ipsa, sit objectum præcipuorum cordis tui affectuum, amoris, appretiationis, laudis, honoris, spei, fidei, & similibus? An Mariam totis cordis tui medullis & totis præcordiorum affectibus ames, laudes, venereris? Estne Maria objectum, quod post DEUM & Christum te maximè oblectare, & exaltare potest & solet? Tandem vide, an Maria in te sua omnia reperiatur, an non sint in te ea, quæ ipsi displiceant, quæ aversetur, quæ non ipsi sunt consecrata?

Confundere, si non ita accipis & habes Mariam. Noveris non esse te Christi discipulum, non esse Joannem, non diligeris à Christo ut Joannes, si Mariam non recipis in tua, si Maria non invenit in te omnia sua. Fac proposita particularia, quæ plurima ex his considerationibus erui possunt; elice varios affectus.

*Colloquium* ad Pretiosissimam DEI Parentem. Mater Sanctissima, ecce ego licet indignissimus filius tuus, filius tamen, quia tibi in filium sub cruce Domini commendatus, filius doloris, ad te sup-

plex recurro, atq; coram Sanctissima Trinitate, & coram te, ac cœlesti curia universa profiteor, quod te in Matrem, Dominam, Patronam, & Advocatam meam accipiam, pro taliq; deinceps agnosce-re & habere velim, quod te in mea accipiam, in te & per te omnia habere velim, tu abhinc eris ob-jectum gratissimum omnium sensuum meorum, omniumq; potentiarum animæ meæ, tu post DEUM & Christum eris meta desideriorum, af-fectuumq; meorum. A te vicissim humillimè postu-lo, ut tu quoq; me in tua accipias, inter filios tu-os, inter servos & mancipia tua connumereris, & me sub tuam protectionem suscipias, ut totus sim tuus, ut nihil sit in me, quod non sit tuum, quod non tibi ex integro offeratur, tuoq; honori & amo-ri consecratur.

*In fine: sub tuum præsidium.*

## Meditatio præliminaris Ad faciendam electionem.

*Praludium* I. Imaginare Paulum Apostolum, dum persequeretur Ecclesiam, luce cœlesti, quæ illum circumfulsit, & voce illa Christi: *Saula Saula quid me persequeris*, ex equo dejectum & pro-stratum atq; orantem. *Domine quid me vis facere.*

*Praludium* 2. Postula gratiam, quâ & tu il-lustratus cognoscas, & intelligas in electionibus & deliberationibus tuis quibusvis, sed maximè in e-lectione statûs vitæ tuæ, qualiter te gerere debeas, & quid te facere oporteat.

PUNCTUM I. Audi illa verba Matth. 16. *Quid prodest homini si mundum universum lucretur, anima verò sua detrimentū patiatur, aut quā dabit homo commutationē pro anima sua.* Et considera, his scripturæ

scripturæ verbis duo insinuari, quæ præ oculis mentis haberi debent in omnibus hominis deliberationibus & electionibus, sed vel maximè in electione statûs vitæ.

*1mum.* Quod in his omnibus præ oculis habendus sit, & irretortâ palpebrâ semper inspicendus finis hominis, ad quem creatus est, qui est laus & gloria DEI, ac salus animæ, hic finis debet esse regula & norma, quâ omnes electiones & deliberationes regulari debent, ita, ut illa nonnisi, & illius medijs ac statûs vitæ electio, futura sit recta electio, quæ huic regulæ optimè congruit, nec ab illa, ulla ratione, deflectit; quod non aliter obtinetur, nisi per attentam finis inspectionem & considerationem.

*2dum.* Quod iisdem verbis insinuaturn est: Illa nonnisi media, & res sub electionem nostram cadere & venire debere, quæ ad finem creationis nostræ conferre, & ad illum consequendum juvare possunt; quæ verò fini huic repugnant, salutiq; nostræ adversantur, illas nullatenus in deliberationem vocandas esse.

Et sic mundus, ejusq; lucrum nullatenus electionis tuæ finis esse potest & debet. Quare in tuis deliberationibus, ad id, tanquam finem, tibi attendendum est, ut salutem animæ consequaris, ne animæ detrimentum patiaris; non verò ad hoc, ut mundum lucreris. Hoc fine præ oculis habito, illa media eliges, quæ tali fini optimè congruunt, hoc est, per quæ salutem es consecuturus, nec passurus animæ detrimentum.

Sed nec mundus ejusq; lucrum, medium esse potest, quod per electionem tuam intendas & eligas, si probabiliter prævideas, mundum ejusq; lucrum non fore tibi medium consequendæ salutis; sed potius impedimentum ejusdem, hoc est, non aliter te lucraturum mundum, nisi patiendo animæ detrimentum.

Potest quidem quis in statu sæculari salvari, & hunc statum potest eligere, si Divino lumine illustratus viderit hunc statum sibi conducibiliorem esse ad salutem, præ quovis alio statu perfectiore. cæterum statum sæcularem, prout hic conducit ad salutem eligere, non est mundum lucrari. etiam in hoc statu, ut quis salutem consequatur, & mundum & animam suam in hoc mundo, hoc est, prout immerfam, rebus ad mundum spectantibus, odisse debet, ut illam in vitam æternam custodiat, debet mundum abijcere, contemnere, illi renuntiare, affectum ejus exuere, illoq; ita uti, tanquam si non uteretur.

Mundus, quem lucrando, animæ detrimentum patimur, est mundus ille, qui DEO & Christo adversatur, qui est unus ex tribus DEI & animæ hostibus. Est mundus à Christo reprehensus, judicatus, & condemnatus. Est mundus, quatenus illi inordinato affectu & contra legem Divinam afficiuntur homines; talis mundi lucrum, ad consequendum finem hominis, medium esse non potest, potius enim est impedimentum finis, adeoq; eligi non potest nisi damnosissimè.

Mundum, per enumerationem suarum partium, sic describit S. Joannes Episl. 1. cap. 2. *Omne quod in mundo est, concupiscentia carnis est, Concupiscentia oculorum, & superbia vite.* Hæc quatenus sunt prohibita, quærere, vel quærere cum inordinato & immoderato affectu, vel quidpiam tale, quod aliquid ex his tribus redolet, est velle lucrari mundum cum detrimento animæ. Verùm quid prodest ita lucrari mundum, ut animam perdas? quid prodest ita consequi voluptates, divitias, honores, si animæ detrimentum patiaris. Nihil certè prodest talis voluptatum, divitiarum, honorum consecutio, nihil (inquam) prodest ad finem hominis, imò quàm maximè obest. Impedimenta

hæc sunt non media consequendæ salutis, adeòq; sub electionem vocari non debent.

Non inrequens, stulta tamen cogitatio est, hominem posse frui mundò, & his quæ ad mundum spectant, simulq; salvari. Frui mundò, mundum lucrari per immoderatum & prohibitum usum voluptatum, divitiarum, per nimium honorum ambitum, est desletere à via salutis. Divitem fieri, & divitijs cor apponere dum affluunt, est gibbum Cameli assumere, aut camelum induere, & in eum transformari; est mammonæ servire. Quomodo ergo fieri potest, ut desleendo à viâ, quæ ducit ad vitam, salutem, & vitam æternâ consequaris, & ad felicem æternitatis terminum pervenias? Quomodo fiet, ut camelum indutus, per foramen acûs transeas, & per portam angustam cælum ingrediaris, ut simul DEO & mammonæ servias? Nunquid colligunt de spinis uvas, aut de tribulis ficus? spinæ & tribuli sunt divitiæ, voluptates, honores nimio, & sollicitô studiô, & contra legem Divinam quæsitæ, quando per hæc; vel cû his speras te salutem consecuturum; expectas à spinis uvas præstantissimas, ex tribulis vis colligere ficus; verum arbor mala non facit bonos fructus.

Sectaris nimio & inordinato affectu terrena, transitorias, ac etiam prohibitas voluptates. varietates &c, hoc ipso talia accipis in commutationem pro anima tua, pro salute tua, reipsa & ipso factò propter illa renuntias saluti tuæ. O quàm misera & quàm deslenda hæc commutatio? Et hæc quidem tu accipis in commutationem pro anima tua, sed quam dabis DEO commutationem pro eadem anima. Tua quâ vivis anima non tua est, sed res totaliter DEO debita, Divini sanguinis pretiô empta; hanc cû perdideris, DEO eam de manibus tuis repetenti & requirenti, quam dabis commutationem pro anima tua? Vile illud pretium, pro

quo illam vendidisti & commutâsti, exosum Deo & abominabile est. Pro argento & auro malè acquisito appendis animam; verùm, ut monet Ecclesiasticus, non est hæc digna ponderatio animæ. Non corruptibilibus aurô & argentô redemptus es, non potest his æstimari incorruptibilis & immortalis tua anima.

Non igitur bene & rectè mundus in maligno positus, & à Christo iudicatus atq; condemnatus, quæritur ab eo, qui salutem animæ consequi intendit, nec vult animæ suæ detrimentū pati, impedimenta finis, media ad finē esse non possunt nec possūt eligi nisi cū detrimento finis, cū detrimento animæ.

Quod quidem certum est non solum de illis rebus, quæ universaliter & respectivè ad omnes sunt media repugnantia fini, aut potius impedimenta finis, sed etiam de illis, quæ comparatè ad certam aliquam & determinatam personam, & respectu ejusdem, sunt media repugnantia fini, atq; impedimenta ejusdem, idq; ratione aliquarum intervenientium circumstantiarum, licet respectu aliorum, qui talibus circumstantijs obnoxij non sunt, possint & soleant esse media apta ad consequendum finem, quod tales res ab eo eligi non possint, respectu cujus sunt impedimenta finis. Et sic v. g. status sacerdotalis, beneficium Ecclesiasticum, respectu plurimorum possunt & solent esse media apta ad consequendam salutem, si tamen experientia infirmitatis & fragilitatis tuæ, atq; conscientia frequentiorum lapsuum te admonet, non futura hæc media opportuna tuæ salutis, sed potius quòd hæc futura sint laqueus, quo infeliciter illaqueaberis, media hæc non sunt tibi assumenda; quia hæc respectu tui, non media, sed impedimenta sunt tuæ salutis, aliudq; proinde opportunius medium est tibi quærendum.

Ex his consideratis, hæc erue practica dictamina,



mina, illaq; pro ininconcusso & firmissimo fundamento, cui omnes tuæ electiones inniti & infundari debent, tene. 1<sup>mo</sup> Finem creationis tuæ, hoc est salutem animæ, in omnibus electionibus, præ oculis te debere habere. 2<sup>do</sup>. ad hunc finem consequendum, illa non nisi media sub tuam electionem debere te vocare, quæ fini creationis tuæ non repugnant, sive ex seipsis & ex natura sua, sive expensis & attentis omnibus & singulis circumstantijs, tuam personam particularem concernentibus, quæ, si aliqua ratione, fini repugnant, protinus rejicienda sunt. Ad has deinde regulas & normam examina, sive quascunq; electiones tuas, sive idq; quàm maximè, electionem statûs vitæ, si fortè hoc negotium eligendi statûs aggressus, vel aggressurus es; hisq; regulis, nisi aberare velis, electionem tuam conformare stude.

PUNCTUM II. Audi illa verba Ecclesiastici 3. *Cor ingrediens duas vias non habebit successum.* Ea; intellige hoc sensu, quòd cor per electionem alicujus rei sive medij, duos oppositos fines intendens, non possit habere bonum successum, ut scilicet utrumq; illum finem consequatur. Exempli gratiâ, si in quapiam electione, præcipuè verò in electione statûs vitæ, intendas & finem gloriæ Divinæ, ac salutis animæ tuæ, & finem aliquem vanum, mundanum, qualis finis esset consecutio honorum, dignitatum, carnis commodorum, oblectationum sensualium, divitiarum, proventuum pinguium, & his similibus. Talis electio non habebit successum, nec bene succedet in consecutione alterius finis.

Poteris quidem unum finem consequi, sed ab altero, nihilo certiùs excides, hoc est salutem animæ non consequeris. Æternæ veritatis oraculum est. *Non potestis DEO servire & Mammonæ.* *Nemo potest duobus Dominis servire.* Viæ hæ, ad diversos, eosq; oppositos ducunt terminos; ad quem  
termi-

terminum ducit una, ab eodem abducit altera; una ducit ad salutem, altera ad interitum. Qui tales proinde vias ingreditur, non bono progredietur, successu, ad alterum terminum, idq; ad terminum meliorem, hoc est ad salutem non perveniet. Si vis successum bonum & optatum habere, unam tene viam, tene viam salutis, obliquas devita, solâq; rectâ viâ incede.

In omnibus quidem deliberationibus, sed maximè in ijs, in quibus deliberatur de eligendo vitæ statu, id singulariori studio curandum est, ut unicè DEUM, gloriam ipsius, & salutem animæ tuæ intendas, ut oculus tuus simplex sit, quò solum DEUM respicias, ut intentio tua sit depurata ab omni vano, carnali, & mundano affectu. Non bene hæc secum componuntur & conjunguntur: terra & Cælum, vanitas & gloria Divina, amor sui, & amor DEI, Dagon & Ara Domini. De ara cordis ejiciendus est Dagon, præcidendæ manus, præcidendi pedes, præcidendum caput & truncus abijciendus; sola arca Domini, hoc est gloria DEI, & salus animæ, in corde & in intentione tualocum habere debent. Reseca proinde omnes affectus mundanos, carnales, & vanos, Dagon hic ejiciatur, nimirum amor proprius, & inordinatus. Ejice non solû trabem, sed etiam festucâ de oculo tuo, DEUMq; solum simplici oculo, mundo corde intueri. Non enim misceri poterunt æterna caducis, spiritualia temporalibus, ut pariter sapias quæ sursum sunt, & quæ super terram. Si cor tuum duas vias ingressum fuerit, scandalizabitur in eis, ut monet idem Ecclesiasticus, & infeliciter aberrabit.

Ex his consideratis erue hoc dictamen, quòd in omnibus tuis electionibus etiam hoc pro universalissima & fundamentali regulâ habere debeas: Quam maximam curam tibi habendam esse, ne  
duas

duas vias ingrediaris, ne duos diversos fines nec sibi subordinatos respicias, ne simul DEUM quæras & te ipsum, ut oculus tuus sit simplex, ut intentio sit pura, ut hanc tanquam, pupillam custodias, nec minimū pulvisculum terrenæ affectionis patiaris, perivāsus omnino tantum te in spiritualibus studijs profecturum, quantum ab amore tui ipsius, & commodi proprii, ac rerum terrenarum affectione animum abstraxeris.

Reflecte te supra puritatem intentionis tuæ. In electione statūs tui, unamne ingrederis viam an duplicem? quid te moveat ad sanctiorem vitæ statum, ad statum v.g. Ecclesiasticum eligendum? si fortè ad hanc electionis partem magis te inclinari sentis? An unicè propter JEUM venias, ad JESUM, an certè, ut etiam Lazarum videas? DEUMne solum quæris, an te ipsum? salutemne animæ tuæ, an certè bona aliqua temporalia, an non spes aliquas venaris? omnino cura, ut solum DEUM, ejus gloriam, & animæ tuæ salutem quæras, unam hanc viam cor tuum ingrediatur, nec ab hac unquam deflectat. protestare, quòd DEUM solum in omnibus spectare velis. *Quid mihi est in coelo? & à te quid volui super terram, DEUS cordis mei & pars mea DEUS in æternum.*

PUNCTUM III. Audi illa verba Lucæ 12. *Quærite primum Regnum DEI, & Justitiam ejus, & hæc omnia adjicientur vobis.* Et ex illis discce: inter actus voluntatis, quos homo habet circa finem & media, quis ordo servari debeat, quem non sit fas pervertere, adeòq; qualiter electiones nostræ fieri & ordinari debeant? Finis primò esse debet in intentione, hic primò intendi, expeti, & quæri debet, tum deinde cognita conducibilitate & aptitudine mediorum ad finem intentum consequendum, eligenda sunt media conducentia ad eundem finem, non è contra. Præposterè proinde

inde agit, qui primò eligit quodpiam medium, & postquam se determinavit ad tale medium, tum deinde quærit modum & rationem, quâ per tale medium finem consequi possit. Talis electio in re est constitutio medij pro fine, & finis assumptio pro medio, vel certè est finis assumptio pro re, quæ occasione alterius principaliter intenti, obtineri etiam & acquiri posse existimatur.

Cum ergò finis hominis sit Regnum DEI, salus animæ; hæc primò quæri debent, tum deinde quærenda media ad hunc finem, quærenda Justitia & vita Justitiæ, per quam in Regnum DEI pervenias. Pervertis ordinem, si non habita ratione finis tui, eligis primùm statum determinatum, v.g. statum conjugalem, matrimonialem, aut etiam statum spiritualem, & Ecclesiasticum; ac tum deinde cogitas & inquiris, qua ratione hic status poterit te juvare ad finem tuum, hoc est ad animæ salutem consequendam, nec aliâ viâ, nisi hâc ad salutem pervenire contendis. Similis es infirmo, qui priùs eligit medicinam, ignarus, an hæc suo morbo sanando sit idonea, tum deinde vult & intendit, ut hæc ipsum sanet; & viatori, qui viam priùs eligit, tum deinde nolendo illam dimittere, inquit, qua ratione per talem viam possit pervenire ad terminum sibi constitutum; es miles, qui plumbeum enssem petit, ac illò vult hosti suo caput præcidere. Turrim ædificas, non computato sumptu si habeas ad perficiendum; aggredieris hostem, ignorans, an habeas vires ad resistendum, eumq; debellandū.

Ut securè procedas, sine tuo præ oculis constituto, gloriâ nimirum DEI, & animæ tuæ salute, non aliter media elige, nisi præmissis examine, quæ media ad finem illum conducunt, & quæ ad consecutionem ejusdem te juvare possunt; collatisq; & comparatis secum invicem medijs, illud elige, quod conducibilius apparebit, & per quod  
securius

securius obtinetur finis. Ita fiet, ut in electione non aberres, ut quæras primum Regnum DEI, tum deinde Justitiam ejus, per quam Regnum DEI obtinetur, ut intentionem finis non præcedat electio medij, nec pervertatur ordo, qui servari debet; tandem ut rectâ in DEUM tendas non oblique, nec cum perversè ad vota tua trahas.

Existimamus frequenter quærere nos Justitiam DEI, & quærimus mundum, quærimus carnem, quærimus vanitatem, quærimus corporalia atq; sensualia commoda & emolumenta. Justitiam quærimus sed non veram, at nonnisi apparentem, & quam DEUS aliquando rigide judicabit. Existimamus, quod electione illa, quâ ex nimio & præcipiti affectu statum quempiam eligimus, non facto prævio examine, an hunc statum eligendo, Regnum DEI & salutem animæ consequemur? non facta disquisitione, quid nos impellat ad talem electionem? an non ratio aliqua humana, vana, carnalis, mundana, politica, saltem occultè se insinuans? existimamus inquam, quod ingrediamur viam salutis, & ecce frequenter illam tenemus, quæ nos ab hoc termino abducit, & in perditionem præcipitat. Temporalia quærimus, & non Regnum DEI, quæ simpliciter quæri non debent, & non quæsitâ licèt, adiicienda nobis, quantum ad vitæ sustentationem necessaria erunt, appromittuntur. aut certè moderatè, sine effusione nimia ad exteriora, sine adhæsiōe affectûs ad ipsa, in tantum nonnisi quæri debent, in quantum conferunt, & juvant ad majorem Divinam gloriam & animæ salutem consequendam.

His consideratis, hoc dictamen practicum, tanquam certissimam & infallibilem bonæ electionis regulam, & firmum fundamentum, supra quod ædificare debes, præter priores regulas tene: nulum te medium prius eligere debere, antequam

finem intendas & præcognoscas; media autem, præcognito fine, non aliter eligenda, nisi bene ponderatâ & examinatâ ipsorum conducibilitate ad finem.

Reflecte te deinde supra electiones tuas, siue jam factas, quæ adhuc mutari possunt & corrigi; easq; ad hanc regulam, non minùs atq; ad regulas duorum præcedentium punctorum examina, an omnibus his regulis benè cohæreant, & ut cohæreant, curam & diligentiam adhibe; siue supra electiones faciendas etiam rerum mutabilium, ut etiam in his, iisdem regulis, & principijs dirigaris, ut ab illis, ne ad latum unguem discedas; ita enim fiet ut tuæ electiones tales sint futuræ, propter quas ipse in numerum electorum connumereris. Fac proposita. Elice affectus.

*Colloquium* instituendum ad Sapientiam Incarnatam Christum Dominum, cui humillimè supplica, ut, qui tui gratiâ factus est via, veritas, & vita, ducat te & dirigat in viam salutis, instruat te & imbuat principijs altissimis indubitatæ veritatis, & infallibilibus, quibus te in tuis electionibus regulari possis, & quæ sequendo non aberres; in eoq; statu vitæ te constituat, ut ipsi & in ipso vivas, imò ipse in te vivat, atq; ut, post mortalem vitam, vivas DEO, & ipso fruaris in beata æternitate. *In fine: Anima Christi.*

## Meditatio

Proponens primum modum faciendæ bonæ electionis.

*Praludium* 1. Imaginare te in ea circumstantia positum esse, in qua proficiscenti ad aliquem



quem terminum, plures viæ vel semitæ occurrunt, te interim ignorante, per quam, ad terminum præfixum, bene & securè pervenire possis.

Prælium 2. Postula à DEO gratiam, quâ illuminatus, illam viam salutis, & illum ulterioris vitæ statum eligas, quem tenendo, à termino salutis & felicitatis æternæ non aberres.

PUNCTUM 1. Audi illa verba S. Petri Apostoli, aliorumq; qui electuri in locum Judæ proditoris, duodecimum Apostolum, sic DEUM orasse referuntur. Act. 1. *Tu Domine, qui nôsti corda omnium, ostende quem elegeris.* Et breviter mente recole historiam electionis, quâ S. Mathias, à congregatis Apostolis, alijsq; Christi discipulis, electus & substitutus est in locum Judæ proditoris, annumeratusq; est undecim Apostolis. In qua historia, hoc potissimum considera, quòd illa Electio non fuerit inchoata, vel saltem non fuerit perfecta & absoluta, absq; oratione & invocatione Divini luminis. Orantes dixerunt. *Tu Domine, qui nôsti corda omnium, ostende quem elegeris.* Ex cujus actûs & orationis consideratione, illud in tuum deriva commodum, eumq; percipe fructum.

Imò In omnibus quidem electionibus, sed maximè in electione rerum majoris momenti, rerum immutabilium, qualis est electio statûs vitæ, quem ad mortem usq; tenere debes, non debere te temerè procedere, non esse hanc electionem faciendam secundùm humanam quamcunq; inclinationem, nec secundùm rationes temporales & politicas. Existimandum potiùs est, hujusmodi electionem, rem esse gravissimi momenti, maximè sanctam, opus Divinum, adedq; consulto DEO per orationem, imò sæpiùs exorato, invocato etiam Beatissimæ & Sanctorum patrociniò, aggrediendû esse tantæ deliberationis negotium. Electio statûs vitæ, est investigatio viæ, quâ tibi ad salutem

pervenendum est, quam si teneas, securus esse possis, te non aberraturū. In qua deprehendenda, cum tu facile decipi possis, siquidem ut monet Sapiens. *Est via qua videtur homini recta, novissima verò illius ducunt ad mortem.* Quærendus est Dux, talis viæ gnarus, qui tibi hujusmodi viam ostendat, quæ te ad optatum perducatur terminum. Talem autem ducem meliorem habere non potes, quam ipsum DEUM. Ille est qui nec falli nec fallere potest, ipse novit corda hominum, hoc est, perspicacissimo intellectus sui lumine cognoscit, antequam sint, omnes tuos actus, idq; non solum actus liberos, qui absolute sunt futuri, sed etiam condicionate futuros, taliq; cognitione & scientiâ directus, præparavit ab æterno, varia gratiæ suæ auxilia, fecit varias series & coordinationes gratiarum, idq; non semper efficacium, sed permixtas aliquas gratijs purè sufficientibus; aliquam seriem conjunctam cum poenitentia finali, cum finali perseverantia in gratia; alias series non conjunctas tali perseverantiæ aut poenitentia. Hasq; series, diversis statibus, respectivè ad tuam personam alligavit, ita nimirum ut si hunc statum elegeris, habiturus sis in eo talem seriem gratiarum, quæ terminabitur gratia finali & felici morte; si fortè alium statum elegeris, non habiturus es similem gratiarum seriem, sed potius illam, quæ carebit finali perseverantiâ in gratia, quæ terminabitur statu peccati mortalis, impoententiâ finali, infelici morte, & æterna animæ damnatione. Orandus proinde DEUS est, & ardentissimis votis ac suspirijs, etiam longiori tempore continuatis & repetitis postulandum lumen à Patre luminum, ut qui novit corda hominum, qui cor tuum intuetur, qui tibi auxilia gratiæ præparavit, variasq; series gratiarum coordinavit, diversisq; vitæ statibus diversas alligavit, ut eum tibi statum vitæ ostendat, in eam te viam dirigat, quâ incedendo

endo, securè ad terminum æternæ felicitatis pervenias, tuæq; animæ salutem consequaris.

2dò. Hoc in tuum commodum derivare potest. Negotium electionis statû vitæ tuæ ingressurus, quid à DEO postulare debeas? non satis est si postules, ut DEUS electionem tuam, cum eam perfeceris, & apud te fixum, determinatum, & constitutum habueris, in hoc vel illo statu vitam ducere, & DEO immolari, ut, inquam, talem electionem approbet, ratam & acceptam habeat, in eaq; te roboret & confirmet, ac tuis votis annuat, sed etiam, antequam quidquam eligas & statuas, orare & postulare debes, cum omni indifferentia & animi præparatione, ad id volendum & eligendum, quod Divinæ voluntati placitum fuerit, ut DEUS ostendat suâq; manifestet voluntatē, quē statû vitæ ipse pro te elegerit, & in quo te salvare decreverit.

Præposterè & minùs prudenter, ac etiam damnosè & periculosè agit, qui post factam à se proprio arbitratu electionem, cum fixa & determinata voluntate & adhæsiōe ad rem electam, tum primum recurrit ad DEUM, ut ipsum ad vota sua trahat, ab eo exigens, ut electioni suæ se accommodet, & si æ voluntatis ductum sequatur. Non vult quidem DEUS ut ipse, in hoc electionis negotio, operetur solus, ut solus ille eligat statum nostrum, ut ad hunc, quem ipse elegerit, nos compellat & necessitet, sed vult eundem statum etiam à nobis eligi, quia vult ut nobis nostram libertatem servet integram & illæsam, ut cum majori nostro merito hac in parte procedamus. Vult nihilominus simul, ut Divina ejus electio præcedat nostram, nostræ electiones conformentur Divinæ, ab eaq; dependeant, ut voluntas creata sequatur ductum voluntatis increatæ, non ut nos DEUM trahamus in vota & sententias nostras. Talem si indifferentiam habueris, poteris securè & cum fiducia orare:

Domine qui nôsti corda omnium, nôsti etiam me ad omnem nutum tuum paratissimum esse, nihil statuere, nisi quod te, de me constituiſſe didicero, ostende igitur quem pro me elegeris statum, quam viam designaveris, quâ ad te pervenire debeam.

Huic tamen indifferentiæ, ne minimum ad-versatur fixa voluntas, spectans & unice intendens gloriam DEI, tuæq; animæ salutem; imò tali voluntate regulandæ sunt quæcunq; electiones nostræ, & in fundamento talis fixæ & determinatæ voluntatis, quæ quoad hoc est conformis voluntati Divinæ, orandus est DEUS, ut per interna Lumina, & per ratiocinationes à te faciendas, tibi manifestare velit, in quo vitæ statu te gloriam DEI, & animæ tuæ salutem quærere oporteat.

Protestare hanc indifferentiam, & actum re-signationis in Divinam voluntatem elice, lumenq; cœleste & intellectûs tui illustrationem implora, ut cognoscere possis Divinam circa te voluntatem, atq; ut sanam, & Divinæ electioni conformem electionem statûs ulterioris vitæ tuæ facias. DEUS meus, & Creator meus, supreme rerum omnium Dominator, summa felicitas & omne bonum meum, compareo indignus ante conspectum Divinæ Majestatis tuæ; & cùm sim vilissima creatura tua, ad te laudandum, tibiq; serviendum, te aliquando fruendum creata, voluntatem meam à te acceptam, tibiq; omnibus titulis debitam, tibi integerrimè subijcio, ac tuæ sanctissimæ voluntati, tanquam supremæ & infallibili regulæ, conformare desidero, & hoc unice amplecti volo, quod tuæ voluntati placitum fuerit, sed vel maxime in electione statûs vitæ meæ, ductum voluntatis tuæ sequi, fixum, determinatum, & omnino constitutum habeo. Tu Domine nôsti corda omnium, meum quoq; cor intueris, tu nôsti quid gloriæ tuæ expediat, quid futurum est cum salute ani-

mæ meæ. Tu ab æterno considerasti omnes vias-  
& semitas meas cognovisti, quâ via ad te sim per-  
venturus, quibus infeliciter aberraturus. Statue i-  
gitur de me, quidquid tibi placet, cui placere non  
potest, nisi gloria tua & salus mea. Ex plenitudi-  
ne scientiæ tuæ, elige statum, in quo tibi serviam,  
qui gloriæ tuæ promovendæ maximè idoneus vi-  
sus fuerit, in quo me salutem consequi volueris;  
quem tu elegeris, is mihi acceptissimus erit. Re-  
nuntio proinde omnibus inclinationibus & affectio-  
nibus meis, omnibus respectibus vanis, sensualibus,  
& humanis, qui me aliò fortè abducere volent.  
Offero me ad omnes cruces, afflictiones, egestatem,  
& maximas quascunq; ærumnas. si viam crucis,  
quâ ad te perveniam, mihi præparasti, paratum  
me ad omnia invenies, paratum cor meum. DE-  
US, paratum cor meum. Illud à te humillimè  
postulo, ut hanc voluntatem tuam, notam mihi  
facias. Ostende Domine, quem statum vitæ pro  
me elegeris. Tua sancta illustratione dirige me in  
viam salutis, quâ ad te pervenire possim. Quod  
cùm ostenderis, doce me facere voluntatem tuam,  
doce me exequi quæ inspiraveris, doce me, viâ  
quam monstraveris, progredi de virtute in virtu-  
tem. Effice ut tibi serviam, juxta beneplacitum  
tuum, & ut tuam in omnibus quærendo gloriam,  
eam, ad quam me creasti, consequar animæ meæ  
salutem.

PUNUTUM II. Recole memoriâ alia, quæ  
præterea in electione S. Mathiæ in Apostolum in-  
tervenerunt. Nimirum imò Quomodo S. Petrus  
Apostolorum Princeps, congregato sancto illi cœ-  
tui reliquorum Apostolorum & discipulorum Chri-  
sti, proposuerit finem faciendæ electionis, qui per  
eam spectari debuit, illis verbis: *Oportet ex his vi-  
ris, qui nobiscum sunt omni tempore, quo intravit  
& exiit inter nos Dominus JESUS, testem resur-*

*rectionis ejus nobiscum fieri unum ex istis.* 2do. statuerunt sancti Apostoli duos ex congregatis discipulis, JOSEPH qui cognominatus est justus & Mathiam, ut ex his unus eligeretur. 3tio post orationem ad DEUM factam, dederunt sortes, & *Cecidit fors super Mathiam.* Hæc recolens, considera etiam in electione statûs vitæ tuæ, quàm faciendam aggredieris, ista proportionatè & accõmodatè à te observanda esse. Ac imprimis, ut in meditatione præcedenti aliàs considerâsti, & cujus meminisse maximè debes, hoc electionis negotium aggredientem, oportet te habere præ oculis finem, quem per electionem intendere debes. Finis autem hic non debet esse alius, nisi laus & gloria DEI, ejusq; obsequium & salus animæ tuæ. Ista unicè quærere, & spectare debes, nulla ratione alios fines respicere, non tua commoda sensualia, non carnem & sanguinem, non vanitates, non te ipsum, ita, ut illum statum vitæ eligas, in quo DEUM laudare, idq; perfectius laudare, ejus majorè & majorè gloriã quærere, & tuæ animæ salutē certiùs & securiùs consequi possis.

2do. sub hanc electionem non posse venire nisi illos vitæ stauts, qui fuerint vel esse censebuntur media apta ad consequendum præfixum finem. sicut Sancti Apostoli, illos viros statuerunt, qui cum illis erant omni tempore, quo exivit inter illos Dominus JESUS, adeòq; qui possent esse testes resurrectionis ejus, quales nonnisi existimabant futuros idoneos ad munus Apostolatûs. Pariter & tu illos status vitæ assumes, pro objecto tuæ electionis, quos existimas fore media idonea, ad finem creationis tuæ consequendum. Illos verò status ab hac electione & deliberatione rejice, de quibus rationabiliter persuasus es, quòd te non juvabunt ad finē tuum, aut etiã in eo consequendo impedire.

3tio. sicut Sancti Apostoli, præmissis his quæ dicta sunt, præmissâ etiam oratione, quâ orârunt, ut



ut DEUS ostenderet, quem elegerit, in his non steterunt ultimò, sed progressi sunt ulteriùs ad explorandam DEI voluntatem, per sortes quas miserunt, ita & ubi non sistendum esse in sola oratione & desiderio sciendi, in quo te DEUS vitæ statu esse velit ; sed per alios etiam modos & media, explorandam esse DEI voluntatem. Incurius es circa salutem tuam, si contentus desiderio serviendi DEO, & oratione ad DEUM, ut te DEUS vocet ad suum servitium, nihil ultra agis.

4<sup>to</sup>. Licet Apostoli in electione Sancti Matthiæ usi sint sortibus, per quas explorabant Divinam voluntatem & electionem ; tamen id factum ab illis fuit ex speciali & extraordinario instinctu, exemplo à nobis non praticando, nec imitando, sed loco sortium, utendum est intellectus ratiocinio, inquirendas nimirum esse varias rationes inclinantes in hanc vel illam electionis partem, pro hoc vel illo statu eligendo aut reiiciendo, rationumq; talium inter se collatione & comparatione, explorandam Divinam voluntatem. Pro quo enim statu, ex Divina Illustratione, habebuntur rationes fortiores & validiores, magisq; nostram voluntatem impellentes, quæ nimirum suadebunt, quòd talis status electione, remotior sis futurus à quærendis terrenis & sensualibus commodis, vanitatibus, & quæ aliquomodo proprium anorem redolent, quòd sis futurus remotior à proximis peccandi occasionibus, periculosisq; conversationibus, & quòd plures diaboli laqueos sis evitaturus ; uæ item suadebunt, in tali statu magis à te promovendam esse gloriam DEI ; animæq; tuæ salutem certio rem & securiorem reddi : existimandum est talibus rationibus, tanquam sortibus ostendi tibi, quòd hunc statum DEUS pro te elegerit, adeòq; ipsum etiam à te eligi debere, nec tali electione te aberraturum esse. Hæc ut in deliberatione de

statu tuo observes, & ut tuis medijs Divinam voluntatem explores stude, & cave, ne ab his in aliquo recedas.

PUNCTUM III Audi illa verba Eccles. 15. *Ab initio DEUS constituit hominem, & reliquit eum in manu consilij sui.* Quibus verbis significatur DEUM ita hominem creasse, ut voluerit eum esse liberum, volueritq; eum suas electiones, ad quas liber est, facere ex prævia deliberatione, consilio, & consultatione, hoc est, cognitis in utramq; partem rationibus, ijsq; bene ponderatis, & secum invicem sufficienter collatis, quodsi in omnibus ita procedendum est, maximè hic modus tenendus est in electionibus rerum immutabilium, à quibus non est fas recedere, qualis electio, ut aliàs dictum, est electio statûs vitæ. Hoc modo tanquàm medio maximè opportuno, & ad præfixum finem plurimum conferente, etiam tu utere, illumq; nunc ipsa exequere.

Statue *imprimis* ob oculos mentis, duos Diversos status, maximè & quasi genericè à se differentes, quales sunt: status matrimonialis & status Spiritualis ac Ecclesiasticus. Et inquire rationes moventes & allicientes, sive ad hunc, sive ad illum statum eligendum: vide, quomodo uterq; hic status juvare te possit ad finem tuum consequendum, gloriam scilicet DEI & salutem animæ tuæ? quæ in uno quoq; hoc statu, possint esse media & adminicula ad eundem finem? quæ, è contra, in alterutro sint discrimina & pericula excidendi à fine ultimo? an & qui modi, quàm efficaces, declinandi talia pericula? confer deinde invicem omnes has rationes, & vide quæ magis præponderent, in quo statu magis est per te promovenda gloria DEI? in quo es securior salutis æternæ, per quem magis assimilariis Duci tuo Christo in quo propius eum comitaris, ejus vestibus & insignibus indueris

*Proponens primum modum electionis 322*

eris- &c. Collatis ita rationibus, advertes facile quò tua magis a Divino spiritu impelletur voluntas? quid tibi sit eligendum? quodsi senties impelli te interius ad eligendum v.g. statum spirituales Ecclesiasticum & sacerdotalem.

Progredere 2dò. ad deliberandum & consultandum an secularem sacerdotem an religiosum potius te fieri expediat? etiam in hac deliberatione, utere simili ut ante ratiocinio, hoc est rationes sive ad illum statum impellentes, ab hoc item vel illo statu retrahentes inquire, bene expende, & secum invicem confer. Vide nimirum utriusque status commoda, non illa, quæ carnem sapiunt, ab his enim quærendis procul esse debes, sed commoda Spiritualia, & adminicula ad tuum finem consequendum expende. Expende item in utroque statu varia salutis tuæ discrimina & pericula, & illa ad invicem inter se compara. Attende, in quò statu sit major commoditas obsequij Divini, & gloriæ DEI promovendæ, salutis item propriæ, imò & salutis proximorum consequendæ, ubi frequentiores, & fortè magis periculosæ ac etiam proximiores occasiones peccandi, aliaque his similia. Quibus debitè expensis, invocato cœlesti lumine tecum dispice, quis status tibi ( tibi inquam nam & supra te ipsum nimirum supra inclinationes, infirmitates animæ tuæ, alia huiusmodi habenda est reflexio ) ex duobus his statibus congruat? in quò certior & secutior est tua salus, & ad quem te interius impelli sentias? si senseris te impelli ad eligendum statum religiosum.

Assume 3tò. Sacros diversos religiosos ordines & repetito pluries simili ratiocinio, ibis per varias eorundem ordinum differentias específicas, prius per subalternas, tum deinde per differentias inferiores, donec tandem ad duos particulares ordines specie quasi infima differentes perveneris, & ex his unum certum elegeris. Et sic deliberabis

*primò* an religio tibi sit eligenda, quæ solitudinem & vitam solitariam atq; contemplativam proficitur, an certè ea religio quæ occupatur non solum circa propriam, sed etiam circa proximorum salutem curandam, & proficitur vitam mixtam ex activa & contemplativa. Procedes deinde ad species alterutrius hujus religiosæ vitæ sublaternas. Si v. g. senties te inclinari, ex rationibus æternis bene expensis, ad eligendam religionem quæ proficitur vitam mixtam, deliberabis an eligenda tibi sit aliqua Religio Clericorum Regularium, an certè Religio alia v. g. Fratrum mendicantium. Ulteriùs progredieris ad inferiores species, tandem ad species infimâ differentiâ à se differentes.

Has deliberationes factururus & repetiturus ratiocinio, illud quidem pro certo habe, quod omnes sacri religiosi ordines ab Ecclesia approbati, ex speciali Divina inspiratione sint instituti, quod mortales, ad consequendum finem suum, juvare possint non tamen omnes eodem modo. Ad illud adverte diligenter, quod non omnes tibi æqualiter congruant; nam imprimis non omnes æqualiter fortè conducunt tuæ complexionis, tuis viribus talentis &c. Non omnes etiam religiosi ordines eodem modo & ratione tendunt ad perfectionem, DEUMq; laudare ac illi placere student; unusquisq; ipsorum proposuit sibi specialius aliud & aliud consilium Christi adimplendum, aliam & aliam ipsius virtutem studiosius imitandam. Quidam sacri ordines toti sunt in imitanda perfectissima Christi paupertate, alij in humilitate & sui abnegatione, alij in imitanda ejusdem obedientia, alij volunt excellere in charitate, quâ Christus dilexit mundum, ut mundus salvetur per ipsum, ex quâ, venit vocare peccatores, hominumq; salutem operari. Ad hæc, non in omnibus sacris ordinibus, totidem & æquè efficacia sunt media, & admini-  
cula

cula ad perfectionem consequendam. Non omnes etiam eodem studio & æquali conatu tendunt ad perfectionem, non in omnibus æqualiter viget disciplina, & religiosi instituti observatio, non ubiq; est par Superiorum vigilantia, conveniens irrepentium defectuum correctio, & in delinquentes animadversio.

Ad has & quascunq; alias particulares Religionum diversarum differentias, proprietates, consuetudines te reflecte, & ratiocinare, quid gloriæ Divinæ, quid salutis tuæ magis conveniat, seposito omni carnis affectu, & sensualium commodorum appetitu. Et si invocato Lumine, cælesti, & rationibus spiritualibus supernaturalibus, ijsq; præponderantibus, senseris te inclinari ad unum aliquem determinatum sacrum ordinem, electionem conclude, & factâ reverentissima gratiarum actione pro tali illuminatione & tanto DEI beneficio, opem Divinam implora, ad exequendum quod statuisti, quodsi te plenè determinare necdum poteris, re ulteriori deliberationi relictâ, conclude resignatione tui in DEI voluntatem, & postulatione ulterioris luminis, prout habes in primò puncto præsentis meditationis.

## Meditatio

### Proponens secundum modum faciendæ electionis.

Prælia eadem quæ præcedentis meditationis.

PUNCTUM I. Audi illa verba Isaïæ 19. *Ubi sunt Sapientes tui? annuntient & indicent tibi, quid cogitaverit Dominus?* Et considera, siquidem modo per præcedentem meditationem proposito; & per ratiocinium tunc institutum circa varios vitæ status,

status, non es à DEO illuminatus, & permotus efficaciter ad eligendum unum ex ipsis; alium adhuc modum adhibendum, & alià via in hoc negotio procedendum esse. poterit is felicior esse, poteritq; DEUS gratiam, quam dare distulit, si constantes fuerimus in ea quærenda, misericordissimè elargiri. Modum hunc insinuatam habes in adductis Isaæ verbis. Nimirum petes assequi quod intendis, consulendo Sapientes, qui tibi indicent & annuntient quid cogitaverit Dominus. Quare ultra consilium proprium & domesticum, quod habes & habere poteras, rationes varias pro utraq; electionis parte studiosè adinveniando, benè expendendo, illas invicem cōferendo, & observando quæ & quantum præponderent. Consule etiam & adhibe alios consiliarios, qui & Sapientes sint, & sint tui amici, tibiq; benè velint, adeoq; qui & possint & velint tibi consulere. Tales consiliarij sunt: Christus Dominus, Beatissima Mater ejus, S. Angelus Custos, tuiq; Sancti Patroni, alij etiam homines, in hac vita mortali degentes, mors ipsa, Judicium Divinum, tandem vita altera, quâ post mortem corporis victuri sumus.

Et imprimis ipse Christus, qui est Sapiencia æterna, qui est amicus tuus benevolentissimus, quò nemo tibi potest melius velle, sit tibi in hoc negotio consiliarius. Ipsum crucifixum acutè complexus, inter oscula Sanctissimorum pedum, reverentissimè consule, quem statum vitæ eligere & tenere debeas, sicut illum consulait Paulus Apostolus. *Domine quid me vis facere?* Et existima Christum tibi consulere statum illum, qui erit maximè conformis ipsius evangelicis consilijs, in quo perfectiùs poteris imitari ejus exempla, in quo illum tanquam regem & ducem tuum propiùs comitaberis, in quo indueris ejus vestibus & insignibus, quales vestes sunt pauperies, contemptus; ignominia,



nia, & insipientiæ titulus. In quo illi pauperi, spreto & illuso, magis assimilaberis; dicit ille tibi consilium à se exquirenti : *Exemplum dedi vobis, ut quemadmodum ego feci, ita & vos faciatis.* Illam etiam hic repetet adhortationem, quam habes in meditatione de regno Christi. Hoc consilio ac responso accepto à Christo, vide & bene expende; Ex duplici illo vitæ statu, circa quos in ratiocinio, per præcedentem meditationem instituto, stetisti, nec ad unum te determinare poteras, cui statui expressæ in hoc Christi consilio conditiones & proprietates, perfectiùs & magis propriè conveniunt, atq; illum elige.

2dò. Sanctissima virgo Sapientiæ incarnatæ Mater, S. Angelus Custos tuus, Sancti tui Patroni, illi maximè, quorum opem & patrocinium jam aliàs expertus es, ad quos majorem præ alijs devotionem habuisti & habes, saluberrimum consilium tibi dare poterunt, si ad ipsos, sive per interna suspiria, & invocationem ipsorum opis, ac patrocinij, sive per longiores devotiones in hunc finem institutas, recurras, vel etiam mente revolvās & tantisper recogites. Si præsentem & aspectabilem haberem Beatissimam Virginem, S. Angelum Custodem, SS. Patronos illos & illos, quibus singulariùs affectus sum, ipsosq; de statu vitæ meæ consulerem, quid illi mihi consulerent, quem vitæ statum eligendum svaderent? atq; si in mentem tibi venerit quòd hi sancti consiliarij, hunc potiùs statum quàm illum eligendum svaderent, acquiesce tali consilio, & illud tibi sequendum esse existima.

3tò. Ex hominibus viventibus potes habere consiliarios, si adhibeas viros prudentes, spirituales, non interestatos, & qui per consilium, quod tibi daturi sunt, nihil aliud quærant, nisi laudem & gloriam DEI, atq; animæ tuæ salutem. Imaginare tibi quempiam talem ex ipsis, & tecum perpende.

Si

Si hujusmodi viro prudenti & sancto exponerem, me in tali esse deliberatione, nec posse me resolvere ad unum potius statum eligendum, ipsiusque consilium expererem, quid ille mihi consuleret? huncne potius an illum vitæ statum svaderet? Consilium quod ab ipso te accepturum sperares, existima tale esse, quod si sequaris, & juxta illud tuam electionem facias, te non esse aberraturum. Nisi etiam quid specialiter obsit, optimum & consultissimum est, ut defacto, sub obligatione secreti, rem totam confessario tuo, vel alicui viro prudenti & timorato communices, ut omnes rationes, sive allicientes & attrahentes, sive retrahentes ab hoc vel illo vitæ statu, aperias, ejusque petas consilium. Consilio & responso tali, quod dabitur (maximè si postquam non unum sed duos aut tres hujusmodi viros exquisieris, & consilium eorum conforme fuerit) tali inquam consilio, securè stare et acquiescere poteris, & juxta illud, tuam electionem perficere. Tu etiam ipse tibi consiliarius hac ratione esse poteris. Cogita, si amicus tuus bonus, cui velles quàm optimè, consilium tuum peteret circa materiam præsentis deliberationis, optaretque à te consilium non qualecunque, sed saluberrimum accipere; quod illi responderes & svaderes, hoc responsum exequendum tibi esse existima, neque enim in retanti momenti, potes aut debes alteri melius velle, quàm tibi ipsi.

4<sup>to</sup>. Mors ipsa potest esse consiliarius, qui tibi annuntiet & indicet, quid de te statuerit & cogitaverit Dominus. Hujus consiliarij sententia te non fallat, O mors quàm rectum est judicium tuum! Porro mortem tali ratione consule: cogita, si nunc tibi moriendum esset, & adhuc posses meritoriè eligere unum statum ex his, de quibus deliberas, quemnam potius tunc eligeres? in morte etiam interrogatus, in quonam statu, si id tunc in

optio-

optione tua esset, mori exoptares? in quo te statu vixisse & mortem oppetere gauderes? ad hanc interrogationem quid responderes? illa responsio sit tibi regula, juxta quam convenit electionem tuam te facere.

5<sup>to</sup> Assume adhuc in consiliarium tuum, illud judicium, quod, constitutus ante Dei judicis tribunal, formaturus es, vel certè, quod habiturus es in alteram vitam translatus, & in æternitate felici vel infelici positus. Quod tunc erit judicium tuum, idem nunc sit in præsentis deliberatione. Judicaturus forsitan es, quod consulcissimè fecisses, si hunc potius elegisses statum, quàm illum, quod de tali electione facta in vita, minor tibi reddenda esset ratio; quòd tali electione consecutus fuisses salutem æternam, à qua fortassis (avertat id Deus optimus) excidisse te; serò nunquam satis dolebis. Ex tali judicio tunc habendo, inferes, quid in præsentis, facto opus sit, quem statum eligere debeas?

Ex his consiliarijs cum cognoveris Divinam circa te voluntatem, non est cur ultra fluctues in hanc & illam partem; vide an non durum tibi sit, contra tot stimulos calcitrare? Time illam comminationem Christi: servus qui cognovit voluntatem Domini sui, & non fecit secundum voluntatem ejus, vapulabit multis. Resolve te ad suscipiendum illud vitæ institutum, ad quod per tales illustrationes & inspirationes Divinas vocaris. Quod cum feceris, Deo humillimè agere gratias pro tanto beneficio, quod inter maxima, quæ in vita tua optare vel sperare potes, numerari debet, & postula gratiam, ut qui dedit velle, det & perficere, quòd si aliquid adhuc te retardat, quominus electionem perficias; ut negotio huic finem imponere possis, progredere ad

PUNCTUM II. & audi verba illa Joan. 3. *spiritus, ubi vult, spirat, & vocem ejus audis.* Et considera post adhibitum etiam secundum electionis

modum, puncto præcedenti propositum, ut vocem Domini non audias, difficile id persuaderi posse. Timendum potius est, ne, dum Spiritus Sanctus ad cor tuum loquitur, ad vocem ejus obliuiscas; vocem quidem audias, sed non percipias, nec intelligere velis, quæ sunt tibi ad salutem. Talis obsurditatis, duæ causæ, ex adductis S. Joannis verbis colligi possunt.

*Ima* Quod spiritus Sanctus, per suam inspirationem & vocationem, quâ te vocat, spirat ubi vult, hoc est, ea tibi inspirat, quæ ipsi placent; suo afflatu & assatu, ad eum te vitæ statum inclinât, quem ipse ex altissimo suo consilio elegit, non quo tu vocari velles. Fortassis spiritus S. taliter spirat: ut Christum sequaris pauperem, illudum, contemptum, ut eum eligas statum, eam religionem, quæ per institutum suum, his Domini sui vestibulis, & insignibus præoptat vestiri. Tu verò ab his abhorres, non placent hæc appetitui sensitivo, tuæ hæc repugnant vanitati. Fortè vocat te spiritus S. ad eum statum, in quo te mundo mori omnino oportebit, in quo mortificationem Christi, continuo in corpore tuo circumferre necesse erit, in quo sædulò curandum est, ut & tu mundo, & tibi mundus, cum suis concupiscentijs sit crucifixus, per quam abstraharis quàm maximè, à mundo à periculosis conversationibus, pluribusq; peccandi occasionibus, in quo cum hoste animæ decertandum, bellumq; ipsi inferendum est, in quo corpori nulla quies concedenda erit, nulla commoda sensuality quæriri debent, in quo præclusus est honoribus aditus, in quo, diligentia cura & studio, in tuam perfectionem, & in proximorum salutem incumbendum est. Deniq; vocat te spiritus Sanctus, ut ex eas de terra tua, de cognatione tua, de domo patris tui, aliamq; terram tibi monstrat, in quam te vult venire. Ab his è

contraretrahit te fortissimè amor proprius, spes  
vana

vana crescedi honores, Prælaturas assequendi, nominis celebritatē & famam comparandi; retrahit te appetitus commodorum sensualium, divitiarum, libertaris, soli nativi amor. Omnia hæc magis placent, adeoq; vocans spiritus S. & svadens his omnibus contraria, spirat ubi vult, non eô modô, quô tu velles. Et hæc est, vel esse potest una causa obsurdescentiæ ad vocem Spiritus S.

2da Causa ejusdem obsurdescentiæ, esse solet. Quia Spiritus S. spirat, vox ejus non est valida, sed tenuis & placida spiratio, in sibilo tenuis auræ, Spiritus S. ad cor tuum loquitur, svaviter invitat non violenter, vox ejus dulcis, & non illa adhuc, ad quam ambæ aures tinniant. Cum interim totus fremat infernus, tumultuentur cupiditates tuæ, buccinatores inordinatorum affectuum, totis illæ antiquæ, prout illas clamantes aliquando audit S. Augustinus. *Itanè nos deseris Augustine? ergonè tibi amplius illud & illud non licebit usq; in æternum?* Inter hos inconditos carnalium cupiditatum clamores, facile obsurdescit ad vocem Spiritus Sancti tenuiter spirantis. Vox hæc svavis aut non auditur, aut audita non percipitur, non intelligitur.

Reflecte te, an ad vocem Domini non obsurdescas? an non aliqua ex his, vel non utraq; hæc sit causa obsurdescentiæ tuæ? Excita te ad audiendam vocem Spiritus Sancti, dicendo cum Psalmista: hodie si vocem ejus audieris ô anima mea noli obdurare cor tuum, magno & forti animo vince te ipsam, frange voluntatem tuam, quantumvis rebellem, compelle sub svave jugum, ad quod te vocat DEI tui beneplacitum. Vince omnes tuas pravas inclinationes, impone silentium tumultuantibus cupiditatibus tuis. Ejice tibicines & buccinatores pravorum habituum, & affectuum validè reclamantium.

Protestare coram Domino, quodd ipsum solum, ejusq; vocem audire velis, idq; ita audire, ut intelligas, & corde percipias. *Loquere Domine quia audit servus tuus*, non loquatur mihi caro, mundus, non loquatur infernus, tu Domine loquere, verba enim vitæ æternæ habes. Perfice Domine aurem cordis mei, ut quæ mihi loqueris ad salutem, audiam & intelligam. Fac Domine, ut te loquente, omnes clamores obstrepentium cupiditatum mearum, & sibili serpentis antiqui conticescant, sola deinceps vox tua sonet in auribus meis.

PUNCTUM III. Audi eadem verba S. Joannis, cum addito, quod ulterius sequitur *Spiritus ubi vult spirat, & vocem ejus audis, & nescis, unde veniat*. Et cogita obsurdæ, ad vocem Spiritus Sancti, posse adhuc & hanc causam esse. Quodd audias vocem, sed nescias unde veniat, hoc est, quia tibi certò non constat, an hæc vox, quam interiore aure animæ tuæ audis, sit Divina, sit vox Spiritus S. & non potius vox alicujus alterius Spiritus, an non vox hostis animæ tuæ, qui subinde se transfiguratur in Angelū lucis. Nec mirum, si tali suborta dubitatione, aliquantūm hæreas, nec ad vocem, quam interiùs audis, statim te proripias, cū S. Paulus Apostolus velit, ut probemus Spiritus, an ex DEO sint.

Loquitur quidem DEUS aliquando, ita clare, & ejus virtus Divina sic impellit voluntatem, ut omnis dubitatio & dubitandi facultas sublata sit, quominus lequatur ipsam illam impulsione. Sicut legimus SS. Paulo, & Matthæo Apostolis, alijsq; nonnullis accidisse. Quem vocationis Divinæ modum, S. pater IGNATIUS tempus primū ad electiones faciendas magis opportunum appellat. quia tamen hic modus loquendi est valde extraordinarius, & non communis, expectari, aut exigi, & à DEO postulari non debet. Alij modi locutionis & vocationis Divinæ, magis usitati & ordinarij



narij sunt : Vel cū animus inspirationibus & motionibus internis agitur, ijq; tam efficacibus, ut sine ullo intellectus discursu, aut cum modico, voluntas feratur ad D<sup>i</sup>servitium & perfectionem; qui modus vocatur secundum electionis tempus, vel tandem, cū intellectus, ratiocinando ( qui modus tertium tempus electionis appellatur ) & rationes ponderando pro una & altera parte, veritatem claris aspicit, & veluti Lumen voluntati præfert, ut id demum eligat, quod, omnibus perpensis, melius fuerit Judicatum. Per duplicem hunc posteriorem locutionis Divinæ modum, quia non tollitur dubitandi facultas, fit, vel fieri potest, ut dum auditur locutio Divina, per alterutrum hunc modum facta, dubitetur, unde vox talis & impulsio veni. t. Siquidem fieri potest, ut etiam hostis animæ, transfigurans se in Angelum lucis, voluntatem impellat ad id, quod aliquam obsequij Divini & perfectionis speciem & apparentiam habere videtur; rationes etiam fallaces, & argumenta sophistica obtrudat, ut hoc potius voluntas eligat, quā illud; subinde etiam & rem bonam svadet, & pias cogitationes fovet. Est tamen virus quod latet, & quod detegi debet.

Ad discernendam locutionem & vocationem Divinam a Dæmonis versutijs & suggestionibus, has regulas, ex Doctrina S. Patris mei JONATHAN, tene. Ima, sedulo & accuratè excutantur & examinentur sive motiones ipsæ & impulsiones secundum tempus, sive cogitationes & rationes pro utraq; electionis parte occurrentes, examinentur inquam circa principium, medium, & finem, hoc est circa rem ipsam & objectum ad quod tales motiones impellunt, sine illud in se & vere bonum, an fucatum tantum boni speciem præferat. Examinentur etiam circa finem? Ex quæsi- ac illis motionibus & impulsibus res svadetur.

finis ille finis bonus, depuratus à finibus quibuscunq; vitiosis, an certè finis pravus, aut finis alicui non bono conjunctus? Circa medium deniq; examinentur, inquirendo, an objectum, quod svadetur, per aliquas circumstantias non vitietur? an comparatè ad illud bonum, ad quod voluntas antea impellebatur, non sit minus bonum? an res quæ svadetur, alioqui secundùm se bona, non debeat per media mala & illicita obtineri? Si omnia hæc rectè se habeant, principium, medium, & finis, atq; rectè se habere deprehendantur per accuratam examinationem, in quo metienda sunt omnia, majore Divinà glorià & salute ac perfectione animæ, nullo respectu habito ad proprias commoditates temporales, sensuales, & vanas; argumentum & indicium erit, motiones & impulsiones, quas voluntas sentit, cogitatione etiam & rationes ad quidpiam impellentes, à bono & Divino spiritu esse. Quòd si res mala, vel bona quidem, sed non bene, quia ob finem malum, aut in circumstantijs, & per media quæ rem vitiant, svadeatur, deprehendaturq; sive in principio, sive in fine, aliquod vitium, quod certè diu latere non potest, hostis enim noster nocendi studiosissimus, diu se regere & occultare nequit, quin fine malo tanquam caudâ serpentinâ se prodât, vel ex capite agnoscat, vel venenum ejus non sentiatur; ex his deprehendes motiones & impulsiones hujusmodi, à spiritu malo immissas esse.

2da. Regula est ad discernendam locutionem & vocationem Divinam, à suggestionibus spiritus mali. Attendendum est ad modum locutionis. Diversissimus enim est locutionis & vocationis Divinæ modus, à modo locutionis diabolicæ. Spiritus Divinus, dum movet & inclinât animam, quæ DEO se conjungere studet & desiderat, ejusq; exquirat circa id ipsum voluntatem, leniter, placidè ac svaviter, sicut aquæ stilla in spongiam, illabitur.

Spir.

Spiritus verò malus duriter, implacide, violenter, atq; cum quodam strepitu, sicut imber decedens in petram. Seu, expressius loquendo, spiritus Divinus movet voluntatem animæ, quæ DEUM & suam salutem quærit, movet inquam svavi consolationum illapsu, hoc est, inflammat affectum ad amorem Creatoris, ad quærendam salutem & perfectionem propriam, ad exercendos, cum omni facilitate, heroicis virtutum solidarum actus, cor conterit & solvit in lacrymas poenitentiae, compassionis Christo patienti, in lacrymas pietatis, devotionis, teneritudinis, affectus erga DEUM; facit animæ desipere res terrenas, oblectationes sensuales, vanitates, & similia, è contra facit sentire gustum, & delectationem in meditatione rerum cœlestium, in asperitate statûs poenitentiae, viæ crucis, mortificationis, facit sentire desiderium maxima quæq; agendi, & patiendi pro gloria DEI. E contra diabolus dum loquitur, desolatione perturbat animam, hoc est, ad res viles & terrenas inclinât, affligit timore subtractionis oblectationû, cōmodorum sensualium, vanitatum &c. Aufert internā animi pacē & tranquillitatem, tristitiā, teporē ac torporē inducit, & propè in desperationē agit.

Juxta has regulas, discerne & tu Spiritus, ipso- rumq; impulsiones, quas sentis in deliberatione de statu tuo, aut certè ad directorem tuum pro consilio recurre. His expeditis, electionem statûs vitæ tuæ, in exercitijs S. Patris JGNATII perficere, & difficultates in exequenda Divina vocatione profligare stude. Certè hoc tempus huic operi maximè est opportunû, dum DEI motio recens est, spiritusq; fervore per tot meditationes excitato, incaluit.

*Colloquium* ad pretiosissimam DEI Parentem, cui supplica, ut suo patrociniò te ab hoste protegat, & defendat, fraudesq; ejus detegat, ac Divinam vocationem te agnoscere, illamq; exequi faciat. *In fine : Ave MARIA.*

## Meditatio I.

De reformanda vita hominis  
in statu sæculari, ac etiam ma-  
trimoniali constituti.

*Praludium I.* Imaginare conversionem Cornelij centurionis ad Christi fidem, de qua habetur Act. 10. Et existima audire te illa S. Petri Apostoli verba, occasione talis conversionis dicta: *In veritate comperi, quia non est personarum acceptor DEUS, sed in omni gente, qui times DEUM, & operatur Iustitiam, acceptus est illi.*

*Praludium 2.* Postula gratiam à DEO, quâ illuminatus cognoscas, qua ratione in statu sæculari, in quo es constitutus, eidem placere, & acceptus esse, tuamq; salutem consequi possis.

*PUNCTUM I.* Audi illa verba 1. Ad Corinth. 7. *Reliquum est, ut qui utuntur hoc mundo, tanquam non utantur. Præterit enim figura huius mundi.* Et considera, adorationem huius S. Apostoli ad eos dirigî, qui in statu matrimoniali, vel in statu sæculari constituti vivunt; ut hi finem suum, ad quem creati sunt, hoc est, salutem animæ consequantur, necessarium omnino est, ut utantur hoc mundo tanquam non utentes.

Illi, ratione sui status, utuntur hoc mundo, vivunt alligati uxori, secundum Apostolum, sunt solliciti quomodo eidem placeant. Filios & familias secundum suam conditionem alunt & alere tenentur; habent terrenas possessiones. Bona temporalia, & œconomias administrant, proventus percipiunt, substantiam terrenam augere & conservare student. Filijs eandem exdividunt, parant

& colligunt dotem filiabus, honores, dignitates, in republica, in cōmunitatibus admittunt, ac etiam quærent & procurant. Magistratus gerunt, tractant publica negotia in comitijs, comitiolis, de integritate Patriæ & bono communi consultant, non sequuntur præcipua & maximè difficilia Christi consilia, non imitantur ejusdem exempla saltem ita perfectè, atq; vi suæ professionis hæc imitantur, vel imitari tenentur, qui ad statum Ecclesiasticum, maximè verò ad statum religiosum vocati sunt. Ex quibus omnibus clarè patet, quòd homines in statu sæculari constituti, utantur hoc mundo. Ne verò illi ipsi animas suas perdant, & ut salutem consequantur, hoc reliquum ac necessarium est, ut utantur hoc mundo tanquam non utentes.

Porro tunc homines utuntur mundo tanquā non utentes, imò quando usus mundi & creaturarum ipsis permissus, ac per statum ipsorum cohonestatus, non est illis occasio progrediendi ad illicita, & prolabendi in ea, ad quæ ipsos mundus, caro, & diabolus incitat, & invitat, contra legem & voluntatem Divinam prohibentem, & contra rectæ rationis dictamen. Facilis siquidem in hoc statu est occasio prolabendi in illicita, ut quotidiana docent exempla. Non omnes sunt continentes intra limites conjugalis castitatis; ex nimio & inordinato affectu ad res temporales, & aucionem fortunæ, multæ committuntur injustitiæ, multæ fraudes, & damnificationes aliorum, ex ambitu & studio assequendorum honorum, promotionum, respectuum. O quæ & quanta non fiunt legi Divinæ, charitati Dei & proximi adversantia! Ut igitur quis utatur hoc mundo tanquam si non uteretur, ita illi vivendum, ita sibi ipsi invigilandum est, ne vita sua sæcularis sit sibi occasio criminum, in quæ multi in hoc statu prolabuntur; ne eorum appetitus sensualis, permissu usu quarundam sensu-

alium

alium oblectationum, irritetur ad appetenda illicita, impellatq; voluntatem ut hæc quærat, & in ea contentiat, quæ sunt prohibita. Magna cautela & vigilantia adhibenda est, ut continentia conjugalis sit prorsus illibata, ut sensus corporis, & affectus custodiantur ad exemplum sancti Jobi, qui cum oculis suis fædus pepigerat, ut ne cogitaret quidem de virgine, ut bona fortunæ non augeantur modis indebitis & illicitis, per oppressionem pauperum, per injurias & damna proximorum, ut nihil alienum manibus adhærere contingat. Ne honores, dignitates, & a'ia hujusmodi quærantur per assentationes, per obsequia conscientiae læsiva, per consilia præjudiciofa Reipublicæ, vel bono sive cōmuni, sive cuiuspiā privato, per depressionē aliorum, famæ alienæ denigrationes, & his similia.

*zdo* Utantur mundo tanquam non utentes, qui in concursu vel mundi amittendi, & eorum quæ mundi sunt, vel committendæ offensæ Divinæ, sive mortalis, sive venialis, parati sunt potius jacturam opum, commoditatum, voluptatum, honorum, & totius mundi subire, quam Deum etiā leviter offendere.

**PUNCTVM II** Utantur *tertiò* mundo tanquā non utentes. Quos usus rerū mundanarum & temporalium, non impedit in cura & studio propriæ salutis, rerumq; illarum, quæ ad salutem pertinent; inò ex tali suo statu occasionem & adjumentum habent exercendorum operum misericordiæ & charitatis, promovendæ etiam Divinæ gloriæ, & cumulandorum meritorum. Qui ita utuntur mundo, ut illud sæpius mente versent, quòd prætereat figura hujus mundi, quòd hæc, quibus utuntur, sint finem acceptura, sint nonnisi figura & umbra aliorum bonorum, quòd sint alia bona longè sublimiora & excellentiora, quæ ab ipsis quæri debent, bona nimirum spiritualia, supernaturalia, perennaturæ.



tura, bona non ad corpus sed ad animam pertinentia, quæ ipsos beatos & felices in æternum reddant. Qui præterea illa bona præstantiora ad animam spectantia studiose quærunt, ad illa aspirant, mediâq; conducentia adhibent, ut illa consequantur, totoq; conatu allaborant, ut sic transeant per bona temporalia, ut non amittant æterna.

4to. Utuntur mundo tanquam non utentes, qui mundo utuntur absq; nimia adhæsiōe, & affectu minùs ordinato ad mundum. Qui, dum affluunt divitiæ, cor non apponunt; Carnis voluptatibus licitis non ita immerguntur, ut non magis delectentur in domino, in rebusq; Divinis & spiritualibus gustum quærant, totoq; mentis affectu in DEUM ferantur, qui in honoribus constituti meminerunt se homines esse alijs similes, mente, non elevantur, nec despiciunt alios, sed potius humiliantur sub potenti manu DEI.

5to. Utuntur mundo tanquam non utentes, qui circa ea, quæ mundi sunt student conformitati cum Divina voluntate; si, DEUS hæc auferat, puta, si auferat amicum, filios, bona fortunæ, honores &c. jacturam hanc ferunt cum æquanimi- tate, & cum omni subordinatione sanctissimæ Divinæ voluntati, animasq; tunc suas possident in patientia, & DEUM in omnibus benedicunt cum Sancto Job: *Dominus dedit, Dominus abstulit, sicut Domino placuit ita factum est sit nomen Domini benedictum.*

PUNCTUM III. Sexto demum utuntur mundo, tanquam non utentes. Qui rebus, quæ mundi sunt sibi licitis & permissis abstinent cum possunt, eaq; amore DEI, & ex fine aliquid pro DEO & salute animæ suæ agendi, sibi ipsis subtrahunt; qui à multis abstinent, quibus sine DEI offensa uti possent, qui sub pretiosis vestibus cilicia, catenas ferreas, aliâq; mortificationum instrumenta deferunt.

ferunt & contegunt. Qui in præcipuis constituti honoribus, DEO se humiliant, humilitatem Christianam non erubescunt, ad vilia etiam obsequia, DEO, Christo, pauperibus exhibenda se dimittunt, libenterq; ea suscipiunt. Qui, dum ipsis divitiæ affluunt, cor non apponunt, sed paupertatem spiritûs amant & sectantur, suis opibus, fortunis, bene comparatis utuntur, non tam ad propria commoda & minùs convenientes jactantias, atq; apparentias, quàm potius ad ferendum subsidium pauperibus & levandam egenorum inopiam, aliaq; bona & pia opera, totum id agendo ex amore DEI, & ad majorem mundi contemptum, quo uti putantur.

His consideratis, reflecte te supra tuum mundi usum, quomodo hætenus mundo usus sis, quomodo deinceps uti debeas? quid te pro salute animæ agere conveniat? reliquum vitæ tuæ quâ ratione transiges? fac proposita, eaq; deinceps constanter & immutabiliter exequi stude.

*In colloquio* Supplica humiliter Christo Crucifixi affixo, ut amara sua morte, & passione, omnem in te mortificet & exstinguat mundi affectum, ne mundi usus, sit tibi occasio amittendæ salutis & felicitatis æternæ, & ut non sit tibi impedimentum, sed potius medium & adminiculum ad DEUM amandum, laudandum, ipsiq; impensius serviendum, ut ita utaris mundo, ut & tibi mundus, & tu mundo sis crucifixus.

*In fine: Anima Christi.*

## Meditatio II.

De reformanda vita hominis in statu sæculari, ac etiam matrimoniali, constituti.

Præludia eadem, quæ meditationis præcedentis.

Pu-

**PUNCTUM I.** Audi illa verba 2da Petri 1. *satagite ut per bona opera, certam vestram vocationem & electionem faciatis.* Quæ ipsa applicata & directa esse ad homines vitam sæcularem agentes, existima. Ut verò hæc fructuosius penetres.

Considera 1mo Per vocationem, non incongruè posse hoc loco intelligi inspirationem, & voluntatis tuæ motionem, ex vi cujus, tot alijs vijs ad salutem totq; diversis vitæ statibus omisis, assumpsisti & elegisti statum vitæ sæcularis, statum matrimonialem. Per electionem verò intelligi debere Divinam tui electionem ad gloriam, per quam DEUS te inter beatos & salvandos connumerat, tuumq; nomen libro vitæ, libro prædestinatorum inscribit. Differunt electio & vocatio per hoc, quòd vocatio versetur immediatè circa media salutis, habeatq; pro objecto & termino immediato, medium salutis, hoc est certum, vitæ statum. electio verò versetur circa ipsum finem, hoc est, circa ipsam hominis salutem, & hanc habeat pro objecto & termino immediato, circa quem versatur. Vocatio ostendet viam, quâ ambulando, pervenias ad terminum æternæ felicitatis; electio præstat, ut æterna felicitate potiaris. Vocationem Divinam habere, multis est commune; electio verò est donum rarissimis obveniens, juxta illud: *Multi vocati, pauci electi.* Potest enim quis vocari ad certum vitæ statum, & vocationi Divinæ vel non obedire, vel obedire quidem, sed postquam ingressus est eam salutis viam, in quam ipsum deduxit vocatio Divina, ab hac deinde via deflectere, aut non dignè sua vocatione ambulare, & sic infelicitè aberrare.

Considera 2do. An quis vocatione Divina vocatus sit ad statum vitæ sæcularem, an verò ex alicujus alterius spiritûs motione & impulsu, statum hunc elegerit, rem esse valde dubiâ & incertâ. De vocatione ad altum perfectiorem, v. g. ad statum religiosum,

sum si non certitudo, fortis tamem præsumptio haberi potest, quod hæc fuerit vocatio Divina. Ad hunc enim statum amplectendum, potuit quis moveri unice gloriæ Divinæ & salutis consequendæ studio, idq; ex desiderio & proposito imitationis virtutum, & exemplorum Christi, ac impletionis Consiliorum ejus, absq; ulla admittance affectus carnalis & mundani. Potuit insuper adhibere media convenientia, sive pro cognoscenda, & pro exploranda Divina voluntate, & vocatione, sive pro discernendis ac probandis spiritibus, adeoq; vocatione suâ ad statum religiosum examinatâ per modos bonæ electionis, & per regulas discernendorum spirituum, potuit, potestq; advertere, vocationem suam esse & fuisse rectam, puram, omnino sanctam, adeoq; Divinam. De vocatione verò ad statum sæcularem, conjugalem, frequenter in contrarium est præsumptio; quotus enim est, qui hunc statum eligat unice studio placendi DEO, Deumq; laudandi, & glorificandi; ex fine item consequendæ salutis, sine admittance inordinatæ affectionis ad carnis voluptates, ad res terrenas, sensuales, vanas, mundanas, ad commoditates, aliaq; his similia? quotus est, qui hunc statum eligat ea intentione, quâ conjugium contrahi debere docuit Angelus Raphaël, Tobiam juniorem? Porro vocatio, admistum habens inordinatum affectum, cum sit obliqua, malo fine vitiata vocatio Divina esse non potest, ut docet S. Pater IGNATIUS, Punct. 220. introductionis ad rerum eligendarum notitiam. & ipsa recta ratio ostendit.

Quantum verò attinet ad Divinam electionem hominis ad gloriam, de hac, in nullo vitæ statu, independenter a speciali revelatione Divina, certitudo omnimoda & absoluta haberi potest. Cum enim homo in vita sua nesciat, an amore an odio dignus sit; cum nemo dicere possit, mundum  
est

est cor meum, purus sum à peccato ; cum ignoret an sit perseveraturus in DEI gratia, an in gratia finali moriturus. Nemo consequenter dicere potest ego de electis sum, ego prædestinatus ad vitam, ego de numero filiorum. Quamvis verò talem certitudinem in nullo vitæ statu habeamus, spes tamen & fiducia plerosq; consolatur, suntq; insuper signa & indicia manifesta è sensu D. Bernardi. *Serm. 1. in septuag.* : ut indubitabile sit aliquem esse in numero electorum, in quo ea signa permanerint. & talia quidem signa reperiri possunt in aliquibus viris sanctis & perfectis; in hominibus tamen vitam sæcularem agentibus hæc non solent ordinariè & communiter inveniri.

PUNCTUM II. Considera 3<sup>to</sup> in hac incertitudine sive circa vocationem, sive circa electionem suam constitutus homo sæcularis, ne dubitationis hujus anxietate omnino consternetur, modum & remedium insinuat S. Petrus Apostolus illis suis verbis : *Satagite, ut per bona opera, certam vestram vocationem & electionem faciatis.*

Modus itaq;, quo in statu sæculari, cujuscpiam, certa ad eundem statum vocatio & electio fieri possit est. Faciendi sunt fructus pœnitentiæ, deplorata vitæ antecedentis peccata eleemosynis redimenda, usu indulgentiarum & frequentatione Sacramentorum Eucharistiæ & pœnitentiæ expianda, opera etiam bona & salutaria, opera Justitiæ, misericordiæ, Charitatis exercenda, sanctè & Christianè vivendum. servanda DEI præcepta, Consilia Christi, quæ impleri possunt, adimplenda, orationi & obsecrationibus, cum Cornelio, insistendum. In rebus cœlestibus & Divinis gustus excitandus & fovendus, Curandum, ut juxta monitum S. Pauli Apostoli, exhibeamus nosmetipsos, sicut DEI ministros, in multa patientia, in tribulationibus, in angustijs, in laboribus, in vigilijs, in jejunijs, ut co-



ram DEO humiliemus animas nostras, ut abundemus in omne opus bonum. Hac ratione vivendo, homo Christianus, in statu sæculari & matrimoniali constitutus, certam faciet vocationem & electionem suam.

Faciet imprimis certam vocationem. Etiam si enim dubitare possit, an vocatio illa, quæ primò elegit statum sæcularem & conjugalem, fuerit vocatio Divina, tamen postquam hunc statum eligit, nec amplius mutare potest, securus & certus esse debet, quòd illum DEUS vocet ad vitam in hoc statu sanctè & Christianè instituendam, quòd illa vocatio, quæ excitatur ut in tali statu, in timore & tremore operetur salutem, & in sanctitate ac Justitia, DEO famuletur omnibus diebus vitæ suæ, sit vocatio Divina. Talem verò vocationem & Divinam, & magis adhuc certam faciet, si DEO vocanti se ad meliorem vitam obsecutus fuerit, & hoc vitæ statu, tanquam medio ad suum finem consequendum, abundando in omne opus bonum, bene usus fuerit.

Faciet etiam certam electionem suam. Etiam si enim de hac non possit habere certitudinem absolutam, & ex omni parte infallibilem, atq; talem, quæ excludat ulteriorem sollicitudinem circa salutem animæ suæ; nihilominus per bona opera certam faciet electionem suam, certitudine spei, & magnæ fiduciæ, fundatæ & innixæ sufficientibus indicijs & argumentis, ex quibus colliget se esse in numero electorum, & quæ illum reddet diligentem & constantem in DEI servitio, & quærenda ejus gloria, atq; curanda animæ salute.

Hanc certitudinem faciet ipsi & conscientia rectè factorum ac bonorum operum, in quibus se constanter exercet, & insuper ipsa promissio Divina, de retribuenda, pro meritis & bonis operibus, gloria. Quæ cum conditionata sit, & per modum

con-



contractus onerosi, sub conditione ponendorum ab homine meritorum vitæ æternæ; impletâ hac conditione, per positionē talium bonorum operum, homo securus est, & in magnam spem erigitur, quod DEUS stabit promissioni suæ, adeoq; quod sit collaturus illi gloriam & felicitatem æternam. Si operarius, absolutô opere, ad quod conductus est, certus est de danda sibi condicta mercede, si miles, post strenuâ cum hoste pugnâ & victoriam, securus est de reddendo sibi stipendio, & dividendis etiam inter se spolijs; si mercator, persolutô adæquatô mercis pretiô, certus est juris sui ad emptam mercedem; pariter & homo Christianus certus est accipiendæ coronæ & felicitatis æternæ. post vitam Christianè & sanctè transactam, & sancta morte terminatam. Illa enim cœlestis beatitudo, est laborum vitæ hujus, pro DEO susceptorum, merces, est præmium & stipendium strenui, cum hostibus animæ, certaminis, ac de ipsis obtentæ victoriæ, est illa pretiosa margarita, quam eleemosynis, operibus misericordiæ, & sanctis laboribus emimus & comparamus.

PUNCTUM III. Considera 4<sup>to</sup>. unumquemq; electionis suæ ad vitam æternam certum & securum esse posse, si horum trium certus sit. 1<sup>mo</sup> quod sua peccata sibi dimissa sint. 2<sup>do</sup> quod sua bona opera sint à DEO acceptanda in meritum vitæ æternæ. 3<sup>id</sup> quod in bonis & sanctis operibus atq; in gratia finali perseveraturus sit ad mortem. Cum enim per hæc tria, seu dependenter ab his tribus, habeatur electio hominis ad gloriam; habita certitudine de tribus illis, habetur consequenter certitudo electionis. Porro qui Christianè, sanctè, & laudabiliter vivit, per sua bona opera & sanctam vitam facit & comparat certitudinem de illis tribus, non quidem, ut dixi, omnimodam & absolutam, sed certitudinem spei, & magnæ fiduciæ in-

nixæ promissionibus Divinis.

Nam imprimis faciendo dignos fructus pœnitentiæ, confitendo etiam sacramentaliter peccata, aut cordis contritione & humilitate sapius ea deslendo, & pro ijs Iustitiæ Divinæ satisfaciendo, eaq; eleemosynis redimendo; habet, & habere potest spem magnam, adeoq; aliquam certitudinem, de remissis sibi peccatis, juxta illam promissionem Divinam 1. Joan. 1. *Si confiteamur peccata nostra, fidelis est & iustus, ut remittat nobis peccata nostra, & emundet nos ab omni iniquitate.*

Deinde opera Iustitiæ, misericordiæ, charitatis, & quarumcunq; aliarum virtutum exercendo & accumulando, homo Christianus, confusus Divinæ bonitati & misericordiæ, quæ homini facienti quod ex se est, non denegat gratiam; sperat, quod hæc sua bona opera, dum illa quam perfectissimè peragere studet, sint acceptanda in meritum vitæ æternæ, & pro his sit retribuenda sibi merces magna nimis, persuadetq; sibi firmiter, in die iudicii; auditurum se illam Christi sententiam: *Venite benedicti Patris mei, possidete regnum paratum vobis ab origine mundi; Esurivi enim & dedistis mihi manducare, sitivi & dedistis mihi bibere, hospes eram & collegistis me, nudus eram & cooperuistis me, infirmus, & visitastis me. In carcere, & venistis ad me. Quàdiu enim ex fratribus meis minimis uni fecistis, mihi fecistis.* Sententiæ tam exoptatæ, in ipsū pronuntiandæ facit, illi spem & aliquā certitudinē, enumeratorum misericordiæ operum executio & frequentatio.

Tandem homo Christianus persistendo constanter in bonis operibus, rigidamq; pœnitentiam de peccatis totā vitā agendo, ac cum magna solitudine operando salutem, sperat in morte, muniendum se victrici & efficaci gratiā Divinā, contra omnes tentationes, quibus tunc impugnabitur; sperat

rat se etiam in morte triumphaturum de hostibus animæ, de quibus in vita solitus fuerat triumphare; sperat se in gratia finaliter perseveraturum, quam tanta solitudine in vita conservare & augere fludebat. Fidit affecurationi S. Augustini asserentis: *Neminem vidi male mortuum, qui bene vixerit.* Si igitur bona opera faciunt nobis certitudinem, seu magnam spem, & in DEI bonitate fiduciam, de remissione peccatorum nostrorum, de comparando meritorum thesauro, ac etiam de conferendo nobis dono perseverantiæ in bonis operibus, & in gratia Divina; hæc ipsa certos nos facient electionis nostræ ad gloriam, certudine spei, & magnæ fiduciæ.

Hæc considerans accendere ad vitam sanctè & Christianè agendam, ad exercenda opera misericordiæ, ad cumulanda merita; quæcunq; potest facere manus tua, instanter operare. Manè semina, vespere non cesset manus tua. seriò cogita de vita rectè instituenda, age, ut opera tua novissima, sint plura & perfectiora prioribus, ut per hæc, certam facias vocationem & electionem tuam. Fac particularia proposita, elice affectus.

*In colloquio* Supplica humillimè bonitati Divinæ, ut te ad vitam piè & Christianè instituendam vocare, & accendere dignetur, suâq; potenti & efficaci gratia adjuvet, quâ adjutus, constantem de peccatis tuis pœnitentiam agas, bona opera & merita accumules, in ijsq; ac gratia sanctificante, finaliter, ad ultimum vitæ tuæ terminum perseveres, & per bona opera, certam facias vocationem & electionem tuam, ad æternam cum DEO felicitatem.

*In fine: suscipe Domine &c.*

## Meditatio III.

### De vita Christianè instituenda, sæculari & conjugali.

Prælua eadem, quæ meditationis primæ.

PUNCTUM I. Audi illa verba S. Pauli Apostoli 1. ad Timot. 5. de viduis dicta. *Si qua vidua filios aut nepotes habet, discat primum domum suam regere.* Et inferius ad omnes Patres-familias spectantia: *Qui suorum, & maximè domesticorum curam non habet, fidem negavit, & est infideli deterior.* Et considera doctrinam hanc Apostoli ad omnes extendi, qui in sæculo degunt, omnibusq; tuis ad vitam rectè & Christianè instituendam ac reformatam, necessariam esse, ut sciant domum suam regere, & ut suorum, maximè verò domesticorum, curam habeant; quod ut melius præstari possit.

Considera ulterius *imò.* Ad hoc, ut aliquis censeatur domum suam bene & Christianè regere, requiri imprimis, ut præ oculis constituto fine hominis, qui non alius est, nisi gloria Divina & salus æterna animæ, ita domum & rem œconomicam administret, ut administratio hæc sit ipsi medium promovendæ magis ac magis gloriæ Divinæ, ac consequendæ salutis non solum animæ propriæ, sed etiam ad eundem finem perducendi omnes, quotquot ad suam curam quâquâ ratione pertinent; et ut omnes suæ ac suorum actiones in hunc finem colliment, nec ab illo deflectere ullatenus permittantur. adeóq; requiritur, ut homo in tali statu constitutus, quærat regnum DEI & Iustitiam ejus, non solum sibi ipsi invigilando, rebus spiritualibus & Divinis vacando, Sacramenta frequentando, orationi, jejunijs, operibus bonis, maximè operibus misericordiæ insistendo, sed etiam,

ut

ut ipsam temporalium administrationem, in finem hunc ordinet & dirigat.

Quod ipsum ut assequatur, necesse est, ut quisq; secum rationem ineat, quam amplam Domum & familiam habere illum æquum sit, attentis: statûs proprij conditione, reddituum ac proventuum amplitudine, alijsq; similibus circumstantijs, ita, ut non desectatur in alterutrum extremum vitiosum, ne nimirum, aut luxu, prodigalitate, & excessu, aut parsimoniâ, angustia animi, & defectu peccetur. Ut item recogitet, ac secum dispiciat, quis sit modus tenendus in colligendis proventibus, còacervandis opibus, augendis & conservandis bonis fortunæ, ut hæc non procurentur studiò immoderatò, nimia solitudine, & ex inordinato ad hæc affectu; ut per curam talium, ne in minimo quidem lædatur conscientia, Justitia, DEI & proximi charitas. Opus insuper est, ut diligenter expendat, quis ibidem servandus sit modus in erogandis pecunijs, qualiterq; sit disponendum de possessis facultatibus, quæ expensæ & qui sumptus faciendi in usus, sive proprios, sive domesticos, pro domestica familia; quantum sit distribuendum in pauperes? quid expendendum in pia opera misericordiæ & charitatis? An maturè & tempestivè non sit deliberandum de ultimis dispositionibus faciendis, de condendo testamento? an hoc non sit sine dilatione conficiendum & qua ratione? ne res hæc, in ipsa infirmitate & morte faciat tibi difficultates, ac te impediat in facienda conveniente ad mortem vicinam præparatione, reconciliando cum DEO, per seriam pœnitentiam, animo tuo, in eliciendis actibus, qui tunc maxime necessarij erunt, ne curæ & cogitationes circa res temporales, sint tibi impedimento.

PUNCTUM II. Considera 2dò Quæ & qualis cura & circa quos haberi & excerceri debeat ab his, qui in statu sæculari vivunt, remq; temporalem œ-

conomicam administrant. Si filios, nepotes, habent, horum primam & principalem curam habere debent, eamq; duplicem, unam in spiritualibus, alteram in temporalibus.

In spiritualibus, circa filios & nepotes, cura taliter exercenda est, ut detur illis bona & Christiana educatio, ac institutio, ut timorem DEI doceantur, instruuntur in rebus ad fidem & salutem pertinentibus, ut horrorem peccati quam maximum concipiant, ut in pietate Christiana, & virtutibus se exercere ac proficere studeant. Studijs etiam literarum, atq; artibus liberalibus & scientijs excolendi sunt, non solum, quia hæc plurimum conferunt ad faciliorem & meliorem DEI, ac eorum quæ fidei sunt, cognitionem, timoremq; DEI, & virtutis amorem; sed etiam, quia cum literis plerumq; instillantur ea, quæ ad animam & salutem pertinent.

Circa temporalia curandum est, ut subsidia vitæ honestè ducendæ convenientia habeant, ut substantia & fortuna, ipsis relinquenda, sit bene acquisita, bonisq; modis & medijs aucta & conservata, nec oneribus, præcipuè majoribus, & ære alieno gravata, ut pro filiabus dos, conformiter ad præscriptum legum regni, assignetur, vel etiam, si fieri potest, in parata pecunia reliquatur, ut electio Statûs vitæ, libertati filiorum & filiarum relinquatur, nec ad ullum determinatum statum, contra suam voluntatem & inclinationem, compellantur, ut, cum ad ætatem convenientem pervenerint, in adeundo illo vitæ statu, quem elegerint, juven: ut data & exdivisa substantiæ portione quæ ipsos concernit. Tandemq; ut filiarum nuptiæ exdotentur, nec dos conveniens ditiùs detineatur.

Post filios & filias ac nepotes, debetur cura domesticæ familiæ, seu famulatio. Iterumq; hæc tam in spiritualibus, quam in temporalibus.

In spiritualibus, ut Domino terreno & creato,  
ita



ita præstent obsequia, ut simul Domino cælesti & Increato famulentur, nec obsequia exhibita vel exhibenda creaturæ, sint impedimento, sed potius ut sint adjumentum ad serviendum Creatori, eiq; laudem & cultum reddendum. Præstandum illud est tereno Domino, utquà verbo, quà exemplo famulos tuos instruat, & hortetur ad convenientem salutis tuæ curam, ut DEI & Ecclesiæ servant præcepta, penitentia & Eucharistiæ sacramenta frequentent, bona opera exerceant & accumulent, vitamq; inculpata & christianam agant.

In temporalibus providendum ipsis est, ut vitæ sustentationem habeant ex conventionem vel consuetudine debitam, ut condita stipendia integrè & in tempore recipiant. Consulendum pariter ipsorum bono & commodo, ut pecunias in stipendium acceptas, in usus honestos & necessarios convertant, & bene expendant, non in computationes, aleas, & his similia, dissipent.

Postremo circa subditos cura hæc est habenda. In ijs quæ ad animam spectant, pro posse juvandi sunt, ut animæ salutem consequantur. Invigilandū est, ut non blasphemetur per ipsos nomen Domini, ut festa colant & observent, proindeq; diebus festis, laboribus, itineribus, alijsq; occupationibus distrahendi non sunt. Avertenda sunt scandala, & offensionum occasiones, vitia corrigenda, præcavendæ Divinæ offensæ, bonorum operum exercitium promovendum. Idonei circa ipsorum salutem operarij & vigiles providendi, qui eos in fide instruant, viam salutis doceant, sacramenta promptè & fructuosè ministrent, officia Divina, secundum ritus & præscriptum Ecclesiæ, celebrent, suoq; munere & sciant & velint accuratè fungi.

In ijs, quæ ad corpus & bona temporalia pertinent, hæc subditis à Domino præstari debent. Protectione & defensione illis assistendum est, sublevandi in

suis necessitatibus, inopiæ eorum succurrendum, quâ consilio, quâ etiam datò ipsis subsidio, maturè juvandi, ne ad egestatem deveniant, laboribus insolitis, novis censibus, pensionibus, alijsq; oneribus non gravandi.

**PUNCTUM III** Considera 3<sup>to</sup> quòd ad hanc filiorum, familiæ, & subditorum curam, quisquis hæc Dei beneficio nactus est, obligetur obligatione specialis charitatis seu pietatis, fundatâ in ipsa natura & inclinatione naturali, atq; in maxima convenientia. De obligatione ad curam filiorum, & cujusq; prolis, ita constat, ut hanc continuò inculcet omnium animalium sollicitudo circa suam prolem educandam & conservandam. Quòd verò ad curam etiam suæ familiæ & subditorum unusquisq; obligetur, obligatione illâ, quæ ad obligationem pietatis reducitur, hinc est, quia vel ipsum nomen, quò Dominus familiæ appellari consuevit, hanc loquitur obligationem; appellatur ille : *Pater familias*; quò nomine admonetur, ut suam familiam amet, tanquam Pater filios, adeòq; ut tanquam filiorum curam habeat.

Hanc curam ita ab ipsis exigit Apostolus, ut illum, qui eam non habet, & negligit, fidem negare asserat, & censeat infideli deteriorem esse. Certè si lem negat, qui suorum curam non habet, fidem inquam, ad quam suis domesticis & subditis obligatur: propter hanc negatam, nemo ipsi amplius fidere, & in ejus circa suos cura conquiescere potest. Fidem etiam Divinam, non verbis, sed factis negat, dum non imitatur, ut debet, Divinam circa creaturas Charitatem & pietatem. Deus noster optimus, ita est universorum Dominus, supremusq; rerum omnium gubernator & rector, ut simul sit omnium nostrum pijsimus & providentissimus Pater, volens omnes salvos fieri, salutis media conferens, & ad hunc finem unumquemq; nostrum perducere desiderans.

derans. Ille insuper vitam nostram corporalem sustentat & conservat, omnesq; creaturas visibiles nostris usibus concedit & subijcit. Hoc ipso facto negat, qui suorum curam non habet. Re ipsa enim & imitatione non confitetur Divinam hanc, circa suas creaturas, providentiam & pietatem, licet eam imitari & exercere teneatur. Insuper negat fidem factis, quatenus omnium offensarum Divinarum, quæ à suis domesticis & subditis committuntur, per quas DEUS blasphematur & negatur, reus ipse efficitur.

Est præterea is, qui suorum curam non habet, infideli deterior; quandoquidem multos infideles videmus, quantam curam illi, sive subditorum, sive familiæ, sive filiorum habeant, ut multos catholicos hac in parte superare videantur. Ad talem curam omnes Patres-familias hortatur S. Augustinus. Ubi dicit: *Unusquisq; Pater-familias hoc nomine agnoscat paternum se a seculum sua familia debere. Pro Christo & vita æternâ suos omnes admoneat, hortetur, corripiat, impendat benevolentiam, exerceat disciplinam, ita in domo sua Ecclesiasticum, & quodammodo Episcopabile implebit officium, ministrans Christo, ut in æternum sit cum Christo.*

Hæc considerans, illud concludere: ut sis in æternum cum Christo, ut Christo ministres, necessarium esse, ut episcopale domi tuæ impleas officium, & curam domesticorum habeas. Confundere si in aliquo huic obligationi defuisti, tecum ipse dispice, quomodo deinceps te gerere debeas, firmisq; & convenientibus propositis id statue.

*Colloquium* ad Sanctissimum JOSEPHUM, cui humillimè supplica, ut is desponsatus pretiosissimæ DEI Parenti, putatius Pater effectus incarnati Filij DEI, atq; constitutus super illam sacram familiam, quâ Trias illa Sanctissima: JESUS, MARIA, & JOSEPH efficiebat, præter tua intercessione, ut in-

tegerimæ suæ conversationis exempla, Verbo incarnato præstita obsequia, & sollicitam curam circa illius Sanctissimæ Familiæ commoda, imitari & æmulari possis, per inculpatam tuam conversationem, per bona & sancta opera, & Christianæ virtutis exempla, tandem per convenientem & Christianam familiæ tibi commissæ administrationem, & ut, talia imitando, præmia fidelis ministerij consequi merearis in cælis.

*In Fine: oratio de S. IOSEPH. Sanctissimæ Genitricis tuæ, Sponsi &c.*

## Meditatio

### De fine hominis Religiosi & medijs ad talem finem

*Preludium 1.* Imaginare Christum ordinantem Ecclesiam, & in ea certam statuum diversitatem constituentem. juxta illud Apostoli ad Eph. 4. *Ipse dedit, quosdam quidem Apostolos, quosdam vero Prophetas, alios vero Evangelistas, alios autem Pastores & Doctores.*

*Preludium 2.* Postula gratiam, ut cognoscas finem & obligationem hominis Religiosi, ejusq; ad hunc finem media & adjumenta, utq; his convenienter uti velis.

**PUNCTUM I.** Audi sapientem Proverb. 4. dicentem: *Iustorum semita quasi lux splendens, procedit & crescit usq; ad perfectam diem.* Et considera verbis his exprimi finem hominis Religiosi, ejusque obligationem.

Finis Religiosi est, continua ad perfectionem tendentia, & continuus in virtute progressus. Religiosi ad religionem hac intentione veniunt, ut relictâ

licitâ viâ latâ & spatiosa, quæ ducit ad interitum, relictis semitis sæculorum, quas calcarunt viri iniqui, relictis vijs difficilibus & incertis, scilicet relictò sæculò & vitâ seculari, incedant semitâ justorum, serviantq; DEO in sanctitate & iustitia omnibus diebus vitæ.

Religiosi veniunt ex sæculo, non ut subsistant in via, quam ingrediuntur, aut secus viam sedeant, contenti eo iustitiæ & virtutis gradu, quem in primo religionis ingressu adepti sunt, sed ut semper progrediantur, hac semitâ cundo de virtute in virtutem, de uno perfectionis gradu in alium, ut procedant sicut lux splendens, ubiq; splendorem virtutis, sanctitatis, & bonæ conversationis diffundendo, optimisq; exemplis, alijs præluendo. Ut procedant sicut lux, crescendo usq; ad perfectum diem, hoc est, enitendo, ut virtus eorum sit aliquando in auge, sit in meridie, diemq; perfectum faciat.

Hæc considerans, fac reflexionem supra te ipsum, quem finem intenderis dum ires ad religionem. Hicne tuus finis, an alius fuerit? an etiam nunc, dum vivis in religione, eundem species & intendas? an ad hunc finem omnes tuæ collimant actiones? Vita tua religiosa estne semita justorum? estne semita quasi lux splendens? splendetne virtutibus & exemplis bonis? proceditne & crescit usq; ad perfectum diem? an non potius in dies magis decrevit? an in vesperam & tenebrosam noctem, hoc est ad vitam, vitâ seculari deterriorem, non declinat? quodsi inveneris, alio te fine ad religionem venisse, aut etiam nunc vivendo in religione alium te finem intendere; Item non vivere te, juxta vocationem & obligationem statûs tui religiosi, adeòq; non incedere semitâ iustitiæ, non progredi de virtute in virtutem, non crescere quasi lucem splendens; confundere coram DEO, corrige intentiones tuas, dirige gressus tuos, ut semitâ justorum deinceps pro-

cedas, & quasi lux splendens crescas usq; ad perfectum diem, per perfectam instituti tui religiosi observationem.

Fac proposita non universalia tantum, sed particularia, facta prius reflexione, & per illam deprehensio, quinam maximè defectus, lucem tuam obscurant & impediunt, ne crescas usq; ad perfectum diem. Postula a Christo qui est via, veritas, & vita, ut ipsius sequendo vestigia, juxta consilia ejus vivendo, per hac semper iermita iustorum procedas, neq; ab hac unquam declines, ut tua vita & conversatio sit quasi lux splendens, & creicens usq; ad perfectum diem, hoc est, quousq; tibi non illuxerit perfectus æternæ felicitatis dies.

PUNCTUM II. Audi verba illa Isaïæ 5. *Vinea Domini exercituum, domus Israël est, & viri Juda, germen eius delectabile.* Audi item eundem Prophetam paulò superius dicentem : *Vinea facta est dilecto meo & sepivit eam.* Et Considera : vineam hanc, quâ olim figurabatur domus Israël typum esse Religionû, Ecclesiæ Christi, & status religiosi. De his, coram sponso suo Christo, gloriatur Ecclesia, dum aliquam Religionem institui, vel antiquam propagari, vel primævum ejus spiritum instaurari videt, dicitq; cum lætitia : *Vinea facta est dilecto meo.*

Homines Religiosi sunt talium vinearum germen delectabile; hi enim, ratione suæ constantiæ, fortitudinis, & imitationis Christi, qui est leo de tribu Juda, rectè appellantur viri Juda, germen delectabile. Ab hac vinea & germinibus, dominus vineæ expectat fructus virtutum multiplices, uvas ori suo gratas, vinum illud præstans, quod se bibiturum in Regno Patris sui Christus appromisit.

Porrò ut vinea hæc, Domino exercituum, fructificet, hoc primum medium ille ipse adhibuit, quod sepiverit eam, ne esset in direptionem & conculcationem, ne Aper de silva vaslet eam. Sepes verò ulterius, qui-



quibus ordines & homines religiosi septi sunt.

Sunt *1<sup>mo</sup>*. singularis Divina providentia, quæ Dominus exercituum protegit & munit suas vineas, & homines religiosos, impediendo graviores eorum tentationes, nec permittendo gravius tentari, avertendo graviorum peccatorum occasiones, quibus obnoxij sunt homines sæculares.

*2<sup>do</sup>* Sepes religionum sunt: præcepta, consilia, & exempla Christi, quæ hominem religiosum continent intra virtutis terminos: hostes animæ & prædones arcent, eorumq; tela retundunt.

*3<sup>io</sup>* Sepes hujus vineæ sunt Vota religiosa, quæ nulla ratione transgredi fas est, quæ quamdiu integra & inviolata sunt, vineæ non veniunt in direptionem & conculcationem, & fructum desideratum afferunt. Votum Paupertatis, murum appellat S. Pater meus IONATIUS, quod tanquam sepe, cincta vinea Domini, à vastatore est tutissima; votum etiam Castitatis, est seps muniens vineam, seps est custodia sensuum, sine qua castitas difficilè servari potest, hæc seps si corruat, aper de silva vastat vineam Domini. Votum pariter Obedientiæ, aut seps est, aut cum sit velut baculus senis, sepem vineæ religiosæ fulcit, quod firmior esse possit.

*4<sup>to</sup>* Seps harum vinearum, scilicet sacrarum religionum, sunt constitutiones, regulæ, instituta earum, & quævis ordinationes sive instructiones; horum enim observatione, religiones in sua integritate continentur & conservantur. Hæ arcent feras, apros, latrones, ne vineæ Domini veniant in conculcationem & direptionem. Collapsâ hâc sepe, hoc est, collapsâ disciplinâ religiosâ & regulari, instituti observantiâ, vastantur vineæ, silveiscunt, labruscas germinant, nec ferunt fructum desideratum.

*5<sup>to</sup>* Sepes religionum sunt, gratiæ Divinæ, quas DEUS abundè & copiosè confert hominibus

reli-

religiosis, ad superandas tentationes & hostes animæ fugandos.

6<sup>to</sup> tandem sepius loco est vigilantia Superiorum, avertentium à suis subditis ea omnia, ex quibus virtus & perfectio ipsorum, aliquod detrimentum pateretur, & per quæ accessum aliquem aut mundus, aut caro, aut dæmon haberet ad vineam hanc electam.

His consideratis, æstima gratiam vocationis tuæ ad statum religiosum; et reflecte te, an talibus sepius munitus, in virtute & perfectione crescas, & fructum feras, quem à te expectat Dominus vineæ, an non facias labruscas, & uvas acerbæ? an divinâ Providentiâ arcente à te occasiones graviorum lapsuum, ipse te in eas non ingeras? an extra occasiones constitutus, non sis aliquando graviter lapsus?

Reflecte te iterum, quomodo imiteris exempla Christi? quomodo observes præcepta, & an sequaris consilia evangelica? sepes etiam votorum religiosorum suntne integræ? an non sint aliquâ saltem sui parte collapsæ? estne paupertas tua murus inconcussus? puritas tua & castitas estne Angelica, munita sensuum custodiâ, quæ ab anima tua hostes & prædones arceat? an certè ipsi tui sensus, non bene custoditi, non sint tales prædones? an oculus tuus non est deprædatus animam tuam? Obedientia tua an non sit fragilis arundo?

Institutum etiam religiosum, disciplina regularis, an per tuas transgressiones, licentiosas libertates, & laxitates, non collabatur.

Reflecte te ulterius, ususne sis gratijs, tibi copiosè collatis, ad superandas tentationes? an non ultroquæ, abjectis iisdem & contemptis, hostem in animam tuam non immiseris?

Reflecte te tandem, quomodo in te profecerit vigilantia superiorum tuorum? an furtivè lo-

cum in te non dederis, five concupiscentiæ carnis, five concupiscentiæ oculorum, five superbiæ vitæ.

Ehce affectus confusionis, gratitudinis DEO, pro tot ad finem tuum consequendum tibi provisiss medijs, tac proposita. Pete suppliciter à DEO, ne has, quas tibi providit sepes, à te aliquando auferat, ne eas dirui permittat, ut non permittat vineas suas venire in direptionem & conculcationem.

PUNCTUM III. Audi verba ejusdem Prophetæ, capite citato, de hac ipsa vinea dicentis : *Et lapides collegit ex illa, & plantavit eam electam, & torcular extruxit in ea.* Atq; his verbis alia media expressa esse existima, ut vineæ religiosæ fructum afferant, & finem suum consequantur.

Ex insinuatiss hic medijs *1<sup>um</sup>* est. Quod Dominus vineæ lapides ex ea colligat. Tales lapides sunt : defectus aliqui irrepentes, prava aliorum exempla, & aliqui religiosi, per incorrigibilitatem, obdurati in malo. Lapides hi plurimum nocent vineæ Domini, hoc est, congregationibus & ordinibus religiosiss, impediuntq; vineæ fertilitatem, colligit hos lapides Pater-familias & Dominus vineæ, non tolerando imprimis defectus irrepentes, sed per tot media illos corrigendo. Qualia media sunt : delationes defectuum, monitiones privatæ delinquentium à superioribus, publicæ reprehensiones, correctiones, & poenitentiae, frequens Sacramentorum, meditationum, examinum usus, exercitia Spiritualia, & hujusmodi alia. Tollit iterum lapides Dominus vineæ, avertendo mala exempla, five externa, five domestica, & si quid contingat, remedium conveniens, per superiores afferendo. Tandem colligit tertij generis lapides, nimirum religiosos, per incorrigibilitatem obduratos in malo, eos emolliendo, vel etiam, si omnino corrigi nolint, extra vineas eijciendo, illosq; sæculo reddendo.

*2<sup>dum</sup>* Medium verbis adductis insinuatiss est

est: Quòd Dominus exercituum, unamquamq; vineam plantaverit electam, non solum per hoc, quod omnes religiones ab Ecclesia approbatæ, ex Spiritus Sancti inspiratione sunt institutæ, quod Sanctissimas leges habent, quòd sint in certa & secura salutis viâ. Sed etiam, quia DEUS ad religiones, seu sacros ordines, vocat homines præcipuos, electos ex millibus, quibus mundus non erat dignus. Dominus vineæ plantat vineam suam electam, dum unamquemq; accomodatè ad ipsius complexionem, inclinationes, vires, & talenta, vocat ad eam religionem, quam scit illi maximè congruere, ad religionem, quam ab æterno prævidit, respectu illius, futuram medium maximè opportunum perfectionis & salutis æternæ consequendæ. Plantat vineas electas in sacris religionibus, plantando non vites aliquas steriles, labruscarum & uvarum acerbissimarum productione, hoc est, multorum criminum in sæculo perpetratione, effætas, sed plantando gerinen delectabile, & ex mundo plantationes novellas, hoc est, homines in tenera adhuc ætate, in prima innocentia constitutos transferendo, & in vineis religiosis transplantando, & non tam deferentes, quàm ignorantes sæculum, ad religionem perducendo. Plantat postremò Dominus exercituum vineas electas, dum in unius cujusq; religiosi animâ, per suas sanctas illustrationes, inserit præstantissima virtutum germina. Germina delectabilia, quæ inserit, sunt: paupertas, castitas, obedientia, humilitas, orationis studium, amor DEI & proximi, conformitas cû Divina voluntate, aliæq; hujusmodi virtutes. Has plantando in anima cujusq; religiosi, Pater cælestis plantat vineam electam.

3<sup>ium</sup> Medium ad hoc conducens, ut religiosæ vineæ fructum præstantem & uberem faciant, est, quòd Dominus vineæ, in unâquâq; religione, tanquam suâ vineâ, extruxerit torcular, quo exprimitur vinum, ori Domini vineæ gratissimum. Ta-

Talia torcularia sunt: mortificationes & pœnitentiæ in religionibus usitatæ, castigatio corporis, abnegatio sui ipsius, humiliationes ultroneè susceptæ & quæsitæ, contumeliæ, confusiones voluntariæ, labores usq; ad defatigationem, ad sudoris, imò quandoq; ad sanguinis effusionem suscepti, compunctio cordis educens ex oculis fontes lacrymarum &c. Hæc torcularia exstruxit in vineis religiosis Dominus earundem, dum religiones sacras voluit esse statum pœnitentiæ, gymnasia patientiæ, officinam crucifixorum, in qua in unoquoq; religioso formatur Christus isq; cruxifixus; dum Christus ad has vineas non aliter vocat, nisi ut post eum crucem ferant, ut cruce tanquam torculari premantur, ut suam carnem cum concupiscentijs crucifigant, ut lacrymis suas & alienas culpas defleant, ut in ijs, tanquam strenui operarij, laborent usq; ad sanguinis profusionem.

His consideratis, humillimas DEO age gratias pro sollicita ipsius cura circa vineas suas, sive in colligendis offensuum lapideis, sive in plantatione harum vinearum, ut sint vineæ electæ, sive in exstruendo torculari ad exprimendum vinum. Age pariter gratias, quòd te in una harum vinearum plantaverit. Admirare Divinam & circa vineas ipsas, circa germina in ipsis plantata, & circa te ipsum, magnam providentiam. Agnosce verè illud à D. Bernardo dictum. *In religione homo vivit purius, cadit rariùs, surgit velociùs, incedit cautiùs, irroratur frequentius, quiescit securius, moritur fiducius, purgatur citius, premiatur copiosius.*

Fac deinde reflexiones supra te ipsum, & imprimis, ad te referendo verba illa: *Collegit ex ea lapides*: cogita, quòd plures lapides, hoc est, plures defectus colligendi reperiantur in vinea animæ tuæ. Ô quantum laborem causas cultoribus vineæ hujus in ijs colligendis! An ipse eosdem colligere consue-

veris per meditationes, examina conscientiae, vari-  
asq; sanctas reflexiones? Tecum ipse dispice, an  
pravo tuo exemplo, non impediveris fructus spiri-  
tuales in consodalibus tuis? an non tuo exemplo sit  
imputandum, quod aliquæ vites, quæ aliquando fu-  
erunt germina delectabilia, nunc labruscas produ-  
cant? An non sis lapis per incorrigibilitatem ob-  
duratus, aliquando extra tuam vineam, hoc est ex-  
tra religionem ejiciendus?

Reflecte iterum te supra illa verba: *Et plan-  
tavit eam electam*, hæc etiam ad te referendo. Et  
cogita, in quali vinea DEI beneficio plantatus sis? an  
non in vinea electa? an non in vinea illa, in quâ  
uberrimos fructus, & uvas ori Divino gratissimas pro-  
ferre potes? quomodo religio hæc, ad quam vo-  
catus es, ex omnibus maximè sit accomodata tuæ  
complexioni, viribus, talentis, inclinationibus, quot  
in ea habere possis media, sulcos inutiles, hoc est  
imperfectiones præcidendi. Cogita plantatum te  
esse inter germina, quæ sibi DEUS elegit ex milli-  
bus, quæ ferunt fructus uberrimos, uvas acceptissi-  
mas. Cogita etiam te plantatum esse, cum per æ-  
tatem tuam & indolem ad omne bonum flexibilem,  
esses germen delectabile, & quomodo factum est,  
ut nunc sis vitis sterilis, vitis effœta, vel certè labru-  
scas producat. Time, ne sis plantatio aliquando era-  
dicanda! Vide etiam, an anima tua sit vinea Do-  
mini exercituum, varijs ab eo virtutibus plantata?  
esne ager, inspirationes Divinas, & sancta lumina,  
aliarumq; gratiarum Divinarum imbrem suscipiens?  
an succrescant in te virtutum germina per continu-  
um studium, & frequens earum exercitium? an  
non potius hæc germina suffocaverunt vepres &  
spinæ, ex maledicta terra, hoc est ex prava tua  
voluntate ascendentes?

Reflecte te tandem, supra illa verba: *Torcular  
exstruxit in ea*, hæc ipsa ad te referendo, & cogita,



an non exhorrescas torcular mortificationum, poenitentiarum, afflictionum, crucis Christi? an vivis in religione tua tanquam in statu poenitentiae, tanquam in schola patientiae? an formes in te Christum crucifixum? an mortificationem ejus feras in corpore tuo? an carnem tuam crucifigas & Christo configi studeas? an labores in religione usque ad defatigationem; an peccata tua desleas? an cum lacrymis contriti cordis vinum exprimas gratum ori Divino.

Confundere de defectibus quos advertes. Ad bonum usum propositorum mediorum, & ad ferendum fructum te excita, timore comminationis illius apud eundem Prophetam: *Auferam sepem ejus, & erit in directionem; diruam maceriam ejus, & erit in conculcationem, ponam eam desertam, & non putabitur, & non fodietur, ascendent super eam vepres & spina, & nubibus mandabo, ne pluant super eam imbrem.* Fac proposita reflexionibus accommodata.

*In colloquio* Postula à Domino vineam, ut mittat operarios, qui in ejus vinea colligant scandala, defectus eliminent, obduratos lapides vel emolliant, vel extra septa eijciant. Pete deinde, ut vineas suas plantet electas, nec cesset ad eas transferre germina delectabilia, & vites fertiles ac fructuosas. Tandem conclude verbis & affectu Psalmistae: Psalm. 79. *DEUS virtutum convertere, respice de caelo & vide, & visita vineam istam, & perfice eam, quam plantavit dextera tua, & super filium hominis, quem confirmasti tibi.*

*In fine: Anima Christi.*

## Meditatio

De vocatione ad statum sacerdotalem.

A22.

Præ

*Praludium 1.* Imaginare ordinationem SS. Apostolorum, quâ à Christo Domino, in ultima cæna, ordinati sunt in Sacerdotes.

*Praludium 2.* Postula à DEO, ut agnoscas dignitatem vocationis tuæ, ejusq; obligationem.

PUNCTUM I. Audi illa verba S. Pauli Apostoli ad Ephes. 4. *Obsecro vos, ut dignè abuletis vocatione vestrâ, quâ vocati estis.* Et cogita observationem hanc Apostoli, licèt intelligi possit de vocatione ad quemcunq; vitæ statum in Christiana religione & Ecclesia Catholica, præcipuè tamen intelligi & applicari posse, atq; in hac meditatione applicandam esse, vocationi ad statum sacerdotalem. Circa quam in puncto præsentis considera ulterius, Sacerdotum, in Christi Ecclesia, plura esse munia, seu officia & functiones. Nimirum:

1<sup>mò</sup> Ut incruentum sacrificium DEO immolent & offerant, quemadmodum pro populo, ita & pro semetipsis. Pro vivis item atq; defunctis; & ut sacrificando conficiant Consecratione Corpus & Sanguinem Christi sub panis & vini speciebus.

2<sup>dò</sup> ut ministrent sacramenta Christi fidelibus, & ministrando Sacramentum Pœnitentiæ, exerceant Judiciariam potestatem, remittendo peccata, vel etiam retinendo & ligando, juxta pœnitentis dispositionem, & intra potestatis suæ terminos.

3<sup>tiò</sup> Ut sint dispensatores mysteriorum DEI.

4<sup>to</sup> Ut sint medici morbos animæ curantes.

5<sup>to</sup> Ut sint Magistri & Doctores erudientes multos ad Justitiam, veram Christi fidem docentes, & viam salutis fidelibus demonstrantes.

6<sup>to</sup> tandem muneris Sacerdotum est, ut DEUM orent, iratum placent hominibus, & legationis ad DEUM munere fungantur.

Hæc considerans, vide quæ & quanta munia & officia, ex vi ordinis sacerdotalis, cõmissa habeas. Reflecte te, an & quomodo singula obeas, & quam

curam & diligentiam adhibeas, ut dignè ea obire possis.

**PUNCTUM II.** Considera vocationis ad statum sacerdotalem, ipsiusq; hujus statûs magnam dignitatem. Etiam in veteri lege, sacerdotalis dignitas præcipua & una ex maximis erat. Regali hæc æquabatur. Unde etiam duæ tribus, una tribus sacerdotalis Levi, altera tribus regia Judæ, conjunctæ & sibi permixtæ erant. In lege Christi, sacerdotalis dignitas tantò excellentior est, quantò ipsum sacerdotium hujus legis, præeminet sacerdotio veteri. Hoc figura fuit, illud res figurata. Sacerdotiû legis veteris originem habuit ab Aaron, & ab hoc in filios successio descendebat; sacerdotium novæ legis originem habet à Christo, & ab ipso descendit per specialem vocationem, & à legitimis Episcopis factam ordinationem. Munia Sacerdotum veteris legis fuerunt: ignem altaris custodire, sacrificia pecorum immolare, incensum adolere, panes propositionis recentes apponere, cerimonias legales observare & custodire &c. Quæ sint munera sacerdotum novæ legis, considerâsti puncto præcedenti, eorumq; dignitatem deinceps considerabis ampliùs. Ex utriusq; sacerdotij veteris & novæ legis comparatione, sacerdotij tui dignitatem facilè intelliges. Independentè ab hac comparatione, magna præterea sacerdotij novæ legis dignitas est. Quia.

Imprimis dignitas sacerdotij novæ legis, est dignitas regalis. Hoc enim sacerdotium est secundum ordinem Melchisedech, qui rex simul & sacerdos fuit. Sacerdotes Christi sunt principes super omnem terram constituti, sunt gens sancta, populus electus, coronata capita, sunt tales reges, qualis Rex, ipse Christus fuit, dum in corpore mortali, mortalis inter homines viveret, hoc est, sunt reges, non ad exigenda tributa, non ad exercitus ferro armandos, hostesq; visibiliter debellandos, sed quòd mentes

tes regant, quòd in æternum consulant, quòd credentes, sperantes, amantes in regnum cælorum perducant. Quare cùm dignitas regalis Christi longè excellentior fuerit, Regum & Principum terræ potestate & dignitate, etiam dignitas Sacerdotum præeminet dignitati terrenorum Regum & Principum.

Imò sacerdotij dignitas major est dignitate summi Pontificatûs, si hic præcisè spectetur quoad supremam & universalem Jurisdictionem supra totam Christi Ecclesiam. Nam Papæ, ex vi summi Pontificatûs præcisè à sacerdotio accepti, convenit Potestas in Corpus Christi mysticum, hoc est, in omnes fideles & Ecclesiam. Sacerdotij verò potestas, est potestas in Corpus Christi verum & reale, ita, ut vel in ipso Papa nihil sit admirabilius, nihil potentius, ipso ejusdem sacerdotio.

2dò Sacerdotij dignitas major est dignitate Angelicâ. Quod enim non est concessum Angelis, concessum est homini Sacerdoti. Quod Sacerdotes conficimus, adorant Angeli, nec conficere possunt, satisq; honoris se habere existimant, quòd Sacerdoti celebranti tanquam famuli assistant.

3tò Sacerdotij dignitas est aliquatenus similis dignitati Maternitatis Christi, quæ tota in hoc stat, quòd Beatissima DEI Parens genuerit mundo Salvatorem & Redemptorem Christum JESUM, DEUM verum & hominem. Hunc ipsum Sacerdos, in suo sacrificio, generat & producit per consecrationem, realemq; Christi præsentiam ponit sub speciebus panis & vini, idq; non semel hoc duntaxat facit, sed toties, quoties sacrificat; generat autem Christum non parvulum, non mortalem & passibilem, qualem genuit Mater Sanctissima, sed generat Christum in mensura ætatis & plenitudinis suæ, immortalem, impassibilem, gloriosum & glorificatum; generat Christum Redemptorem & Salvatorem; ita enim conficit Corpus, & sanguinem Christi, ut statim

immolet eundem Christum, tanquam Agnum immaculatum, in redemptionem & salutem Fidelium.

4<sup>to</sup> Sacerdotij dignitas est eadem moraliter cum dignitate Christi. Sacerdos enim conficiens Sacramenta, est eadem moraliter persona cum Christo, conficit Sacramenta repræsentando personam & in nomine ipsius, in potestate etiam & virtute sibi à Christo collata. Insuper conficit illa sermonibus & verbis Christi, vel certè verbis à Christo ad id institutis.

5<sup>to</sup> Sacerdotij dignitas est dignitas propè Divina. Sacerdos enim ea operatur, quæ solius sunt virtutis & potestatis Divinæ. Quis potest dimittere peccata, nonne solus DEUS? hanc potestatem Christus contulit Sacerdotibus. *Quorum remisistis peccata, remittuntur eis.* Judicium mundi & hominum, est res ad DEUM propriè spectans. Judicium hoc Pater æternus commisit Unigenito suo Filio, juxta illud Ioan. 10. *Pater omne Judicium dedit Filio.* Filius autè hoc ipsum Judicium & potestatem judiciariam dedit Sacerdotibus, ipsosq; constituit Iudices, ut judicent 12 tribus Israel, hoc est, omnes Christi fideles: ita ut terrestre Sacerdotis Judiciū (prout ait S. Leo) *Sit præjudicata authoritas in cælo, ut quæ in terris aut ligata sunt aut soluta, statuti ejusdè conditione obtineant et in cælo.* Divinum opus est disponere de Regno Cælorum: Post hoc, morte Filij DEI reseratum, penes Sacerdotes est potestas clavium. Sacerdos cælum aperit, & nemo claudit; claudit & nō aperit. Virtus etiam patrativa miraculorum, est virtus soli Deo propria, DEUS enim est, qui facit mirabilia magna solus. Hanc virtutem contulit DEUS sacerdotio. Sacerdos sacrificando facit miraculum miraculorum, & mysteriorum maximum. Sacerdos voce suā (DEO obediente homini) (è sinu Patris æterni, Filium ejus incarnatum ad terras deducit, speciebus panis & vini alligat, facit cum hominibus permanere, pane hōc cœlesti, sub



modicis speciebus, non solum septem millia hominum, sed totum mundum potens est reficere. Ad vocem Sacerdotis, sacrosancto altaris mysterio, Angelorum chori adesse festinant, sociantur summa imis, ima & terrena junguntur celestibus, ex visibilibus, atq; invisibilibus unum quid efficitur.

6to Ad dignitatem Sacerdotij accedunt & hæc, quod Sacerdos sit Minister & Dispensator mysteriorum DEI, sitq; Thesaurarius Verbi Incarnati; ipse in sua dispositione & manibus habet infinitum meritum Christi thesaurum, immensas celestium gratiarum & donorum opes, illasq; liberaliter elargiri possit, pro una lacrymula, pro pectoris tunctione, pro poenitentis cordis suspirio, pro humili peccatorum confessione.

Quod Sacerdos sit medicus spiritualis, quod animas sanet, quod non solum vitam spiritualem protrahere possit, sed etiam mortuos in anima resuscitare, & ad vitam revocare valeat. Quod tanta virtute medendi polleat, ut nullus morbus sit inianabilis, nullum vulnus, respectu illius, incurabile. Quod non aliam medicinam utatur ad curandos animi morbos, nisi pretiosissimo, sanguinis ex Christi vulneribus profluentis, balsamo. Quod efficacissima remedia in promptu habeat, quæ ex præscriptione hujus medici applicata, vim magnam habent, non solum ad sanandos, sed etiam ad præcavendos ulteriores morbos & mortem animæ.

Accedit adhuc & illud ad dignitatem Sacerdotis, quod ratione potestatis prædicandi verbi Divini, fungatur charactere & officio Legati à Deo missi. Sacerdotes sunt præcursores adventus Domini, sunt Apostoli, orbis magistri, Doctores gentium, sunt Evangelistæ, Christi Evangelium annuntiantes, sunt Prophetæ prædicentes futura; præmia scilicet bonorum & supplicia impiorum. Mittuntur illi & legatione funguntur, non solum ad Reges terræ &

Princ



Principes, ac divites hujus sæculi, sed etiam ad pauperes, rudes, & simplices. mittuntur tam ad justos, quàm ad peccatores; ad hos, ut convertantur à vijs suis pessimis, & pœnitentiam agant; ad illos, ut in virtute proficiant, serviantq; Domino in sanctitate & Justitia; ut, qui justus est, iustificetur adhuc, nec viam Justitiæ deserant unquam. Mittuntur ad Infideles & ad fideles, ut illi per ipsos lumen fidei accipiant, hi ut in lumine fidei ambulent, nec illud vitijs obscurant. mittuntur ad omnes, ut omnes ad Christum adducant, & omnibus viam salutis demonstrant. Puncta legationis sunt; ut homines agnoscant unum DEUM, & quem Pater misit JESUM Christum Filium ejus unigenitum, ut prædicent Regnum DEI & Justitiam ejus, ut prædicent pœnitentiam, ut prædicent non semetipsos, sed JESUM Christum & hunc Crucifixum, suaq; prædicatione efficiant, ut in fidelibus formetur JESUS Christus.

Tandem & hoc auget dignitatem sacerdotis, quòd non solum sit legatus DEI ad homines, sed etiam, quòd sit orator & legatus ad DEUM & Christum, à sponsa ejus, militante Ecclesià constitutus. Magna hinc Sacerdotis est dignitas. Cum Christus Sponsam suam amet, libenter hos legatos audit, libenter habet proponi sibi per ipsos negotia & necessitates Ecclesiæ, vora & desideria populorum. Oratores hi, sunt primæ admissionis; non solum illis semper patet accessus ad Christum, sed etiam tenentur sæpius cum eo transigere, conferre, & commissa sibi tractare. Ipsi licet ingredi sancta Sanctorum, ipsi latus Regis sæculorum & thronum slipant, in quo residet Christus Eucharisticus. Sacerdos, dum alij silent, in templo tanquam dignior & ex officio loquitur cum DEO, habetq; publicam audientiam, sæpè etiam secreto loquitur tanquam amicus cum amico.

**PUNCTUM III.** Circa verba superius adducta

**Pun-**

puncto 1. hoc considera. Si tanta est dignitas statûs sacerdotalis & vocationis ad eundem statum, sequi hinc legitimè, Sacerdotem oportere tali vocatione dignè ambulare. Certè sancta sanctè tractanda sunt, & tantæ Personæ dignitas, cum dignitate sustinenda. Non modicè enim derogatur dignitati non solum Sacerdotis, sed etiam DEI & Christi, cujus personam sacerdos agit, si mores non respondeant professioni, & tanti muneris sanctitati.

Porro, ut quis dignè ambulet vocatione ad talem statum.

Requititur 1<sup>mo</sup> Ut in Sacerdote sit puritas plusquam Angelica, puritas conscientia, quàm maxima, summa innocentia, & integritas vitæ. Dum sacra peragis mysteria ô Sacerdos, Rex Angelorum est, quem consecratione in Eucharistiam deducis, & in ea adoras; Angeli ipsi assistunt; Angelorum panem & tu ipse manducas, & tali pane alios reficis. Quidam igitur & ipse Angelus eris? oportet te purissimos Spiritus, Angelica puritate, æmulari. Dum sacrificas, Agnū immaculatum immolas, quare curandum tibi est, ut & ipse sis agnus sine macula; cavendum, ne propter lupinos mores, sis lupus agnum comedens. Dum ad altare accedis, procedis, Albā & splendidum apparatus indutus, quō sacerdotalium vestium nitore admoneris, ut tua conscientia, primā stolā, hoc est, gratiā sanctificante fulgeat in oculis DEI, ut anima tua, tanquam sponsa coram suo Sponso Christo, compareat in vestitu per Charitatem deaurato, circumdata sanctarum virtutum & meritorum varietatibus atq; ornamentis. Nullius tunc labis, præcipuè mortalis, conscius esse debes, vult Christus ut sis mundus totus. Licet verò talis fueris, hoc est à gravioribus peccatis, per gratiam DEI liber, exigit à te tanti mysterij sanctitas, ut & pedes laves, hoc est, dum adest copia confessorij, ut etiam venialia, & pulvisculos pedibus ad-

hæ

hærentes, per Sacramentum pœnitentiæ, vel etiam lacrymis ex contrito corde profusis abluas. Christi Personam agis, imitare Christi sanctitatem, Christum induere, eumq; ita moribus & sanctitate exprime, ut jam non tu vivas, sed Christus in te vivat. Es quodammodo Mater Christi, ipsum in Sacramento producens & generans, magna, proinde in te puritas inveniri dedet. In Matre Sanctissima, tanta fuit puritas, ut nec actuali nec originali labe fuerit unquam contaminata; tu ad eam saltèm puritatem enitaris, ut nullò unquam, non solum mortali peccatò, sed etiam veniali, maximè verò deliberato, maculeris. Christum manibus tractas, in ulnas tuas sicut alter Simeon suscipis; ita illum porta, ut post quodvis Sacrificium, & Sacramentalè Christi susceptionē, securè & cū certa spe salutis, immediatè mori possis, illudq; cū Simeone occinere: *Nunc dimittis servum tuum &c.*

Requiritur 2<sup>do</sup> in sacerdote, ut dignè ambulet vocatione sua, magna in DEUM & proximum charitas. Quævis Sacramenta, quæ Sacerdos ministrat, sunt Sacramenta pietatis, sunt signa unitatis, & charitatis vineula, debent igitur & in suscipientibus & in ipso ministrante accendere magnam charitatem. Sacerdotio veteris legis demandata fuit cura custodiendi & fovendi ignis in altari. Ignis qui in altari custodiri debet à Sacerdotibus novæ legis, est Christus Eucharisticus; sed & ipsa anima atq; cor Sacerdotis, altare esse debet, in quo Sacerdos custodire & fovere debet ignem charitatis in DEUM & proximum. Duæ candelæ in altari accensæ, dum Divina celebrantur, quid aliud significant, nisi quòd cor Sacerdotis Divina celebrantis, gemino hoc duplicis charitatis igne ardere debeat. Debet tali igne ardere cor Sacerdotis, dum circa salutem animarum laborat, sive prædicando, catechizando, instituendo; sive Sacramentum pœnitentiæ aliaq; Sacramenta ministrando. Si enim non arserit igne amoris Divi-

ni, non poterit ignem accendere in cordibus peccatorum. Debet etiā ardere igne charitatis erga proximum, quia debet condolere ijs. qui ignorant & errant, memor illius: *quoniam & ipse circumdatus est infirmitate.*

Requiritur 3<sup>ti</sup>o Fidelitas in dispensandis mysterijs; Ut Sacerdos censeatur dignè ambulare vacatione suā, fidelitatē in ipso requirit S. Paulus 1. ad cor. 4. *sic nos existimet hōo, ut ministros Chriſtī, & dispensatores Myſteriorū DEI.* Hic jā queritur inter dispensatores, ut fidelis quis inveniatur. Rara quidē hæc virtus est, cæterum cuivis Sacerdoti perquam necessaria. Porro fidelitas in hoc consistit, ut Sacramenta & myſteria Divina, indigentibus, petentibus, & debitè dispositis, promptè ministremus, ut minùs dispositos disponamus, & instruamus, denegemus verò indignis, nec ad ea dispositis, imò nec disponere se volentibus, ut non demus sancta canibus, nec projiciamus margaritas ante porcos. Ad hanc fidelitatem, & fortitudinem, quæ fidelitati conjuncta esse debet, hortatur Sacerdotes S. Chrysostomus: *Ut cum multo studio hæc dona distribuatis* (loquitur de sanctissima Eucharistia) *Non parva vobis imminet ultio, si quem culpe ullius conscium, hujus mensa participem esse concedatis. Sanguis ejus de manibus vestris exigetur.* Quod ita intelligi debet, ut publicè indigni, quales potissimum sunt excommunicati, palàm & publicè arceantur à mensa Eucharistica, imò ab alijs etiam officijs Divinis. Qui privatā notitiā sciuntur indigni, si non possint ad saniolem mentem reduci, privata monitione prohibeantur à Sacramenti Sanctissimi susceptione. Similis fidelitas tantò magis servanda est in administratione Sacramenti poenitentiae, ne aliena peccata palpemus, ne excusemus, quæ excusari non possunt, nec debent, ne simus canes muti & non larrantes dum latrandum est, dum est moriendus peccator de periculo animæ, de facienda

restitutio.

restitutione five bonorum fortunæ, five famæ, & honoris, de dimittenda & amovenda proxima peccandi occasione, de vita seriò emendanda. Ne indebitis resolutionibus laxemus fidelium conscientias, ne ob vanos respectus, pravis consilijs, simus alii duces in præceptis, & quos in cælum ducere tenemur, ne præcipitemus in infernum.

Requiritur 4<sup>to</sup> in Sacerdote orandi assiduitas, & frequens per orationem cum DEO communicatio, ut verè de eo dici possit, *hic est sacerdos qui multum orat pro populo*. Sicut Christus semper vivit ad interpellandum pro nobis, & rogat pro nobis Patrem, ita & Sacerdoti cuiusvis orandus est Pater cælestis deprecatione assidua. Sacerdos est orator & legatus Ecclesiæ, necessitates ejusdem in oratione DEO exponens. Cum ergò hæ multæ sint & novæ ac novæ semper, non breviter nec perfunctoriè exponi debent. Ut oratio sit efficax, constans esse debet, nec satis est, in ipsa cum Christo unâ horâ vigilare, sed totis noctibus orandum, sæpiùsq; in oratione pernoctandum est. Hanc orandi assiduitatem requirit in Sacerdotibus Ecclesia, multa in hunc finem ipsam præscribendo.

Requiritur 5<sup>to</sup> In rebus Divinis tractandis summa reverentia. Minima irreverentia & denegatio exigui quantumvis honoris, offendit terrestres Principes. Præscribi consueverunt multæ adorationes, genuflexiones, cerimonie, cum summa gravitate, modestiâ, demissione exhibendæ ab ijs, qui in conspectum Principum, ad transigenda cum ipsis negotia, admittuntur. Quantò magis offendit DEUM irreverentia, quæ à Sacerdotibus committitur, dum hi ministrant in conspectu Domini, & celebrant Divina. Levem irreverentiam Ozæ Sacerdotis, quam commisit sua temeritate in contingenda Arca veteris testamenti, morte ejusdem punivit DEUS. Quæ poenæ manebunt irreverentias in  
tra-

tractando corpore & sanguine Christi, alijsq; Sacramentis administrandis, à pluribus Sacerdotibus committi solitas? ritus & ceremoniæ ab Ecclesia præscriptæ, vide qua gravitate, modestiâ, animi demissione & corporis compositione fieri debeant? absit ut hæc fiant more histrionico & mimico, ut genuflexiones Sacerdotis sint similes genuflexionibus militum Christo illudentium. DEUS non irridetur.

Requiritur 6<sup>to</sup> ad dignè ambulandum vocatione sacerdotali, sufficiens in Sacerdote scientia, eruditio, & prudentia. Hæc enim requiritur in orbis Magistris & Doctoribus, in his, qui viam veritatis docere, & Evangelium Christi prædicare, ex vi sui muneris, tenentur. Sine hac, nec Sacramenta fructuosè ministrari, nec Verbum DEI salutariter prædicari, nec conscientiarum difficultates convenienter resolveri possunt. Sine scientia & doctrinâ, sacerdotium suscipi non debet; post susceptum verò, doctrina Sacerdotis frequenti & fere continuâ librorum lectione, meditatione rerum Divinarum & spiritualium, similibusq; medijs conservari, ac etiam augeri debet. Curandum est, ne Ecclesiasticus ita se immergat rebus tēporalibus, ut obliviscatur spiritualium, vel studium eorum negligat, sine quorum sufficienti notitia, officio suo convenienter & fructuosè fungi non potest.

7<sup>mo</sup> tandem requiritur, ut conversatio Sacerdotis sit sancta & exemplaris, ut Sacerdos sit sal, quod aspersum condiat populos, ut ejus actiones sint ad gustum Divinum, & fideles, videntes opera bona ipsius, glorificent Patrem qui in coelis est, habeantq; unde ædificentur, nec cogantur delinquere, si eum imitari velint. Sacerdotes non solum incensum offerre debent, sed ipsi ubiq; & in omni loco debent esse bonus odor Christi, debentq; in praxi ostendere, & demonstrare exemplò, quod prædicatione docent.

His



His consideratis, æstima vocationis tuæ, ad statum sacerdotalem, dignitatem, simulque reflecte te supra tuam, propter peccata à te cōmissa, maximā indignitatē, & indignum te reputa eō, quō fungeris ministerio. Reflecte te, quā indignè hæcenus ambulaveris vocatione tua? Recogita; quæ & quanta in te puritas conscientiæ? an talis, qualem exigit & personæ quam agis, & mysteriorum ac Sacramentorum quæ administras, excellentia & dignitas? quæ in DEUM & proximum charitas? quis animarum zelus? quā fidelis sis dispensator mysteriorum DEI? quod in te orationis studium? quis ad res Divinas meditandas, & cum DEO agendum affectus? quantam DEO præsentī exhibeas reverentiam, & cum quali, Divina peragis mysteria? quā accuratus es in sacris ceremonijs & ritibus observandis? An sis sollicitus de habendi sufficienti scientiā & doctrinā, ad munus sacerdotale ritè obeundum. Quam curam habes, de bono nomine & de dando alijs bono exemplo.

Confundere, si hæc in te aut non inveneris, aut defectuosa adverteris; fac proposita, curaturum te deinceps ea omnia & singula, sine quibus non potes dignè ambulare vocatione tuā.

*In colloquio* Supplica Christo, ut te dignum efficiat suum Ministrum, ac te in se transformet, ut non quomodocumq; geras personā ejus, ac sacerdotali munere & functione repræsentes, sed ut imitatione virtutum & exemplorum ejus, Christum in te quā perfectissimè exprimas, hacq; expressione efficias, ut deinceps non tu vivas, sed vivat in te Christus.

*In fine: Anima Christi*



## Meditatio

### De vocatione ad beneficium ecclesiasticum habens anexam curam animarum.

*Praludium* 1. Imaginare actum institutionis, per quam institutus es in Pastorem & Rectorem Ecclesiæ tibi commissæ, vel etiam illum actum, quò S. Petrus institutus est à Christo in universalem totius Ecclesiæ Pastorem, illis verbis: *Pasce oves meas, pasce agnos meos.*

*Praludium* 2. Postula à DEO gratiam, quâ illuminatus agnoscas obligationem annexam beneficio Pastoralis seu curato, & ut huic obligationi satisfacias,

PUNCTUM I. Audi illa verba S. Pauli Apostoli ad Hebræos 13. *Obedite præpositis vestris & subiacete illis, ipsi enim pervigilant quasi ratione reddituri pro animabus vestris.* Et ex his verbis disce in munere Pastoralis Præpositorum & Rectorum Ecclesiæ tria hæc inveniri. 1<sup>mo</sup> Honorē & jurisdictionē ipsorum spirituale in Oves suæ curæ commissas. 2<sup>dò</sup>. laborem & vigilias circa easdem oves, ac obligationem laborandi & vigilandi super gregem suum. 3<sup>tiò</sup> obligationem ad reddendam rationem pro animabus.

Convenit imprimis Ecclesiæ DEI Rectoribus honor & Jurisdictio. Ipsos siquidem Apostolus vocat Præpositos, vult ut illis obediatur, mandat ut hi subiaceant illis, qui ipsorum curæ committuntur. Illi habent potestatem nomine DEI, & nomine Christi summi Pastoris, præcipiendi legem Evangelicam, & leges Ecclesiæ promulgandi, ac etiam exigendi, ut hæ leges à fidelibus servantur; quia Pastores sunt, & vocem eorum oves audire & sequi tenentur.

Ultra honorem & Jurisdictionem in munere Pasto-  
 rali contentam, ex vi Pastoralis muneris, debetur  
 à Pa'tore ( quod secundum est ) labor & vigilantia  
 supra oves. ipsi enim ( ut ait Apostolus ) pervigilant.  
 Vigilantia Pastoris qualis esse debeat, commodè  
 describitur à S. Basilio. Dicit ille : Pastorem esse,  
 esse nihil habente, nisi quod ad victum quotidianum  
 attinet, clavam & peram, remissè tamen, tanquam  
 subsidia diurna gestantem, nullam crastini curam ha-  
 bentem, bestiis hostem, mansuetorum animalium con-  
 tubernalem, forum ac tribunalia fugientem, syco-  
 phantarum ac mercatura ignorantem, divitias nesci-  
 entem, proprium tectum non habentem, sed sub eo,  
 quod mundo commune est, agentem, noctu ad cælum  
 suspicientem, & per astra, conditoris admirabilem po-  
 testatem considerantem. Discutiantur singula. Vigi-  
 lantis Pastoris proprium est : proprium nihil habe-  
 re, nisi quod ad victum quotidianum attinet, non  
 habere curam crastini, Divitias nescire, hoc est, non  
 inhiare congregandis pecuniis, augendis Ecclesiasticis  
 proventibus, sed contentum esse eo, quod ad congruā  
 Pastoris sustentationē est necessarium; si verò redditus  
 sint majores; quod est supra congruā sustentationem,  
 id convertere in Ecclesiæ ornamentum, in Paupe-  
 rum eleemosynas, in ovium suarum indigentium ne-  
 cessitates. Nimia enim cura & sollicitudo circa auctio-  
 nem proventuum, Divitiarum coacervationem, non  
 solum dedecet Pastorem, & turpem redolet avari-  
 tiam, sed etiam impedit eundem in debita vigilan-  
 tia supra gregem Dominicum; quantum enim his  
 augendis Pastores impendunt curæ, tantum detra-  
 hunt de vigilantia circa oves.

Convenit deinde Pastori, ut peram & clavam  
 remissè gestet, tanquam diurna subsidia; nimirum,  
 ut inmoderata sustentatione & provisione temporali-  
 um, quam pera significat, sit contentus. Clavam  
 vero teneat, tanquam subsidium & arma, ad arcen-

dos & abigendos lupos, fures, latrones, aliosq; ovium hostes, ad corrigendas inobedientes & aberrantes oves. Per clavā hanc intelligi debet Pastoralis sollicitudo, quæ nullis adversis cedat, nullis vincatur difficultatibus, omnesq; respectus superet. Vel etiam per clavam intelligenda est virga correptionis, quæ remissè gestari debet, quia in spiritu benignitatis & mansuetudinis Christi, corripiendæ & corrigendæ sunt oves, si desistant & aberrant.

Ulterius, Pastor vigilans, debet esse bestis hostis, qui pro grege suo, adversus lupos infernales, adversus Leones rugientes, qui circum eunt, quærentes quem devorent, aliasq; bestias, adversus etiam fures & latrones, nimirum adversus hæreticos, & malos Catholicos, pravo exemplo corrumpentes alios, strenuè & fortiter decertare debet, ne oves discerpant & lacerent, ne furentur & mactent.

Pastoris etiam vigilantis officium exigit, ut sit mansuetorum animalium contubernalis, quia inter suas oves continuò versari debet, nec ab illis, ad tempus præcipuè longius, recedere fas ipsi est, ut totus sit in quærendis animarum lucris, in providendis ovium futurum spiritualibus, commodis in avertendis damnis & & detrimentis.

Vigilantis præterea Pastoris hæc laus & commendatio esse debet, quòd forum & tribunalia fugiat, ac sycophantas & mercaturas ignoret, quòd lites, quantum fieri potest, declinet & aversetur, nec se negotijs sæcularibus & negotiationibus immisceat. Per hoc enim maximè avertuntur fidelium animi à Pastore, si litigiosus sit, si nimius in exigendis decimis, proventibusq; augendis, si lucra & pecunias, per modos indebitos & artes insolitas, quærat. Hæc dedecent statum Pastoralem, & Pastorem distrahunt, quominus convenienter ovibus invigilare possit.

Additur insuper; quòd Pastor vigilans proprium testum non habeat. Pastor pastorum Christus Dominus de seipso dicit : *Vulpes foveas habent, volucres cœli nidos. Filius autem hominis, non habet, ubi caput reclinet.* Etiam alios minores Pastores convenit æmulari, & imitari Pastorem optimum Christum, non ut defacto testæ & domos non habeant, sed ut nulla privata ipsorum commoda, in proprijs domibus, eos detineant, quin promptè, quocunq; tempore, subveniant animabus, accurrant ad juvandos morientes, ad ministranda sacramenta Fidelibus, ad conferendum Baptismum infantibus, maxime si periclitentur, ad solandos infirmos, aliaq; sui muneris exercenda ministeria, sæpiusq; sub eo, quod mundo commune est, testæ, hoc est, sub cœlo agant, quàm domi suæ inveniantur.

Tandem de Pastoriis dicitur & illud, quòd noctu ad cœlū suspiciant, & per astra, Conditoris admirabilem potestatem considerent; quia vigilantia Pastoralis etiam hoc à Pastoribus exigit, ut sæpius, non tam corporis, quàm mentis oculos in cœlum levant, ut æpius postulent à DEO, se in cura & vigilantia circa animas adjuvari, ut è somno ad orationem se pro proripiant, illud mente revolventes: *Nisi Dominus custodierit Suum* & ipsorum gregem, frustra illos vigilare, qui ex vi muneris Pastoralis custodiunt eum; ut Divina & cœlestia libenter meditentur, & per creaturas & ipsi veniant in cognitionem DEI & alios adducere studeant.

3. *ium* Quod ex verbis Apostoli discitur, est: ad vigilantiam supra oves ipsis commissas, ita teneri Pastores, ut sint rationem reddituri pro animabus. Hujus rationis DEO aliquando reddendæ, meminisse eos oportet. Hæc illos debet excitare, & accendere ad sollicitam curam & vigilantiam quàm maximam. circa animas ipsis demandatas. Quia DEUS, in die sui Judicij, sanguinem de manibus i-

psorum requiret, si qui culpâ & negligentia ipsorum perierint. Quia Judicium durissimum est ijs qui praelunt, ob negligentias, & defectus vigilantia convenientis circa ipsorum oviculas.

Sacerdotes non beneficiati, quidquid ministerij spiritualis circa animas praelant, si exerceant munia & ministeria sacerdotalia, cum hæc ex Charitate faciant, idq; frequenter absq; obligatione etiam ipsius charitatis, non reddent rationem pro animabus, ob omissa & non praelita aliqua spiritualia obsequia. Beneficiati tamen, qui possident beneficia annexam curam animarum habentia, graviter obligantur ad praelanda hujusmodi obsequia; quia obligantur ex Justitia commutativa, in stipendium enim, interveniente contractu saltem implicito, pro talibus obsequijs, percipiunt Ecclesiasticos proventus, & redditus beneficij. Quare, si huic obligationi contraveniunt, si quid ex grege Domini, culpâ illorum pereat, si lupus infernalis aliquam oviculam rapiat & discepat, sciant pro perditis animabus rationem se reddituros, manet illos Judicium durissimum.

Exhorresce Judicij Divini severitatem, & recogita, an, & quantam rationem redditurus es pro animabus, quas tuâ culpâ perijisse opinari potes. Recogita, an aliquæ & quot animæ per tuam negligentiam perierint? reflecte te, an tua vigilantia supra oves tibi commissas talis fuerit, qualem describit S. Basilius? et cum plures adverteris defectus, eos per seriâ pœnitentiam desle, ac firmiter propone omni deinceps diligentia te invigilaturum gregi tuo: Protestare paratum te etiam animam ponere, ne aliquando ovis quæpiam tibi commissâ pereat.

PUNCTUM II: Audi illa verba Principis Apostolorum imma S. Petri 5. *Pascite, qui in vobis est, gregem DEI.* Et considera: à quovis Pastore ovium Christi



Christi, eā curā circa oves cōmissas haberi debere, ut pascat gregem DEI, ut cibum & pascua ovibus provideat, eas alat, reficiat, & impinguet. Porro cibus duplex est. unus spiritualis, quo reficiuntur animæ, alter corporalis, quo sustentantur corpora. Cibum spiritualem, quis & qualis esse debeat, sæpius nobis descripsit incarnata Sapiencia Christus. Nam *primò* cibum spiritualem dicit esse omne verbum quod procedit de Ore DEI. *2dò* talem cibum dicit esse voluntatem DEI, aut potiùs voluntatis Divinæ executionem. *3tò* Carnem suam appellat cibum datum pro mundi vita. *4tò*. Cibus animæ sunt Iustitia & omnes virtutes. Unde beati dicuntur, qui hunc cibum esuriunt, & sitiunt Iustitiā. *5tò* tandem cibus animæ sunt quævis sacramenta novæ legis, sunt gratiæ Divinæ, tam habituales quàm actuales, illis enim sustentatur vita animæ nostræ.

Cibum huiusmodi, ex vi sui officij, Pastor gregis Christi, tenetur ovibus sibi commissis apponere. Et imprimis tenetur illas reficere verbo DEI, quia tenetur illis. Doctrinam Christi & Evangelij continuo instillare, in catechismis, docendo mysteria & rudimenta fidei, instruendo quæ Christianum nōsse oportet, explicando quæ sunt præcepta legis naturæ, quæ præcepta legis scriptæ, quæ præcepta legis gratiæ seu Evangelica, quæ item præcepta Ecclesiæ, quæ sit obligatio servandi huiusmodi leges, quæ poenæ in transgressores statutæ, quæ præmia observantibus legem appromissa. In concionibus, ostendendo ea, quæ ad mores spectant & vitam sanctè ac Christianè instituendam, deterrendo à peccatis, exempla Christi & sanctorum ad imitandum proponendo, exhortando ad præstandum DEO obsequium, reverentiam, & amorem, ad vitandas noxias conversationes, fugiendas occasiones peccati. In privatis colloquijs, varia salutis media, remedia contra

peccata, motiva & incitamenta ad virtutē suggerendo.

Tenetur insuper Pastor gregis Christi, cibum illum, quo Christus ipse vivebatur, suis oviculis apponere, nimirum, debet illis exponere & explicare voluntatem Patris cœlestis, ad eamq; faciendam adhortari, debet illis explicare, quod voluntas DEI sit sanctificatio & salus æterna ipsarum; quod DEUS sua voluntate exigat, ut non solum præcepta servantur, sed etiam, ut in virtutibus Christianis proficiant. Debet suis oviculis persuadere Pastor, ut opera Justitiæ, Charitatis, misericordiæ, aliaq; exerceant, & per talia opera, salutem & cœlum promereantur; ut in perferendis adversis & tribulationibus conforment se voluntati Divinæ, in ea conquiescant, hanc in se impleri appetant, ac per ipsam, appetitum & famem suam exsatiarent.

Tenetur præterea Pastor ovibus, suæ curæ commissis, Panem cœlestem, panem Eucharisticum præbere & ministrare, non solum quando illæ præcepto obligantur ad hunc panem manducandum, sed quotiescunq; volent & petent. Imo famem hujus cibi debet in illis excitare, usum quam frequentissimum commendare, utq; illum fructuosè, & ad vitam, non verò ad Judicium manducent, instruere & admonere.

Ulteriùs Pastor, vi sui muneris, tenetur ovibus Christi alia etiam Sacramenta ministrare, & ad hæc, tanquam ad pascua quibus impinguari possunt, adducere. Justitiam quoq; & quarumvis virtutum studium quam maximè commendare, ut hæc esuriant & sitiant, famemq; horum & sitim, in ipsis ut accendat, tenetur procurare.

Tandem Pastor gregis Dominici debet laborare, ut oves ipsius in gratia DEI proficiant, eamq; augere studeant, ut gratias actuales & inspirationes Divinas promptè & toto corde suscipiant, illisq; obediant, bene ipsi utantur, & efficaces reddant.

Ita pascendo oves suas Pastores Ecclesiarum, impinguabunt sibi commissum pecus, impinguatas oves summo Pastori Christo reddent, & in Judicio DEI universali, cum alijs ovibus, etiam suas oves ad dexteram constitutas, magno suo spectabunt solatio.

Verum & cibo corporali, oves tali refectione indigentes, nimirum pauperes, pascendæ subinde sunt à Pastoribus. Væ illis, si se ipsos pascant, si ex vellere ovium, ex pauperum substantijs, eorumquæ labore, lucra sua & emolumenta temporalia quærant, si comedant domos viduarum, si ut escam panis devorent plebem Christi, si à pauperibus, pro sepulturis mortuorum, pro Sacramentorum ministratone, & suis obsequijs, nimium exigant, & pecuniam cum sanguine emungant. Bonus Pastor non est rigidus exactor, metens ibi, ubi non seminavit. Pauperes, exhaustas, vellere spoliatas oviculas etiam temporali cibo reficit, eleemofynis sublevat, & corporalibus adjuvat subsidijs. Bonus Pastor dat, vel paratus est dare animam & vitam suam pro ovibus; quantò magis, in ovium commodum & subsidium, dabit perlibenter bona suæ fortunæ & substantiam. Hanc qui tenaciter retinet, nec pauperem sublevat, quomodo sperari poterit ut pro ovibus ponat animam? quemadmodum sentit S. Gregorius ubi dicit: *Qui non dat pro ovibus substantiam suam, quando pro his daturus est animam suam?*

Ad veba illa: *Pascite gregem DEI*, addit Petrus: *qui in vobis est.* Quo addito videtur commendare, ut omnes quidem oves, sed maximè illas, inter quas sæpius aut etiam continuò versantur, pascant Ecclesiarum Pastores & Præpositi; ut oviculis domesticis majora impendant, & incipiant à Domo sua, ut timorem Domini, & ea quæ ad salutem spectant, doceant suos domesticos & familiam, ut quisq; domum Pastoris considerans, advertat facile, domum illam esse ovile Domini, omnes illic esse mites, man-

svetas, innocentes oviculas, Christo Pastori gratas, nullum reperiri fatentem hædum.

Videtur & alterum commendare, ut, qui Pastoris munere fungitur, suas omnes oviculas non solum in & præ oculis habeat, sed etiam memoria & intellectu læpius verset, de spiritualibus eorum necessitatibus cogitet, charitate & affectu complectatur, in corde & pectore ferat; hac enim ratione sperari potest, ut gregem, qui ita est intra cor & viscera Pastoris, pascat diligentius & cum majore gregis ipsius commodo, ac utilitate.

His consideratis, mentem ad teipsum converte, & percurrendo singula, vide, in quo defuerit Pastoralis tui muneris? an singula hæc observaveris ut deinceps observes, & tuo satisfacias officio, curam & studiū adhibe, propositisq; teipsum obfirma

PUNCTUM III. Audi ulteriora verba ejusdem Scripturæ: *Pascite, qui in vobis est, gregem DEI, facti forma gregis ex animo*: Et considera: à Pastorbis gregis Christi, hoc insuper exigi ut sint forma gregis ex animo, hoc est, ut in teiphs, vitaq; & moribus suis ostendant oves ipsis commissæ, quales ex eorū institutione, esse debeant? ut in teipsis eā ipsis exhibeant & efforment, cui se conformare debeant; ut, quod ore & prædicatione docent, id exemplo ostendant, doctrinæq; veritatem exemplo proprio declarent. Imitari debent primum & universalissimum Pastorem Christum, qui non contentus, quod suā doctrinā oves pasceret, etiam exemplo illas pavit. Hæc, inter alias, boni Pastoris proprietates, imò obli-gatio est, ut ante suas oves vadat, hoc est, bono exemplo illis præeat & præluceat. Nunquam efficacius pervadebit Pastor suis ovibus, ut via mandatorum DEI incedant, ut non declinent à semita Justitiæ, ut de virtute in virtutem proficiant, ut salutem animæ consequi studeant; quàm, si ipse primus, tanquam Dux suarum ovium, hac viâ prævenit, &

fuō exēplo viā hanc ipsis ostenderit. Unde non immerito quaerit S. Gregorius. *Quomodo nos vitam corrigere valemus alienam, qui negligimus nostram?*

Doctrina quævis, quantumcuiq; difficilis, non potest melius facilitari, quam exemplis; in his maxime elucet veritas. Doctrina Evangelica, Doctrina salutis, est doctrina difficilis; difficile ab hominibus intelligi, & percipi potest, nisi ostendatur in exemplis; habet quidem Pastor gregis dominici, & habere potest in promptu, siue ipsius Christi, siue tot Sanctorum exempla, quæ suis ovibus proponat, quibus doctrinam Evangelij & suæ prædicationis declaret & ostendat; cæterum exempla, quæ audiuntur vel leguntur, non sunt ita efficacia ad pervadendum. Efficaciora longe sunt exempla, quæ conspiciuntur; idq; maxime efficacia sunt, quæ in ipso Pastore & propositæ veritatis magistro inveniuntur, quando, qui prædicat, opere ea complet, & exequitur, quæ prædicatione docet. Ex vita & moribus magistri, doctrina ejusdem de moribus, magnum pretium & æstimationem habet; de veritate illius minimè dubitatur, si ipse magister suæ doctrinæ multum fidat & tribuat, & reipsa ac factis doceat: suam Doctrinam, à se, pro vera & infallibili haberi.

Hinc non immerito dicit D. Bernardus: *Boni solititq; Pastores impinguare pecus non cessant boni: laetisq; exemplis, & suis magis quam alienis; nam si alienis & non suis, ignominia est illis, & pecus ita non proficit, si enim, verè causa, ego, qui videor inter vos Pastoris officium gerere, vobis exposuero Moysi mansuetudinem, misericordiam Samuelis, Davidis sanctitatem, immitis ipse, & impatiens, atque immisericors, & minimè sanctus; sermo minus sapide eveniet, & vos minus avidè capietis.*

Ex his concludes: Pastorem bonum debere esse formam gregis ex animo. Ex animo inquam



ut, quæ in ipso virtutum & sanctimonix exempla  
foris elucet, non ficto animo fiant, non simulatè,  
non ad oculum, sed ex interno vero & sincero vir-  
tutis amore, ut non exterius solum & in cute pate-  
ant, sed in ipso animo, in charitate interna erga  
DEUM & proximum, in corde fundamentum fu-  
amq; radicem habeant.

His consideratis, ad teipsum te converte, &  
vide, an sis forma gregis tui ex animo? an merea-  
ris titulum boni Pastoris, tuæq; obligationi satisfac-  
cias? an virtutum tuarum exemplis doctrinam,  
quam ovibus proponis, confirmes? an non dicetur  
tibi aliquando! ô Pastor! ô Idolum! constitue fir-  
miter, quòd deinceps futurus sis forma gregis tui ex  
animo, quòd sis accuratissimè impleturus boni  
Pastoris munus & officium.

*Colloquium.* Supplica humillimè Pastori opti-  
mo Christo, ut, qui te ad Pastoralis muneris formam  
vocavit, bonum te Pastorem efficiat, Pastorem vi-  
gilantem, pascentem gregem Domini cum fructu,  
& utilitate ipsius gregis, bono exemplo, & sanctâ  
vitâ tuâ, ad omne bonum prælucentem. ita, ut sis  
forma gregis ex animo, ut te potenti suâ gratiâ sibi  
conformem efficiat, quatenus per imitatio-  
nem exemplorum & virtutum ipsius, bo-  
num pastorem induas, ita enim fiet,  
ut sis forma gregis ex animo.

*In fine: anima Christi.*





## ERRATA CORRIGE

In intentione Authoris pag. 3. fac. 1. V. 4. cetiduo  
excitiorum *Lege* octiduo exercitiorum

Ibidem pag. eadem & fac V. 19. ipforum *Lege*  
ipsarum

Ibidem pag. 6. fac. 1. V. 15. succinite *Lege*  
succincte

Ibidem eadem pag. & facie V. 16. circa quæ  
*Lege* circa quas

Ibidem pag. 6. facie 2. V. 13. alium vero *Lege*  
alia vero,

### Parte 1ma.

Pag. o.V. 17. *felicitatatis* L. felicitatis

Pag. 11. V. ultimo *clari* L. dari

Pag. 12. V. 15. *betus* L. beatus

Eadem pag. V. 28 *liberate* L. libertate

Pag. 20 V. 19. *temperiania* L. temperantia

Pag. 21. V. 1. *onitas* L. bonitas

Pag. 24. V. 29. *reveretatur* L. vereatur

Pag. 28. V. 8. *totâ hac pœna gravior est malitiâ*  
*peccati mortalis* L. totâ hac pœna gravior  
est malitia peccati

Pag. ead. V. 12. *mulplientur* L. multiplicentur

Pag. 32. V. 32. *divininis* L. divinis

Pag. 33. V. 33. *se abusus* L. es abusus

Pag. 40. V. 4. *deficiens* L. defecuosum. Ea-  
dem pag. V. 5. *participionem* L. participellam

Pag. 58. V. 4. *confuegam* L. confurgam

Pag. 62. V. 31. *Sprutum* L. Spiritum

Pag. 64. V. 18. *pœnitecham* L. pœnitentiam

Pag. 90. V. 18. *precipituri* L. pæcipitari

Pag. 95. V. ultimo *pffinarum* L. pœnarum

Vitio typi locò signi paginæ 100. positum signum  
pag. 90. & tota decas numeri iterum re-er-ur

Itaq; pagina 95. 2do notatâ V. o. *ll et* L. licet

Pag. 128. V. *habebifi* L. habebis


Pag. 131. V. 10. *ilia* L. illa

Pag. 133. V. 16. *approriando* L. appropriando


Pag

Pag. 152.	V. 20.	<i>flagellis</i>	L. flagellis
Pag. 154.	V. 4.	<i>secundum</i>	L. secundum
Pag. 157.		<i>conformi</i>	L. conformi
Pag. 158.	V. ultimo	<i>ambusa</i>	L. ambula
Pag. 175.		<i>profectus</i>	L. perfectus
Pag. 184.	V. pacis		L. parzis
Pag. 188.	V. 17.	<i>invivat</i>	L. invitat
Pag. 229.	V. 32.	<i>ardefcit</i>	L. exardescit
Pag. 243.	V. 32.	<i>genicus</i>	L. gente
Pag. 246.	V. 35.	<i>filium</i>	L. filum
Pag. 277.	V. 34.	<i>habuemit</i>	L. habuerinr
Pag. 274.	V. 6.	<i>multa me</i>	L. multa me
		<i>mala</i>	
Pag. 309.	V. 18.	<i>ara</i>	L. arca
Pag. 311.	V. 12.	<i>vira</i>	L. via
Pag. 310.	V. 24.	<i>stants</i>	L. status
Pag. 320.	V. 30.	<i>ve</i>	L. quæ
Pag. 339.	V. 4.	<i>dimittunt</i>	L. d.mittunt
Pag. 340.		<i>astum</i>	L. statum
















E

EX

J

Ex

U

U

Si

✻

T

# EXPEDITA Salutis Via

Per  
EXERCITIA SPIRITUALIA  
à S. PATRE IGNATIO

## MONSTRATA

Ex meditationibus ; sensum eorundē Exercitiorū  
declarantibus.

Usui varij statūs hominum ac-  
commodata

à P. Adriano Miaskowski  
Societatis JESU.


## PARS III.

In qua proponuntur meditationes.

Usui Religiosorū Societatis IESU accommodatæ.

Sive in octiduo exercitiorum Spiritualium

Sive in duplici votorū & Spiritūs Renovatione  
Assumendæ.



SANDOMIRIÆ

Typis Collegij Societatis JESU Anno 1718



)(†)(

# PARS III.

## *In Qua*

Proponuntur Medita-  
tiones, ufui Religiofo-  
rum Societatis JESU  
Accommodatæ.

Sive in octiduo Exer-  
citiorum Spiritualium  
Assumendæ.

Sive in duplici femestri  
votorum & Spiritûs Re-  
novatione faciendæ.

12

D

fu  
sta  
A  
A  
Pa

co  
dia  
pr  
lu

49  
4/5  
ve  
ej  
m  
na  
an  
ea  
ra

vi  
te  
lu  
m  
P





## Meditatio

### De fine Religiosi Societatis JESU & medijs ad hunc finem.

*Praludium 1.* Imaginare factam à Christo in sua Ecclesia illam coordinationem, & constitutam statuum diversitatem, cujus meminit S. Paulus Apostolus ad Eph. 4. *Ipse dedit quosdam quidem Apostolos, quosdam verò Prophetas, alios autem Pastores & doctores.*

*Praludium 2.* Postula à DEO gratiam, ut cognoscas finem Religiosi Societatis JESU, & media, quæ ad eundem finem, sacro huic Ordini, providit DEI bonitas, & ut per talia media illum ipsum consequaris.

PUNCTUM I. Audi DEUM dicentem Isaiaë 49. *Ecce dedi te in lucem gentium, ut sis salus mea usq; ad extremum terra.* Et considera adductis verbis exprimi sufficienter finem Societatis JESU, ejusq; filiorum, quem alijs verbis, eodem tamen sensu expressit S. P. N. JGNATIUS: *Finis nostra Societatis est, non solum saluti & perfectioni animæ propriæ cum Divina grâtiâ vacare, sed cum eadem impense in salutem & perfectionem proximorum incumbere.*

Considera ulterius, quod DEUS, dum vocavit te in Societatem JESU Filii sui, vocaverit te propter hunc finem, ut sis lux gentium, ut illumines eos, qui in tenebris infidelitatis, & in mortē, ac in umbra mortis, per peccata patrata sedent. Præterea vocavit te DEUS, ut sis salus; sicut e-

nim JESUS ex vi sui nominis est Salvator & salus mundi, ita & tu, qui es, JESU socius debes esse aliorum, debes ipsi JESU cooperari ad salutem mundi, non enim convenit te recedere ab exemplis Ducis tui in curanda salute proximorum tuorum.

Porro ut sis lux gentium & salus earum, debes studio singulari & quàm maximo curare prius salutem & perfectionem tuam propriam; lux enim gentium nequaquam esse poteris, si lumen, quod in te est, tenebrae fuerint. Ut sis lux alios illuminans, non sufficit si tantum sis lux falsa, apparentis, ignis fatuus, sed necesse est, ut sis lux vera, talis enim lux esse debet, quæ illuminat omnem hominem. Necesse est ut talis lux in oculis DEI inveniaris interiorius, qualis in oculis hominum appareas exteriorius. Tali enim non nisi luce DEUS uti consuevit, ad illuminandas gentes. Necesse est, ut non solum faciem Doctrinae praeferas, sed etiam, ut bono exemplo ad omnem virtutem & perfectionem tuis proximis prae luceas.

Salus etiam aliorum esse non potes, nisi prius fueris salus tua; si enim tuam salutem & perfectionem neglexeris, imperfectusque vixeris, non dabit te DEUS in lucem & salutem gentium. Dicitur tibi: *longè à salute mea verba delictorum tuorum.* Doctrina vitæ difformis, sunt verba delictorum. talis igitur Doctrina longè erit à salute, quia non erit fructuosa, sed sterilis, paruumque; aut nullum fructum in animabus proximorum faciet. DEUS enim, quantumvis zelosis concionibus, ferventibus ad hortationibus, spiritualibus colloquijs concionatorum, confessoriorum Professorum &c. salutem & perfectionem propriam aut negligentium, aut minus curantium, non alligat gratias speciales, cor pulsantes & efficaces. Referunt quidem illi plautus, conciones ipsorum

fre-

frequentantur, attentè audiuntur, zelus prædicatur; cæterum fructus exiguus, modica aut nulla in moribus mutatio & reformatio sequitur, quia DEUS non utitur ipsis pro instrumento conversionis animarum.

His consideratis, æstima finem vocationis tuæ, adverte quàm sublimis sit ! Finis hic idem est, qui fuit finis ipsius Christi, qui fuit finis Apostolorum. Quanti & tua & proximorum salus sit æstimanda, hinc collige, quòd Christus pro salute tam tua quam aliorum hominum, vitam suam posuerit, pretiumq; salutis hominum, sanguinem à se profusum, & infinitum meritorum tuorum thesaurum esse voluerit ; quòd Christus salutem tuam & proximorum tuorum, suam salutem esse reputet & suam appellet. dicit enim: *Dedi te in lucem gentium ut sis salus mea.* Et certè salus hominum, salus Christi est, non solum quia hanc, ut esset sua, Christus magno emit pretio, idq; ita emit, ut qui vivit, jam non sibi vivat, sed ei qui pro se mortuus est, Christo, imò ut ipse in omnibus vivat, ut possint singuli cum Apostolo dicere : *Vivo ego jam non ego, vivit in me Christus* ; sed etiam ex hac ratione salus hominum est salus Christi, & tu lucrando salutem tuam & proximorum, es salus Christi, quia quando Christo lucraris animas, efficeris eidem in salutem, efficis enim, ut Christus suum finem consequatur qui est salus mundi. Laborando circa proximorum salutem, es salus ipsius Christi ; quia zelo tuo obsistis, ne Christus tradatur, illudatur, flagelletur, crucifigatur. Obsistis enim ne DEUS offendatur, adeòq; ne Christus talia iterum patiatur, ne rursus crucifigatur in cordibus peccatorum. Dum etiam peccatores ad penitentiam adducis, & ad meliorem vitam revocas, Christum in cordibus peccatorum crucifixum, de

A3

cruce

cruce deponis. Salvas igitur Christum qui à cruce semetipsum non salvavit. Dum animas pretioso Christi sanguine redemptas ex inferni faucibus extrahis, facis ne Sanguis Christi descendat in corruptionem, quare etiam hac ratione salvas Christum, adeoque es salus Christi.

Fac deinde reflexiones. Quomodo deinceps debeas conjungere curam salutis & perfectionis propriæ, cum cura salutis proximorum, quod debeas inchoare à curanda salute & perfectione animæ tuæ. Accendere desiderio consequendi finem tam sublimem. Offer te ad omnes labores in curanda & quærenda salute animarum. Propone curaturum te, ut efficiaris aptum instrumentum promovendæ gloriæ Divinæ, & procurandæ tuæ & proximorum salutis. Propone item juxta officij tui præsentis rationem, si Professor es, nihil te prætermittendum, in pietate cum literis instillanda discipulis tuis, in commendando ipsis timore DEI, virtutum Christianarum studio, frequentatione sacramentorum, reverentia DEI in Eucharistia præsentis, Devotione ad virginem Deiparam, alijsq; his similibus.

Conclude hoc punctum sequenti affectu. O amabilissime JESU DEUS cordis mei, totum te impendisti pro salute mea, non salvasti te de cruce ut salvares me. Tulisti clavos, lanceam, multamque ignominiam, innumeros dolores, sudores, & agnoscere, & hæc propter me ac propter meam salutem. Tu factus es mihi in salutem, tu dixisti animæ meæ: salus tua ego sum. Ergone amabilissimo cordi tuo non reddam vices? Ergone non ero salus tua? nunquid non salvabo te à persequentibus te, & à crucifixoribus tuis? ager mi JESU in cruce, tantummodo tu non crucifigaris in cordibus impiorum. Lambant canes sanguinem meum, cruore meo canales & sentinæ

sentinæ repleantur, ne tuus pretiosissimus sanguis, in corruptionem descendat. Offero me tibi DEO meo ad omnes labores, ad omnes ignominias, ad durissimas cruces, ad mille mortes, etiam ad poenas & tormenta inferni sustinenda; ut per hæc omnia impediam illusiones, flagella, cruces, omnesq; ignominias, quas amabilissime JESU a peccatoribus suslines. Toto cordis affectu precor tibi salutem: *Salus DEO nostro qui sedet super thronum, & Agno.*

PUNCTUM II. Audi illa verba Spiritus S. Actor. 31. *Segregate mihi Saulum & Barnabam, in opus ad quod assumpsi eos.* Verba item S. Pauli de se dicentis ad Galat. 1. *Cum placuit ei qui me segregavit ex utero matris mee, & voca it me per gratiam suam ut revelaret filium suum in me ut evangelizarem illum in gentibus.* Et considera primum medium consequendi finem Societatis esse præviam Dispositionem & præparationem ad vitam Apostolicam, & munus prædicandi Christum, animasq; convertendi, quæ fiat per segregationem. *segregate mihi.* Circa quam.

Considera ulterius imò. In quo hæc segregatio consistat? consistit verò tum in hoc, quod quis exuat pravos affectus, habitus, vitia & imperfectiones vitæ sæcularis, exuat veterem hominem cum suis concupiscentijs, exuat inclinationes & appetitus sensuales, suasq; mortificationes plenè mortificet. Ita enim quis efficitur segregatus à peccatoribus, qualem esse oportet virum Apostolicum. Tum etiam hæc segregatio consistit in eo, quod is qui assumitur ad opus circa quærendam salutem proximorum, abstrahat affectum ab omnibus rebus terrenis, vanis, sensualibus, quod nullis rebus mundanis moveatur, commoda propria contemnat, nulli creaturæ affectu adhæreat, nihil quærat nisi ea quæ sunt JESU Christi, nisi DEI



gloriam & proximorum salutem. Talis non solum est segregatus à peccatoribus, sed insuper excel-  
 sior cœlis factus. Præterea segregatio hæc con-  
 sistit in eo, quòd homo ad Apostolicos labores se  
 præparans, antequam tali muneri applicetur, soli-  
 tudinē amare debeat, nō in debeat se ante tēpus in con-  
 versationes cū sæcuaribus ingerere, multominus  
 debeat se in illas effundere, sed quòd debeat la-  
 tere velle, intra se collectus, suæ salutis & per-  
 fectioni intentus, & totus cum DEO per medita-  
 tiones & orationis studium conjunctus. Imò in-  
 ter ipsos labores circa salutem proximorum, ean-  
 dem segregationem & solitudinem homo Aposto-  
 licus amare & appetere debet; non debet se ne-  
 gotijs donare, sed commodare, debetq; sæpius  
 seipsum abstrahere à conversatione, & quodam-  
 modo se suffurari, ut interim se recolligat, ut di-  
 spersiones congreget; inter ipsas vero conversatio-  
 nes debet mente in DEUM elevari, ut tota il-  
 lius conversatio in cœlis sit.

Expende 2dò. Qualis debeat esse hæc se-  
 gregatio? debet esse talis, ut per eam qui assu-  
 muntur ad opus & labores circa salutem anima-  
 rum, segregentur spiritui sancto, hoc est, ut spi-  
 ritu DEI agantur, rebus spiritualibus se impen-  
 dant, totiq; sint spirituales. Debet hæc segrega-  
 tio esse ex utero matris, hoc est, à primo reli-  
 gionis ingressu, à primis annis nostræ vocationis,  
 ut tunc illi statim assuescamus, in ea gustum ha-  
 beamus, ac deinceps totâ vitâ conservemus. Quis-  
 quis es, qui te disponis ad munus Apostolicum,  
 talis tua debet esse segregatio, ut efficiaris vas ele-  
 ctionis portans nomen JESU, ut sis Paulus evange-  
 lizans Christum. ut per eam reveletur in te Filius  
 DEI, hoc est, ut transformeris in Christum, per ve-  
 ram imitationem virtutum & exemplorum Christi,  
**ut non ore solum, sed magis vitâ tuâ, moribus tuis**  
 toto



toto te, loquaris & evangelizes Filium DEI.

Expende 3<sup>tiu</sup>. Quam sit necessaria hæc segregatio? Est necessaria, ne laborando circa alienam salutem, nostram in ducimen adducamus, ne, dum conveniamur cum perversis eo fine, ut eorum animas DEO lucremur, ab ipsis pervertamur. Est necessaria hæc segregatio, ut laboribus nostris circa proximorum salutem, fructus desideratus respondeat. Ut fructuose prædicemus Baptismum penitentiae, debemus cum Joanne ex eremo venire. Leges Sanctissimas allaturi populo, debemus venire cum Moyse à consortio sermonis Domini. Ut nos DEUS faciat in gentem magnam cum Abrahamo, oportet nos egredi de terra, & de cognatione nostra, & de domo Patris nostri.

His consideratis, reflecte te supra singula. Concipe desiderium ita laborandi circa proximos, ut fructus animarum quam maximos referas. Resolve te ad media proposita, dependenter à quibus potes sperare, fructuose te laboraturum. Fac proposita firma & efficacia. Implora Divinae gratiae auxilia, ut in virum Apostolicum formari possis.

PUNCTUM III. Audi illa verba Psalm. 104.

*Misit Moysen servum suum, et Aaron, quem elegit ipsum, et posuit in eis, verba signorum et prodigiorum suorum.* Ex his verbis expressum intellige medium Societati concessum, ad educendos mortales ex servitute peccati, illud ipsum, quod concesserat DEUS Moyfi & Aaron, ut educerent populum Israëliticum ex servitute Ægyptiaca Pharaonis. Sicut enim in Moyse & Aaron posuit DEUS verba signorum & prodigiorum suorum, ut illos tanquam legatos audirent Pharaon & Israëlita, & ut DEI voluntatem per ipsos intimatam exquerentur; ita in S. Patre JGNATIO, Societatis JESU Institutore, & per ipsum in filiis ejus posuit verba signorum, seu posuit signa & prodigia

gia ad convertendos peccatores valde efficacia.

Signa verò hæc & prodigia sunt, illa ipsa spiritualiter exhibita, quæ ex promissione Christi. Marci 16. Sancti Apostoli corporaliter facturi erant,

*immum* Ex his signum est. *In nomine meo* *Dæmonia ejicient.* Quam felices sint Societatis Filii in ejiciendis dæmonijs ex cordibus & animabus mortalium, docet quotidiana experientia, nequè id prodigiolum reputatur. Prodigiosum tamen est, quod in nomine JESU hæc ejiciant, hoc est, quod non sui nominis celebritatem, non auræ popularis plausus, aliasq; vanitates, non lucra aut temporalia emolumenta quærant, non seipsos prædicent, sed prædicent JESUM & hunc crucifixum; quod unicè intendant, ut nomen JESU clarificetur, sanctificetur, ut in nomine JESU omne genuflectatur, ut in hoc nomine profligentur dæmonia, ut ex ipsorum laboribus non alius fructus, nisi major DEI gloria & salus proximorum proveniat. Hæc fuit usitatissima Sancti Patris nostri tessera; *Ad Maiorem DEI gloriam.* Eadem est & debet esse tessera filiorum ejus.

*2dum* Signum est: *Linguis loquentur novis.* Linguae novæ sunt, quæ si loquantur, tanquam sermones DEI; quæ loquuntur ea, quæ mandavit Dominus, loquuntur magnalia DEI. lingua nova est, quæ loquitur de regno DEI, de rebus Divinis, de rebus spiritualibus, ea, quæ ad DEI gloriam & salutem proximorum spectant, in colloquium nonnisi adducit. De alijs non loquitur nisi perhonorificè; nullius famam lædit, excusat intentionem, dum opus non potest; de rebus proprijs tacet, maledicentibus non maledicit; quæ in verbo non offendit. Linguae hæ novæ sunt, quia non audiuntur communiter. tali linguâ novâ locutus est S. P. noster JGNATIVUS, talibus linguis

*De fine Societatis & medijs ad hunc finem 9*

guis loqui voluit & docuit suos filios.

3<sup>ium</sup> Signum est. *Serpentes tollent*. Serpentes sunt hostes Societatis nostræ, qui suo morſu lacerant famam ipsius, ſuumq; in eam virus effundunt. Et omnia quæ pro gloria DEI Societas agit, exhibitant. Hos ſi ex mente Sancti Patris noſtri, non ſolùm ſupportamus patienter, ſed etiam amore & affectu completimur, pro illisq; oramus, ſerpentes tollimus. Serpentes item, imò peſtilentes dracones, ſunt mala aliorum exempla, quibus ſi exempla virtutum Chriſtianarum & religioſarum opponimus, & cum Moyſe facimus ut opera noſtra ipsis contraria, tanquam virga correctionis, dracones illos devoret & eliminet, ſerpentes tollimus.

4<sup>um</sup> Signum est. *Si quid mortiferum biberint, non eis nocebit*. Si ob imitationem & amorem Domini noſtri JESU Chriſti, venena oblocutionum, convitiarum, caluminarum, non abhorremus, ſed calices talium amaritudinum toto ore bibimus, neq; tamen per hæc deiſcimus, & à proximorum ſalute non deterremur, verùm omnes amaritudines concoquimus, mortiferum quid ita bibimus, ut nobis non noceat.

5<sup>um</sup> Signum est: *Super ægros manus imponent, & bene habebunt*. Hoc ſignum facimus, ſi ad curandos animarum morbos & vulnera, non contenti ſoia prædicatione, etiam manum admoveamus, & opere adimplemus, quod docemus ore; ſi per virtutum exempla ſublevamus homines ex infirmitatibus ipſorum, ſi etiam ſub ſidijs temporalibus, pro noſtro poſſe, proximorum noſtrorum indigentiam adjuvamus & ſublevamus, ſuper ægros manus imponimus, & ad hanc impositionem manuum, illi in anima ſæpius bene habent.

Ultra hæc ſignorum & prodigiorum verba,

quæ DEUS posuit in S. Patre nostro, & per ipsum in filijs ejus, ipse JESU socius, laborans circa salutem proximorum, debet esse quoddam prodigium, imò complexum prodigiorum.

1<sup>mo</sup>. ut in ipso sit insignis scientia, non vulgarisq; Doctrina & eruditio, conjuncta cum majore longe humilitate, cū profundissima demissione, primum locum & partes cuiq; deferente, honore præveniente alios, & ambiente insipientiæ titulum.

2<sup>do</sup>. ut sit in ipso fortitudo & constantia in procuranda proximorum salute, nullis incommodis, nullis adversis superabilis, promptitudo etiam & celeritas, per tela & ignes evolans ad animarum obsequia.

3<sup>tium</sup> prodigium est, & esse debet: inter maximos labores summa indefatigabilitas, contemptus terreni lucri, commodi, & emolumenti, suq; ipsius oblivio, nullius compensationis admissio, ultra DEUM, & salutem animarum. ut dicere possis: *Da mihi animas, cætera tolle tibi.*

4<sup>tū</sup>. prodigium sit modestia, corporisq; & animi compositio, qualem requirunt regulæ modestiæ, ut, qui vident homines societatis secum conversantes, audiunt prædicantes, disputantes &c. intueantur illos tanquam Angelos DEI, existiment illos homines de cælo delapsos, ut conspectu modestiæ, cum animi demissione conjunctæ, exsatiari non possint.

5<sup>tum</sup> prodigium sit: perfecta affectuum & Passionum moderatio & mortificatio; ut nullus, unquam, in homine Societatis, commotior animi perturbati motus conspiciatur, nullum unquam asperum audiatur verbum; ut nullo verbo, gestu, aut facto, injuriam vindices. sed prorsus sis immobilis & imperturbabilis, vultumq; habeas ut fili-  
cum. Ut ipse etiam zelus sit secundum scientiam  
&c

& prudentiam, eôq; ita utaris, non ut animum cuiusquam exasperes, sed ut nonnisi à peccato retrahas, & ad DEUM peccatores convertas.

Talium prodigiorum complexum debere esse verum JESU socium, ex Societatis ipsius Instituto facile intelliges. Quàm verò efficax sit hoc medium promovendæ Divinæ gloriæ, & procurandæ salutis proximorum, disces ex tot exemplis virorum Apostolicorum; utinam id ipsum, cum Divinæ gratiæ auxilio, propria te doceat experientia.

Ex his consideratis reflecte te, & cogita nihil ex his omnibus esse supra tuas vires. Etiam tu, cum ope gratiæ Divinæ, si volueris, poteris talia patrare miracula. Ut autem velis, excita te tot filiorum Societatis, fratrum verò tuorum, sanctis exemplis, excita horum mediocum efficaciam & præstantiam.

Colloquium ad S. Patrem IGNATIUM. Pater Sanctissime, ad beatissimos tuos pedes procido, indignus & degener Filius, tibiq; humillimè supplico, ut inter filios tuos connumeratus, & sortitus sortem ministerij, ad quod tu à Spiritu Sancto assumptus es, vocationi meæ respondeam. Intercessione tuâ efficacissima impetra mihi, ut finem universæ Societati à te præfixum, per media, quibus & tu, & Societas à te instituta, sanctè usi estis, ego quoq; consequi valeam, & media propòsita constanti & invicto animo adhibere velim.

*In Fine: Anima Christi.*

## Meditatio

De beneficio vocatiōis ad Societatem, ejusq; pretio & amore.

*Preludium* 1. Imaginare te non solum in-



ter aulicos magni Principis connumeratum esse, sed etiam admissam ad intimam cum ipso familiaritatem.

Præliudium 2. Petè à DEO gratiam, ut beneficium vocationis tuæ, per quam admissus es in Societatem magni Principis, nimirum DEI & salvatoris tui, pro merito æstimare velis.

PUNCTUM 1. Audi verba illa Apostoli 1. ad Corint. 1. *Fidelis DEUS, per quem vocati estis in Societatem Filij ejus JESU Christi Domini nostri.* Et ad Ephes. 1. *Benedictus DEUS & Pater Domini nostri JESU Christi, in quo etiam & nos sorte vocati sumus.* Et considera: magnam tibi gratiam magnum à DEO beneficium præstitum esse, quòd in Societatem JESU Christi filij ejus vocatus sis, pro eoq; beneficio gratias quàm maximas DEO à te persolvi debere. Magnitudinem hujus beneficii quòd melius agnoscas, perpende bona & comoda vocationis tuæ, & ex illo provenientia emolumenta.

*Imum* Emolumentum est, quòd tuæ vocationis beneficio, finem creationis tuæ, facillè, & cum cœrtitudine aliqua & securitate consequi valeas. Creatus es, ut Dominum DEUM laudes, revereris, eiq; serviens tandem salvus fias. Et ubi hunc finem, in quo vitæ statu, meliùs consequi potes, quàm in Societate? ubi majora adjumenta habes, modos & media laudandi DEUM? an non hîc, ubi in omnibus actionibus major laus & gloria DEI spectari & intendi debet; ubi in omnibus quæritur DEUS. Ubi major est occasio & comoditas serviendi DEO? quàm in eâ religione, in qua cum DEO tam frequens est communicatio per meditationes rerum Divinarum, per examina conscientiæ, per crebras mentis ad DEUM elevationes, aliaq; multiplicia spiritualia exercitia; in qua in virtutum solidarum studium semper incum-  
bitur



bitur, profectus in perfectione & spiritu magnâ curâ promovetur, Divinum beneplacitum exquiratur & impletur; in qua obedientia ad minimos Superioris ( in quo DEUS agnoscitur ) nutus, prompta & paratissima. DEUM etiam te in Societate faciliè revereri posse non dubites. Revereris DEUM, quando non solum à lethalibus, sed etiam à venialibus noxiis abstinere, imò etiam quascunque caves imperfectiones, quæ vel minimùm Divinis oculis, aliqua ratione, displicere possunt. In Societate id faciliè assequi potes si velis. Frequens sacramentorum usus, indefessa superiorum vigilantia, religiosæ Disciplinæ rigor, sancta domesticorum exempla, votorum & spiritûs semestres renovationes, annuæ recollectiones, manifestatio conscientia apud superiores & Præfectum spiritûs, delationes defectuum in Societate usitatae, mortificationes & poenitentia, sive publicæ, sive privatæ ac reprehensiones delinquentium, sunt efficacissima, remedia, ut DEUM reverearis, ut à culpis & defectibus abstineas, & ut sanctè vivas. Tandem in Societate faciliè, & cum aliqua non communi asssecuratione assequi potes, ut salvus fias. Hanc securitatem facit tibi Christus illa sua promissione, *Qui reliqueris omnia propter me, centuplum accipiet, & vitam æternam possidebit.* Eandem securitatem facit vita sanctè acta: *Fidelis enim DEUS est, ut retribuat unicuique juxta vias suas.* Et insuper eandem securitatem faciunt revelationes S. Tereffiæ, S. Francisco Borgia, alijsque viris sanctis super hoc factæ, quod quicumque in Societate JESU moritur, salutem animæ suæ sit consecuturus.

2dum Emolumentum est, quodd ex vi vocationis tuæ possis consequi finem cuiusvis homini Christiano præfixum. Finis hominis Christiani est, Christum non fide tantum & ore, sed  
etiam

etiā opere & charitate confiteri, utendo medijs ad salutē, quæ idem ipse Christus providit mundo; per observationem Præceptorum, & Doctrinæ Evangelicæ, DEUM laudando, reverendo, eiq; serviendo curare, ut vitam habeas, & abundantius habeas. Hujus finis consequendi, vivendo in Societate, habes tot adminicula & media. In hac teneris intueri Christum ceu prototypon & exemplar omnis sanctitatis; ad ejus notitiā perfectiorem pervenis, ipsum confiteris, non ore tantum, & nomine, sed etiam opere ac imitatione. Duci tuo te conformando. Societas, schola est, in qua non quomocunq; Christi doctrinā addiscis, sed taliter, ut eam exequaris & adimpleas, ut per mediā salutis à Christo provisā, gratiam sanctificantem & merita augeas, atq; hac ratione vitam habeas, & abundantius habeas.

*3rium* Emolumentum, ex tua vocatione proveniens, est quodd finem cujusvis hominis religiosi facile assequaris in Societate. Finis hominis religiosi est, consilia Christi maximè ardua sequi & adimplere, qualiā sunt: de relinquendis rebus omnibus, de servanda paupertate spiritus, de conservanda castitate, & carne crucifigenda cum suis concupiscentijs, de abneganda propria voluntate, & subiicienda voluntati Superioris; Finis & obligatio religiosi est: Christi exempla virtutum, maximè sublimium & heroicarum, imitari, & DEO servire in sanctitate, omnibus diebus vitæ, proficundo de virtute in virtutem, & ad summam contendendo perfectionem. Ut hunc finem consequaris, mediā in Societate habes, non solum vota religiosa, quibus te obligas ad sequendā consilia maximè ardua, omnibus religiosis cōmunia, sed etiam singularem horum votorum obligationem, non omnibus communem, constitutionibus societatis expressam. Habes & alia adjumenta. Singula

gulæ regulæ tui Instituti excitant te, & quodammodò compellunt, ut de virtute in virtutem proficias, ut crescas in virum perfectum, ad mensuram ætatis & plenitudinis Christi. Illæ tibi commendant alia & alia Christi consilia, maximè ardua; illæ proponunt exempla ejusdem Christi, virtutum heroicarum, & maximè difficultium; illæ volunt ut induaris vestibus & insignibus Christi, ut Christo configaris cruci, in Christum transformeris, sisq; verus JESU Socius.

*4um* Emolumentum & commodum vocationis tuæ est, quòd per illam consequi possis finem hominis Religiosi Societatis JESU, qui, ut dictum est, in eo consistit, ut non solum animæ tuæ salutem cures, sed etiam in salutem & perfectionem proximorum incumbas. Vocatus es in Societatem, ut sis Vas Electionis portans nomen JESU coram gentibus. Non alligaris uni loco, uni cubiculo, uni angulo; sed totus orbis, laborum tuorum & zeli Apostolici theatrum esse debet, ibi commorandum tibi est, ubi majoris Divini obsequij & salutis animarum spes affulget, omnia tua studia, omnes labores, actiones, officia, eò collimant, & à te ordinari debent, ut proximos tuos adjuves, & Deo lucreris ipsorum animas.

Emolumenta & commoda temporalia, à Religioso, maximè Societatis, intendi & queri non debent; ex vi tamen vocationis tuæ etiam temporale emolumentum habes, nimirum, quòd ex Religionis præscripto, Fundatorum & Benefactorum Societatis munificentia, et ex Superiorum tuorum cura & paterna providentia, habeas, accommodatè ad eandem tuam vocationem, vitæ sustentandæ necessaria, ita, ut circa ea, quæ ad victum, vestitum, & supellectilem cubiculi pertinent, non oporteat te esse sollicitum.

Hæc considerans, ingens pretium tuæ vocationis

tionis concipe. Quod de sapientia tibi à DEO data sensit Salomon, id ipsum tu sentias de vocatione tua: *Venerunt mihi omnia bona pariter cum illa, & innumerabilis honestas per manus ipsius; infinitus enim thesaurus est hominibus, quo qui usi sunt, participes facti sunt amicitia DEI, propter dona disciplinæ commendati.* Magni æstima hoc beneficium, pro eoq; DEO sæpius age gratias. Benedictus Pater Domini nostri JESU Christi, qui vocavit me in Societatem ejusdem JESU Christi Filij sui. Pete humillimè ut te penes idem beneficium conservet, & finalem in Societate perseverantiam benignissimè largiatur.

PUNCTUM II. Audi illa Verba Christi Matth. 16. *Beatus es, quia caro & sanguis non revelavit tibi, sed Pater meus, qui in calis est.* Et Hæc applica ad vocationem tuam, certumq; & persuasum habeas, vocationem tuam ad Societatem, vocationem veram, vocationem Divinam esse & fuisse. Nec te ad Societatem à carne & sanguine, sed à DEO omnino vocatum esse. Ut hunc statum eligeres, & ad Societatem admissionem postulares, non caro, non sanguis, non mundus, non dæmon animæ tuæ hostis, sed Pater ille, qui in Cælis est, ex singulari paterno in te affectu, & ex fine, ut et tu sis in cælis, revelavit tibi,

Ac imprimis. non potes suspicari tuam vocationem esse à carne & sanguine, Quia caro & sanguis non invitat ad illud vitæ institutum, quod præscribit carni & sanguini bellum esse inferendum, quod vult, ut caro cum suis concupiscentijs crucifigatur, quod exigit mortificationem quaeri in omnibus, secundum quod carnis commoda, quæ vitæ corporali conservandæ necessaria non sunt, & omnium sensuum oblectamenta respuuntur, & tanquam spiritui nociva rejiciuntur.

Neque illud metuas 2dò. ne fortè tua voca-

tio fuerit à mundo. Etiam mundus neminem vocat ad id, ut illi crucifigatur, ut contemnatur, ut ei renuntietur; cum ergo ij omnes, qui ad Societatem vocantur, vocentur ad hoc, ut mundo renuntient, mundum contemnant, mundum crucifigant, Juxta illud Apostoli: *mibi verò mundus crucifixus est & ego mundo*; consequens est non vocari eos à mundo.

Sed & illud frustra timeretur 3<sup>ti</sup>o. An fortè non hostis animæ tuæ Dæmon, sua suggestione, te ad Societatem invitaverit. Societas dæmoni quam maximè opponitur, ipsum ubiq; oppugnat, regnum ejus destruit, dæmonem ex cordibus mortalium ejicere studet, à castris illius homines abstrahit, & sub Christi deducit vexillum. Quare Societatem ita sibi adversantem diabolus nemini svadere potest. S. P. IGNATIUS de discernendis spiritibus docet, si cogitatio ad rem aliquam invitans, rectè se habeat tam circa Principium, quàm circa medium, quàm circa finem, hoc est, si rem bonam svadeat, nec ad minus bonum impellat, quàm anima priùs sequi decrevisset, finis etià præfigatur bonus, nec ad ullum malū declinet, nullamq; annectat, & anima interrim in pace & tranquillitate relinquatur; cogitatio talis à Deo est, & pro Divina inspiratione est habenda.

His consideratis, reflecte te supra vocationem tuam, & facilè invenies, illam rectè se habuisse & circa principium, & circa medium, & circa finem. Quàm bona enim res per illam svasa tibi fuerit, metire sanctitate instituti tui. Finem etiam metire sublimitate finis eidem à S. Fundatore præfixi. Medium æstima ex mediorum præstantia, quibus Societas utitur, & tu in ea vivendo, uti teneris, ad finem tuum consequendū. Nullum hîc annexum, nullum latens malum, eti-

amfi Argo oculatior esses, deprehendes.

Quodsi existimas vocationem tuam ab hoste animæ tuæ suggestam esse, eò, quòd ad Societatem amplectendam, motus faceris spe aliquarum immunitatum, commodorum sensualium, vanitatum, oblectamentorum sensuum &c.

Noveris vocationē ip̄am secundū se à DEO fuisse, licet Dæmon tanqua interpellator pessimus se immiscuerit suggestionē mali finis, licet tritico hinc à cælesti Patrefamilias seminato, inimicus homo superfeminaverit Zizania. Nec superesse aliud, nisi ut intentionē corrigas, evellas Zizania, vanitates & commoda sensualia, aliaq; his similia contemnas, potiùsq; his contraria exoptes, illumq; finē unicè intendas, ad quem est instituta Societas. Qua facta correctione intentionis, metū omnē deponere circa tuæ vocationis reſtitudinē, huncq; ipsum metū scias fraudē & tentationē diaboli esse, illo proinde abjecto, in tranquillitate conscientiæ DEO in Societate sanctè servire stude.

Solent subinde aliqui in vocatione inconstantes prætereundere. à suis Promotoribus se ad Societatem eligendam inductos esse, ipsorum persuasione admissionem petiisse, ac etiam religionē ingreſſos esse, adeòq; vocationē suā non ex DEO sed ex hominibus fuisse. Hæc prætenſio Promotoribus imprimis injuriosa est. Hoc enim legibus nostris specialiter cautum est, ne Professores quenkū suorum discipulorum ad Societatem nostram alliciant, idem in universum, prohibitum est & alijs, quamvis confessarij consilium dare possint petentibus, & eas Religiones vel monasteria proponere, quæ illis magis commoda in Domino judicaverint. In examine etiam admittendorum, de hoc expressè inter alia inquiritur, an à quopiam nostrorum non s̄ motus, & inductus ad Societatem eligendam. Hasq; sanctissimas leges obſervari, illi solum negant



gant, qui, ut dimissionem à Societate extorqueant, se inductos esse prætendunt, vel qui non distinguunt inter datum petenti consilium, & inter studiosam inductionem ad amplectendum tale vitæ genus.

Deinde eadem prætensio injuriosa est DEO & vocationi ejus. Hoc enim gratis concessum, quod quispiam inductus fuerit à quopiam à nostris ad hanc determinatè religionem eligendam, v. g. ad Societatem JESU amplectendam, hinc omnino non sequitur talem vocationem à DEO non fuisse; hæc siquidem minimè sibi repugnant, vocationem aliquam ex svasione humana, simulquæ ex DEO & à DEO vocante esse. Si enim quod sit persuadentibus hominibus, non esset unquam à DEO vocante, verum esset primos Christianos ad sanctam fidem non fuisse à DEO vocatos, quod sancti Apostoli ipsam ipsdem persuaserint; verum erit, conversionem Ninivitarum non ex DEO fuisse, siquidem hi, ad prædicationem Jonæ, poenitentiam egerunt. Et in universum, alias conversiones, ad prædicationem concionatorum, vel occasione pij alicujus colloquij cum viro sancto, vel consilij accepti secutas, non esse conversiones vocante & excitante DEO. Nunquid non utitur DEUS hominibus ut instrumentis, ut alios ad se attrahant. Verius opinaberis, si senseris, DEUM usum fuisse tuis Professoribus, Promotoribus etc. ut per eos tanquam per suas linguas te ad Societatem vocaret & adduceret. Talis omnino sensus fuit Patri Gasparis Barzæi, qui in quadam Epistola ad socios Conimbricenses data, magnum vocationis suæ ad Societatem pretium exaggeratè testatus, inter alia hæc scribit: *Quantum debet hic peccator Gaspar ( se ipsum intelligit ) Patri Magistro Simoni, Joanni, & Morales, qui me propè invitum ad Societatem pertraxerunt. Quid retribuam*

tribuam Domino pro omnibus qua retribuit mihi? prater admirationem & lacrymas, quod reddam, nihil suppetit. Ad hæc, in Tyrocinio constitutus, post tot sancta lumina, post cognitum finem tuæ creationis, comparatâ pleniorē Instituti Societatis notitiâ, agnovisti clarè medium ad finem tuæ creationis consequendum maximè opportunum esse vitam in Societate transactam seu transigendam; dicere proinde debueras ad imitationem Samaritanorum, ac etiam nunc dicere debes. Non propter meorum Promotorum loquelam & consilia, vocationem meam amo & æstimo, sed quia ipse clarè perspicio, quòd hæc sit unica via, quâ ad salutē pervenire debeo, hanc teneo, neq; ab illa unquam desistere volo.

Hæc considerans, concludere apud Te, quòd à DEO vocatus sis ad Societatem JESU; quòd hæc Divina voluntas sit & fuerit, ut castra Christi sequereris, ut huic Duci in Societate ejus adhæreas. Et quòd hanc circa te dispositionem, non caro & sanguis tibi revelaverit, sed Pater qui in cœlis est. Redde iterum pro tali beneficio Divinæ Providentiæ gratias. Misericordias DEI agnosce dicendo: Misericordias Domini cantabo, qui me in hanc Societatem adlegit, fecit mihi magna, qui potens est, quando me de sæculi luto ereptum, collocavit cum Principibus populi sui.

PUNCTUM III Audi illa verba Lucæ 9. Nemo mittens manum suam ad aratrum & respiciens retro, aptus est Regno DEI. Et hæc intellige eo sensu, quo illa intellexit D. Bernardus. Is in Epistola sua 10. ad Robertum nepotem, Monachum Cluniacensem, intelligit ea de his, qui vitam Religiosam profitentes, post facta religiosa vota, vitæ religiosæ pertæsi, eandem deserunt, dicitq; tales non esse aptos Regno DEI & de e-

orum.

orum salute multum debere metui existimat. Nec immerito, tales enim sunt canes illi redeuntes ad vomitum, quibus dicitur: *foris canes*. Illi dirumpunt vincula, quibus trahendi erant ad DEUM in caelo possidendum.

Christus Regnum caelorum non parat nisi ijs, qui cum Christo permanserunt & permanent in tentationibus, qui cum Christo permanent in Cruce, quantumvis graves patiantur tentationes, quibus tentantur, ut ex cruce descendant, & crucem deferant, hoc est, ut vitam Religiosam, cui tanquam cruci per religiosa vota tanquam per clavos affiguntur, deferant. Ut descendas de Cruce hac, tentat te caro, tentat mundus, tentat diabolus; tentant vero vanitatibus, spe vana honorum, Divitiarum, voluptatum, commodorum sensuallium, tentant subinde fucatis & apparentibus majoris Glorïae Divinæ promissionibus. Si non cedas his tentationibus, sed cum Christo in ipsis permaneas, si in cruce religiosa perseveres, parat & disponit tibi Christus Regnum caelorum. Descendis de hac cruce? redis ad saeculum? deferis Sanctam JESU Societatem? frustra tibi blandiris, si regnum caelorum appromittis. Desertoribus Angelis ignis æternus paratus est. Time ne in te & de te verificetur, quod dictum & impletum est in Juda Iscariote, præcipuo Societatis JESU desertore. Prævaricatus est ille de Apostolatu suo, hoc est de gratia Vocationis ad Apostolicum vitæ genus, ut abiret in locum suum, hoc est in locum, qui conveniebat Filio perditionis.

Certè ad hoc, ut quis salutem æternam consequatur, necessarium omnino est, ut non moriatur in statu peccati mortalis, sed potius ut moriatur constitutus in gratia sanctificante, in eaq; finaliter perseveret, et ut ex hac vita decedat in poenitentia finali, & Charitate DEI. Porro qui

13. B4 post

post emissa religiosa vota, Societate deferunt, & ab ea sine iustis & sufficientibus causis dimissionem extorquendo, recedunt, communiter mori consueverunt in statu peccati mortalis, & sine vera & finali poenitentia, atq; sine gratia sanctificante decedunt. Deferendo enim vocationem sine iustis causis, gratiam sanctificantem miserè perdunt, quia per convulsionem votorum religiosorum, & promissionis, vim & rationem voti habentis, de vita in Societate perpetuo agenda, graviter & mortaliter peccant, atq; in hoc peccato ad mortem usq; perseverant, nec de hoc peccato veram ac seriam poenitentiam agunt. Si enim poenitentia illorum seria, & prout oportet ad salutem, esset, deberent reparare quod ab ipsis pessimè actum est, adeoq; deberent ad Societatem redire, quam indebitè & nulliter dimiserunt, vel cum dimissio eorum, causis non veris, fraude aut dolo, aut gravibus delictis ea mente perpetratis obtenta, per leges & declarationes Societatis, ipsis optimè notas, quia sæpius omnibus intimari solitis, sit nulla & irrita, deberent sibi consulere & media adhibere, ut dimissionem, quæ coram Deo valeat, obtineant, quod rari sunt qui faciant. Huic peccato plurima alia accumulanti, dum ligati votis taliter atq; si iisdem soluti essent, more sæcularium vivunt, gravissimisq; criminibus suas innodant conscientias, ac morte deinde superveniente, non solum sine fructuosa poenitentia, sed etiam in desperatione de obtinenda venia & salute decedunt; in hoc etiam Judam, infelicem Societatis JESU desertorem, imitati, qui pariter desperationis laqueo vitam suam infelicitè ac miserè finivit. Hujusmodi igitur desertores Societatis, non sunt apti regno DEI, sed ab hoc excluduntur & in locum Judæ, hoc est in æternum desertoribus Angelis præparatum supplicium abeunt.

*Sed*

Sed fortassis, his suæ vocationis desertoribus spem bonam faciet, data ipsis à votis Religiosis absolutio, & dimissio talia ex legitima Præpositi generalis Auctoritate. Caterum monet Bernardus in citata Epistola ad Robertum Monachum, qui etiam obtenta Apostolica absolutione & concessione, à Cisterciensi, ad Cluniacensem Ordinem transierat, non esse fidendum tali absolutioni *Dicit enim perituram ejus animam, fieriq; supra modum peccatum peccans.* Et statim addit: *Quid tibi frustra quispiam blanditur de Apostolica absolutione, cujus conscientiam Divina ligatam tenet sententia. Nemo mittens manum suam &c.* Multo minus fidendum est absolutioni à votis, ijs qui è Societate JESU sine rationibus justis ad sæculum redeunt. Absolutio talium desertorum à votis, solvit eos votis coram hominibus, & in foro externo. Sed coram DEO ligatam conscientiam Divina tenet sententia.

Colloquium instituitur ad Beatissimam, per cujus Patrocinium suppliciter postula, ut in Societate JESU Filij ejus, Cruci ipsius confixus, moriaris, & ut materna illius protectione adversus omnes tentationes defensus, ad Societatem triumphantem pervenias.

*In fine: Ave Maria.*

## Meditationes

In Triduo Collectionum ante primam Votorum renovationem Faciendæ.

## Meditatio I. De Votorum & Spiritûs Renovatione.

*Preludium 1.* Imaginare Sanctissimam Divinarum Personarum Trinitatem, Sacratissimam Christi humanitatē, Pretiosissimam Virginem DEI Parentem, & curiam cælestem universam, non solum renovationi votorum à te faciendæ interfuturam, sed etiam præsentī tuæ meditationi, omnibusq; tridui sequentis actionibus speciali modò interesse præsentem; In hisq; tuum fervorem, tuum animum, tuam intentionem spectare, suumq; gustum explorare velle.

*Preludium 2.* Pete uberem gratiam, ad hæc omnia cum gustu & beneplacito Divinæ voluntatis, & dignè conspectu cælestis curiæ, peragenda.

**PUNCTUM I.** Considera Renovationem, quam Societas, in suis Domibus & Collegijs, bis in singulos annos fieri & institui sanctissimè voluit, duplicem esse. Unam Renovationem Votorum religiosorum, alteram Renovationem Spiritûs. Renovatio Votorum, est eorum votorum, quæ post expletum biennium tyrocinij nuncupavimus, & per quæ nos obligavimus ad servandam in Societate perpetuam Paupertatem, Castitatem, & Obedientiam, & ad ingrediendam eandem Societatem, per acceptationem gradus illius, in quo unumquemq; nostrum hæc ipsa Societas per Adm. R. P. Nostrium Generalem constituere volet. horum, inquam, Votorum est iterata & repetita nuncupatio. Finem duplicis hujus renovationis, propter quem illam fieri voluit S. Pater noster **IGNATIUS**, sequentibus verbis expressit part. 4. Constit. Cap.



Cap. 4. Num 5. *Ad Devotionis augmentum, & ad excitandam, quâ DEO obstricti sunt, obligationis memoriam, & ad majorem in vocatione confirmationem, bis, annis singulis, simplicia vota congruum erit renovare.*

Utraq; hæc Renovatio, inter alias, duas has etiam habet proprietates.

*1<sup>am</sup>* Quod habeat vim & totam rationem primæ nuncupationis & emissionis votorum, ita, ut licet non inducat novam & diversam obligationem, inducat tamen eam ipsam, quam inducit, vel de se nata est inducere prima nuncupatio.

*2<sup>da</sup>* Proprietas Renovationis votorum est, quod quævis renovatio suppleat omnes defectus & vitia, si quæ fortè contigerunt in primâ votorum nuncupatione, ob defectus ætatis requisitæ, biennii Novitiatus, & alios similes, omnesq; tales defectus, postquam cessarunt, consveta votorum renovatione emendantur.

His consideratis, recogita. Quantæ dignitatis & æstimationis apud Religiosos Societatis debeat esse hæc renovatio. Si prima votorum nuncupatio habetur pro re maximè sancta, maximè necessaria ad finem vocationis hominis Religiosi, si diem primæ nuncupationis votorum bonus religiosus observat, tanquam natalem, quo DEO & Religioni natus est, quo primò cæpit esse Religiosus, si diem hunc existimat esse diem suæ desponsationis, quo per vota Religiosa, anima ejus DEO desponsata est. In pari observatione, & æstimatione debere esse renovationem, quâ prima vota renovamus.

Recogita iterum & reflecte te, quâ devotione, qua animi resolutione, tuiq; victoriâ, qua præpatione, primò vota tua nuncupasti, pari devotione, resolutione, & animi sensu, simili præ  
m illa

missa dispositione & præparatione, eadem vota nun̄ renovare aude. Imò si fortè prima nuncupatio remissè, negligenter, defectuosè facta est, nunc supplere & corrigere velis hos defectus.

Resolve te ad hanc renovationem omni meliori modo faciendam, Deoq; quàm maximè per eam placendum. Propone adhibiturum te media ad hunc finem cōducentia, præmissurū præparationes, quas Societas à nobis hoc tempore præmittit, exigit, idq; propone, hæc te præmissurum non ex more & consuetudine, non ex aliqua indeclinabili necessitate, sed ut gustum expleas Divini beneplaciti, conformiter ad exempla tot nostrorum, qui hujusmodi renovationes magno fervore, devotione, & sanctitate peragere soliti fuerant.

Ora S. Patrem tuum, S. Franciscum Xavierium, & alios primos Patres Societatis nostræ, ut in renovatione tuorum votorum, eum fervorem experiaris, eam intentionem habeas, ita omnia, tuamq; obligationem intelligas, atq; te obligare velis, quo fervore illi, qua intentione, quo sensu, & qua obligandi se voluntate, sua vota in monte serrato nuncupârunt.

PUNCTUM II. Considera Renovationem in Societate non esse præcisè & unicè, repetitam votorum nuncupationem, sed debere esse etiam Renovationem spiritûs, totiusq; hominis reformationem in melius. Considera et illud: hanc ipsam spiritûs renovationem, in eo stare, ut nos exuamus veterem hominem.

Homo vetus qui exuendus est, nihil aliud est, nisi homo terrena sapiens, sapiens ea quæ carnis sunt, quæ mundi sunt, non percipiens verò ea, quæ sunt spiritûs, quæ sunt salutis animæ, idq; non percipiens hæc practicè, licet fortè speculativè ea cognoscat & intelligat. Homo vetus, est  
homo

homo propriorum commodorum, & eorum quibus sensus oblectantur, sectator, homo vanus, suis obsequens concupiscentijs, homo passionû immortificationarum, amoris proprii servus & mancipium; homo vetus, est Belial, hoc est absq; iugo, iugum excutiens legis Divinæ, obligationis votorum, Regularum & disciplinæ religiosæ, aliterq; vivens, quam à se exigant recta ratio, lex Divina, & Regulæ proprii Instituti. Homo vetus deniq; est, homo Christo, ejus exemplis, doctrinæ, consilijs, quaqua ratione contrarius & oppositus. Hic igitur vetus homo, per præsentem votorum & spiritûs renovationem est exuendus.

Exiit verò per constantem & fortem tentationum victoriam, quibus aliquis succumbere solitus fuerat, per passionum & carnis mortificationem, per debellationem sensualitatis & amoris proprii, per eradicationem pravarum, vel certe nostro instituto minùs conformium consuetudinum, & habituum, per exactam votorum & regularum observationem, per Christi humilis, obedientis, contempti, patientis imitationem.

Hæc considerans, reflecte te supra antea vitam tuam, & recogita, an non reperiat in te homo vetus. Vide quæ emendare potissimum debeas, quas tentationes superare, quam rationem in his superandis tenere, quæ adhibere media. Tecum dispice, quæ passiones dominantur, quæ maximè mortificationis ferro egeant, quæ consuetudines sint eradicandæ, contra quæ vota, contra quas regulas, facilius delinquis? Christo, ejusq; sanctissimis exemplis, quam sis dissimilis? Resolve te ad hæc corrigenda, age pœnitentiam, & detestare antea vitam tuam, per animosam confessionem deponere quicquid gravat conscientiam tuam, per sancta & firma proposita obfirma te contra tentationes, quibus impu  
gnari

gnaris, contra consuetudines, quibus obnoxius es, contra defectus quos commististi.

PUNCTUM III. Considera per renovationem spiritûs ita debere exui veterem hominem, ut simul induamur novum.

Novi hominis, quem induere debemus, exemplar & ideam, in seipso exhibuit nobis & expressit suâ Doctrinâ, suis virtutibus, exemplis & consilijs, Dominus noster JESUS Christus, descripsit nobis Spiritus Sanctus, digitus Paternæ dexteræ, per S. Patrem nostrum IGNATIUM, in Sanctissimis Societatis Constitutionibus. Descripsit insuper idem Spiritus Sanctus per sua lumina, sanctas illuminationes & inspirationes, per proposita in tyrocinio, collectionibus, & meditationibus à nobis concepta & formata. Hunc hominem novum efformare in nobis nititur gratia Divina, in quotidianis meditationibus, examinibus, alijsq; exercitijs spiritualibus.

Talem novum hominem induere hoc maxime tempore debemus, nimirum debemus induere talem hominem, qualem nostra poscit vocatio, qualis nostris regulis & constitutionibus depictus atq; delineatus est. Indui debemus verum JESU Socium, debemus indui vestibus & insignibus Domini nostri JESU Christi, pro ejus amore ac reverentiâ, ut velimus contumelias & injurias pati, ac stulti haberi & existimari, ut ipsi assimilemur, eumq; imitemur. Indui debemus ipsum Dominum nostrum JESUM Christum, & serio adlaborare, ut in nobis formetur Christus, Christus humilis, Pauper, Castus, Obediens, non solum Patri æterno, sed etiam Matri Sanctissimæ, sed etiam Sancto JOSEPHO, & cuicunq; alteri potestati obediens usq; ad mortem, idq; mortem Crucis, ut formetur in nobis Christus in Cruce sua constantissimus, & in vocatione sua usq;

usq; ad finem perseverans , ita , ut ne propter salutem quidem principum sacerdotum totiusq; gentis Judæorum , ut in ipsum crederent , de cruce descendere voluerit . Laborandum est , ut formetur in nobis Christus patiens incommodorum , injuriarum , & quorumvis adversorum tolerantissimus . Christus mitis & mansuetus , orationi , in qua etiam pernoctare solitus fuerat , maximè deditus , conformis in omnibus voluntati Patris æterni . Curemus , ut has aliasq; virtutes Christi , imitatione in nobis exprimamus .

Hac ratione induemur novum hominem , induemur Christum , imò in ipsum transformabimur . Transformatio hæc , opus est præstantissimum , tuæ vocationi , perfectioni , & saluti , maximè consentaneum & summè necessarium . Hoc opus in præsentī triduo aggredere , hoc deinceps toto vitæ tuæ tempore perficere stude . Hæc unica sit tua cura , ut Christi exemplis & vestigijs , insistas , & in novitate vitæ semper ambules .

Colloquium ad Patrem æternum , cui supplica humillimè , ut sicut per generationem æternam filium unigenitum sibi simillimum generavit , eiq; suas omnes perfectiones per identitatem in natura communicavit , ut te quoq; suis gratijs per hoc triduum ac totâ deinceps vitâ tuâ liberaliter in te effundendis , faciat conformem imaginī Filij sui , quatenus per vota religiosa , eorumq; observationem , ipsi arctissimo & nunquam dissolubili vinculo vnionis conjungaris , Sanctitatisq; Filij ejus Incarnati , ac virtutum suarum per imitationem particeps efficiaris , atq; hac ratione exuens veterem hominem , ipsum Christum induaris , in eumq; perfectè transformeris . Conclude affectu , Sancto Patri tuo usitatissimo .

*Anima Christi.*

**Medi-**

## Meditatio

### De Renovatione exterioris & interioris hominis.

*Prælia* eadem quæ Meditationis præcedentis.

PUNCTUM I. Considera in præsentī spiritus & votorum Renovatione renovari debere & Extēriorem, & Interiorem hominem.

Exterioris hominis Renovatio stat potissimum in exteriorum animæ potentiarum, seu sensuum nostrorum reformatione. Absq; hac & innovatio interioris hominis & per consequens renovatio spiritus nullatenus obtineri potest. Si portæ patentēs sunt, impediri difficilē potest hostis, ne animam occupet, & tanquam in suam intret domum, ne vetus homo cum suis concupiscentijs sedem suam in tali figat anima, ne intret mors, ne intret peccatum. Claudantur sensuum portæ & custodiantur, in pace erunt omnia. His januis clausis veniet in animam Dominus JESUS Christus, veniet novus homo.

Custodiatur lingua, ponatur custodia ori per Regulæ silentij accuratam observationem, dum medium silentium tenebit omnia, Omnipotens sermo Divinus, Verbum æternum, de regalibus sedibus veniet, in anima hominis religiosi residet, eamq; donis suis, gratijs, virtutibus & meritis locupletabit. Qui non refrænat linguam suā, ejus vana est Religio. Multum vanitatis, parum virtutis est in religioso linguam suam non refrænante. Religiosus garrulus & loquax, est Virtutibus vacuus, deficit in humilitate, quæ est, fundamentum totius Religiositatis, deficit in Charitate, deficit in mansuetudine alijsq; virtutibus, factus est



est velut æs sonans, aut cymbalum tinniens. Talis Religiosi vana est religio. In multiloquio non deest peccatum; ubi multiloquium, ibi multi sunt defectus, ibi vetus homo.

Sine custodia etiam oculorum, aurium, aliorumq; sensuum, non ambulamus in novitate spiritus. Pepigisti fædus cum oculis tuis, ut non aspicias mundum & ea quæ mundi sunt, quæ te à Deo avertere possunt, ut terram plerumq; & subinde etiam mente ad Deum elevata, cælum intuearis, exclusisti ab anima hostem, qui ipsam deprædaturus erat, exclusisti veterem hominem, veterem Adam, qui pomum vetitum, eò quòd esset pulchrum visu, intuitus, illudq; comedens, & se, & totum perdidit genus humanum; induisti Christum, expressisti in te imaginem matris Beatissimæ, Matris & Virginis modestissimæ. Sis affectus huic imagini, eam tenerimè ama & appretia, cura ut in te sit perfectissimè expressa. Hæc tibi placeat semper, quæ in te specialiter Deo, Christo, matri ipsi sanctissimæ, bonis omnibus, imò malis etiam placeat, quæ te in omnium oculis, non solum novum hominem omnibus amabilem, sed etiam Angelum Dei, imò & ipsum Christum, & Dei filium facit.

His consideratis, fac reflexionem supra anteriorem tuum hominem, qualis ille hætenus fuerit. Quæ linguæ tuæ, quæ oculis, quæ alijs sensibus à te adhibita est custodia? Erubescere ac desle tuam miseriam. Recogita quanta tibi damna sint illata, imò non tibi tantum, sed & tot alijs per tuam garrulitatem! quot non solum defectus sed etiam peccata commisisti? Recogita & illud, an oculus tuus non sit deprædatus animam tuam? An portâ hâc patente non introierit in Animam tuam vetus homo? an per hoc o-

C.

stium

stium hians non abiverit novus homo, Christus, gratia illius, virtus, Religiositas? an per januas sensuum non custoditorum non recesserint à te? Obarma, obfirma te propositis, ad reformandas has potentias, ad sensus tuos melius deinceps custodiendos. *Pone Domine custodiam ori meo. Averte oculos meos ne videant vanitatem. Separa aures meas spinis.*

PUNCTUM II. Considera in hoc triduo ut perfectam spiritus Renovationem consequaris, non solum exteriorem, sed etiam interiorem hominem debere te renovare.

Homo interior potissimum consistit in dubus animæ nostræ potentijs interioribus & spiritualibus, nimirum in intellectu & voluntate; adeoq; ut interior homo renovetur, debere renovari intellectum & voluntatem.

Intellectus Renovationem singulariter nobis commendat scriptura illis verbis ad Ephes. 4. *Renovamini spiritu mentis vestre.* Hanc consequemur, si effecerimus, ut à nostro intellectu procul sint cogitationes vanæ, fastuosæ, superbæ, quæ Angelum lucis in satanam transformant, cogitationes quâquâ ratione etiam remotè puritati Angelicæ repugnantes, cogitationes inobedientes, sæculares, & quæcunq; aliæ homini religioso non convenientes, ipsumq; dedecentes.

Potissimum tamen intellectus noster renovabitur & reformabitur rind si semper illi Deus præsens obversabitur, si hoc præcipuum nostrum fuerit studium, ut DEUM habeamus intellectui nostro præsentem, & obversantem in omnibus nostris actionibus, eumq; mentis oculis inquæamur, & ad ejus laudem & gloriam omnia referamus. Hæc continua Dei præsentis memoria non solum nos novos, sed etiam perfectos homines efficit, secundum id, quod Abraham dictum est.

est. *Ambula coram me & esto perfectus.* Hæc nos reddit fortes contra omnes hostium animæ nostræ insultus, contra quascunq; tentationes robustos & invictos. Hæc facit, ut simus Angeli qui semper vident faciem Patris, qui in cælis est.

Reformabitur intellectus, si eidem quàm frequentissimè obversetur Christus crucifixus, si ante te fuerit pendens vita tua, si irretortâ mentis tuæ palpebrâ aspicias in Authorem fidei & consummatorem JESUM, qui proposito gaudio sustinuit crucem confusione contempta; si intuearis sanctissimum illud exemplar in Monte Calvariæ tibi monstratum, illiq; in omnibus tuis actionibus te conformare, easdem actiones passione Christi dignificare, illiq; unire studueris.

2dò Intellectus renovabitur per renovationem nostrarum meditationum, quæ ipsæ renovabuntur, si fiant eâ attentione animi, & Potentialium applicatione, quam in nobis desiderat S. Pater noster IGNATIUS, & Sancta Mater Societatis. Si juxta additiones & annotationes ejusdem Sancti Patris, & juxta doctrinam in tyrociniis nobis traditam, meditationes nostras instituerimus; eumq; ex ipsis fructum quænaverimus, qui percipi potest & solet per has rectè institutas. In his, nisi velimus deesse gratiæ Divinæ, facile exardescit ignis, qui non solum vitia excoquit, sed in Cherubinos, Seraphinos, & in cælestes nos transformat Intelligentias, ut nihil sapiamus nisi DEUM, nihil amemus nisi DEUM, DEUM in Omnibus quæramus. Æstimemus horam meditationis, sicut illam æstimavit magnus Societatis nostræ Theologus P. Franciscus Suarez, sui ævi alter Augustinus, qui potius tantæ suæ doctrinæ jacturam præelicebat, quam jacturam unius horæ meditationis. Pro grandi piaculo habeamus, hanc aliquando intermittere. Periculosum nobis omni-

nò sit, per nihil nos faciliùs à perfectione hominis religiosi, novi hominis, veri JESU Socij, imò etiam (quod avertant Superi) à vocatione religiosa, & in ea perseverantià defecturos, quàm per neglectum orationis & intermissas meditationes.

3<sup>tiò</sup> ad Renovationem intellectùs confert plurimum debitus Examinum conscientiae usus, esq; spirituali profectui maximè accommodatus, Examinum inquam, non solum, generalium sed etiam particularium. Particularis Examinis usus, utpote proprium S. Patris nostri inventum, filijs ejus, nisi velint à Sancto suo parente desistere, maximè deberet esse familiaris. Per duo hæc examina, tanquam per efficacissima media, in novos transformamur homines.

4<sup>to</sup> tandem ad innovationem intellectùs etiam hoc desiderari potest, ut ipsa literarum studia, quæ in Societate, intellectus nostri sunt præcipua occupatio, & ad quæ nos interim applicat Societas, tractemus juxta mentem, spiritum, & intentionem Societatis, ut non aliam rationem in addiscendis literis & scientijs teneamus, nisi præscriptam pro usu sive discipulorum sive docentium rationem studiorum.

His consideratis, reflecte te supra singula. In quo tuus interior homo, in quo intellectus reformatione indiget? An frequenti DEI & Christi Crucifixi memorià delecteris, eaq; ad perfectionem & profectum in virtutibus exciteris? quò fervore, quà diligentia & applicatione meditationes instituas? qualiter hora illis concessa decurrat? an non fument tunc cogitationes vanæ, otiosæ, disparatæ & alienæ? an certè exardescat in ipsis ignis Divinus? Examina conscientiae quàm sanctè, quò successu, & quò fructu fiant? Examinis particularis usum quàm pridem intermiseris? an sis constans

stans in eo his singulis diebus faciendo ? An deniq; in tuis studijs rectam intentionem habeas, an in his DEUM, gloriam ejus, & salutem animarum quæras ? an vanitatem, an te ipsum & vanos plausus ? An cures fervare ea, quæ circa modum studendi, docendi, leges nostræ præscribunt. Fat proposita accomodata, gratiamq; Divinam implora.

PUNCTUM III. Considera, ut renovetur interior homo, voluntatem quàm maximè renovari debere. Hæc siquidem, propter corruptionem naturæ nostræ per peccatum originale causatam, à prosequendo bono vero & honesto, à DEO amando, a primævo fervore, à virtute & perfectione facillè desecit. Cum bona æterna, supernaturalia, ad salutem pertinentia, voluntas frequenter contemnat, caduca verò, transitoria, in perniciem nos trahentia, facillè sectetur, veterem in nobis assiduò format, retinet, & conservat, novum autem expellit hominem. Quare in voluntate reformanda plurimùm & in desessò studio est laborandū, indicendum est bellum amoris proprio, amoris rerum terrenarum, amoris creaturarum, expugnandæ pravæ animi affectiones; his enim nonnisi expugnabitur vetus homo, & novus induetur.

Porro voluntas nostra reformabitur, quando conformabitur voluntati Divinæ. Ad reformandam & renovandam voluntatem opus est, ut reguletur in omnibus suis actibus Lege æterna, Præceptis Dei & Ecclesiæ, legibus & regulis Societatis, dictamine conscientie recto, consilij Christi, illustrationibus & inspirationibus Spiritus Sancti.

Innovatur etiam voluntas, per frequentes Amoris Divini aliarumq; virtutum Theologicarū & moralium actus, per intentionem placendi soli Deo, eum laudandi, divinamq; ejus quærendi gloriam



gloriam, per talis intentionis frequentem renovationem, per contemptum respectuum humanorum, per odium sui ipsius.

Innovant voluntatem frequentia & ardentia ad DEUM suspiria, ignitæ ejaculatoriæ orationes, ardens proficiendi semper in melius desiderium.

Recollige te, an utaris his medijs renovandi tuam voluntatem. Ab hoc tempore incipe. Constitue tempora pro eliciendis & frequentandis huiusmodi actibus; dispone ascensiones ad DEUM in corde tuo.

Colloquium ad Filium æternum Incarnatum, à quo suppliciter petes, ut, qui hominem renovaturus, hominem assumpsit, meritisq; suis infiniti valoris, gratias ad hunc finem opportunas promeruit, ut inquam, suæ passionis & meritorum fructum tibi applicet ad te innovandum, ut, pro te homo factus, & exteriorem & interiorem tuum hominem, in hominem novum, imò in seipsum transformet, suarumq; virtutum exprimat in te imaginem.

Concludes illo affectu: Suscipe Domine universam libertatem meam etc.

## Meditatio

### De Renovatione Voti Paupertatis.

*Preludia eadem, quæ duarum præcedentium Meditationum.*

PUNCTUM I. Considera, in triduo hoc Renovationis à Societate concessio, ante iteratam ab omnibus renovaturis faciendam votorum simultaneam morè Societatis nuncupationem, debere



ab unoquoq; ex renovaturis singula vota renovari per correctionem defectuum, in cujusvis observatione, superiori semestri & ante, commissorum. Singula vota, & eorum renovatio, erunt materia sequentium meditationum. Et præsentis quidem Meditationis erit materia & objectum, votum paupertatis. Circa quod votum in hoc puncto considera sequentia.

1<sup>mo</sup> Naturam voti simplicis Paupertatis, quale post biennium Novitiatus emittunt nostri scholastici, talem esse, ut, licet per illud non extinguatur nec auferatur jus ad bona quæcunq; sed maximè immobilia, quæ quis in sæculo habuit, & quibus ante ingressum in Societatem se non abdicavit, sed potius, vovens in Societate paupertatem, talium bonorum retineat Dominium; per idem tamen votum exuat se administratione omni talium bonorum, nec licitus sit illi ullus eorundem ullus, ita, ut nec distribuere, nec donare, nec abdicare illis seipsum possit proprio arbitratu, sed nonnisi cum facultate & assensu superiorum, de illis disponere debeat in pias causas, & per modum Eleemosynæ. In propriam verò utilitatem, nec bona ipsa sua, nec fructus illorum convertere potest, ita, ut nec facultas ad id per leges nostras ipsi concedi debeat.

2<sup>do</sup> Natura hujus voti est, quòd vi illius scholasticus, vel alius quisq; teneatur suis illis bonis in sæculo habitis, eorumq; dominio se abdicare, cum primum illi, sive per leges Patrias, sive per leges Societatis licuerit, dependenter à facultate & concessione superiorum, & juxta modum legibus Societatis præscriptum.

3<sup>tiò</sup> Natura ejusdem voti est, quòd vi illius religiosus sit incapax dominij supra bona & res quascunq;, quas, in religione existens, ex eleemosynis, donationibus, & alijs titulis acquirit,

etiãsi capax sit dominij bonorum, quæ viâ successiõis naturalis interea in eum devolvuntur. Non habet quoq; Religiosus dominium bonorum & rerum Societatis, ac ipsius cujuscunq; Domicilij; sed hoc totum & plenum dominium est penes ipsam Societatem, administratio verò penes superiores, usus autem penes privatos, pro ut hanc ipsis superiores concefferint.

4<sup>to</sup> Considera, non solum usurpationem rei tanquam propriæ, sed etiam merum utum rei sine superioris concessione, esse contra obligationem voti religiosi Paupertatis, talemq; usum esse peccatum grave vel leve pro quantitate materiæ, hoc est, pro quantitate rei habitæ vel usurpatæ. Porro quantitatem sufficientem ad culpam mortalem declaravit Societas esse illam, quæ furto sublata, esset sufficiens ad constituendum peccatum mortale, contra septimum præceptum; imò statuit, ut culpa circa talem quantitatem esset Casus in Societate reservatus.

His consideratis, reflecte te supra tuam paupertatem. Recogita, quæ sit tua obligatio circa bona hæreditaria & Sortem legitimam te concernentem, an huic obligationi in aliquo non contraveneris? Quòd si circa hæc bona servas interea leges Societatis, vide tamen, ne contra eas & obligationem tui voti quidpiam aliquando committas.

Reflecte etiam te, an, si vè per leges Societatis, si vè per leges patrias, non possis jam te abdicare tuis bonis? Si quadriennium vitæ tuæ religiosæ jam implevisti, per leges Societatis potes jam, & teneris abdicare te tuis bonis, nisi superioribus aliter visum fuerit.

Reflecte insuper te supra reculas tuas, quas habes ex donationibus, eleemosynis, alijsq; titulis similibus, an non sit aliquid majoris & notabili

bilioris quantitatis, an non sit aliquid sine facultate? Etiam usum & usurpationem rerum minoris quantitatis sine facultate, nè contemne; talium enim rerum usus, est saltem venialiter peccaminosus; timendum etiam est, ne, sicut per repetita parva furtiva potest perveniri ad eam quantitatem, quæ sit sufficiens ad peccatum mortale, & ut peccetur mortaliter; ita per frequentes rerum parvarum usurpationes contra paupertatem, perveniatur ad quantitatem sufficientem ad peccatum mortale contra Votum Paupertatis. Exhorresce tantum malum.

Elice affectus huic materiæ & tuæ conscientiae accommodatos. Fac proposita, observaturum te exactè votum paupertatis, conformiter ad obligationem tuam, omnia intelligendo juxta ipsius Societatis Constitutiones.

PUNCTUM II. Considera, cum vitam hanc mortalem nullatenus possimus ducere absq; usu aliquarum rerum creatarum, ad ejusdem vitæ sustentationem necessariorum; neq; enim sine cibo, potu, indumentis esse possumus, quoad vivimus, proindeq; debeat nobis horum usus concedi, & defacto conceditur, absq; ulla voti paupertatis violatione; ut tutò & secura conscientia hac in parte procedatur, hæc in praxi esse tenenda.

1<sup>mo</sup> Quòd ex obligatione voti paupertatis omnia superflua refecari debeant, debereq; nos esse contentos solis necessarijs.

2<sup>do</sup> Ex ijs quæ videntur esse necessaria ad vitæ nostræ sustentationem, debere nos esse contentos rebus vilissimis, & quæ pauperibus maxime accommodatæ judicantur. Quare in Necessarijs quæcunq; singularitas, vanitas, aut sensualitas quæsitæ, ac etiam quivis excessus, repugnant puritati voti paupertatis.

3<sup>to</sup> Religiosum debere experiri subinde aliquos effectus sanctæ Paupertatis, patienter, sine murmurationibus, ac etiam libenter ferendo defectum rerum necessariarum; aut, si nostra necessitas expleatur rebus vilioribus, quam juxta Societatis morem à superioribus nostris provideri nobis soleat; cum & ipsi superiores, per talium rerum subtractionem, possint subinde probare suos subditos

4<sup>to</sup> Omnia Necessaria ad victum, vestitum, cubiculi suppellectilem, debere subministrari subditis, ab ipsorum superioribus, ex bonis & proventibus communibus, nec licitum esse ulli subditorum, ea sibi aliâ quacunque viâ quærere, aut per alios procurare, nec penes ipsos superiores esse, hanc illis facultatem dare.

His consideratis, reflecte te supra tuam suppellectilem, an sit illa pauperibus & paupertati accommodata, an in ea non reperiatur aliquid superfluum, an non aliquid pretiosum, aut vanitatis magis & curiositati, quam necessitati deserviens. Reseca superflua, pretiosa, vana; desidera cum vilioribus, imò cum vilissimis commutare, & ut efficacius id obtineas, à superioribus hoc ipsum postula.

Reflecte te an experiaris, & quo animo, fructus & effectus sanctæ Paupertatis. Per gratiam quidem Divinam, & superiorum providentiam, nunquam nobis necessaria desunt, dum tamen aliquando necessitas & indigentia naturæ nostræ vilioribus expletur & contentatur, nec suppeditantur ea, quæ sensualitati amorique proprio magis arrident, an tunc non prorumpas in murmurationes, an non habeas in eo casu tuas resolutiones, an non soleas jus naturæ prætere ad quærenda meliora in victu, vestitu, & cubiculi suppellectili, non contentus ijs, quæ tibi superiorum tuo-

rum Charitas, ex tenuibus proventibus suppeditat; scito tuas illas resolutiones non esse resolutiones rectæ Theologiæ & rationis, sed ex Cathedra pestilentiaë esse à satana dictatas. Jus illud naturæ quod prætendis, est vitiosus naturæ corruptæ appetitus, contra quem boni Religiosi pugnant, & tu pugnare, eumq; superare teneris.

Confundere, quòd matrem tuam sanctam Paupertatem sæpius afflixeris, quòd murum hunc tuæ Religionis, hoc propugnaculum concusseris. Propone redintegraturum te omnia, matrem hanc tuam, S. Paupertatem, filiali deinceps affectu amaturum, nec legem ejus unquam dimissurum.

PUNCTUM III. Considera Paupertatem religiosam non debere te profiteri merè exteriorem, quæ sit extrinseca carentia rerum superfluarum, pretiosarum, curiosarum, vanitatem redolentium; sed paupertatem tuam, debere insuper esse paupertatem internam, paupertatem Spiritus. Tali paupertati appromittitur Regnum Cælorum. *Beati pauperes Spiritu, quoniam ipsorum est regnum cælorum.* Hæc paupertate pauperes, ore ipsius Veritatis æternæ, Beati appellantur.

Porro paupertas Spiritus in hoc stare videtur, quòd Religiosus ad res illas, quæ suo usui conceduntur, non adhæreat affectu, nec cor ad ista apponat, quod ita hæc habeat, ut contentus sit futurus, si illi pro libitu superioris accipiantur, vel in deteriora commutentur, nec inde contristetur, vel minimè affligatur. Talem paupertatem commendat nobis S. P. IGNATIUS dum præscribit, ne ullâ re tanquam propriâ utamur, hoc est, ne ita afficiamur ut propriæ. Talis paupertas S. Gregorium Magnum pauperi Anachoretæ, in sanctitate, & merito exæquavit, imò supra hunc longè extulit, quòd Divitijs, quibus Sanctus hic Pontifex, pro ratione & conditione supremæ  
in

in Ecclesia DEI dignitatis affluebat, non afficeretur, nec cor suum apponeret, cum tamen Anachoreta, rei cuiusdam vili & miseræ in paupere suo tuguriolo repertæ, plus quam par est affectu adhæreret.

Reflecte te an hæc spiritus paupertas in te inveniatur? An ita careas rebus superfluis, vanis, prætiosis, ut has non desideres, non libenter habeas si offerantur. An non habeas in tuo cubiculo aliquid, v.g. Imaginem, Rosarium &c. cui ita afficiaris, ut si tibi acciperetur, inde perturbari te & affligi contingeret. Erubescere, & illud tibi ingemina: *Projecisti molem, vide ne arenam obruaris.*

Colloquium ad Spiritum Sanctum, tertiam Sanctissimæ Trinitatis Personam, cui supplica, ut igne illo suo, quo universum accendit orbem, purificet cor tuum, tuosque affectus, ut nulli rei creatæ affectu adhæreas, sed in solo DEO plene conquiescas, solusque DEUS sint universæ divitiæ tuæ & omnia.

*In fine: Suscipe Domine universam*

*libertatem &c.*

## Meditatio

### De Renovatione Voti Castitatis.

*Preludia* Eadem quæ meditationum præcedentium.

PUNCTUM I. Considera Castitatem, ad quam nos, per votum Castitatis, DEO in Societate obligamus, debere esse talem, ut in carne militantes, non secundum carnem militemus, sed potius contra



tra carnem, tanquam præcipuum eumq; domesticum & continuum hostem decertemus, ipsam cum suis concupiscentijs, rationi perfecte subjungentes. Item: Castitatem in Societate debere esse Angelicam, hoc est talem, ut quod Angeli habent per naturam, nos per virtutem & imitationem puritatis Angelicæ consequamur. Circa hanc S. Pater noster in suis Constitutionibus in hæc Verba loquitur: Quæ ad votum Castitatis pertinent, interpretatione non indigent, cum constet, quàm sit perfecte observanda, nempe enitendo Angelicam puritatem imitari & Corporis nostri & mentis munditiâ.

Circa voti hujus observationem, tantò majore supra nos ipsos vigilantia opus est, quantò ob naturæ nostræ corruptionem, lapsus contra hoc votum consuevit esse facilius & gravior. In aliorum votorum materia licet possit dari parvitas & levitas, possintq; aliorum votorum transgressionibus excusari à culpa mortali propter materiæ levitatem, in voto tamen Castitatis non datur parvitas materiæ, ita, ut exigua etiam in re venerea delectatio, deliberatè quæsitâ, propter levitatem nullatenus excusare possit à mortali, ut docet, & docere tenetur Universa Societas.

Hæc considerans, reflecte te supra Voti hujus observationem. Si contra hoc votum, ut opinari licet, per DEI gratiam gravius non deliquisti, Divinam singularem circa te agnosce & adora Providentiam. Ex victoria de hoc tuo hoste, nimirum de carne tua, ne insolescas, neq; quidquam remittas de vigilantia supra te ipsum, & supra hostis hujus insidias. Præliare, bella Domini, continuo decerta, nec unquam quietem seu armistitium concede hosti, summâq; sollicitudine & diligentia invigila, ne ipsi in continuo hoc bello aliquando succumbas. Si virgo es, memineris

ris habere te thesaurum in vase fictili & fragili. Tibi ipsi diffide, atq; in timore & tremore custodi hunc Thesaurum, custodi vasis fictilis integritatem; simul tamen DEO & gratiæ ejus fide, ac spe in DEUM erectus, certus de adfuturo tibi cælesti auxilio, ulteriorem tibi de hoste hoc ominare victoriam, dicens cum Apostolo; *Omnia possum in eo qui me confortat.*

Quodsi quid contra voti hujus puritatem per humanam fragilitatem accidit, post lapsum quamprimum consurge; hoc beneficium est vocationis tuæ Religiosæ, quod in religione cadatur rariùs, surgatur velociùs. Age pœnitentiam, & corrige culpam; Religio utiq; est status Pœnitentiæ. Tali malo edoctus, sis in posterum cautior, sis vigilantior, & magno animo restaura prælium adversus hostem, victoriam de ipso reportaturus, si strenuè pugnaveris.

PUNCTUM II. Considera, cùm Societas nostra, ex vi suæ vocationis & finis ad quem est instituta, debeat non solum propriam, sed etiam proximorum salutem curare, adeoq; cum sæcularibus diversi etiam sexus & ætatis subinde agere, homines Societatis debere esse maximè præparatos & munitos contra tôt occasiones & tentationes, voto potissimum Castitatis adversantes, quæ ex conversatione cum varijs Personis accidere possunt, ne, qui alios ex cænò vitiorum extrahit, ipse coinquinetur.

Hoc Societas providentissimè præcavens, conversationes nostrorum cum externis, maximè verò cum sæminis, sanctissimis legibus circumscriptis: qualis est Lex illa, ut ad conversationes hujusmodi non exponantur nisi viri valde probati & prudentes. Item illa, ut nostri non permittantur mulieres invisere, nisi in magna necessitate, & cum spe magni fructus; ut dum inviluntur

tur quæcunq; personæ, semper sit præsens aliquis  
e nostris Socius; ut Professores Scholarum infe-  
riorum cum suis discipulis non loquantur, nisi in  
loco patente, aut in præsentia aliorum. Scholasti-  
cis verò nostris, quamdiu student, interdicta est o-  
minis cum quibuscunq; Externis communicatio;  
ita, ut ne ad portam quidem vocari debeant, ni-  
si de unius R. P. Rectoris licentia, ut portam ad-  
euntes sine facultate, & ad eam cum externis collo-  
quentes, publicis & gravibus puniantur pænis.

Magnus hic & nimius potest videri rigor,  
neminem tamen offendere debet; quia per hunc,  
& eorum qui ita circum scribuntur lapsibus ac  
ruinæ Spirituali occurritur, ejusq; antevertuntur  
occasiones; & honori Divino ac Societatis existi-  
mationi, proximorum verò ædificationi, & ani-  
marum auxilio consulitur. Estq; necessaria hæc  
præcautio ad avertenda tot pericula.

Hæc considerans, reflecte te, quomodo san-  
ctas has leges amantissimæ tuæ Matris Societatis  
observaveris? An colloquiorum cum externis oc-  
casiones, & clancularias conversationes non quæ-  
sieris? conversatio tua interim tota debet esse in  
cælis, cum libris, cum religiosis tuis fratribus,  
idq; etiam hæc conformis legibus nostris. Con-  
versatio cum sæcularibus, alteri tempori & matu-  
riori ætati reservanda est. Christus ipse in Do-  
mo Nazarethena privatus delituit, cum sua Matrè  
Sanctissima, & Sancto suo putatio Patriose Jose-  
pho, usq; ad annum ætatis trigessimū, nec in publi-  
co comparuit, nisi ad disputandum cum Doctori-  
bus, idq; non in alio loco nisi in templo. Con-  
versationes non ex voluntate superioris, nec ex  
obedientia, sed ex quodam pruritu & propria in-  
clinatione quæsitæ, ordinariè damnosæ, periculosæ  
sunt. **Amas periculum, vide ne in illo pe-  
reas.**

PUNCTUM III. Considera, in Religione quavis, sed specialiter in Societate nostra, plurima præsidia, media, & adjumenta esse, ad servandum votum Castitatis. Hujusmodi præsidia sunt.

1<sup>mo</sup> Usitata in Societate Sacramentorum frequentatio, per quæ nobis nova semper gratiæ Divinæ auxilia ad vincendas tentationes conferuntur.

2<sup>do</sup> Conscientiæ propriæ apud superiores & Præfectos Spiritûs manifestatio, quæ ita est efficax medium, ut S. Pater noster existimet, taciturnitate, & defectu claritatis, respectivè ad superiores & conscientiæ directores, ostium aperiri fatanæ, qui pro suo arbitrato, sine interpellatore liberè exigit, & facile persuadet quæ vult.

3<sup>io</sup> Præsidium singulare est delatio alienorum defectuum,

4<sup>to</sup> Exempla sancta domestica, tum eorum cum quibus vivimus, tum aliorum qui nos præceperunt. Talibus exemplis sæpius excitabat se Augustinus, cum diceret: *Potuerunt hi & hæ, & tu non poteris Augustine?* Similibus exemplis unusquisq; nostrum debet se excitare, ad sanctè & innocenter vivendum, & conversandum sine querela.

5<sup>to</sup> Mortificationis & poenitentiarum in Societate frequens & ferè continuus usus, est singulare medium ad vincendas carnis tentationes. Tali medio usus est S. Paulus Apostolus, ut ipse testatur: *Casigo corpus meum, & in servitutem redigo.* Hoc medio & his armis vicerunt molestas carnis tentationes, S. Benedictus, & S. Franciscus Seraphicus; ille in spinis, hic volutando se in nivibus; & S. Franciscus Xaverius, arctissimè funiculis se constringendo.

6<sup>to</sup> Custodia sensuum, & exterior modestia, arcet ab anima hujusmodi hostem.

7<sup>mò</sup> singulare præsidium ad servandam Castitatem, est frequens cum Deo communicatio & conjunctio per meditationes ritè factas, per Examina Conscientiæ, per frequentia & ardentia ad Deum suspiria, & actus Amoris Divini frequentatos, per continuam Dei præsentis memoriam. Multum item confert devotio ad Beatissimam Virginem, S. Angelum Custodem, aliosq: SS. Tutelares & ad eorum patrocinium in tentatione factum refugium.

8<sup>vò</sup> tandem tale præsidium est, studium virtutum solidarum potissimum autem humilitatis & obedientiæ. His enim maximè virtutibus munitur Castitas.

Reflecte te an his præsidijs & armis usus fueris, quorum usus tibi maximè successerit. Expediret uti omnibus, vel quàm plurimis; vide quomodo deinceps his te uti oporteat.

Colloquium ad purissimam Virginem Dei Parentem ei supplicando, ut in conflictu cum carne tua, monstret se esse matrem, ut te faciat mitem & castum, ut quæ in sua conceptione immaculata contrivit caput serpentis antiqui, ipsa conterat omnes diabolicas suggestiones, faciatq; te triumphare de hoste tuo, de carne tua.

*In fine : Ave maris stella.*

## Meditatio

### De Renovatione Voti Obedientiæ.

*Praludia Meditationum præcedentum.*

PUNCTUM I. Considera Obedientiam in Societate, quam renovaturi sumus : non debere esse

D. ... vul



vulgarem, & qualemcunq; , sed debere esse perfectam, consistentem non in exteriori tantum executione eorum, quæ Superior præcipit, sed insuper in perfecta abdicatione voluntatis ac iudicii, aut potius in omnimoda conformitate voluntatis & iudicii in obediente, cum voluntate & iudicio Superioris præcipientis. Talem in Societate vult esse obedientiam, ejusdem Societatis Sanctissimus Fundator S. IGNATIUS. In hac vult nos esse maximè conspicuos, in hac singulariter non vult nos superari ab aliis Religiosis Ordinibus, etiam si patiemur nos superari in jejuniis, vigiliis & cætera victus & vestitus asperitate. Per talem Obedientiã quasi per notam & caracteristicam vult discerni veros germanosq; Societatis filios.

Considera, proinde tres quodammodo esse gradus Obedientiæ, nobis propriæ, 1<sup>us</sup> gradus est Obedientiæ prout hæc est in executione, 2<sup>us</sup> gradus Obedientiæ, prout est in voluntate, 3<sup>tus</sup> gradus Obedientiæ est, prout est in Intellectu. Circa 1<sup>um</sup> gradum Obedientiæ, hæc ulterius.

Considera, 1<sup>mo</sup> Quod Obediens debeat esse velut cadaver & baculus senis, hoc est, ut S. Pater noster explicat, quod debeat sinere se in omnem partem verti, totaliterq; esse in manibus & dispositione Superioris, ut illum, ubicunque voluerit ponat, de illoq; pro suo placito disponat.

2<sup>do</sup> Quod obediendum sit non solum in facilibus, & rebus gratis, sed etiã in difficilibus, idq; æqualiter, sive præcipiantur facilla, sive ardua & molesta.

3<sup>io</sup> Quod obediendum sit, non quomocunq; promptè & alacriter, sed etiam punctualiter, ita ut ad vocem Superioris, vel ad pulsum campanæ religiosum evocantis, litera inchoata, etiam non perfecta relinquatur.



4to Quòd ad obediendum non debeat semper expectari, clarum & expressum Superioris imperium, sed ad minimum ejus nutum & signum quodcunq; suæ voluntatis obtemperandum sit.

5to Quòd obediendum sit, non solum Superioribus altioribus, sed etiam subordinatis & delegatis officialibus, idq; cum humilitate, subijciendo se homini propter DEUM.

6to Deniq; quod obediendum sit constanter & non ad aliquod solum tempus, sed cum perseverantia & semper.

Reflecte te supra has condiciones Obedientia, quam in executione habere debes, an ita te tractari Superioribus tuis permittas, atq; si cadaver vel baculus senis esses? an æquè obedias in difficilibus & sensui ac amorì proprio repugnantibus, sicut obedire consuevisti in gratis & facilibus? an tua Obedientia sit prompta, alacris, imò & punctualis in omnibus? an ad pulsus campanæ è lecto & somno statim te proripias & post recreationem in puncto conticescas? an voluntatem Superioris per nullum, vel aliquod signum expressam & à te cognitam promptè exequaris, an certè expectas & requiris clarum & expressum imperium? an æquali promptitudine obedire consuevisti subordinatis officialibus, atq; ipsis altioribus. Defectus, quos notaveris detestare, & per hanc renovationem corrigere stude.

PUNCTUM II. Considera 2dum gradum Obedientia, qualis in Societate esse debet, in hoc consistere, ut non solum Obedientia sit exterior, exterius exequens ea, quæ à Superiore præcipiuntur, sed etiam ut sit Obedientia Voluntatis. Talis ut sit.

Debet imò curare subditus Religiosus Societatis, ut nunquam sibi displiceat in eo, quod sibi mandatur, ut obediat sinè murmurationibus etiam

internis, sine impugnationibus voluntatis sui Superioris.

2<sup>dò</sup> Ad habendam Obedientiam voluntatis, debet curare subditus, ut nunquam voluntatem Superioris ad suam trahat vel detorqueat, ut non exoptet illa sibi mandari, quæ ipse facturus sua spontè esset, maximè in concursu voluntatis, per quam Superior sibi diversum quid præciperet.

3<sup>tiò</sup> Ad ejusdem Obedientiæ perfectionem pertinet & illud, ut voluntas subditi & voluntas Superioris secum concordent, & inter has voluntates talis sit consensio, ut quidquid vult Superior, idem velit & subditus, idem amet, idem ipsi placeat, & ut voluntas Superioris sit regula, quâ sequatur voluntas subditi.

4<sup>tò</sup> Tandem ad perfectionē hujus gradus Obedientiæ requirit S. Pater noster, ut subditus voluntatem Superioris non tam suam faciat, quam potius ut suam exuat, & Divinam per Superiores expositam induat.

Fac reflexionem supra tuam voluntatem, comparatè acceptam ad voluntatem Superioris, an illa non soleat esse diversa à voluntate Superioris, an non ipsi contraria, an non conjuncta cum murmurationibus, displicentiis, improbatione voluntatis Superioris, licèt hanc exterius exequaris? an voluntatem Superioris non studueris aliquando ad tuam detorquere, & pertrahere, ut id tibi præciperetur, quod ipse voluisti? an ita tuam voluntatem voluntati Superioris conformare studeas, ut illam pro Regula habeas & tuam esse velis, imò ut velis tuam exuere, & induere Divinam per Superiores expositam.

Etiam circa hunc Obedientiæ gradum defectus notatos detestare & corrige, DEUMq; ora, ut rebellem tuam voluntatem ad se & sub jugum Obedientiæ compellat, imò in suam voluntatem  
per

per conformitatem perfectam transformet.

PUNCTUM III. Considera, tertium gradum Obedientiæ Societati propriæ esse Obedientiam Intellectûs. Hæc Obedientia obtineri his modis potest.

1<sup>mò</sup> Si Obediens non examinet, neq; discutiat, quod præcipitur, an sit bonû, an malum, an justû, vel injustum, sed cæca promptitudine obtemperet in omnibus, ubi non est manifestum peccatum.

2<sup>dò</sup> Si Obediens non attendat ad Superioris qualitates, nec consideret, utrum Superior, sit doctus, prudens, talentatus, talium vel talium meritorum, an minùs doctus, minùs prudens &c. An sit Sanctus, perfectus, an secùs. Si non attendat, quo affectu erga subditum rem quampiâ præcipiat, quo fine, an non studiô ipsum mortificandi, affligendi, si non attendat ad modum præcipiendi minus suavem & asperiozem, sed omnia excuset, omnia benè interpretetur.

3<sup>tiò</sup> Si Obediens quoad fieri poterit suum Judicium conformet Judicio Superioris, illudq; captivet in obsequium Obedientiæ, ac justum omnino & rectum existimet, quod Superior mandat.

4<sup>tò</sup> Si Superiorem non judicet Obediens, quod talia sibi injugat, quæ minùs sibi aut cuiuspiam alteri sapere possent, sed potiùs paratus est defendere id totum, quidquid imperat, nullatenus improbare.

5<sup>tò</sup> Deniq; si Obediens in imperante non consideret personam hominis erroribus obnoxij, sed potiùs personam Christi, personam DEI, quam Superior gerit, & cujus locum tenet, si non attendat ad Personam, cui obedit, sed unicè ad Personam propter quam obedit, talis Obedientia Intellectûs cæca quidem dicitur, sed maximè oculata est, siquidem in Superiore non præcisè

hominem, sed DEUM & Christum in homine in-  
tuetur.

Hæc considerans, vide an tua Obedientia  
ad hunc gradum pertigerit! an Intellectus tuus  
cæcutiat ad ea quæ te possent minùs promptum  
ad obediendum reddere, sit verò perspicax in  
considerandis iis, quæ promptitudinem excitare &  
meritum Obedientiæ augere possunt.

Colloquium ad S. Patrem IGNATIUM à quo  
postulabis, ut per ipsius intercessionem, triplicem  
hanc consequaris obedientiæ perfectionem, & ex  
ea agnoscaris ejus verus filius.

*In fine : Suscipe Domine universam  
libertatem.*

## Meditatio.

### De Renovatione promissionis in- grediendi Societatem.

*Preludia præcedentium Meditationum.*

PUNCTUM I. Considera, præter illa tria Vota  
simplicia Paupertatis, Castitatis, & Obedientiæ,  
post biennium Novitiatus emitti & nuncupari so-  
lita. Emitti & nuncupari simul promissionem de  
ingredienda Societate, quam Votum esse speci-  
ale, à tribus illis diversum, declaravit Societas in  
Congregatione Generali 5. Can. 5. in hæc verba:  
*Promissio illa ingrediendi Societatem, qua in formula  
votorum simplicium Scholasticorum habetur, votum  
est peculiare à tribus aliis distinctum, quo quis se  
obligat ad acceptandum gradum Professorum, vel  
Coadjutorum formatorum, prout Præposito Generali,  
ad majus DEI obsequium fore videbitur. Et ne  
hujus mentis & declarationis à Societate factæ,  
igno-*

## *De Renovatione promissionis ingrediendi &c. 53*

ignorantia prætendatur, statuit eadem Societas, ut novitiis nostris ab ingressu statim Religionis ac deinceps 6to quovis probationis mense, potissimum verò & maximè ante admissionem, eorundem ad vota simplicia, id ipsum clarè & apertè explicetur. Voluit ulterius Societas & Constituit, ut in libro; in quo notantur nomina Scholasticorum, qui emittunt vota simplicia, postquam illa quis emisserit, subscribat se hoc & hoc anno, die, emisisse vota simplicia, & clarè intellexisse promissionem illam in formula votorum contentam, esse Votum acceptandi gradum à Patre nostro Generali sibi determinandum, & manere se obligatum ad prædictam indifferentiam. Voti hujus obligatio talis & tanta est, ut si quis gradum quæ Præpositus Generalis conferendum judicaverit, etiam dum non intervenit præceptum Obedientiæ, non suscipiat nec obsequatur, censendus sit esse in malo statu, adeoque à Sacramentorum usu vel administratione arcendus.

Rem hanc legibus nostris ita munitam, & obligationem tuam seriò apprehende, magni enim momenti est, & quàm delicatè subinde sentiunt aliqui, gradu qui ipsis confertur minùs contenti. Constitutio in certo Societatis gradu, cum à te interea remota sit, pluribusq; annis expectari debeat, in tuam fortè non venit apprehensionem, & minùs consideratur, maturè tamen providendum est, ne suo tempore si gradum non fuens consecutus, in quem magis propendes, puta perfectionem 4. Votorum, gravius hac occasione conturbetur, ne in aliquas difficiles incidas tentationes.

Protestare tuam indifferentiam ad Cuiusmodi gradum, & dum vota renovabis, cum special reflexione ad hæc omnia, fac promissionem in formula votorum contentam, propria te hujus promissionis & voti obligatione obstringe, animamque

tuum obfirma, ad fortem gradûs tibi obventuri acceptionem, expugna viriliter inclinationem, si quam habes ad certum gradum, tali promissioni adversantem. Deo supplica ut te in hac indifferentia robores, ut cum tempus tuæ promotionis advenerit, gradum qui tibi obtinget tanquam de manu ejus Divina suscipias. Propone nulla te quæsiturum patrocina, nihil te unquam tentaturum, quod tali indifferentiæ & obligationi repugnet. Simulq; firmiter statue curaturum te & allaboraturum strenuè, ut & in virtute & in literarum studijs quàm maximè proficias, & per talem profectum fias aptum Instrumentum gloriæ Divinæ, & ad quoscunq; usus Societatis idoneum, hæc cura, hoc studium ne minimè officit promissæ per votum indifferentiæ ad gradum. Hanc curam in suis filijs requirit Societas, & cum ipsa indifferentia vult conjungi.

PUNCTUM II. Considera, in hoc ipso voto & promissione ingrediendi Societatem per acceptionem conferendi cujuscunq; gradus, includi votum perseverandi in Vocatione religiosa, seu votum vivendi, & moriendi in Societate, idq; vivendi non ad aliquod certum tempus, sed vivendi semper, vivendi in perpetuum, vivendi ad mortem, etiam in casu in quo vita tibi concederetur longissima. Includitur votum perseverandi, in quibuscunq; circumstantiis, quæ evenire solent vel possunt, hoc est, etiamsi maximas persecutiones, afflictiones, tuq; humiliaiones contineas. longo imò toto vitæ tempore pati te contingeret. Etiam si totus mundus te invitaret propositis summis honoribus, voluptatibus, divitijs. Per promissionem de ingredienda Societate, & quocunq; ejus gradu acceptando, tali te obstringis obligatione, quæ excludit libertatem moralem egrediendi, ac deferendi Societatem. obligas te ut in Societate vitam



vitam perpetuò degas, adeoq; ut perseveres in Societate, cum perseverare nihil aliud sit nisi vitam in Societate perpetuò degere.

Imò votum perseverandi in Societate transcendit alia vota, prout hæc in Societate nuncupantur, in ijsq; includitur. Non aliam enim voves Paupertatem, nisi perpetuam & quidem in Societate, non aliam Castitatem nisi perpetuam, rursus in Societate, non aliam Obedientiam nisi perpetuam, etiam hanc in Societate, adeoq; per omnia vota tua voves perpetuitatem ipsorum in Societate, voves tuam perseverantiam. Qui percipit quid est vovere perpetuam actionem principio suo immanentem, perpetuam inquam in Societate, facillè intelligit, quòd hoc ipso velit talis actionis principium esse in Societate perpetuum.

Afficere singulariter gratiæ vocationis Tuæ, in qua perseverantiam non satis tibi est vovere semel, sed quater illam voves, dum quatuor vota simplicia nuncupas. Cave ne in vocatione tua vel minimum aliquando vacilles, ne de hoc vinculo dissolvendo cogites, aliàs resolveres te ad omnium votorum vincula dissolvenda. Qui contra hoc unum votum delinquit, factus est omnium reus, contra omnium votorum obligationem agit.

Protestare amorem Vocationis Tuæ, amorem JESU Christi, in cujus Societatem vocatus es, dicendo cum Apostolo : quis me separabit à Charitate Christi, à Societate JESU mei, an nuditas, an persecutio, an tribulatio, certus sum, quia neq; mors, neq; vita, neq; ulla Creatura me poterit separare.

PUNCTUM III. Considera, Amorem Vocationis Religiosæ, omnium virtutum, omnis perfectionis & totius Religiositatis fundamentum esse, super

super hoc fundamento totius perfectionis fabrica construi & assurgere debet, et facile defaecto construitur.

Qui enim amat vocationem suam facile ea facit, quæ sunt vocationis ejus. Ubi hoc fundamentum est infirmum, ubi amor vocationis vel nullus vel exiguus & imperfectus, ibi aut nullæ virtutes sunt, aut valde infirmæ valde imperfectæ, nec virtutis nomine dignæ, ibi nullum perfectionis studium, ibi omnis exulat Religiositas. Qui se resolvit ad fundamentum hoc labefactandum, resolvit se facile ad totius perfectionis structuram subvertendam.

Quare cum in hoc triduo unà cum votis Religiosis debeat restaurari moles & fabrica virtutum ac perfectionis, à fundamento hoc inchoandum est, ut virtutes in ædificio spiritali superædificandæ sint solidæ, opus est ut solidum & firmum sit fundamentum, ut sis firmus in vocatione tua, ut cum amore solido ames.

Excita hunc in te amorem, in eoq; toto vitæ tempore te exerceas, amore verò tuæ vocationis, excitare ad amorem religiosæ perfectionis ad studium solidarum virtutum.

Colloquium instituendum ad S. Paulum Apostolum. Cujus circa hoc tempus festum conversionis & vocationis ad Apostolatam celebrat Ecclesia. A quo postula, ut sicut hic magnus Apostolus vocatus à Christo, eidem firmissimè & indissolubiliter adhæsit, & juxta mensuram suæ vocationis & gratiæ famulatus est, ita & tu firmus sis in vocatione tua, & illà dignè toto vitæ tuæ tempore ambules.

*In fine: Anima Christi.*

Medi-

## Meditationes

In Triduo Collectionum ante  
2dam Votorum renovationem  
faciendæ.

## Meditatio

## De excutienda Tepiditate.

*Præbuidium 1.* Imaginare in dæmoniaco illo  
muto, quem spiritus mutus allidebat, spumante,  
dentibûs stridente & arescente, quem describit S.  
Marcus Cap. 9. depictum esse hominem desidio-  
sum & tepidum, maximè cum Venerabilis Beda  
per eundem intelligat, & intelligi velit homines in-  
ertes, languidos & otio torpentes.

*Præbuidium 2.* Pete à Deo gratiâ ut possis, co-  
gnoscere naturam tepiditatis & damna, ex qua ea  
sequuntur, hisq; mederi ad torporem omnem ex-  
cutiendum.

PUNCTUM I. Audi verba illa Parahipomenon  
21. de Joram Rege dicta. *Percussi eum languo-  
re insanabili, & sic longâ consumptus tabe, languo-  
re pariter & vitâ caruit.* Et considera, tepi-  
ditatem rectè explicari posse per languorem in-  
sanabilem & longam tabem. Tepiditas cum  
non statim ad letalem culpam perveniat non est  
mors Animæ, nec Animam uno quasi ictu peri-  
mit, sicut aliæ culpæ mortales; est tamen mor-  
bus periculosus, cui nisi maturè occurratur, tan-  
dem miseram conficit animam. Est longa tabes,  
miserum reddens quem afficit & vitam tandem  
consumens. Est febris occulta & interna, quam  
hecti-

hecticam vocant, interiora hominis depascens omnemq; auferens vigorem. Est ignis usq; ad perditionem devorans, est gangræna, quæ cum semel invaserit hominem, per totum corpus se diffundit & tandem enecat. Est lethargus animæ, qui ita hominem perdit & conficit, ut hōc morbo laborans certò moriatur, nec tamen sentiat se mori.

Tepiditatis Natura est non uni tantum virtuti opponi sicut cætera vitia, quæ singula singulis virtutibus opponuntur. Verum tepiditas omnes & singulas virtutes labefactat & corrumpit. Ipsa vitiat Charitatem & facit, ut dilectio Dei non sit summè, & super omnia appetitiva ejusdem, tantum enim amari DEUM persuadet, ut ejus bonitatem, super ea tantum præferat, quæ cum gratia Sanctificante & Amicitia Dei stare non possunt, non verò super alia, quibus DEUS leviter offenditur. Ipsa cum amore Dei componit amorem proprium, amorem propriæ excellentiæ, amorem vanitatum, ipsa facit ut DEUM remissè oscitanter, non ex tota anima, non ex tota mente, non ex totis viribus ames.

Vitiata Charitate tepiditas vitiat & alias virtutes. Facit ut fides sit modica & exigua, ut spes sit infirma, oratio tepida, ut in Meditatione non exardescat ignis, ut propter distractiones voluntarias oratio fiat in peccatum, facit ut Sacramenta suscipiantur ex consuetudine, absq; præparatione & conveniente devotione ac reverentiâ, ut Sacramentum Pœnitentiæ suscipiatur cum perfunctoria conscientiæ discussione, cum dolore valde remisso, & de quo meritò metui possit an sufficiente. Tepiditas facit, ut deficient homini spiritualia, cælestia, & æterna; incipiant verò sapere terrena, sensualia, vana & caduca, ut ex via ardua virtutis, perfectionis, religiosus tepidus sensim deflectat,

flectat, & in viam faciliorem laxiorem declinet, tandemq; ingrediatur viam latam & spaciosam, resolvens se etiam ad mortales noxas.

His consideratis, reflecte te & recogita, an & tu morbo tam periculoso non labores, an hac lenta tabe non conficiaris? Examina virtutes tuas, qualis in te sit amor DEI, an non vitiatum tepiditate, an non permixtum amoris proprio? quā magna sit fides tua, quā firma spes, tuæ orationes quā ferventes? ad Sacramenta cum qua devotione accedas, quo fervore, quo fructu ea suscipias? Percurre singula exercitia tua spiritualia, percurrere omnes actiones religiosas, an hæc omnia non remissa ex consuetudine, ex necessitate, ex compulso fiant? an non fiant ob humanos respectus, ad oculum, ad apparentiam. Si deprehenderis te tam periculoso infirmari morbo, exhorresce periculum tuum, existima malum hoc periculosissimum nulla ratione tolerandum & dissimulandum tibi esse. Omni contentione in hoc renovationis triduo, excute noxium hunc torporē, ad quod te duo hæc juvabunt. Subtrahe te violenter ijs, ad quæ te natura vitiose inclinat, & ferventer insta pro bono, quo amplius indiges.

Fac proposita præsentis animæ tuæ statui accommodata, Divinumq; ad hæc exequenda implo-  
ra auxilium.

PUNCTUM II. Audi illa verba Apocal. 3. *Dicis quod dives sum & locupletatus, & nullius ego, & nescis, quia tu es miser & miserabilis & cæcus & nudus.* Quæ ipsa de tepido intellige, & existima per illa explicari miserabilem & infelicem tepidorum statum, ac damna, quæ tepiditatem consequuntur. Homines & religiosi tepidi, quia non illico in peccata mortalia prolabuntur, quia aliqua bona opera exercent, quia Sacramen-

ta

ta frequentant, orationes, meditationes, examina, aliaq; exercitia spiritualia faciunt, existimant se divites, locupletatos esse, magnosq; virtutum, meritorum & gratiæ Divinæ thesauros collegisse, & ignorant quia pauperes & cæci & nudi sunt. Sunt pauperes ob tot neglectas merendi occasiones, ob labores vel negligenter, & tepidè susceptos, ob plures gratias actuales, & inspirationes contemptas, Sunt pauperes, quia per id boni; quod agunt, cum illud remissè & negligenter faciunt, non multum lucrantur, nec multum merentur, imò pro suis tepiditatibus, quod sancta non sanctè tractaverint, reddituri sunt rigidam rationem Deo Judici-justitias Judicaturæ.

Tepidi præterea sunt cæci, quia suum miserabilem statum non agnoscunt, non apprehendunt, nec vident periculum in quo versantur, ad quod tamen quàm maximè advertere deberent. Quia ad tot Divinas illustrationes, ad tanta spiritus Sancti lumina cæcutiunt.

Nudi etiam sunt quia ipsorum tepiditas primam stolam in ipsis lacerat, vestem nuptialem detrahit, detrahit splendidum virtutum & Charitatis amictum, quia non habent veræ sanctitatis togam, eam vero laciniam, qua coram oculis hominum se contegunt, jubebuntur, detecta ipsorum simulatione deponere, diceturq; illis. *Deponere fili, non tuum est quod geris.*

Nescit præterea tepidus, quia miser est & miserabilis. Miser est, quia uno tantum passu à morte distat, hoc est à peccato gravi & mortali. Hæc enim est via nimirum per tepiditates ad graves lapsus. Tepidi eò tandem deveniunt, ut in gravissima, fædissima, ac etiam publica, ac infamia crimina prolabantur, Deo id permittente, vel in pœnam ipsorum tepiditatis, vel ut hac ratione advertant ad suam infelicitatem



citatem, & ita facilius corrigantur.

Tepidus est miser & miserabilis, quia peccatis venialibus & pluribus imperfectionibus est obnoxius. De tepido verificatur illud Proverb. 4. *Per agrum hominis pigri transivi & totum repleverunt urtica, & operuerunt superstitiem ejus spina, & maceria lapidum destructa est.*

Tepidi sunt miseri & miserabiles, quia ad excitationem gratiæ Divinæ obsurdescunt, puta quævis media suæ perfectionis & profectus respuunt, & inefficacia reddunt quia facilius est ut peccatores, ut homines sæculares, ad veram poenitentiam, & fervens DEI obsequium adducantur, quam ut tepidi religiosi torporem suum & soporem excutiant. Tepidos illa manet Christi reprehensio. *Va tibi Corozaim, va tibi Betsaida. Si in Tiro & Sidone factæ fuissent virtutes, quæ factæ sunt in vobis, alim in cinere & cilicio egissent poenitentiam.*

Tepidi miseri sunt & miserabiles, quia sunt proximi, ut ex ore Divino, à corde & visceribus bonitatis ejus ejiciantur, juxta illud Apocalipsis *utinam frigidus, aut calidus esses, sed quia tepidus es, incipiam te vomere ex ore meo.* Sunt miseri, quia sunt proximi, ut DEUS candelabrum ipsorum moveat de loco suo. Hoc est, ut suæ vocationis jaeturam patiantur, ut illos Religio non taleret, aliosq; meliores substituatur. Sunt miseri, quia versantur in periculo amittendæ salutis, & incurrendæ damnationis æternæ. De ipsis D. Bernardus dicit. *Quod turpissimum, plenum ignominia & confusione saltum faciant, de excelso in abyssum, de pavimento in sterquilinum, de solio in cloacam, de celo in canum, de clauistro in seculum, de paradiso in infernum.*

Hæc considerans, recogita quò te deduxerit tepiditas tua, quò deducet ulterius, nisi eam

abjeceris. Obsequere exhortationi S. Bernardi Serm. 3. de Ascens. Domini. *Exurgamus obsecro quicunq; eius modi sumus, resarciamus animas, recolligamus spiritum, abijcientes perniciosam tepiditatem. Etsi non quia periculosa est, & DEO solet (quod interdum plangimus) vomitum provocare, certè, quia molestissima, plena miseria, & inferno planè proxima, umbra mortis jure censetur.*

PUNCTUM III. Audi illa verba Apocal. 3. *Svadeo tibi emere à me aurum ignitum & probatum, ut locuples fias, & vestimentis albis induaris, & non apareat confusio nuditatis tua. Et existima his verbis contra tepiditatem remedia tibi insinuari.*

*Aurum* Remedium est, ut emas aurum ignitum & probatum. Aurum ignitum est Charitas & amor DEI, non ille permixtus imperfectionum scorijs, non qui habet admistum amorem proprium, amorem commodorum, & oblectamentorum, sensualium, sed amor DEI, ab his omnibus imperfectionibus depuratus, summè appretiativus summi boni super omnia etiam levissimè adversantia eidem, est amor intensus, fervens, quo DEUS amatur ex tota mente, ex omnibus viribus, est amor efficiens, ut cor sit ardens in nobis, amor exurens omnes imperfectiones, nullum compatiens remissionis frigus.

Aurum ignitum & probatum sunt meditationes rerum caelestium, non ex usu & consuetudine factæ, sed ex desiderio proficiendi in virtute, meditationes ferventes, in quibus exardescit ignis Divini spiritûs, meditationes fructuosæ, factæ cum reflexionibus practicis supra actiones proprias, per proposita efficacia exurentes quoscunq; defectus.

Aurum ignitum & probatum est Sacramentorum, Pœnitentiæ & Eucharistiæ digna susceptio &

tatio, cum maxima dispositione & præparatione, cum excitato in nobis dolore, quàm intensissimo ac seria peccatorum detestatione, ut à mensa Eucharistica recedamus tanquam leones ignem spirantes, contra omnes tentationes & vitia fortissimi, ut efficiamur Seraphini amore DEI flagrantés, toti in DEUM qui ignis contumens est transmutati.

Aurum ignitum & probatum sunt frequentes mentis ad DEUM elevationes per orationes ejaculatorias, per ardentia ad DEUM suspiria, per ignitas, in cælum evolantes amoris Divini scintillas,

Aurum ignitum & probatum, est fervor spiritus, in omnibus actionibus se se prodens, ut quidquid agimus instanter agamus, ut quodcunq; opus nostrum, fiat à nobis tanquam opus DEI, tanquam opus DEO consecratum, & ex DEI amore factum, conspectu & oculis ipsius dignum, in quo sibi DEUS complacet.

Tale aurum ignitum & probatum qui habet, facile expugnat tepiditatis egestatem. Tepiditas stare non potest cum charitate fervente, cum meditationibus sanctè & accuratè factis, cum digna susceptione Sacramentorum, cum fervore virtutum & actionum nostrarum. Hoc auro ignito & probato efficiamur locupletes. Quia abundamus in omne opus bonum, quia augemus virtutes & merita. Tale aurum emitur à nobis per seriam potentiarum animæ intellectûs & voluntatis ad res Divinas applicationem, per victoriam difficultatum, per heroicam laborum pro gloria DEI susceptionem, per strenuam & constantem executionem propositorum, per mortificationes & afflictiones corporis, per vitæ asperitatem, per humilem gratiæ Divinæ implorationem, emi debet ab ipso DEO. Solius enim Divinæ virtutis

E

est

est tepidos corrigere, ex tepidis efficere in suo obsequio ferventes.

2<sup>du</sup>m remedium ad depellendam tepiditatē est, ut induamur vestibus albis. Indui vestibus albis est emundare conscientiam per confessionem generalem culparum toto semestri commissarum, & stolam primam tot imperfectionibus infectam, in sanguine agni & balneo Sacramenti Pœnitentiæ dealbare, eamq; immaculatam deinceps conservare & custodire.

Indui vestibus albis est exuere veterem hominem & induere novum cum fervore, cum intentione depurata, ex plurium virtutum motivis. Agere & per singulas gloriam Divinam intendere, & promovere ad gustum beneplaciti Divini explere velle.

Alba vestis est candor ille animi, quem institutum nostrum requirit in detegendis conscientię nostrę arcanis, ac reddenda ratione Superioribus & Præfectis spiritus.

Hæ vestes à nobis indutæ faciunt, ut confusio nostrę nuditatis non appareat, ut propter tepiditatem nostram, quæ nos nudos facit, non confundamur coram Deo & Cælitibus, imò etiam coram hominibus, coram quibus frequenter tepidi confundantur, dum ipsorum virtutis inopia detegitur.

His consideratis seriò te ipsum excita & animum applica ad hæc adhibenda remedia, & per illa tepiditatem depellendam. Propone in hoc triduo usurum te his remedijs, ac etiam deinceps, illis maximè, quæ respectu tui fore efficaciora eventus ipse docebit.

In Colloquio postula suppliciter à Deo, qui ignis inextinguibilis est, ut in corde tuo illa sufficitet incendia, quibus inflammatus & accensus depulsa omni tepiditate, illum ardentissimè ames &

in ejus obsequio, tuisq; omnibus actionibus fervens & in fervore constans efficiaris.

*In fine : Anima Christi.*

## Meditatio

### De Observatione Instituti & Disciplinæ Religiosæ.

*Praludium 1.* Imaginare S. Patrem tuum IGNATIUM porrigentem tibi librum illum pretiosissimum, qui vocatur Constitutionum nostrarum Thesaurus, & dicentem, quod aliquando dictum fuit Ezechieli Prophetæ. Ezech. 3. *Fili hominis comede volumen istud.*

*Praludium 2.* Postula à DEO gratiam, ut in Regulis Societatis gustum quàm maximum habeas, easq; quàm accuratissimè observes.

PUNCTUM I. Audi illa verba Deuter. 30. *Juxta te est sermo valde, in ore tuo & corde, ut facias illum.* Et hæc de lege veteri dicta applica legibus Societatis, & considera in his Sanctissimis legibus observandis magnam facilitatē esse.

Mandatum hoc quod tibi DEUS præcepit per famulum suum, S. IGNATIUM Patriarcham tuum, non supra te esse, nec procul positum, nec in cælo situm, ut possis dicere, quis valet ad cælum ascendere, ut deferat illud ad nos, ut audiamus, atq; opere compleamus, non est supra te hoc mandatum, nimirum non est supra vires tuas, non præscribuntur tibi res difficilissimæ. nimia exterior vitæ austeritas, nocturnæ vigiliæ, perpetua jejunia.

Leges etiam tuæ non sunt supra te quoad modum obligandi, ut ad minima obligeris sub



obligatione præcepti. Sermo Domini legibus nostris contentus, juxta te est, non arctatur illo libertas tua, sed juxta illam est, est accomodatus imbecillitati naturæ tuæ, nec eam nimium prægravat, non est item supra vires gratiæ, confert tibi illas DEUS liberalissimè, & qui eas inspiravit S. Patri tuo, ipse te auxilio gratiæ suæ adjuvat ut exequaris.

Non est procul positum mandatum legum tuarum, sed juxta te est, continuò tibi legum istarum memoria refricatur, gratijs divinis ad illas observandas assiduò excitaris, juxta te sunt sanctissima exempla, tot fratrum tuorum, qui in observatione & amore legum istarum excelluerunt, qui exactissimè illas observare studuerunt, & nunc etiam in hoc studio desudant magno suo fructu, & solatio.

Mandatum hoc, cæleste quidem est, sed non in cælo situm, at de cælo missum est. Sermo hic cum unigenito Filio DEI à regalibus sedibus venit, innituntur enim sanctæ, tuæ Religionis regulæ consilijs & exemplis Christi, & ex ipsis sunt desumptæ. De cælo datæ sunt & inspiratæ; quia post frequentes Sanctissimæ Trinitatis apparitiones, & factas ab ipsa illustrationes, Beatissima etiam Virgine DEIPARA sæpe visâ & approbante, conscriptæ, quare non restat, nisi ut leges has audiamus & opere compleamus.

In ore & corde tuo est sermo hic Divinus, ut faciās illum, cor enim rapit, legis hujus sanctitas, os & linguam provocat, ut laudes & approbes, quidni ut faciās eam. In ore tuo & corde tuo est, quædam enim Regulæ ( ut Regulæ Summarij ) cum ad internam spiritualem nostrorum pertineant institutionem, videntur ad cor propriè dirigi & ordinari, adeoq; in corde esse ac debere esse. Aliæ, ( quales sunt Regulæ communes



munes) cum pertineant ad communem externā disciplinam; in exteriori hominis compositione & exterioribus actionibus, quasi in facie & ore ejusdem positæ esse censentur.

Hæc considerans humillimas age gratias Sanctissimæ Trinitati, & pretiosissimæ Dei Parenti, pro legibus tam Sanctis, tam facilibus, tibi; & obsequio Divino ac saluti, sive animæ tuæ; sive proximorum procurandæ accomodatissimis. Confundere, quod in eis observandis tam negligens fueris, quod sæpius abusus sis ea libertate, quæ per leges tuas tibi relicta est, & immunitate, à peccati obligatione, ut liberiùs transgredereis quasdam regulas, quæ libertas incitamento esse debuerat ad eas observandas, ut etiam Deo aliquid offerres ex filiali amore, non habente admistum timorem servilem, timorem servitutis peccati. Propone exactiorem te in illis observandis futurum, aliquas Regulas delige, quas unicè amore Dei, te observaturum firmiter statue.

PUNCTUM II. Audi illa verba Proverb. 7. *Fili serva mandata tua & vires, & legem meam quasi pupillam oculi tui, liga eam in digitis tuis, scribe illam in tabulis cordis tui.* Et his verbis puta exprimi pretiū & æstimationem, in quo debent esse leges tuæ.

Nimirum leges hæ Sanctissimæ debent esse in eo pretio *in primis* in quo est vita, debent enim æstimari tanquam medium dependenter à quo vivere debes, media autem, sicut bonitatem, ita & æstimabilitatem & pretium suum à fine, & ipsius finis habent. *Serva mandata tua & vires.* Idq; non debent esse in eo tantum pretio, in quo est vita corporalis, supra quam etiam debes æstimare easdem leges; 2do enim humilitatis gradui maximè congruit, ut paratus sis legem tuam observare, cum dispendio vitæ corporalis.

Verum leges Societatis apud Religiosum ejusdem, debent esse in eo pretio, in quo est vita Spiritu-  
alis animæ, salus item & vita æterna. Siqui-  
dem ab observatione legum istarum dependet vi-  
ta animæ, per illam augetur, nutritur, conserva-  
tur. Observatio legum tuarum est via, qua te o-  
portet pervenire ad salutem & vitam æternam.  
Si non observes leges tuas, non es securus salu-  
tis. Quia non es securus perseverantiæ in gratia  
DEI, timendum tibi est, ne à transgressione legum  
tuarum, progrediaris ad committenda peccata ven-  
ialia, ab his ulterius ad patranda mortalia, adeoq;  
ne à gratia DEI excidas. Timendum tibi præ-  
terea est, ne commisso semel mortali, de hoc de-  
inde in aliud, de leviori in gravius, de occulto  
in infame, & quod non tibi solum, sed etiam a-  
liis, imò & toti Religioni noceat, prolabaris, tan-  
demq; ne vocationis tuæ jacturam incurras, & ne  
exerrando à via salutis, animam tuam in æter-  
nam damnationem præcipites. His enim itineri-  
bus pervenitur ad perniciem, quod insinuare vi-  
detur illa Psalmistæ monitio: *Apprehendite disci-  
plinam, nequando irascatur Dominus, & pereatis de  
via iustarum*

2do æstimare debes leges tuas religiosas, ut  
pupillam oculi tui. Tot enim lacrymis steterunt  
Sancto Patri tuo, non tam atramentò illæ, quàm  
lacrymis conscriptæ sunt Pupilla S. Patris tui, a-  
deoque pupilla oculi tui super se & super univer-  
sam Societatem vigilantissimi tantum laboravit, de-  
sudavit circa omnes & singulas regulas, debes itaq;  
omnes & singulas æstimare, ut pupillam ocu-  
li tui. In pupilla oculi tui ne minimum quidem  
pateris pulvisculum, etiam in observatione legum  
tuarum, ne minimum convenit te pati defectum,  
ut ne unus quidem apex de lege prætereat. Cir-  
ca pupillæ oculi tui custodiam, singularem adhi-

bes curam & diligentiam, indemnitati & integritati illius, quam maximè provides, ut etiam legum tuarum integritas servetur, pari diligentia al- laborandum est, ad hanc te hortatur Spiritus Sanctus per Sapientem: *Tibi serva legem meam ut pupillam oculi tui.*

3tio Lex Societati data, æstimari debet æstimatione non more affectiva, sed effectiva, non satis est, quod meliora videas probesq; sed opus est ut æmuleris charismata meliora, ut exequaris quæ probas, Hoc insinuant illa verba: *in digitis tuis liga eam.* Non satis porro est, ut ad executionem manum tantummodo admoveas, ut bene incipias, alligare debes manum digitosq; legi tuæ, ut perficias, & opere compleas, & ne putes, majores tantummodo regulas te observare debere, Regulas item magis difficiles & magis arduas, ad quorum executionem, tota manu & frequenter valida opus est. Etiam parvæ minutæ leges, & legum apices, ad quarum executionem digitis non nisi utendum est, observari debent, idq; ita ut illas in digitis liges, ne effugiant, ut earum specialem curam, & in digitis quodammodo, hujusmodi leges numeratas habeas, earum executioni asuefcas & in iis exequendis continuò occupa- ris.

4to Tandem. *Scribe illam in tabulis cordis tui.* Tanti æstimare debes legem tuam, ut illam in tabulis cordis describas, ut bene cordi imprimas, in eoq; conserves. Porro in corde lex religiosa describitur per frequentem ejusdem meditationem, quam expresse commendare videtur scriptura, Deuter. 6. *Eruntq; verba hæc, quæ ego præcipio tibi hodie, in corde tuo, & meditaberis in eis sedens in domo tua, & ambulans in itinere, dormiens, atq; consurgens.* Hac meditatione legum tuarum, frequenti super earum observationem re-

flexione, testaberis pretium, quod earundem habes, testaberis affectum, quod ipsis afficeris, quod legem tuam in tabulis cordis tui descriptam habearis, declarabis quā & quantam diligentiam habearis circa earum integritatem & custodiam. Et proculdubio assequeris, ut has sanctas leges observes.

Fac reflexiones convenientes protestare pretium legum tuarum, propone quæ suggeret Spiritus S.

PUNCTUM III. Audi illa verba Proverb. 4. *Tene disciplinam, ne dimittas eam, custodi illam, quia ipsa est vita tua.* Et his verbis existima describi, qualis legum tuarum observatio esse debeat, expende singula.

Imò *Tene disciplinam* non satis est, disciplinam & legis observationem digito attingere vel etiam digito movere, apparentiam aliquam facere, quod regulas observes, teneri debet disciplina, hoc est in possessionem accipi. Debet ex possessione observari, oportet eam exactam & accuratam esse. *Tene eam*, hoc est bene percipe, quid à te leges tuæ, quid disciplina religiosa exigit. *Cura*, ut ea quæ sunt disciplinæ religiosæ exequaris, omnia intelligendo juxta ipsius Societatis constitutiones, juxta verum earundem sensum, non verò juxta interpretationes detortas, laxas, & vero sensui repugnantes, hoc enim non est tenere disciplinam, sed abijcere.

2<sup>do</sup> Expende verba. *Nec dimittas eam.* Quibus verbis exigitur, ut Disciplinæ & legum religiosorum observatio sit constans, ne facile recedas à sancto mandato, ne difficultatibus occurrentibus, aut quibuscunq; rationibus induci te patiaris ad negligendam vel transgrediendam aliquam legem, ne à servanda disciplina & legibus religiosi dimovearis, censurationibus & linguis aliorum, vanis respectibus, privatis amicitijs & familiaritatibus

liaritatibus, pravis si quæ contingerent exemplis. Ut non dispenses tecum in ulla lege, nec agas, ut in aliqua earum, tecum dispenietur sed circa omnes & singulas proteſteris. *Tenui eam, nec dimittam.*

3<sup>ti</sup>o Expende verba : *Custodi eam.* Et puta his verbis exprimi legum tuarum observationem debere esse providam. Ut futuris à longè prospicias, antevertas occasiones transgrediendi leges. In conversationes, in quibus, aliquas earum probabiliter transgressurus es, non teingere, sed has, quàm maxime declina. Per proposita efficaciam particularia practica ad circumstantias particulares & impedimenta quæcunq; ac difficultates se reflectentia, obfirmare animum flude, ut semper stes pro legum tuarum observatione, hanc in te promove, & cura ut in dies sis perfectior & perfectior.

4<sup>to</sup> demum expendere illa verba. *Quia ipsa ( id est disciplina ) est vita tua.* Hoc præstat constans observatio, alicujus temporis continuâ firmata praxi, ut in naturam transeat, si observationi huic asueveris per aliquod tempus, nullam deinceps in iisdem observandis difficultatem experieris, ita tibi facile & gratum erit servare leges, ac vivere. In ipsis transgrediendis, ita difficilis & immobilis efficiaris, atq; si de vita tua ageretur. Hocq; assequeris ut exacta legum tuarum observatio non sit finienda nisi cum vita tua. *Quia ipsa est vita tua.* Non solum observatio legum religiosarum, ita debet esse cum vita connexa, illiq; alligata, ut sicut respiriis & momentis, ita & executione legum vita nostra distinguatur & decurrat, sed etiam legum & Disciplinæ religiosæ observatio pro medio habenda & adhibenda est, ut vitam non tam corporalem, quàm potiùs spirituales animæ serves, eamq; contra hostes animæ



mæ tuearis. Persuasum omnino habe si observatio legum in te vigeat & vivet, quod & tu vives, custodies regulas, custodient te, servabis illas, ipsæ vicissim servabunt te, contra hostes animæ tuæ protegent & defendent te.

Habe illas pro antidoto & remedio contra omnes tentationes, à legum tuarum observationum, adeoque vita tua spiritualis dependet. Ad fugandos dæmones & infernalium spectra præsentissimum remedium existimatur esse effigies S. Patris nostri IGNATII habita & deportata. Verior effigies S. Parentis tui esse non potest, quàm sit illa, quæ in Constitutionibus ejusdem expressa reperitur. Hanc non in foliis depictam, aut libris descriptam, sed in tabulis cordis delineatam custodi & fugabis dæmonia. Tanquam verus & germanus Sancti Patris tui filius, sis vera imago ejusdem per exactam legum suarum observationem. Omnino tibi persuade, Sanctum Patrem tuum talem fuisse, qualem hominem Societatis debere esse, sanctis suis descripsit legibus. Has & tu quod perfectius observaveris, eris imago perfectius expressiva S. Parentis tui. Vide ergo, ne ex lineamentis ejusdem, aliqua linea desit, aliquis apex desideretur, ne in alicujus regulæ observatione deficias. Talem imaginem cum in te expresseris, horrebit illam dæmon, procul à te discedet, non infestabit te suis tentationibus, nec hanc S. IGNATII effigiem ferre poterit. Fæminæ cuidam in partu periclitanti Eberspergæ in Bavaria libellus legum nostrarum papyro involutus, appllatus fuit, eamque subito à morte imminente liberavit, & factum vivum eduxit. Libellum hunc tu tibi applica non quomodocumque sed comedendo hoc sacrum volumen, illudque per exactam observationem legum in eo contentarum, in tuam substantiâ convertendo, ac ipso viscera tua replendo, tali antidoto à per-



periculis vitæ tuæ liberaberis, mortemq; evades animæ, & per conversionem animarum plures spirituales Christo produces filios. Quia lex in hoc Sancto libello contenta, ipsa est vita tua, imò non tua tantum, sed tot aliorum.

His consideratis, fac reflexiones materiæ accomodatas, & te ipsum excita ad exactam. constantem, providam, cum vita non nisi terminandam legum tuarum observationem, excita te ad depingendam in te, quam simillimam Sancti Parentis tui effigiem, ut illà omnes à te repeilas tentationes & vitam animæ tuæ inter tot seves pericula. Fac proposita. Elice affectus.

Colloquium ad Increatam DEI Sapientiam. Unigenite Fili DEI, & Increata Patris æterni Sapientia, per quam legum Conditores justa decernunt, quæ famulo tuo Sancto IGNATIO de Lojola Sanctissimam inspirasti legem, qua, universa per ipsum instituta, regeretur Societas, supplico humillimè, largire mihi gratiam, ut eandem legem ad quam observandam, ex tua miseratione, me vocare dignata es, quàm perfectissimè observem, simq; vera immago ejusdem S. Parentis mei IGNATII, ei quàm simillima per accuratam legum observationem, quas ille non solum sapientissimè condidit sed etiam exactissimè observavit.

*In fine: DEUS qui ad majorem nominis  
tui gloriam &c.*

## Meditatio

### De Paupertate Religiosa.

*Preludium* 1. Imaginare quòd fles in conspectu Divinæ Majestatis, coram Sanctissima Virgine MARIA & curia cælesti universa, velisq; vota religiosa

religiosa nuncupare vel renovare. Interim verò quod monearis à Malachia Propheta Malach. 1. *Si offeras cecum ad immolandum, non ne malum est, si offeras claudum non ne malum est. Offer illud Duci tuo, si placuerit ei, aut si susceperit faciem tuam.*

*Praludium 2.* Postula gratiam à DEO, ut ad defectus in observatione votorum commissos ferio advertas, illosq; desleas & corrigas, atq; his correctis accedas ad immolandum te ipsum Domino, per faciendam à te votorum renovationem.

PUNCTUM I. Audi illa verba Amos 10. *In die illa suscitabo tabernaculum David, quod cecidit, & reedificabo aperturas murorum ejus, & ea que corruerunt instaurabo, reedificabo illud sicut in diebus antiquis.*

Et considera siquidem paupertatem religiosam, S. Pater noster IGNATIUS murum Religionis appellat, quidquid voto paupertatis repugnat, esse id quod murum hunc labefactat & subruit. Omnes defectus contra paupertatem, esse aperturas & fissuras murorum, partesq; collapsas, quæ reëdificari debent, per exactiorem voti paupertatis observationem.

Hunc murum post tempora Apostolorum aliquatenus collapsum, monitus ut collabentem Ecclesiam reëdificaret pauperrimus Franciscus Seraphicus instauravit & reëdificavit, instituta religione, quæ singulariori studio Evangelicam Christi paupertatem rigidissimè profiteretur, hunc reëdificandum murum, si per te aliqua sui parte collapsus est, invitat te hoc tempore Divina Bonitas, offert tibi gratias, vult ut ipsi collabores. Id ipsum à te exigit Societas, exigit S. Pater IGNATIUS, & ipsa voti obligatio, quod ut facilius & melius præstes.

Considera ulterius imò Paupertatem, quam  
reëdi-

reædificaturus es, taliter reædificari debere, ut sit tabernaculum David, hoc est debere à te taliter instaurari paupertatem, ut in ea sibi ipse Christus verus David complaceat, ut in eam tanquam in suum tabernaculum reclinet, qui non habuit ubi caput reclinaret, qui stabulum palatii, præsepe auratis regum solis, viles pannos pretiosæ præelegit purpuræ. Porro tua paupertas non qualiscunq; murus, sed erit tabernaculum David, si illi quam Christus in vita sua mortalis adamavit, paupertati, fuerit quàm simillima, si per rerum omnium contemptum, quoad fieri poterit, immitatus fueris Christi paupertatem.

Considera 2dò murum paupertatis religiosæ subrui maximè sequentibus defectibus 1. Si habeas & clanculariè aserves pecunias, res pretiosas, curiosas, vanas, non necessarias. 2. Si res usui Religioso profuturas, compares viâ indebitâ & religioso instituto repugnante. 3. Si aliqua, quæ permitti possunt, habeas absq; Superiorum concessione. 4. Si re aliqua tanquam propria utaris, eiq; affectu adhæreas. 5. Si res ex Domo vel cubiculo alterius tibi usurpes. 6. Si accipias, vel dispenses quidpiam ex iis, quæ domi sunt sine facultate, nec ita tractes res usui tuo concessas, ut integræ & indemnes maneant, quæ longiori usui conservari debent. 7. Si ab externis aliqua accipias, procures vel etiam Eleemosinas, maximè pro ministeriis Societatis, ultrò oblatas, acceptes & admittas. 8. Si valetudinis prætextu in infirmitate sis nimius in exigendis commoditatibus, si medicinas singulares requiras & magni pretij ac valoris, non contentus minùs pretiosis.

Considera 3tò collapsum paupertatis murum reædificari debere, per defectuum illorum per quos collapsus est correctionem & eliminationem, per oppositos & contrarios illis ipsis defectibus virtuosos

ofos paupertatis actus, per seriam pœnitentiam de talibus defectibus actam, per firma practica & particularia proposita, quæ offerente se occasione certo sis executurus, per curam & studium perfectæ spiritûs paupertatis. Tres paupertatis species distinguit S. Bernardus, serm. 1 in testo SS. Omnium. Unam Plebeciorum, qui sunt pauperes miserabili necessitate, non laudabili voluntate. Alteram veterum Philosophorum Ethnicorum, quorum aliqui voluntariè sua omnia reliquisse leguntur, ut expediti mundialibus curis, studio vanitatis possent vacare liberis, nolebantq; censu abundare terreno, ut sensu abundarent proprio. Tertiã paupertatem Apostolorum & imitatorum Christi, seu paupertatem spiritûs, quam illi habent, qui sunt voluntariè pauperes; intentione sancta & desiderio spirituali imitandi Christum, propter explendum beneplacitum DEI, & quærendam salutem proximorum, Hæc tibi curanda est paupertas ut instaures ruinas collapsi muri religiosæ paupertatis.

Considera 4<sup>to</sup> murum hunc debere, ita restaurari ut talis sit tua reædificata & instaurata paupertas, qualis fuit diebus antiquis, hoc est non debere te esse contentum, quòd aliquos non nisi defectus v.g. graviores corrigas, vel quòd corrigas omnes imperfectè, sed enitendum esse, ut paupertas sit omnino conformis constitutionibus Societatis, ut sit conformis exemplis Ducis tui Christi, ut sit conformis exemplis primorum nostrorum Patrum, SS. IGNATII, FRANCISCI Xaverii, FRANCISCI Borgiae, & aliorum qui in hac virtute singulariter excelluerunt, ut sit talis, qualis fuit diebus antiquis, hoc est statim ab inchoata Societate, item dum primus adhuc in te fervor Novitiaticus permaneret.

His consideratis, reflecte te supra tuam pau-

paupertatem, circumspice, an qua parte murus hic collapsus non sit, an ruinam non minitetur. Percurre defectus supra enumeratos, an aliqui in te non reperiantur & qui illi? stude omnino re-ædificare & restaurare hunc murum, manum operi admove, utq; integer semper maneat, te allaboraturum propone. Protestare verbis Prophetæ quod cum Divinæ gratiæ auxilio, suscitaturus sis tabernaculum David, quod murum paupertatis, si forte aliqua sui parte corruit, instauraturus sis, & re-ædificaturus, sicut in diebus antiquis.

PUNCTUM II. Audi illa verba S. Pauli Apostoli 1. ad Timot. 6. *Habentes duntaxat alimenta & quibus tegamur, his contenti simus.* Et considera his Apostoli verbis, duo insinuari, quæ ad paupertatem religiosam comparandam sunt necessaria.

*Primum* ut si habeamus alimenta, & quæ ad vestitum pertinent, his contenti simus, hoc est, ut ea, quæ nobis à Religione per Superiores providentur, circa victum & vestitum, quantumcunq; illa vilia fuerint, gratè accipiamus, & ex amore paupertatis, libenter habeamus, nec requiramus, si in ipsis alimentis præstantiora, & quæ magis appetitui sensuali arrideant, si in ipso vestitu meliora. Sed unice attendamus ut tegamur, qui finis non minus obtinetur per vestes veteres & attritas, panni vilioris & crassioris, atq; per novas, ex panno tenuiore & meliore, idq; ita hæc acceptemus, ut contenti simus futuri etiam vilissimis.

Alterum est, ut ultra alimenta, & tegumenta, nihil præterea appetamus nihil habeamus, si illud magnum, si parvum fuerit, si vile, si pretiosum. Sed quidquid est supra vitæ necessaria, & supra id, sine quo officium nostrum exequi non possumus, ut sunt libri aliqui, id omni-



no respuamus, & contēnamus. Divitiæ hominis religiosi, hominis Societatis, debet esse ipsa paupertas. Paupertas se ipsâ satis pretiosa, satis dives est. Paupertas Christi, debet esse homini religioso pretiosior cunctis opibus, cunctis thesauris sæculi, hæc non solum seipsâ, sed etiâ Deo divitem facit religiosum. Paupertate enim spiritus possidetur regnum Cælorum, possidetur DEUS & in DEO possidentur omnia. Extra DEUM qui quærit aliquid, ostendit se nimis avarum esse, quia talem cui DEUS non sufficit.

Iterum fac reflexiones, es ne contentus his, quæ ad vitam utcunq; sustentandâ, quæ ad corpus tegendum sunt necessaria? esne contentus etiâ vilioribus? an subinde non experiaris desiderium habendi meliora! an non sentiâs accendi te invidiâ, si apud alios præstantiora videas? an non soleas conqueri, murmurare, contra ea, quæ ex Superiorum providentiâ ad usum tibi conceduntur.

Reflecte te, quid ultra vitæ necessaria quæras? si DEUM quæris & in Deo omnia, habes DEUM & invenis in ipsa paupertate. Si aliud quæris, DEUM faciliè perdere potes & omnia.

Fac proposita convenientia, elice affectus.

PUNCTUM III. Audi illa verba Christi Lucæ 22. *Quando misi vos sine saculo & pera, & calceamentis, nunquid aliquid defuit vobis? At illi dixerunt Nihil.* Et considera hoc paupertatis religiosæ privilegium esse, ut nihil habentibus nihil desit. Etiam hanc dum in subtractione necessariorum experiuntur sanctæ paupertatis effectus, veris Religiosis abundè sunt omnia. Mittuntur Apostoli sine sacculo, sine pera, sine calceamentis, defunt illis necessaria, quia defunt calceamenta, defunt insuper pera & sacculus, reconditoria asser-  
vanda



vandæ alimonix & faciendæ ulterioris proviſionis, adeoq; nec ſpes relinquitur humanæ providentiæ, ulterioribus vitæ neceſſitatibus proſpicientis, & interim Apoſtolis nihil deeſt.

Nihil deeſt *1<sup>mo</sup>*, quia omnes divitiæ hujus ſæculi, omnia commoda, omnes providentiæ, & quidquid eſt extra DEUM, eſt magnum nihil, eſt vanitas, eſt quid inane. Excelfus animus hæc contemni & pro nihilo habet, adeoq; dum deſunt commoditates, deſunt vitæ neceſſaria, nihil deeſt, non apprehenditur, non ſentitur hic defectus, atq; ſi nihil deeſſet. non ita amatoribus mundi, hominibus avaris; ſuppetunt his omnia, & nihil habent, quò plùs hi colligunt, eò magis egent & plùs illis deeſt. Avaro enim tã deeſt id quod habet, quàm quod non habet, ſiquidem circa utrumque æquè eſt anxius, æquè ſolicitus; circa id quod habet eſt ſolicitus, ut conſervet, retineat, non amittat; Circa ea quæ non habet eſt ſolicitus & anxius, ut acquirat, ut habeat. Utraque illi deſunt, deſunt ea quæ non habet, ſentitque graviffimè hæc ſibi deeſſe, ſiquidem tanto ſtudio, & frequenter cum animæ diſpendio ea quærit; Deſunt etiam illi ea quæ habet, cum enim his, quæ habet, non utatur, ita illa habet atquè ſi non haberet, adeoque & hæc ipſa illi deſunt. Deeſt inſuper avaro DEUS, quia DEUM minimè quærit, nullam curam habet, ut conſequatur & poſſideat DEUM, quia aurum ſimul & DEUM tenere non poteſt, occupatam enim habet animam.

*2<sup>do</sup>* nihil deeſt veris paupertatis amatoribus, dum ſine quibusdam etiam neceſſarijs vitæ ſubſidijs vivunt. Quia dum ipſi terrena deſpiciunt, ſua commoda & ſcriptos negligunt, id DEUS ipſis compenſat longè melioribus. Quia ſpiritualibus & inter-  
nis bonis, cæleſtibus conſolationibus, compenſat DEUS centuplo, quod relinquentibus omnia, hic adhuc in vita reddendum ap-  
promiſit, ut nihil habent-

tes omnia possideant, habeantque id totum in emi-  
nenti, & amplius, quod dimiserunt.

3<sup>io</sup> tandem nihil ipsis deest. Quia etiam  
temporalia Deus religiosis omnem sui curam ab-  
ijcientibus providet; imò major est circa eos Di-  
vina Providentia, in subministrandis etiam tem-  
poralibus, quàm possent esse quæcunque humanæ  
providentiæ. *Facta cogitatum tuum in Domino &  
ipse te enutriet.* Dico cum Psalmista. *Dominus re-  
git me, & nihil mihi deerit,*

His consideratis, reflecte te, an tu sis in ter eos  
pauperes, quibus nihil deest? sunt quidem aliqui,  
teste Divo Bernardo, qui pauperes esse volunt eò  
pactò, ut nihil illis desit, & sic diligunt pauper-  
tatē, ut nullā patiantur inopiā; cæterum hæc pauper-  
tas valdè imperfecta, & imperfectorum religiosor-  
um est, nec illi hac ratione consequuntur, quod vo-  
lunt, nimirum ut illis nihil desit. Illis solis nihil  
deest, qui eam paupertatem profitentur, ut etiam  
velint pati necessariorum defectum & inopiam.  
Esne tu de hujusmodi pauperibus? Felicem te, si  
subsidijs quibuscunque destitutus, lætus dicere pos-  
sis: nihil te desiderare, nihil tibi deesse. Disce  
experiri effectus sanctæ paupertatis etiam in neces-  
sariorum defectu; disce terrena & sensualia com-  
moda postponere spiritualibus & cælestibus bonis ac-  
solatijs; disce totum te Divinæ Providentiæ re-  
linquere & committere. Resolve te, ut ad hanc pau-  
pertatis perfectionem enitaris.

Colloquium ad Christum Crucifixum. Pau-  
perissime JESU, amore mei cruci affixe, & in summa  
moriens paupertate, commendasti mihi de cruce  
Matrem tuam Sanctissimam & filialem erga ipsam  
amorem, Commenda & alteram matrem. Excita  
me & accende tuâ gratiâ, ut paupertatem tan-  
quam matrem filiali affectu diligam, ut hanc ma-  
trem meam non erubescam, sed in ejus amore,  
pretio

pretio, & æstimatione vivam, ejus munera gratè suscipiam, & tanquam verus hujus matris filius, cruci tuæ confixus, in nuditate & paupertate moriar.

*In fine: Anima Christi.*

## Meditatio De Religiosa Castitate.

*Preludia eadem quæ Meditationis præcedentis.*

PUNCTUM I. Audi illa verba Matth. 10. *Inimici hominis domestici ejus.* Et ad Colos. 3. *Mortificate ergo membra vestra quæ sunt super terram.* Et considera, per tria vota Religiosa, tres hostes animæ oppugnari; per votum paupertatis oppugnatur concupiscentia oculorum seu mundus, per votum obedientiæ oppugnatur superbia vitæ seu Diabolus, per votum castitatis oppugnatur concupiscentia carnis seu caro.

Per vota paupertatis & obedientiæ oppugnantur hostes externi, extrinsecus animam aggredientes. Per votum Castitatis oppugnatur hostis intrinsecus, intestinus, imò non unus tantum, sed plures hostes oppugnantur. In una enim carne plures hostes experimur & numeramus. Inimici hominis domestici ejus. Contra hunc hostem, utpote domesticum, acerrima & continua instituenda est pugna. Ut ejus insidiæ evitentur, assiduò invigilandum est. Si magnâ vigilantia & circumspeditione opus est, dum hostis vicinus adest, quanto magis dum domi est, dum præsens te aggreditur.

Non desunt tamen arma quibus ille impugnari debet, & quibus sæpiùs feliciter devictus est, & à te vinci potest. Hujusmodi arma potissimum sunt; Mortificatio carnis, & crucifixio ejusdem cum suis

concupiscentijs; hæc arma arripienda, his confingendum, ne domestico huic hosti succumbamus. Porro sicut hostes visibiles duplici modo impugnari consueverunt, uno modo quando arète cinguntur, die & nocte inquietantur, & ad faciendas continuas excubias atque vigilias necessitantur, dum item ijsdem commeatus necessarius vitæ sustentandæ, aliaque subsidia subtrahuntur. Alterò modò hostes visibiles extrinseci impugnantur, quando manus in prælio conferuntur, expediuntur & committuntur arma, mortes & vulnera infliguntur. Pariter & caro, hostis domesticus Animæ, duplici hoc modo impugnandus, vexandus, & mortificandus est.

1<sup>mò</sup> Per subtractionē & denegationem eorum, quæ ad ejus commoda, necessitates prætensas, licita etiam ac permissa sensuum oblectamenta spectant. Hoc est, affligenda est caro inediâ, vigilijs, siti, frigore, laboribus, alijsque his similibus. Debitandæ sunt, per hæc, vires ipsius, ne contra spiritum sit robusta, ne contra eundem aliquando prævaleat,

2<sup>dò</sup> Caro mortificari debet, vulnerum, verberumque inflictione, frequenti castigatione, flagellis, catenulis, cilicijs, alijsque varijs ingeniosè adinventis mortificationibus, idque ita, ut quò potentior est hostis, & quò validiores sunt, ac molestiores ipsius aggressiones & insultus, tantò majori conatu ipsi resistamus, acrioresque mortificationes, magis crebras, & rigidiores adhibeamus, ut illius impetum & vires frangamus.

His armis usi sunt & rebellem carnem devicerunt. S. Paulus Apostolus, S. Benedictus, S. Martinianus, S. Franciscus Seraphicus, S. Franciscus Xaverius, alijsque Sancti. His armis & nobis utendum est, ut ex domestico hoste carne triumphemus. Qui carnem suam indulgenter habuit, rarus aut nullus est, qui eam debellaverit. Si indulgemus carni,

ni, si majorem, quàm par est, curam illius habemus, si nihil illi negamus quacunque desiderant oculi, si in nulla re inferimus illi molestiam, violentiam; nutrimus hostem, armamus illum contra spiritum, fortem & robustum reddimus. Valde difficilis conflictus erit cum ejus tentationibus, & incertus pugnae eventus, imo timendum est, ne in hac pugna infelicitè potius succumbamus, quàm triumphemus. Efficacissimus modus hostem hunc superandi est, mortificationem continuam in corpore circumterre, flagris & disciplinis carnem discindere, catenulis dilaniare, cilicijs affligere, varijsque instrumentis & modis in illam cavere, et Cruci Christi cum suis concupiscentijs affigere.

His consideratis, reflecte te supra usum poenitentiarum & mortificationum corporis. Ne fide hosti tuo, sed mortificationibus stude illum subjungere Spiritui. Constitue reassumpturum te mortificationes, quas in Tirocinio in usu habuisti, ac etià aucturum, praesertim si experiris hostem contra rationem & spiritum vires sumere; et cum in omnibus mortificationem quaerere debeas, vide & tecum dispice in singulis occupationibus, & actionibus tuis Religiosis, quas & quales mortificationes te facere & adhibere conveniat.

PUNCTUM II. Audi illa Verba Lucae **II** *Cum fortis armatus custodit Atrium suum, in pace sunt ea, quae possidet.* Et considera, alterum medium debellandi domesticum animae hostem, nimirum Carnem, esse Custodiam sensuum. Nisi fortis armatus custodierit atrium, non est speranda hostis hujus victoria, non est speranda pax animae, & tranquillitas; ut in pace sint, & salva ac integra maneant, quae possidet anima, fortis armatus in atrio est constituendus. Caro nostra intra nos bellum gerens adversus rationem & spiritum, non sola eundem aggreditur, sed ordinariè advocat externas

suppetias, ut conjunctis viribus, validiore irruat impetu. Suppetiæ sunt: variæ imagines, variorumque objectorum species sensibiles, quas per patentem sensuum portas advocat, & ministerio eorundem sensuum, in atrium immittit, atque cum his deinde adonitur animam, & interiora domus penetrare nititur, intellectum & voluntatem oppugnat, & varijs cupiditatibus exagitat, fitque subinde, ut voluntas in prælio & pugna, cum hoste talibus viribus aucto, infeliciter succumbat, ejusque tentationibus cedat.

Hic assus & bellandi modus, ne carni, hosti nostro succedat, custodiendum est atrium, custodiendi sensus corporis, fortis armatus in atrio hoc & in primo aditu & ingressu Domus animæ nostræ constituendus est, qui arceat externum hunc succursum. Fortis hic armatus est ipsa ratio, & voluntas bene animata adversus hunc domesticum hostem, obfirmata & stabilita in desiderio & proposito superandi eundem, armata & instructa Regulis modestiæ, armata sanctis resolutionibus & propositis, super exactissima earundem regularum observatione formatis, armata tot Divinæ gratiæ auxilijs, totque adjumentis & præsijs, armata denique forti & efficaci puritatis Angelicæ amore. Armatus hic debet esse fortis, ut non cedat ullis diffinitatibus, ullis respectibus & rationibus humanis, lingvis item & obrectationibus aliorum, qui non patiatur se ex sua statione moveri, & atrium incusoditum relinquere, propter explendam curiositatem, aviditatem sciendi, aliosque similes ad speciem honestos titulos & prætextus. Talis fortis armatus, si custodierit atrium & sensuum portas, in pace erunt omnia quæ possidet.

Quamdiu anima non succumbit hosti, possidet Thesaurum puritatis & castitatis, æstimabiliorum quibuscunque opibus, possidet Thesaurum meri-



meritorum & bonorum operum, thesaurum gratiæ divinæ & donorum supernaturalium, possidet pacem & tranquillitatem cordis, quæ exuperat omnem sensum, possidet Deum & thesauros bonitatis ejus. Hæc omnia erunt in pace, erunt salva & integra, si custoditum fuerit atrium; non enim oculus, non auris, non lingua, non ullus alius sensus deprædabitur animam.

Hæc considerans reflecte te, an fortî huic armato commiseris custodiam atrii tui? Custodia & vigilantia Superiorum supra conversationes & exteriores actus nostros, supra observationem legum nostrarum, multum juvare potest ad nos in puritate conservandos, & præcavendos tot lapsus ac defectus; interim si non accesserit propria sensuum custodia & vigilantia supra semetipsum, minus illa efficax erit; unusquisque debet supra seipsum vigilare, nec satis est, alteri custodiam atrii relinquere. Is ipse, cujus est domus & atrium, qui thesauros in hac domo depositos habet, debet custodire atrium suum, quia de ipso & de ijs quæ possidet, agitur.

Lustra atrium domûs tuæ, percurre omnium & singulorum sensuum portas, & vide, an illæ sint bene custoditæ? si quæ minus custoditæ est, provide, ut quàm optimè custodiatur; percurre item omnes & singulas modestiæ regulas, adverte in cujus potissimum observatione deficias, velisque hunc defectum corrigere. Pone custodiam ori tuo, sepi aures tuas, claude oculos, illudque quàm maximè cura, ut nulli tui sensus pateant, ne per varia objecta liberè vagentur, ut per illorum portas nihil perveniat, quod vires hostis tui augere possit. Ita enim fiet, ut in pace sint tua omnia, quæ possides, ut habeas internam animæ pacem & tranquillitatem, ut tua puritas sit integra & Angelica, ut gratiâ Divinam retineas, ut Deus in corde tuo resideat.

PUNCTUM III. Audi illa verba Genesis 38 de Ioseph dicta. *Relictô in manu ejus palliô fugit.* Et obiter in memoriam revoca historiam Patriarchæ Joseph. Quomodo is ad peccatum sollicitatus tentationem vicerit, nimirum vicit illam per hoc, quod relictô pallio fugerit, fugâ feliciter triumphavit. Et hinc discce, ultra media duobus superioribus punctis proposita, hoc probatissimum & efficax medium ad debellandum domesticum hostem, nimirum carnem, esse fugam occasionum, fugam tentationum.

Universalissimum quidem hoc medium est, ad quoscunque animæ nostræ hostes debellandos, ut nos subtrahamus occasionibus, ut de tentationibus fugâ triumphemus; maximè tamen felix, & maximè necessarium est hoc medium ad superandos domestici hostis insultus. Contra mundum, contra dæmonem, non solum innoxie, sed etiam cum spe victoriæ potest pugnari aggressivo conflictu, potest formale institui prælium, carnem verò tuam poteris quidem aggredi mortificationibus & afflictione multiplici, ultra hunc tamen, nullus alius conflictus est attentandus, sed solâ fugâ triumphandum.

Et imprimis, ut de carne triumphes, fugiendæ sunt quævis occasiones & conversationes, quæ vel umbram periculi habere videntur. Puritas Angelica, est speculum nitidissimum, speculum sine macula, quod levi etiam afflatu infici & obfuscari potest. Si obfuscari illud nolis, subduci debet, ne affletur. Est lilium candidissimum, quod in manibus facile marcescit, est ovicula, quæ nisi effugiat, in occasionibus, tanquam in medio luporum, facile discerpitur. Occasiones verò & conversationes aliquid periculi afferentes, sunt ignis, in quem si te conjicias, facile adureris, sunt viscus, quem si tangis inquinaris, sunt laqueus, in quem facile incidis, si non  
caveas

caveas, si non fugias, sunt dulce venenum, quod si haurias, necaris, sunt pestis, quam si attraxeris, de te actum est. Effundenti se in conversationes, ingerenti in occasiones, nihil aliud ominandum est, nisi quia periturus est in periculo, quod amat.

Fugiendæ igitur sunt conversationes & quævis occasiones, quibus caro uti potest ad nos debellandos, idque fugiendæ sunt relietio pallio. Pallium hoc sunt tituli colorati, prætextus quæsi, & rationes quæ svadent, ne te illi occasione subducas, ne hanc vel illam conversationem dimittas. Tales rationes & tituli sunt: spes præsentia majoris gloriæ Divinæ, occasio apparens spiritualis obsequij animarum, metus ne animos fidelium a te avertas, ne pro solitario, & eremicola habearis; persuasio fortis, leve aut nullum periculum timeri & cetera ex tali occasione & conversatione, fiducia gratiæ Divinæ; experientia, quod similes occasiones & conversationes nihil tibi in antè damni & nocumenti attulerint, spes conciliandi amicos, Benefactores Societati, spes obtinendæ eleemosynæ & subsidij, vel pro domo paupere & indigente, vel pro alijs pauperibus. Hæ & aliæ rationes similes, sunt pallium ex quo teneris, & ad animæ tuæ traheris interitum, hoc pallium nisi dimitteris & reliqueris, hosti tuo in prædam cedes.

Tentationes etiam quas caro immittit, & quibus nos sollicitat & aggreditur, fugâ sunt superandæ. Quod hac ratione præstabis: Principijs cujuscunque tentationis puritati Angelicæ repugnantis, fortiter obsta, primas statim suggestiones rejice, ostium mentis claude, fuge omnem moram & longiorem cum hoste disceptationem, mentem aliò averte, honestamque diversam assume occupationem, quæ mentem & animum abripiat, ac te periculo submoveat; non bene cessit primis Parentibus longior cum hoste disceptatio; scintilla tentationis nisi

statim excutiatur, facillè te aduret, tentatio semel admissa; vel non fortiter statim rejecta, tuò damnò brevè capiet incrementum.

Porro etiam hæc tentationum fuga, debet esse palliò rejectò. Pallium hujusmodi est profunditas animi & defectus claritatis, seu indebita verecundia, cui tanquam pallio involvimus, & quâ tegimus tentationes nostras coram Superioribus ac conscientie nostræ directoribus, quibus tamem hæc perleges nostras patere debent, ut ab ijs dirigamur & instruamur, qua ratione eas superare possimus. Hoc pallium omnino rejici debet & relinqui in manibus hostis nostri, qui nos ex hoc pallio tenet, tamdiuque spem reportandæ de nobis victoriæ habet, quamdiu suas suggestiones & artes tectas videt.

Fac Reflexiones, proposita, & elice affectus.

Colloquium institue ad pretiosissimam DEX Parentem, cui humiliter supplica, ut illa fugienti tibi conversationes & occasiones, quæ nocumentum aliquod afferre possunt, fugienti item tibi quasunque tentationes domestici hostis tui, sit civitas Refugij, ut post abjecta pallia, ex quibus te hostis tuus tenere consuevit, sub suam protectionem Sanctissimam, tanquam sub pallium te recipiat, & confide te hîc securissimum futurum, hîcque palliò purissimæ Virginis, puritati tuæ optimè te consulturum.

*In fine: sub tuum Presidium*

## Meditatio De Religiosa Obedientia

*Praludia* eadem, quæ meditationis de paupertate religiosa.

PUNCTUM I. Audi illa verba 1mi Reg. 15. *Nunquid*

quid vult Dominus holocausta & victimas, & nos potius ut obediatur ei. Melior enim est obedientia quam victima. Et considera in quo pretio sit obedientia apud DEUM, magis illa aestimatur, quam victima. Quæ tamen ipsæ in quo pretio fuerint, hinc collige: victimarum oblationes tanquam munera sibi gratissima respiciebat DEUS, illis placabatur iratus, per victimarum oblationem obtinebatur facile, quidquid à DEO postulabant homines; circa victimas tot ritus & ceremoniæ fuerunt institutæ & præscriptæ; in omni lege Religionis veræ sacrificia & victimas DEUS sibi offerri voluit. Voluit offerri in lege Naturæ, in lege scripta, & in lege gratiæ.

Quamvis verò DEUS in victimis & holocaustis ita sibi complaceret, nihilominus illis ipsis præfert obedientiam, *Melior est obedientia, quam victima.* In hac ita sibi complacet, ut etiam oblatio pretiosissimæ victimæ, in ara crucis, pro salute nostra oblata, non fuerit sine obedientiæ merito; victima illa Agni immaculati tollentis mundi peccata, licet ex se acceptissima fuerit, tamen quo gratior appareret, obedientia Christi in moriendo intervenire debuit. *Factus obediens usque ad mortem, mortem autem Crucis.* Imò ut Christus se in holocaustum Patri æterno offerret, non satis illi fuit, quòd suam carnem immolaverit, quòd vitam posuerit, quòd sanguinem pretiosum ad ultimam guttam profuderit, etiam Intellectum & voluntatem, per humilem obedientiam, immolare illum oportuit.

Hæc considerans, Reflecte te imò super vota tua Religiosa, & recogita, quòd & tu in singulis renovationibus consueveris DEO immolare victimas, & in præsentis sis easdem immolaturus. Victima talis imprimis est Paupertas religiosa ejusque votum. Per hanc victimam, immolas DEO quidquid in mundo reliquisti, immolas jus tuum & Dominium quod habuisti, vel habere poteras supra pos-

sessiones & quæcunque bona fortunæ, immolas sæcularia desideria, & spes quibus te mundus ad se alliciebat. Victima hæc multum Deo grata & accepta est, hanc immolantibus DEUS multa præmia præparavit. Castitas pariter ejusque votum, altera victima est. Per illam immolas Deo non carnes taurorum aut vitulorum, aut aliorum pecorum & animantium, sed carnem propriam cum ejusdem concupiscentijs, immolas terrena & sensuaria oblectamenta, idque hanc victimam immolas in ara crucis, quia carnem tuam per mortificationem configis cruci Christi. Per ipsam, dum Deo consecris innocentiam tuam & puritatem Angelicam, immolas quodammodo agnum immaculatum & innocentes columbas. His tamen victimis melior est obedientia. Et quia ipsa etiam obedientia tua est victima, nam & hanc voves, per ejusque votum immolas Deo omnes honores & dignitates, immolas voluntatem & Intellectum, dum has potentias Animæ subijcis voluntati & judicio Superioris; Ideo obedientia melior est alijs victimis, quod complectatur & rationem obedientiæ & rationem victimæ. Idque obedientia est præstantior victima quàm victimæ Paupertatis & Castitatis. Per paupertatem enim immolantur res homini extrinsecæ, quæ cum creatæ sint hominis ipsius causâ, inferiores & minis præstantes sunt ipso homine. Per castitatem immolatur quidem DEO ipse homo, sed secundum partem sui imperfectiorem, nimirum secundum corpus & secundum id, quod homo habet commune cum brutis. Immolantur affectus & inclinationes brutales & sensuales. At per obedientiam DEO immolatur homo secundum partem sui præstantissimam, secundum quam homo est similitudo & imago DEI, secundum quam differt à brutis, nimirum immolat animam, immolat Intellectum & voluntatem, quæ sunt pars nobilissima hominis,



minis; adeoque obedientiae victima est praestantissima, & melior alijs victimis, quas religiosus Deo immolat per alia vota

Reflecte te 2dò & recogita, quàm perfecta debeat esse obedientia, ut in illa sibi Deus magis complaceat, quàm in victimis & holocaustis. Certè ut obedientia in comparationem veniat cum holocaustis, debet esse valde perfecta, quantò magis ut praferatur iisdem. Holocaustum, talis fuit oblatio, quæ integrè & ex toto res immolabatur & offerebatur nulla parte sui imminuta, ita ut nihil rei esset, quod non offerretur Deo. Pariter & obedientia, ut Holocaustis comparari ac etià praferri possit, debet per illam totus homo immolari Deo, nimirum ut non solum Superiori, & Deo quem in Superiore agnoscis, obedias in magnis, sed etiam in minimis; non solum in facilibus & tibi gratis, sed etiam in difficilibus & à quibus abhorres; non solum dum praecipit clarè & expressè, sed etiam dum ex nutu vel signo aliquo mentem ipsius & voluntatem cognoscis; ut non solum obedias Superiori docto, sancto, tibi specialiter affecto, sed etiam minùs docto, minùs sancto, tibi minùs affecto; ut obedias non solum Superioribus ordinariam potestatem & jurisdictionem habentibus, sed etiam officialibus subordinatis ex delegata potestate aliquid injungentibus. Imò ut totus homo, secundum quod homo est, cedat Deo in holocaustum, non solum voluntatem, sed etiam Intellectum & Judicium tuum, Voluntati & Judicio Superioris humiliter submittere debes.

Recogita 3tò si DEUS tanti aestimat obedientiam, quanti te illam aestimare conveniat? Debes illam magis aestimare, quàm victimas & holocausta, eo sensu, ut propter obedientiam faciendam, debeas omittere etiam sanctissimas actiones, ad tuam salutem & perfectionem quàm maximè conducen-  
tes, ut debeas relinquere quaecunque obsequia circa  
proxi-

proximorum salutem, etiamsi conversionis totius mundi spes affulgeret, si obedientia aliò te avocet, ut debeas DEUM relinquere propter DEUM, obedientia præstat quibuscunque sanctissimis actionibus ex voluntate propria factis.

His reflexionibus adde reflexiones supra tuæ obedientiæ perfectionem, quam perfecta illa in te fuerit, & deinceps esse debeat. Elice varios affectus confusionis, resignationis, & humilis subjectionis tuæ voluntatis & judicii, voluntati & iudicio tuorum Superiorum, quoscunque tibi DEUS providerit, circa res quascunque, ex hoc unico motivo, quòd quidquid illi præcipiunt, DEUS per ipsos præcipiat, & quòd hominibus tanquam DEO præcipienti obedire tenearis. Fac Proposita, pete gratiam ad ea exequenda.

PUNCTUM II. Audi ulteriora verba ejusdem Capituli lib. 1. Reg. *Quoniam quasi peccatum ariolandi est, rebugnare, & quasi scelus idololatria, nolle acquiescere.* Considera: quantum DEUS æstimat obedientiam, in eaque sibi complacet, tantum averfatur & detestatur inobedientiam. Obedientiam præfert victimis & holocaustis, inobedientiam è contra comparat gravissimis peccatis, nimirum peccato ariolandi, & peccato Idololatriæ. Verùm quid similitudinis habet inobedientia cum illis peccatis? habet, & multum habet.

Et imprimis, repugnare voluntati Superioris, est quasi peccatum ariolandi; quia inobedientes faciunt quædam auguria & divinationes. Dum enim præferunt suam voluntatē voluntati Superioris, habent formaliter vel æquivalenter iudicium practicum, quo ipsi existimant, id, quòd ipsi volunt contra Superioris voluntatem, melius esse, DEO magis acceptum, & magis conforme voluntati ejus. Illi solent divinare: si voluntatem suam præferant voluntati Superioris, eventura inde majora bona, securam

euram hinc majorem DEI gloriam, facilius illos hac ratione obtenturos salutem animæ, nihil id obfuturum perfectioni & spirituali profectui ipsorum, proximorum animas quam plurimas per id DEO lucrandas &c. Verum divinare illos mendacia, ipsa frequenter docet experientia, dum etiam vanos fines, quos in suis inobedientijs sibi præfigunt, sæpius non consequuntur, dum eorum ominationes & prædictiones falsas fuisse eventus ipse ostendit.

2dò Nolle acquiescere voluntati Superioris, est quasi scelus idololatriæ. Per inobedientiam enim honor & cultus, qui DEO debebatur, eidem subtrahitur, & idolis quibusdam exhibetur. Talia idola sunt: Excellentia propria, eminendi cupiditas, libertatis ampliandæ studium, proprii sensus & judicii æstimatio, Amor proprius, variæ vanitates & consequentiæ. His idolis honor impenditur, qui per inobedientiam DEO eripitur, dum singula hæc, vel aliqua ipsorum, præferuntur voluntati DEI, per Superiorem explicatæ, dum iisdem idolis voluntas & judicium subditi immolantur, quæ DEO immolari & in holocaustum cedere debuerunt.

Fac reflexiones supra tuas inobedientias, an non fuerint illæ peccata ariolandi? Illa quæ per inobedientiam tibi pollicebaris & quæ intendebas, an non fuerint divinationes mendaciorum? Item, an tuæ inobedientiæ non fuerint scelus idololatriæ? Idola illa tuæ propriæ excellentiæ libertatis, excutientis tvave jugum obedientiæ, amoris tui inordinati, humanorum respectuum, in quanto honore & existimatione sæpius apud te extiterunt? quàm frequenter illa adorasti; o quoties, ut idola hæc coleres, Creatoris tui voluntatem contempsisti? o quoties his idolis voluntatem & judicium tuum immolasti? Confundere, Idola hæc comminue, ea; ipsa, unà cum voluntate tua, Deo Creatori immola. Propone deinceps non illis, sed soli DEO per  
obe-

obedientiam perfectam te sacrificaturum.

PUNCTUM III. Audi adhuc ulteriora verba ejusdem capitis: *Pro eo, quòd abjecisti sermonem Domini, abjecit te Dominus, ne sis Rex.* & 1. Regum 13. *Si fecisses quæ præcepit tibi Dominus, jam nunc præparasset regnum tuum super Israël.* Et considera damna, quæ ex inobedientia sequuntur, & pœnas quibus illa punitur, hæc potissimum esse: Quòd Deus abijciat eos, qui per inobedientiam abijciunt sermonem Domini; quòd faciat, ut non sit rex, qui est inobediens; quòd non præparet illi regnum, quod propter obedientiam præparasset. Damna hæc & pœnæ, gravissimæ sunt.

Et imò quidem abijci quempiam à Deo pœna gravissima est, abijci à Deo, est excidere ab extraordinaria & singulariori Divina providentia, ab illa providentia, quæ Creaturam rationalem ita in suum finem dirigit, ut etiam ipsam ad eundem perducatur. Quem Deus abijcit, illi jam non succurrit, non tuetur in periculis, non præservat à malis, occasionem ruinæ non avertit, deprecationes Sanctorum pro eo non audit, orari pro ipso non vult. *Usquequo tu luges Saul, cum ego abjecerim eum.* Tradit Deus talem in reprobum sensum, ut faciat quæ non conveniunt. Difficilè is corrigitur, juxta illud: Considera opera Dei, quòd nemo possit corrigere, quem ille despexerit.

2do pœna inobedientiæ est, Quòd inobedientem Deus abijciat ne sit Rex. Obedientis privilegium est, quòd ipse sit Rex, quòd dominetur suis cupiditatibus, quòd appetitum sensitivum & passionem rationi subjectas habeat. Inobedientiæ pœna est, quòd illi nolint subijci sui subditi, qui est inobediens suis Superioribus. Ex eo quia ratio & voluntas repugnant Deo & Superioribus locum Dei tenentibus, caro etiam repugnat rationi, repugnant cupiditates & nolunt ratione regni, nolunt illam  
sibi

sibi dominari, jugumq; ipsius excutiunt. Servi tu ei, à quo factus es, ut serviat tibi, quod propter te factum est. Vir obediens loquitur victorias, facile superat tentationes, ex pugna cum mundo, carne, & diabolo victor recedit. E contra, inobediens tentationi miserè succumbit, & qui per obedientiam Deo servire renuit, fit servus peccati, mancipium diaboli, mancipium suarum cupiditatum. Qui DEO obedit, obediunt ei omnia. Petro obediens obediunt mare, eiq; se calcandum præbuit. Mare & venti obediunt tibi, si tu obedieris DEO. Inobediens creaturas experitur sibi inobedientes & rebelles: contra inobedientem Jonam concitatur mare & venti, paratur Cetus ad devorandum eum.

3<sup>ta</sup> Pœna inobedientiæ est, quod regnum propter obedientiam præparatum, ab inobediente transferatur. Propter suam inobedientiam Adam & Eva pelluntur ex Paradiso, qui ipsi, si obediissent, paratus & destinatus fuerat. Propter inobedientiam, Saulis transfertur ab ipso regnum, & Davidi facienti voluntatem Domini præparatur. Præparatur regnum obedientibus, dum illis auxilia gratiæ uberiora & efficacia conferuntur ad salutem consequendam. Aufertur regnum, dum hujusmodi auxilia subtrahuntur. *Auferetur à vobis regnum DEI, & dabitur genti facienti fructus ejus.* Regnum, quod ab homine religioso auferri, vel peres quod ille conservari potest, est non solum potestas dominativa supra carnem propriam, & supra affectus & passiones appetitûs sensualis, sed etiam est beneficium vocationis religiosæ, est perseverantia finalis in gratia, & æterna animæ salus, est conversio animarum pretioso Christi sanguine redemptarum. Hoc regnum quemadmodum DEUS præparavit obedienti, ita aufert ab inobedientibus, ex quibus aliqui indignos se faciunt gratiâ vocationis & perseverantiâ in illa. alij merentur etiam à regno cœlorum excludi, alij in pœnam



nam non assumuntur ad hoc, ut per eos animæ infidelium & peccatorum, ad veram fidem & poenitentiam convertantur.

Exhorresce has pœnas, & cogita an & tu ipsas non merueris? an item non experialis in te illam pœnam, quod propter tuas inobedientias inobedientem rationi habeas carnem tuam, inobedientes affectus & appetitus tuos brutales & sensuales. Desce & detestare tuas inobedientias & propone te in omnibus obedientem futurum superioribus tuis.

Colloquium ad S. Patrem nostrum Ignatium. Divinissime Pater, indignus filius tuus ad plantas tuas sanctissimas pronus procido, & humillimè supplico, ut sit in me perfecta obedientia, quam tantopere filiis tuis & mihi commendasti, in qua excellere, & per quam ipsos discerni ab aliis voluisti, fiat obsecro in me duplex spiritus tuus spiritus in quâ duplicis gradus obedientiæ, ut non solû voluntatem meam voluntati meorum Præsidum perfectè subijciam, sed etiam, ut iudicium meum iudicio eorundem conformare studeam. Effice, ut hoc spiritu tuo animatus vivam, factus obediens usq; ad mortem, idq; mortem crucis, & hunc spiritum moriens in manus Patris æterni reddam.

*In fine: suscipe Domine universam libertatem.*

## Meditatio

### De vocatione religiosa ejusq; desertoribus.

*Preludia eadem quæ meditationis de paupertate religiosa.*

**PUNCTUM I.** Audi illa verba Joân. 6. Multi discipulorum JESU, abierunt retrò, et jam non cum illo ambulabant. Quæ audiens, per hos discipulos intel-



tellige desertores Societatis JESU, qui ab ea sine  
justis & sufficientibus causis recedunt.

Desertores hujusmodi sunt ex Discipulis JE-  
SU, quia in schola ipsius, sub institutione Sanctissimi  
hujus magistri permanserunt aliquo tempore, ab ip-  
so sunt vocati, ab ipso quâ verbò, quâ exemplò in-  
structi, discere poterant ac debuerant, qua ratione  
eum sequerentur, illi adhærerent, nec ab ipso retro  
abirent, qui tamen deinde sine justa ratione, quæ  
coram DEO valere possit, ab hac schola recedunt &  
ad mundum, de quo illos Christus elegerat, infeli-  
citer redeunt. Nec mirandum, quòd Societas plu-  
res desertores sui numerat, etiam à Christo, æternâ  
DEI sapientiâ multi discipulorum abierunt retro.  
Neq; per hoc derogatur sanctitati instituti Societatis,  
quòd multi eam deserant, quandoquidem etiam  
Sanctissimæ institutioni Christi multorum discipulo-  
rum recessus ne minimùm derogarit.

Sicut verò de illis, qui à Christo vivente su-  
umq; prædicante Evangelium recedebant, verè di-  
ctum fuit, quòd abierunt retrò, quòd jam non am-  
bulabant cum JESU, ita id ipsum de desertoribus  
qui sine rationibus sufficientibus & veris, deserunt  
Societatem JESU, verificari consuevit. Abeunt &  
illi retrò, non eo tantùm sensu, quia redeunt ad  
sæculum, sed etiam, quia à JESU hoc est à Salvato-  
re à salute recedunt, non eunt amplius viâ salutis,  
sed ab hac quàm maximè elongantur. Utinam alio  
saltem tramite versus tamen eundem terminum i-  
rent, utinam ad eum tenderent terminum, quem  
Christus, qui via veritas, & vita est, ipsis demonstrat;  
sed infelices, retrò hoc est ad terminum oppositum,  
à quo abducebantur abeunt.

Verificatur & illud de iisdem Societatis de-  
sertoribus, quòd jam non cum JESU ambulent.  
Ambulare cum JESU, est ita ambulare, sicut ipse  
ambulavit, est sequi JESUM, ejusq; insistere vestigijs,

est vivere secundum præcepta Evangelica, & consilia & exempla Christi; est conversari, sicut Christus conversatus est, virtutes ejus imitari, indui vel ibi & insignibus JESU; est Spiritu JESU agi, ac vivere, illiq; se conformare. Qui vero à JESU abeunt, & Societatem ejus ex rationibus indebitis deserunt, non amplius ambulant, sicut Christus ambulavit, non vivunt nec volunt vivere secundum consilia & exempla Christi, nolunt imitari Christum pauperem, humilem, & contemptum. Diversæ ipsorum sunt conversationes, & valde difformes conversationibus Christi. Non amplius causa Christi sequuntur, sed ad illa se transferunt, ad quæ illos trahit concupiscentia oculorum, concupiscentia carnis, & superbia vitæ, seu caro, mundus, vanitas, & diabolus. Ad mundum spectant; sunt de mundo; mundum illos diligit tanquam id quod suum est; quodsi mundus illos non diligit, illi tamen diligunt mundum, mundo, etiam repellenti ipsos, adhærent, & ea quæ sunt mundi, sectantur, post carnem & post sua desideria ambulant.

Hæc considerans desse infelicitatem hujusmodi Societatis JESU desertorum, irrisq; cordialiter condole. Et ne tu etiam ad eandem infelicitatem devenias, ex avertice, tuæq; in vocatione constantiæ & perseverantiæ consule, atq; omni meliori modo provide.

PUNCTUM II. Audi ulteriora verba Joan. 6. Dixit ergo JESUS ad duodecim: nunquid & vos vultis abire? respondit Simon Petrus: Domine ad quem ibimus? verba vitæ æternæ habes. Respondit eis JESUS: nonne ego vos duodecim elegi, & unus ex vobis diabolus est. Ex quo toto Christi cum apostolis colloquio discce, quàm potentia sint exempla desertorum Societatis, ut Christus ad probandam duodecim apostolorum constantiam, post abitum, reitò, multorum suorum discipulorum, interrogare non dubitaverit.

Verit. Nunquid & vos vultis abire? Nec frustra id quaesivit Christus. Quamvis enim S. Petrus è sensu & nomine omnium Apostolorum, protestatus fuerit: *Quò ibimus? verba vitae aeternae habes*; tamen inter ipsos duodecim Apostolos vidit Christus unum, qui abiturus & Societatem ejus deserturus erat; nimirum vidit Judam Iscariotem, qui à Christo deinde turpiter defecit. Quod ipsam illis expressit verbis: *Nonne ego vos duodecim elegi, & ex vobis unus diabolus est.*

Ex quibus verbis disce iterum. Hæc apud Christum pro eodè accipi, unus ex vobis retro abibit (quod tua responsione significare volebat) & unus ex vobis diabolus est. Diaboli prædicata sunt: quòd sit mendax quòd sit superbus ab initio, quòd sit spiritus immunus, quòd in veritate non steterit, quòd è cælo tanquam fulgur ceciderit, quòd draconi adhæserit, quòd ipsi paratus sit ignis æternus. Hæc prædicata omnino conveniebant Judæ desertori. De alijs Societatis JESU desertoribus, qui eam inlicitè ex prava sua voluntate deserunt, an ipsis eadem prædicata conveniant, fileo. Timeo tamen, ne pleraquæ conveniant. Illud è testimonio & oraculo veritatis æternæ certum esse videtur, quòd Judas volens & disponens se ad abeundum retro à Christo, jam tunc diabolus fuerit, quòd si verò, dum adhuc vellet abire à Christo, Diabolus fuit, postquam defacto abijt, pejor exstitit diabolò.

Sed liceat inquirere quid Iscariotem adhuc in schola Christi existentem, & fortè plures Societatis JESU desertores, in diabolo transformet? an sola ipsorum vacillatio in vocatione? solane voluntas deferendi Christum? & talis quidem voluntas frequenter est sufficiens ad hujusmodi transformationem faciendam. Interim plura vitia Judam adhuc in Societate & collegio Apostolorum existentem in diabolum transformarunt, per quæ se ad defectio-

nem à Christo disponebat. Tertia Judæ vitia fuerunt. 1<sup>mo</sup> Avaritia & paupertatis defectus, atq; pecuniarum clancularia asservatio. *Fur erat & oculus habebat.* 2<sup>do</sup> Orationis & rerum Spiritualium neglectus & fastidium. Christus sumpta cana abiit in hortum, ultimum sermonem cum Apostolis instituit, post sermonem & ipse orat, & alios orare jubet. *Orate ut non intretis in tentationem.* Judas his se subducit, negligit ea, quæ alios in Christi schola detinebant: *Quo ibimus? verba Vita aterna habes,* proinde non est mirum, quod tandem à Christo defecerit.

3<sup>tium</sup> vitium Judæ fuit, quod etiam illum fecit Christi desertorem: familiaritas periculosa, conversationes malæ & suspectæ, associabat se principibus sacerdotum, Pharisæis, scribis, persecutoribus Christi, cum illis conversabatur, clancularias amicitias & familiaritates habuit, multa cum illis tractabat, transigebat &c. associabat se præterea licentibus, hominibus malis, perversis. *Dux fuit eorum qui comprehenderunt JESUM,* & ita factum est, ut cum perversis perverteretur.

4<sup>tum</sup> Judæ vitium fuit: alienæ virtutis persecutio, obrectatio. Obsequium illud sanctum poenitentis Magdalenæ, ab ipso Christo laudatum, quod ipsa fecit, pretiosum unguentum effundendo in sanctissimum Christi caput, Judas ausus est improbare & damnare, *Ut quid perditio hac? potuit istud vendari multo, & dari pauperibus.* Propter hoc vitium non debuit Judas habere locum in schola virtutis & ibi ubi virtus erat in pretio.

5<sup>tum</sup> vitium Judæ, quod eum disponebat ad defectionem à Christo, fuit hypocrisis & virtutis simulatio. Simulabat misericordiam super egenos cum diceret, *potuit dari pauperibus,* qua simulatione tegebat suam avaritiam & pecuniæ cupiditatem. Cum lupo esset, induebat se vestimentis ovium, sed non patiebatur illi pastor, nec potuit continere ovile Christi.

6<sup>tum</sup>.

Etiam vitium Judæ, fuit profunditas animi Judæ, ex qua Crifto medico, volenti sibi succurrere, nolebat sua aperire vulneia, culpam nolebat confiteri & agnoscere, licet Christus illum indigiret, quod ipsum esset traditurus. Hæc & Judam perdidit, & multos desertores perdit, ut eos tanquam insanabiles Christus medicus rejiciat.

7<sup>um</sup> tandem vitium Judæ fuit sacrilegium illud in caniculo commissum, hoc est sacrilega, in peccato mortali, in proposito tradendi Christum, suscepio Sanctissimi sacramenti, post acceptam illam sanctissimam buccellam in Judam intravit satanas, ipsaq; Judas transformatus est in diabolum.

Hæc & similes dispositiones ac vitia, fuerunt gradus & passus, per quos Judas desertor Christi ejusq; Societatis, & qui eum imitantur, à Christo recedunt, abeunt retrò, & ex Christi discipulo ac socio, transformantur in diabolum. *Unus ex vobis diabolus est.*

Hæc considerans, existima etiam ad te dirigi illam Christi interrogationem: *Nunquid & vos vultis abire?* respondensq; a te expectari. Quod vero responsum dabis duci & magistro tuo sanctissimo? nunquid non respondebis? Domine quò ibo? verba vitæ æternæ habes! quis me separabit à Charitate tua? mihi adhærere Christo bonum est. Domine paratus sum tecum in carcerem & in mollem. Protestare cum S. Petro: *Etiam si omnes scandalizati in te fuerint, ego non scandalizabor.* Item cum P. Claudio Aquaviva. *Si Societas ab omnibus desereretur, ininus ego cum ope tua mansurus sum.* Ora Christum viscerosissime. Domine jube me venire ad te, trahere post te, curram in odorem unguentorum tuorum. Ne permittas me separari a te.

Reflecte te deinde an non inveniatur jam in te aliqua dispositio fultem remotiores & inchoata ex his, quibus similes, in gradu proximioris dis-



spofuerunt Judam, ut Christi societatem defereretur. Percurre singula Judæ vitia, per quæ ille præcipitatus est. vide quod grandi & meditandi in te studium? quis affectus ad res spirituales, aliaque exercitia spiritualia? quis paupertatis amor? ad conversationes, amicitias, familiaritates cum sæcularibus & cum laxioribus quæ propensio, quæ effusio? quod pretium alienæ virtutis? quis animi candor in aperienda conscientia? quæ reverentia Sanctissimi Sacramenti? quæ conscientie puritas, & quanta illius cura dum a te his ad mensam Eucharisticam? Contrarias, vitijs Judæ, virtutes comparare stude, & tuæ perseverantiæ, in sancta: JESU Societate certior & securior esse poteris.

PUNCTUM III. Audi illa verba ad Galat. 3. *Currebatis bene, quis vos impedit non obedire veritati. Persvasio hæc non est ex eo qui vocat vos.* Etiam hæc applica ad dimissos Societatis & dimissionem sine iustis causis procurantes. Si primus ille fervor, quo in Tirocinio DEO fervierunt, spectetur; si attendatur illa tunc exacta regularum observatio; ille in custodienda Disciplina religiosa rigor, illa minimorum defectuum fuga, illud solidarum virtutum & perfectionis studium? fateri est necesse, quod bene ceperint. *Currebatis bene.* Si verò spectentur ulterius ea, quæ deinde subsequuta est, primi fervoris remissio, in transgrediendis regulis libertas, graviorum criminum patratio, mediocrium salutis contemptus vel abusus, regressus ad sæculum; quid dicere restat? an non illud: *quis vos impedit non obedire veritati?* quo factum est, ut talis secuta sit mutatio? quis vos impedit non obedire veritati vocanti? vos ad vitam perfectiorem? ad currendam illam vitam, ad quam currendam ipse Christus exultavit ut gigas? veritati invitanti per tot internas motiones Spiritus Sancti, per tot lumen in meditationibus aliisque exercitiis accepta, per Christi Consilia, &c.



empla, per exempla contodalium vestrorum? Quis vos impedivit? superastis illa impedimenta quæ impediebant, ne Christum primò vocantem sequeremini, quæ primum religionis ingressum retardabant. Et quod modo tale supervenit impedimentum, quod primam illam voluntatem vestram serviendi DEO in religione, aliquando tam fortem & firmam, ita nunc devicit, ita superavit.

Insinuat hoc impedimentum Apostolus per verba quæ subjungit *Persuasio hæc non est ex eo, qui vocat vos*. Impedimenta illa quæ aliquos JESU fortius olim bene currentes, in suo cursu sistunt, imò etiam retrò abire faciunt, sunt aliquæ persuasiones, aliqua dictamina prava & perversa, quæ vel audiunt ab alijs, vel ipsi sibi formant & concipiunt in finem deterendi Societatem JESU. Hæc faciunt, ut non currant benè, ut cursum cæptum non continuent, sed abeant retrò nec obediunt veritati.

Tales persuasiones & dictamina sunt: remittendâ est aliquid de nimio rigore: non ita persequendus est hostis, ut perimatur civis. Non unica tantûm via salu is est, duodecim sunt portæ ad cælestem civitatem Ierosalem. Non ingrediar cælum, eâ porta, quâ illud ingrediuntur homines Societatis, ingrediar aliâ. Etiam homines sæculares salvabuntur, nunquid non possum DEO servire in sæculo? peccatores & publicani multos religiosos præcedent in regnam DEI &c. De his persuasionibus & dictaminibus quid sit sentiendum, indicat Apostolus. *Persuasio hæc non est ex eo, qui vocat vos*. Persuasiones hæc, cum sint contrariæ vocationi DEI, illiq; adversentur, non sunt à DEO, non sunt ab eo qui te vocavit in Societatem Filij sui. Qui te vocavit ad Societatem, vult ut in ea permaneas, monetq; per Apostolum: *Unusquisq; in qua vocatione vocatus est, in ea permaneat*. Qui te vocavit ad Societatem, vocavit e ut non eßes de hoc mundo, qua ratione igitur si

eri poterit, ut iterum te vocet, ut ad sæculum redeas, ut sis de hoc mundo?

His consideratis, reflecte te supra fervorem tuum, quò vitam religiosam inchoasti? quantum de illo remiseris? an non penitus extinctus sit? an jam eò non devenias, ut de abruptendo cursu capio cogites. Vide ne repugnes obedire veritati, quæ te continuo excitat ut curras in vocatione, roborat, & in via DEI detinet. Vide ne tandem persuasio aliqua mala à proposito tuo te dimoveat. Scito persuasiones quascunq; quæ te à servitio DEI & constantia in eodem avocant, non esse a DEO, non esse ab eo qui vocavit te.

Persuasiones quæcunq; à Christo sequendo, à Societate ejus ad sæculum te avocantes, sunt persuasiones periculosissimi Ducis, quibus te in perniciem trahit, sunt persuasiones carnis & mundi. Protestare cum Apostolo: sed licet Angelus de cælo evangelizet mihi præterquam quod sua vocatione ad Societatem Filii sui DEUS mihi semel evangelizavit, anathema sit. Protestare rursus quòd sicut in materia Fidei, omnes contra fidem rationes illico dissolvitis, rejicis, nulliusq; ponderis esse censetis, ita omnes rationes contra vocationem, quas tibi aliquando objiciet dæmon, quibus defectionem persuadere velit, te animose rejecturum, tanquam hostis animæ tuæ fraudes & insidias. Atq; ad obediendum veritati quæ te vocat, ut DEO servias & in vocatione tua perseveres, captivatum te & intellectum & voluntatem & libertatem & omnes potentias tuas.

Dictaminibus illis falsis quibus multi seducuntur, oppone contraria Dictamina & veritates infallibiles, illiq; te deinceps regere & illis quæ hinc inde. Justificationem quam cepi tenere, non derelinquere. Inimico meo, hoc est carni meæ non cedam in æternum, non congregibò prunas super caput meum. Caro non perimitur moderata mortificatione,

sed

sed magis voluptate quàm corrumpitur. Quidquid sit de alijs, qui ad vitam religiosam non sunt vocati inquam, mihi tamen unica hæc est salutis via, inquam per vocationem deductus sum; hanc si deseruerò, erravi & perij in æternum. Duodecim portæ sunt cælestis Hierusalem, ego tamen nullà alià admittar præterquam illà, ad quam me ducit vocatio mea. Homines sæculares salvabimur, sed qui utuntur hoc mundo tanquam non utentes, & qui DEUM in sæculo quærant, non desertores, non canes redeunt ad vomitum, non qui DEUM perdunt, ut sæculum & mundum inveniant. Cùm DEUS voluerit ut ipsi servirem in religione, non vult amplius ut illi serviam in mundo. Nemo potest duobus Dominis servire, nec fieri potest, ut quis mundo & cælesti serviens, DEO pariter serviat. Peccatores & publicani præcedent etiam religiosos in Regnum DEI sed vix penitentiæ ingressi, & conversi ad DEUM in toto corde, non quia misericordiâ DEI abutuntur, & in spem veniæ peccare volunt & peccant. His dictaminibus te deinceps regendum propone.

Colloquium instituendum ad Beatum Aloysium Gonzagam. Sanctissimæ Angelice adolescens, quem pretiosissima Dei Parens, voce à sua imagine delapsa, ad Societatem JESU vocare dignata est, per illum amorem & pretium, quo in vocationem tuam ferebaris, obtestor te & humillimè postulo; ut impetres mihi solidum vocationis meæ amorem. Sint obsecro mihi familiaria illa tua dictamina, quibus tu regebaris: *Volo reddere securam salutem meam. Ego non sum amplius de hoc mundo. Nimis arduum est esse Dominum & salvari.* Effice intercessionem tuam, ut in sancta Societate militante vivam & moriar, in triumphante verò unâ tecum Deo fruam in æternum.

*In Fine: Anima Christi.*

Ex pensio contemplativa  
 Formulæ votorum  
 Per secundum orandi modum à  
 S. Patre nostro IGNATIO pro-  
 positum.

*Praludium 1.* Audi illa verba Psal. 25. *Vove-  
 te & reddite Domino DEO omnes, qui in circuitu ejus  
 assertis munera.* Et imaginare in conspectu Sanctis-  
 simæ Trinitatis, coram pretiosissima Dei Patente, te  
 constitutum esse, ad emittenda vel renovanda vota tua.

*Praludium 2.* postula à Deo gratiam ut cum  
 gustu quàm maximo beneplaciti Divini vota tua  
 nuncupare, teq; per illa in holocaustum Deo offer-  
 re, & quidquid voveris plenè exequi possis.  
 In ipsa meditatione expende singula Formulæ verba.

*Omnipotens* Tua Domine omnipotentia im-  
 becillitatem meam adjuvet ut vota mea tibi red-  
 dam & voveam; hæc quoq; me adjuvet, ut quæ  
 voveo adimpleam & exequar. Ego enim ex me non  
 sufficio ad dicendum etiam Sanctissimum nomen tu-  
 um; quantò magis insufficiens sum ad superandas dif-  
 ficultates quas experiar, ad vincendas tentationes, qui-  
 bus impugnabor & quibus ab observatione votorū ho-  
 stis animæ meæ retrahere me conabitur. In te verò,  
 si me auxilio & gratiâ tuâ confortaveris, omnia potero,

*Sempiternæ.* Quia sempiternus & immortalis es  
 Domine, perpetua tibi debentur obsequia. Quare &  
 ego trado me tibi in servum perpetuum. Perpetuam  
 tibi Paupertatem, Castitatem, & Obedientiam vovere  
 volo, quia dignus es Domine, ut semper tibi servi-  
 atur, ut semper tibi vota mea reddam & exolvam.  
 Maxime cum & tu præmiaturus sis præstita tibi ob-  
 sequia in perpetuas æternitates. Quia æternus &

imutabilis es, mea quoq; voluntas imutabilis est, quâ volo semper & in perpetuum manere obligationem meam, & nunquam vinculis illis, quibus nunc tibi adstringar, solvi.

*DEUS.* Hoc titulo & nomine complector omnes titulos, quibus verè & propriè compellaris Domine. Hoc nomine exprimo essentiam & naturam tuam, exprimo omnes Personas Sanctissimæ Trinitatis, exprimo omnes perfectiones & attributa tua Divina. Tu es Domine tibi & rebus omnibus sufficientissimus. Tu bonorum meorum non indiges, non eges donis & obsequijs meis, tu es summa bonitas & Clementia; & quia talis es, licet his non egeas, admittis tamen benignissimè munera & obsequia mea, tu es omnisca & perfectissima sapientia. Immenus es Domine misericors, & justus. Non esses id quod es, si non esses ineffabilis, si possem te exprimerè. Es fons & plenitudo omnis perfectionis & omnium bonorum. Quotquot verò attributa & perfectiones habes Domine, totidem titulos habeo ego, ut te amem ut me tibi per vota religiosa immolem, ut servjam tibi.

Ego NN. Ego. pulvis & cinis, cujuslibet ventis dispersioni pervius. Ego canis mortuus merito abominabilis. Ego stipula sicca igne infernali digna, Ego is, cujus putredo Pater, Mater autem & soror vermes. Ego opprobrium & dehonestamentum Religionis meæ. Ego arbor inutilis & infructuosa, bis mortua, frustra terram occupans, & imbrem sanguinis tui in vanum bibens. Ego mancipium peccati & diaboli. Ego, tu solus hosti quid ego.

*Licet undecunq; indignissimus.* Indignissimus ratione principij ex quo originem dūco; quia ex nihilo sum. Indignissimus ratione principij in quod resolvat; quia pulvis sum & in pulverem revertar. Indignissimus ratione tot criminum & delictorum meorum. Indignissimus a prima conceptione mea, quia



quia in peccatis conceptus sum, indignissimus à primo rationis ulu, a quo non statim me ad te Deum meum in toto corde converti, indignissimus toto vitæ meæ tempore, qui te non esse unquam offendere. Indignitatem hanc meam dum recogito, mirari satis non possum, quomodo tantus peccator, tamdiu sustineor.

*Divino conspectu tuo.* Et quomodo dignus ero conspectu tuo, qui non sum mundus in conspectu tuo, qui in oculis tuis sanctissimis, averſantibus turpitudines meas, sapientius idq; graviter contra te deliqui. Cum indignissimus sim, quomodo comparebo ante conspectum tuum?

*Pretus tamen pietate.* Pietas tua Domine, & timere me facit & sperare. Timere facit, quis enim non timebit te quia pius es, et impietatis meæ non est concordia cum pietate tua. Sperare facit, quia pietas tua est asylum impietatis meæ.

*Et misericordia tua infinita.* Indignitas mea me prohibet, retrahit innata ad malum propensio, arcet illa, cujus mihi bene conscius sum, infirmitas & fragilitas mea. Misericordia tamen tua (quæ per hoc ipsum quia infinita & tua est, superat omnem indignitatem & miseriam meam in eam me erigit non solum fiduciam, sed etiam audaciam, ut compaream ante conspectum tuum, ut in conspectu tuo Divino vota mea reddam.

*Et impulsus tibi serviendi desiderio.* Et hic est quæ jam experior effectus pietatis ac misericordiæ tuæ infinitæ, ô Bonitas, quod me, indignissimum hæc, non projicias a facie tua, sed gratia tua, me ad te benignissime attrahas, & immensas desiderio serviendi tibi. Desiderium hoc ô utinam sit fervens, efficax, stabile & nunquam imminutandum, sit desiderium serviendi tibi quàm perfectissimè, ne quælo cesses Domine excitare & impellere me assiduo, suscita in corde meo flammam & incendia amoris tui, qui-



quibus semper ardeam, voluntatem meam, quantum vis rebellem, invicta virtute tua compelle, ut in sanctitate serviam tibi omnibus diebus vitæ meæ.

*Voveo* Hoc est, obligare me volo & obligo obligatione votis religiosis propria & conveniente - Ea obligatione, quâ DEUS optime dignus es & qua tibi arctissimè adstringi possim. Voveo toto me, toto totius substantiæ affectu omnipossibili, majore quàm unquam fervore spiritûs, intentione, quæ maximè sublimis esse potest, ex amore quo te diligo summum bonum meum.

*Coram Sanctissima Virgine Maria.* Sine qua non audeo comparere coram te. Hæc enim est peccatorum scabra, hæc mea maxima fiducia. Hæc mater pallio suo conteget quidquid in me displicet tibi. Per ejus manus vota & munera mea tibi reddita spero fore grata & accepta.

*Et Curia tua celesti universa.* Vos sancti coelestes incolæ, vestrâ in servitio DEI constantiâ sanctisq; vestris exemplis, vos quæso excitate me semper ad constantiam in obsequio Divino, intercessionem vestra impetrare, ut vota quæ voveo fideliter adimpleam.

*Divina Majestati tua* Majestatis tuæ DEUS consideratio continet me, & utinam semper contineat in accurata votorum observatione, ne transgressionem eorum, efficiar læsæ Divinæ tuæ majestatis reus; efficit & illud, ut sim memor rem & negotium me habere tecum, qui terribilis es in Majestate tua, cui debetur omnis honor & obsequium, cui displicet inutilis, infidelis, & stulta promissio, qui requiris, ut quod vovetur, reddatur fideliter.

*Paupertatem.* Non exteriorem tantum sed interiorem etiam, Paupertatem spiritûs, Paupertatem usq; ad omnimodam cibi, potûs, vestitûs, omniumq; necessarium inopiam.

*Castitatem.* Corporis & animæ, omnium sensuum

suum & affectionum, usq; ad resistantiam sanguinolentam, usq; ad luctam morte terminandam.

*Et Obedientiam.* Obedientiam in executione, Obedientiam voluntatis, Obedientiam intellectus & Judicii. Obedientiam sine excusationibus, præensionibus, & murmurationibus. Obedientiam iussa & placita Superiorum exequentem absq; eo, quod voluntatem Superioris traham in sententiam meam. Obedientiam obsequentem non solum altioribus superioribus, sed etiam subordinatis officialibus. Obedientiam cæcam, promptam, & punctualem.

*Perpetuam in Societate JESU.* Hoc est totâ vitâ observandam, cum perpetua & finali, in sancta Societate perseverantia.

*Et promitto eandem Societatem me ingressurum* per acceptationem promptam cujuscunq; gradus, pro me à superioribus meis determinandi. Fiat de me Domine Divina tua, meorumq; superiorum dispositio. Omnis, quicumq; ille gradus fuerit, sublimis est, quia per illum ad cælum ascenditur. Omnis est futurus supra mea merita. Omni me indignum reputo. Nullum ambio, nec ambiam unquam, qui elegi abjectus esse in domo Domini, hoc est in Sancta Societate IESU. Promitto taliter, ut hanc promissionem, vim & obligationem voti habere velim.

*Ut vitam in ea perpetuò degam* Hæc erit mea maxima felicitas, quâ majorem in vita optare non possum. Hanc appeto, hanc ut assequar, omni adnitur studio, ad hanc curandam, obligatione voti me adstringo, ipsamq; fixa & immutabili voluntate desidero & promitto.

*Omnia intelligendo juxta ipsius Societatis constitutiones.* Non juxta detortas, & menti Societatis contrarias interpretationes, non secundum resolutiones laxas, nec secundum Principia & dictamina imperfectorum religiosorum. Procul hæc sint à me. Te IESU amabilissimè, tua consilia, sanctissimas

con-

constitutiones Societatis tuæ, meum esse magistrum volo & expeto. Fac Domine ut non aliter nisi secundum easdem constitutiones, verumq; illarum sensum, obligationem votorum meorum intelligam, & omnia quæ vocationis meæ sunt.

*A* *Tua ergo immensa lenitate & Clementia* In qua me sperare, quod non confundar in æternum, læpius proficeor & profitebor semper.


*Per J. U. Christi sanguinem peto suppliciter.* Hic sanguis Domine est orator meus, ad te melius infinites clamans, quam sanguis Abel.


*Ut hoc holocaustum in odorem suavitatis admittere digneris* Non quamcunq; oblationem DEUS meus tuæ Majestati de me facio, sed tanquam in holocaustum totus cado, meq; totum absq; omni imminutione tibi immolo, totusq; amoris tui incendijs in tuo obsequio absumi & conflagrare desidero. Hoc igitur holocaustum in odorem suavitatis admittere digneris, ut sim bonus odor agri pleni, cui benedixit dominus. Unio holocaustum hoc, cum suavissimè fragrans sacrificio, quod tibi in ara crucis obtulit Incarnatus Filius tuus, ita enim unitum admittere dignaberis in odorem suavitatis.

*Et ut largitus es ad hoc desiderandum & offerendum* In quo ego misericordias tuas recognosco & recognoscam atq; cantabo in æternum.

*Ita etiam ad explendum gratiam uberem largiaris.* Nosti Domine quod sine tua gratia sim mihi dux in præceptis, in lapsum, in interitum, Nosti, perseverantiam, non esse hominis volentis neq; currentis sed tui miserentis. Trado ergo me gratiæ tuæ custodiendum, servandum, & ad te qui ultimus finis meus es perducendum.


AD M. D. G.














Biblioteka Jagiellońska



51dr0022213



